



Frontinus.

Pomiferam arborem, quam in pede lestrarii fuerat complexa  
metatio, postea sic abeunt exarata, intactis fructibus relictam.




Biem. V. VII. 8(a)



IVSTI LIPSI  
MONITA ET EXEMPLA  
POLITICA.

LIBRI DVO,

Qui VIRTUTES ET VITIA Prin-  
cipum spectant.



ANTVERPIÆ,  
EX OFFICINA PLANTINIANA,  
Apud Ioannem Moretum.

CLD. LDC. VI.

*Cum Privilegiis Casareo & duorum Regum.*



IVSTI LIPS


MONITAE EXEMPLA

POLITICA.

LIBRI DVO.

Qui Viri sunt et Virtus Pura.

Epitaphium



ANTVERPIA

EX OFFICINA PLANTINIANA

Apud Ioannem Moretum.

MD. LXXVI.

Christophorus Plantin



SER<sup>MO</sup> ET POTENTISS<sup>MO</sup>  
PRINCIPI  
ALBERTO

ARCHIDVCI AVSTRIÆ,  
DVCI BVRGVNDIÆ,  
PRINCIPI BELGARVM.



ERTIVM hoc inge-  
nij & stili mei monu-  
mentum est, SER<sup>ME</sup>  
PRINCEPS, quod in-  
clyto nomini tuo  
LIBENTES MERITO

imus consecratum. Etsi vllum; quo-  
modo non istud, quod ipso titulo ad  
Te vocat, & augustum hoc nomen  
vult inscribi? Sunt enim MONITA  
POLITICA: ad quem iustiùs, quàm ad  
Politiæ & status nostri rectorem ibunt?

\* 2

Sunt

*Biem. K. VII. 8 (6)*



Sunt EXEMPLA: & cui conuenientiùs  
dabuntur, quàm qui stirpem & gen-  
tem suam in ijs agnoscet? *Rudolfi, Philip-  
pi, Maximiliani, Caroli, Ferdinandi, Alphonsi,*  
passim hîc memorabuntur, è maiori-  
bus tuis: qui scriptionem hanc illu-  
strant & insigniunt, vt cælum stellæ.  
Quid, quòd argumentum & materies  
eòdem ducit? VIRTUTES ET VITIA  
Principum; illas formamus aut sugge-  
rimus, & hæc amolimus: at tu illarum  
grande exemplar es, qui eximias habui-  
sti & habes; & horum (quantum ho-  
mini licet) pænè expers, in omni ætate  
aut nesciuiisti ea, aut spreuisti. Ergo ad  
Te imus: & quo fine? vt splendorem  
huic scriptioni mutuemur, & tutelam.  
Sicut insignia vestra ædibus, Prætorijs,  
villis appendimus, contra vim aut pro-  
teruiam: sic nomina hæc sacra, contra  
calumniam, aut liuorem. Neque enim  
vobis



vobis hîc aliquid quæritur : non aliter,  
quàm cùm Deo sacra facimus , & do-  
num ponimus, nostrâ id fit, non ipsius  
causâ . A nobis officium omne est, &  
debetur ; à vobis beneficium. & hoc  
ipso accipimus, quòd frontes operum  
solâ præscriptione vestrà honestatis.  
Ego eo fine feci: patere SER<sup>ME</sup> PRIN-  
CEPS . & sicut aurum aut ebur magis  
æstimare soletis , à solerti manu & arte  
politum: sic has EXEMPLORVM gem-  
mas, ingenij & eloquij aliquâ luce (cum  
Deo dicam ) perfusas. Ille idem Deus,  
SER<sup>ME</sup> ET POTENTISS<sup>ME</sup> PRINCEPS,  
longæuum Te nobis seruet, & donet  
aliquando sub OPTIMO PRINCIPE opti-  
mum statum, id est, desideratam diu  
tranquillitatem & PACEM. Louanij  
xv. Kal. Feb. anni ∞. ioc. v.



# LECTORI.



ECCE duos istos libros, Lector, trientem operis destinati, & addam, affecti. Nam duo alij sequuntur, qui Ciuilem Prudentiam habent: itemq; duo, qui Militarem. Est scilicet eadem diuisio, & ordo, qui in Politicis nostris fuit: quorū luci aut assertioni hac scribuntur. Sed cur non confeci igitur? aut certè cur non distuli? Utrumq; ab eadem causâ. fatebor enim ingenuè, postremus ille grauior morbus me deiecit, & à stilo arcuit; atque idem impulit vel incohata hac sic edere, quia post me nihil edi, adamantinum est meum decretum. Ego quidem, ut res erat, ostium tunc spectabam: neque nunc ad interiora valde me recepi. Ceterum Exempla quæ hîc sunt, aut in alijs erunt, scito ab optimis, nec obuijs semper auctoribus esse: & cur non eos edidi? quia nouitij aut Grammatici cōmatis illa cura uidetur, & aut à vano aut pusillo animo esse. A vano, si lectionem variam iactas: à pusillo, si diffidis credi. Nobis atas, & priora scripta, fidem vindicant: qui abrogat, inquirat, spondeo inuenturum auctores. Satis est. tu istis frueri, & reliqua expecta (utiliora haud dubiè & rariora, ut res & materia est) expecta, inquam, si Deus, vita, & otium, dabunt. Si non; à te suppone, & dedi exemplum.

INDEX



# INDEX CAPITVM, MONITORVM, QVÆSTIONVM,

## LIBRI PRIMII.

### CAPVT I.

**I**N sermonem & rem ingressio,  
atque obiter vtilitas Exem-  
plorum. pag. 1

### CAP. II.

**DE RELIGIONE.** Eius vtilitas, siue  
necessitas ostensa: vel in totâ So-  
cietate, vel seorsim in Rege, &  
subditis. 3

**MONITVM I.** Deus vbique colen-  
dus, etiâ inter & apud hostes. 4

**MON. II.** Sacra nec in periculis de-  
ferenda, aut negligenda. 6

**MON. III.** Tuitio sacrorû famam  
& potentiam donat. 8

**MON. IV.** Sacrorum antistites aut  
administros honorandos, au-  
diendos esse. 10

### CAP. III.

**DE SUPERSTITIONE.** Assitam Re-  
ligioni esse, & in vanitatem, vili-  
tatem, timorem inclinare. 12

**MON. I.** In tristibus aut aduersis  
sapè se insinuat. ibid.

**MON. II.** In friuolis aut paruis se  
ostendit. 13

**QVÆSTIUNCVLA.** An in populo  
non vtilis Superstitio, & Princi-  
pi permittenda? ibid.

### CAP. IV.

**DE IMPIETATE.** Eius matrem Su-  
perbiam, aut Ferociam, sapè &  
Vitiolum cumulum, esse. 22

### CAP. V.

**DE FATO.** Id considerandum, cre-  
dendumque esse. 23

**MON. I.** Regna & Reges à Deo  
dari. 24

**MON. II.** Regna à Deo & Reges  
tolli. 28

**MON. III.** Et causas quasdam me-  
dias, sed inopinatas, his interue-  
nire. 31

**MON. IV.** Regna à Deo & Reges  
temperari. 34

**MON. V.** Clarissimè Fata in Prædi-  
ctionibus elucere. 35

**QVÆSTIO.** Liceatne igitur & de-  
ceat in euentus inquirere, & va-  
tes aut diuinos consulere? 42

### CAP. VI.

**DE CONSCIENTIA.** Eam curan-  
dam esse, atq; obsequendum. 44

### CAP. VII.

**DE PROBITATE ET CONSTAN-  
TIA.** Vtramque Principi conue-  
niētē, aut necessariam esse. 46

### CAP. VIII.

**DE PRVDENTIA.** Quam Vfus &  
Historia gignunt, & producit  
Doctrina. 58

## LIBRI SECVNDI.

### CAP. I.

**DE PRINCIPATV.** Eum præferen-  
dum alijs imperijs videri. 67

**MON. I.** Antiquissimû hûc esse. 67

**MON. II.** Communissimum hunc  
esse. 68

**MON. III.** Iustitiam magis in eo  
exerceri. ibid.

**MON. IV.** Tranquillitatem & con-  
cordiam coli. 69

**MON. V.** Modum regendi melio-  
rem tutioremque esse. 70

MON.



MON. VI. Maximè hanc imperij formam diurnare.	71	fagaciter inquirenda.	134
CAP. II.		QVAESTIO: An ergo deceat, aut expediat, ipsum Principem ius dicere, reddere?	136
In eo Viros Fæminis præferendos, & has vix feliciter imperare.	72	QVAESTIO: An Curias, & Ordines Iudicum perpetuos esse conueniat?	140
Muliebris imperij infelicitis Exempl. pla.	73	CAP. X.	
Muliebris imperij boni & felicitis Exempla.	78	DE LEGIBVS. Eas nec multas, nec item lites, probari.	142
CAP. III.		CAP. XI.	
DE ELECTIONE. Quæ cõmendare eam, quæ abijcere possint.	82	DE IYSTITIA DIVINA: atque eam rebus interuenire.	146
CAP. IV.		CAP. XII.	
DE SUCCESSIONE. Hanc præfe- rendam, etsi incommoda etiam habet.	91	DE CLEMENTIA. Eam quoque Principi decoram vtilemque ef- fe.	148
MON. I. Certos Liberos præferri.	92	CAP. XIII.	
MON. II. Præferri ætate primos, et- si in exēplis interdum aliter.	93	DE FIDE. Hanc quoque Principi conuenientem, vel necessariam esse.	160
MON. III. Patrum, aut fratris fi- lium, variè præferri.	95	CAP. XIV.	
CAP. V.		DE MODESTIA IN SENSU. Hanc Principi decoram, & vtilem ef- fe.	173
DE FRAUDE ET VI. Has quoq; priorum specie interuenire.	97	CAP. XV.	
CAP. VI.		DE MODESTIA IN CVLTU: Et hanc conuenire, elegantiam aut pompam non conuenire.	183
DE PRINCIPVM INCLINATIONE. Deteriores eos sæpè fieri, & mu- tari.	116	CAP. XVI.	
CAP. VII.		DE MAIESTATE: Et saluâ Mode- stiâ posse assumi.	187
DE FINE PRINCIPATVS: Qui est, publicum bonum.	119	CAP. XVII.	
CAP. VIII.		DE CASTITATE: Quam Princeps extra connubium, & in eo pro parte sumet.	189
DE EXEMPLIS PRINCIPVM. Ea facere ad Virtutes aut Vitia sub- ditorum.	121	DE PATIENTIA. Ab irâ & vindi- ctâ alienum esse debere, præfer- tim in conuiciatores.	202
CAP. IX.		CAP. XVIII.	
DE IYSTITIA: Quam Princeps in se, & suis, seruet.	123	DE MAGNITVDINE ANIMI. Fa- mam & immortalitatem Prin- cipi proposita, & expetenda ef- fe.	208
DE IYSTITIA: Quam Princeps er- ga Subditos seruet.	128		
MON. I. Seuerè administrâda.	129		
MON. II. Sine affectu vel aspectu administranda.	131		
MON. III. Subtiliter interdum vel			



IVSTI LIPSI  
MONITA ET EXEMPLA  
POLITICA.

LIBER PRIMVS.

CAPVT PRIMVM.

*In sermonem & rem ingressio, atque obiter  
utilitas Exemplorum.*



V D I T O R. Accedo. annuis? L I P S I V S. Imò accede, & sede. vacuum reperis, & sermonibus haud alienum. Otium est, & lapsus cum equo (non enim ab equo, ne rideas) ferias mihi fecit, & domum feruare, focum assidere, iussit. O rem ingenio meo alienam! nec aliud magis vitam aut vigorem mihi sustinet, quàm exercitatio & motus. At ferendum est, quod non mutes. A V D. Ferendum. & nobis diuturnum desiderium: quod haud semel promere memini, & ad te velut communi legatione deferre. L I P S. Quid ais? A V D. Illud de EXEMPLIS. quæ viri & iuuenes flagitant (ita loquendum est: nec enim petunt tantum.) subiungi P O L I T I C O R V M tuis libris. Sunt ibi Sententiæ & velut Decreta, vtilia ac salutaria: quis abnuat? sed vt valida atque efficacia sint, nōne vides vsum, id est Exempla decesse? Hæc adde, & pulcherrimè cœptum opus absolue: nec muros tantum & tectum, sed instrumenta atque ornamenta adiunge. Sicut herbas qui seuit, opportunè eas irrigat atque alit, vt adolescant: sic tu Sententiarum istos velut frutices foue & attolle, vel sole vel pluuiâ, vt sic dicam, Exemplorum. Vtrum-

A

uis



uis enim præstant. illustrent, dum in rem velut præsentem ducunt, & facta ostendunt, quæ facienda suadentur; fouent etiam, dum animum erigunt, & re docent non noua, non ardua proponi. Sed & viam præeunt, in quâ vestigia tutò ponamus. sicut qui gubernandi parùm peritus est, vbi plures nauis, cursum temperat, & sequitur priores. Ita vada & scopulos vitat, & sine magnâ suâ arte, portum cum prioribus petit, & tenet. Vidistine etiam, qui ad speculum se comunt, faciem & cultum rectè disponere? prorsus hîc idem: aliena vita & facta speculum sunt, & imago, in quâ te videas & ad eam decorè componas. Quod magis fit, vbi varia & multiplex lectio Exempla varia & multa suppeditat; vt eligere sit, & ad rem talem aut talem appositum aliquid semper applicare. Ita sicut Zeuxis ille pictor olim, Iunonem effigiaturus, virgines Agrigentinorum pulcherrimas conduxit, & è singulis aptauit quod præstantissimum in quaque esset: ita, inquam, Princeps, & politici viri, ab exemplis factisque illustribus potentiam (ea Iuno est) & prudentiam suam forment. Quid ais, mi Doctor? nihil moueo, aut impetro? L I P S. Illud, nondum istud. Moues, fateor: & ex facili, quippe iamantem motum. Rationes quas dicis, iamdiu in mente agito: & rem per se vtilem atque opportunam agnosco: sed vt suscipiam & præstem, nondum herclè impellis. Nam liberè dicamus, cui bono? Sparginus hæc monita; & velut pharmaca ægris, aut lumen cæcutientibus, offerimus: quem vsum tamen fructumque videmus? Et vis plura etiam addam, id est perdam? A V D. Bona verba, vir optime. Quod medicis, hoc tibi faciendum cense: cum veteri imperitiæ morbo acriter pugnandum: & à perseuerantiâ fructum expecta. Sparge, sparge salutaria hæc velut semina: & cur non vel ab agricolæ exemplo? Ille si hoc alteroque anno spes destituit, tamen arat, occat, serit: & Bonus Euentus seriùs, sed vberiùs, sæpè responderet. Audi tuum doctorem. *Quare verbis parcam? gratuita sunt. Non possum scire, an ei profuturus sim, quem admoneo: illud scio, alicui me profuturum, si multos admonuero. Spargenda est manus. non potest fieri, vt non aliquando succedat multa tentanti.* L I P S. Hæc quidem auctoritas valdè me quatiat: sed & tua honesta sic voluntas. Etiam ratio

*N. Zeuxis*



ratio alia. quòd sicut gemmæ, etsi in lutum aut sordes abiectæ, splendorem non amittunt : & dies postea reuelat, & attollit : sic in istis, quæ benè & honestè dicuntur. si diem tamen ferent. Ergo huc imus ? eamus. tanto alacrius, quòd breuius iter laboribus scriptisque nostris restat. Sicut athletæ cùm metam vident & accedunt, etsi fessi, appropierant : sic nos in senectutis hoc limite, alacrius promptiusque laboremus, quia laborum mox expertes. Conscientia vtrique sustentabit, & vires porriget : quòd hæc atque alia, in tuum ô magne Deus honorem, in vestrum Principes ac subditi bonum moliti sumus, atque vtrinam emoliti. Aspira tu idem ille Deus, vt possim ; fauete vos isti, & delectantia simul atque vtilia ( talia erunt ) pronis animis adinite. Ordinem seruabo, quem POLITICIS præstruxi : nec EXEMPLA solùm, sed & MONITA passim inspergam, & alibi QVÆSTIVNCYLAS. hæc omnia vtrique iam finia me dicto. At tu audi.

## CAP. II.

## DE RELIGIONE.

*Eius utilitas, sine necessitas ostensa: vel in totâ Societate, vel seorsim in Rege, & Subditis.*

**V**T autem qui domum moliuntur, à fundamentis : sic nos qui Rempublicam, à fulcro & velut basi eius, Religione ordiri debemus. Sine eâ, non Princeps officium suum, non Subditi facient : sine eâ, societas non erit. quia non Fides, non Iustitia, non Virtus ; sed fraus, licentia, proteruitas, & vno verbo, confusio hominum ac rerum. Quod frænum erit peccaturis ? quis metus satis validus ? nam externum illum, qui à pœnis aut morte est, multi contemnunt : & desperatio, impetus, aut iracundia, eò ducunt. Esto igitur vinculum & firmitamentum reipublicæ, Religio : ac Princeps, vt dixi, ipse habeat. quò Ratio eum & Gratitude vocant. Rex es ? à Deo habes : & quò maior altiorque, plura benefico illi Numini debes : & per cultum igitur venerationemque eius agnosce. Rex es ? vt



diu & feliciter esse possis, datori supplica: & scito tollere posse qui tribuit, & euertere qui sublimauit. Aristoteles, ad suum Regem: Αρχαὶ μὲν οὐκ ἐν λόγῳ καὶ πάτερος ἐστὶ πᾶσιν ἀνθρώποις, ὡς ἐν θεοῦ τὰ πάντα, καὶ δεῖ θεοῦ, ἡμῶν σωθῆναι: *Vetus & à maioribus acceptus hominibus est sermo, quòd OMNIA A DEO, ET PER DEVM, nobis sint constituta. Qui hoc imbibit, Religionem quomodo non habebit?*

*Prima mihi debes animi bona. SANCTVS habère.*

Ex quo sequetur, vt virtutes etiam habeas, & maximè Modestiam ac Clementiam: quæ Religioni proximè adhærent. Ad-  
do, quòd tutior ita eris. amor enim ex isto, & veneratio erga ipsos Principes innascitur: nec facilè exteri aut subditi lædent, cui Numen amicum & propitium arbitantur. Quid, quòd ipsi Subditi ita meliores tranquillioresque? Nulla res magis animos & mores componit, quàm Religio: & illa vbi in pectus demissa, Virtutum agmen sequitur. in primis mansuetudo quædam animi & tranquillitas, bona imperantibus, & quæ faciles obnoxiosque præceptis reddit. Denique externa Felicitas eò vocat. quod ab omni æuo obseruatum, Deum qui se colunt attollere; & pijs religiosisque Principibus prospera plurimùm euenisse; alia alijs. Exemplis hæc firmemus: videamusque in veteri & vanâ Religione etiam eius cultores fuisse, & præmium à Deo externum tulisse. Qui si imaginem & speciem eius honestat at munerat: quid in verâ faciet? Primum igitur *Monitum*:

MONITVM I. *Deus ubique colendus, etiam inter & apud hostes.*

*Exempl. I.* AGESILAVS Spartæ rex fecit. qui, vt Xenophon ait, venerabatur delubra etiam in hostico sita, ab ijsque vim militum & iniuriam abstinebat: *quòd existimaret diuina auxilia, non minùs in hostili, quàm amico solo, imploranda esse.*

II. ALEXANDER MAGNVS quàm illustri exemplo docuit? Tyrum obsederat, Iudææ finitimam, ceperatque. In arduâ eâ & longâ obsidione, auxilia ab Iudæis petierat: repulsus. quia cum Dario vetustius ijs foedus erat. Iræ igitur plenus (& animos victoria



victoria fecerat) mouit in Iudæos, vlcisci certus, & prædæ ac cædi omnia destinabat. Venitque ita affectus. sed *Iaddus*, tunc Pontifex, diuinitus somnio monitus, cum omni populo candidato, cum cœtu sacerdotum byssino, ipse in hyacinthinâ stolâ, tiaram capite & in eâ DEI nomen gerens, obuium se dedit, pacis specie atque habitu. Atque ita ferocem Regem religio obiecta mouit, vt statim mitis submissusque ad Pontificem vltro accederet, & ipsum saluaret, & MIRABILE illud nomen adoraret. Mirati comites, quidam & indignati: è quibus Parmenio Regem adiit, *Quid ita hominem adoraret, qui ipse passim iam pro Deo esset?* Respondit, *non illum se, sed in ipso Deum adorasse: quem eâ specie iamantem, in vrbe Dio Macedonia, per somnium vidisset, hortantem vt promptè in Asiam pergeret, suâ ope & numine eam subiecturus.* Hæc Alexander. & vrbi ac genti veniam: quid veniam? præmia atque honores tribuit, & immunes suisque legibus viuere iussit; & quosdam in militiam suam allêgit.

III.

ANTIOCHI Syriæ regis in eâdem gente factum simile; imò à se, si non ab auctore, illustrius. Obsidebat Hierosolyma, in vnâ vrbe bellum patraturus: & ecce festum magnum Iudæi Scænopegia, siue Tabernaculorum, celebraturi erant. Gens nec in afflictis rebus cultum Dei deseruit: & Legatos ad Antiochum misit, sine alio colore petitem septem dierum inducias, vt operari sacris magni Dei possent. Magnus ille Deus pectus mouit. nec petita modò rex indulxit, sed ipse ad eius cultum versus, boues auratis cornibus, magnam thuris & odorum vim, deduci ad portas iussit, ac sacerdotibus tradita immolari. Quid magis mirer? an victoriæ interpellatæ patientiam? an sacra non solùm permissa, sed instructa? sacra, quæ contra se conatusque suos suscipi sciebat, fortasse & caput suum ijs peti. Sed fructus, vt solet, pietati adfuit. & Iudæi moti inopinatâ benignitate, finem certaminis, initium amicitia fecere, ac se suaque Antiocho permisere.



MON. II. *Sacra nec in periculis deferenda,  
aut negligenda.*

I. Romani in arce Capitolinâ obsidebantur à Gallis, clausis undique vijs, nec aditu nec exitu. Quem tamen Religio inuēnit. quæ nihil deterrita, Q. FABII pectus impulit, sacra sollennia & familiaria in colle Quirinali, statò die, obire. Is cùm adesset, ipse cultu habituque sacro degressus, per medias hostium stationes, itum tutum & reditum habuit: siue attonitis illis inopinatâ audaciâ; siue religione etiam motis, ne pietati intercederent, quam nec præsens periculum, nec mors in oculis, impedissent.

II. Quid PAVSANIAS Spartanorum rex, & Græciæ tunc totius dux? Is in pugnâ nobili ad Plataeas cum Persis, in quâ de Græciæ salute agebatur: ingruente iam hoste & lacescente, suos continuit, donec per sacra & victimas Dij consulti pugnae annuissent. Fiebat longius, & hostes interea cunctationem pro metu interpretati, magis instare, premere: multi è Græcis cadere. nec vel sic tamen telum remitti permisit: sed victimis multiplicatis, supinas denique manus ad cælum, & preces, tulit: *Vt si in fatis non foret Græcos vincere, at saltem ne inultis, sed facinore aliquo memorabili edito, mori indulgerent.* Auditus est, & statim felicia exta: inde procursus, & victoria. Sed quis ille animus? quàm fixus obnixusque in ceremonijs patrijs? qui vel inter necione cædi eligebat, quàm Dij inuitis ferrum stringere.

III.  
An. ∞. cc.  
xxvii.

At verò LVDOVICVS, cui DIVI prænomen virtus & merita pepererunt, Galliæ rex: per ipsa pericula, imò infortunia, religionem assertum & defensum iuit. Vitâ ille Princeps & moribus optimus; iustitiæ tutor vnicus, histrionum osor, impiorum expulsor, ab anno duodecimo rex, in annum quinquagesimum sextum quo obiit, omnia (vt verbo dicam) cælo, & titulo suo digna, edidit. Sed quod meæ nunc rei facit, arma pro religione bis cepit. primò in Ægyptum traijciens, infelicitè rem gessit, copijs, commeatu, machinis amissis. Nec tamen animo. iterumque magno exercitu in Africam iuit, vxore, liberis,



beris, regno relicto: sed nec ibi felix, vnâ re se putauit, quòd vitam si non in acie, in expeditione tamen posuit: id est, religioni donauit. Mortuus enim in ipsâ Africâ: sed in stirpe diu vixit, & viuit. è quâ HENCICVS QVARTVS Galliarum nunc rex imperat: quem proavi illos animos, sed feliciùs sumere, bellis & victorijs clarum, tacitum multorum est votum.

Quid ante Ludouicum GODEFREDVS Lotharingæ & Bul-  
lionij Dux? quàm acres illi in pectore stimuli, qui adegerunt  
rem tentare atque aggredi, vix Europæ viribus patranda? Iu-  
dæa & Terra Sancta à profanis & impijs tenebatur: qui loca il-  
la Christo Deo calcata, aut cruentata, illudebant ac profana-  
bant. Perditum est pijsimo Heroi (sic nominandus est, &  
homine in eo aliquid maius:) militem collegit, opes suas &  
autum patrimonium expendit, fratres ipsos duos impendit.  
Deus autem cœptis quàm palàm adfuit? ad *sexcenta millia pe-*  
*ditum*, *equitum centena millia* armauit: exercitum, quem rarò  
Europa nostra vidisset. Scio esse, qui numerum minuant: sed  
fuisse certum est, etsi non omnes peruenisse. *Venit* igitur in  
Syriam, & (vt Iulianis olim verbis dicam) *vidit*, *vicit*. Rex  
Terræ Sanctæ factus, victorijs & vitâ illustris obiit: quem mi-  
rari aliquando subiit, non & ipsum relatum in Diuorum nu-  
merum, tam claris testatisque meritis.

IIII.  
∞.XCVI.

CAROLVS QVINTVS Imperator, multâ vitæ sanctimo-  
niâ, præsertim iam senior, fuit. Preces ipse componere, no-  
ctu surgere & ad Deum fundere: sed ardorem præsertim &  
studium in tuendâ religione profiteri. Voluisset & propagan-  
dâ: ac querentis eius vox sæpè audita, Quòd per bella inter-  
na, & cum Christianis Principibus, laurea eriperetur, quam  
de veris profanisque hostibus posset referre. Sed quod ad tuen-  
dam, notum quid in Germanico bello fecerit: quàm pericu-  
losè suscepit, animosè gesserit, feliciter consummarit. In  
eo, dum Saxonem persequitur, ad Albim fluuium: sub ip-  
sum prælij tempus obseruauit imaginem Christi, in cruce ad-  
fixi, plumbeâ glande ab impio milite recenter traiectam. Ste-  
tit, & ingemuit: atque altâ voce ad Deum clamauit, *Domine,*  
*si vis iniuriam hanc ulcisci, potes: ecce autem me vindicem tuum pa-*  
*ratum*

V.



*ratum. iuua.* Certè audiuit, & iuuit. fuga & dissipatio hostium ad eius adspectum facta, Dux ipse saucius in manus venit; & bellum vno prælio confectum.

MON. III. *Tuitio sacrorum famam & potentiam donat.*

I. Cuius clarissimum exemplum est PHILIPPVS MACEDO: qui tenuis adhuc viribus, neque inclytus nomine, gradum ad illa vtraque fecit à sacrorum tutelâ. Phocenses in Graciâ, cum Delfico templo præessent, bello impliciti, thesauros eius Dei veteres & famâ celebres tangere ausi, & mutui titulo, quid nisi spoliare? Ea res in odio & execratione omnium cum esset, solus ipse non iram, sed vindictam etiam & arma sumpsit. Contrà sumunt Phocenses, Onomarcho quodam duce: & iuncti exercitus, & prælio instruuntur. Ibi Philippus, pulcherrimo astu, suos omnes lauru coronari iussit (sacræ Apollini cæ frondes.) atque ita velut Deo duce, & Deo dicatum exercitum, manus conferere. Factum & alacriter, & feliciter. cum Phocenses ipsis insignibus violati numinis conspectis, in fugam consternati, armis abiectis abeunt, & temeratae religionis poenas multo sanguine suo pendunt. In gratiâ & gloriâ ab hac re Philippus. auxit opes & regnum, quod obscurum & modicum, validissimum Europæ effecit: & filio materiem ad illud Asiæ quærendum reliquit.

II. CONSTANTINVM MAGNVM licet addere: eò iustius, quod veræ pietatis præbuit se assertorem. Quàm ea ad id æui iacebat? oppressa sedibus, ignibus, aquis: & caput aut vocem attollere in eius professionem non erat. Ille ante Principatum affectum aliquem, & iam Princeps amorem ostendit: templa Dijs clausit, Christo aperuit, & omni vi atque arte hoc nomen & numen iuit propagatum. An non se vnâ? imperium turbidis illis temporibus, & seditioni factis, firmiter ad senectutem tenuit, & suis adeò reliquit. Prospera multa bello gessit, veterem Romam tenuit, & nouam struxit. Hæc omnia cui accepto, nisi Religion iatque eius tutelæ, referat?

III. CAROLVS deinde MAGNVS iterum noui auctor imperij, qui



qui id à Romanis vel potius Barbaris ( nam ij dominabantur in Italiâ ) ad Francos Germanosque transtulit : is, inquam, palàm hunc titulum debet inscripsitque tuitioni sacrorum . Ter in Italiam copias duxit, & victrices reduxit : vt laborantem à seditiosis aut ab hostibus Pontificem maximum, in libertatem assereret, atque etiam dignitatem . Eumdem potentiâ & finibus auxit, Rauennate Exarchatu, atque alijs in Italiâ, perpetuo dominij iure concessis . Aliône etiam suo fructu? alio. nam iam Imperator victorias inclytas peperit : & ô laudabiles! contra hostes fidei bellis ferè susceptis . Mauros in Hispaniâ fregit & comminuit; Saxones, Danos, Auares in triumphum, nec suum, sed Christi duxit. Plerisque enim errores detraxit, & lumen veritatis nostræ infudit. Magnum Principem! & vnde, dixi.

At Hispaniæ mentio ALFONSV, siue ADELFONSV vt III.  
prisci ferè scribunt, eius regem mihi suggerit, ab istâ hac radi- DCC. XXXI.  
ce florentem . Hispania scissa tunc variè, & Mauricis armis regnisque infessa erat : multa recepit, iunxit : & semper in istis prima ei cura, templa instaurare; vasis vestibisque, ad sacrorum cultum, exornare . Adeoque hæc agenti fauor numinis adfuit, vt sæpè, cum animosâ audaciâ an temeritate dicam, castra hostium explorabundus, atque id solus adierit: solus redierit ac sese explicarit, idque cùm agnitus interdum ab ijs fuisset. Miraculum hîc quis non agnoscat? Isto feruore ( sic appellare debeo ) CATHOLICI regis agnomen meruit: quod idem antea *Recaredo* datum in Concilio Toletano, cùm Gothorum gentem, abiectis Arii delirijs, in Ecclesiæ castra reduxisset. Ac tertium, idem in *Ferdinando* rege, patrum memoriâ, à Iulio II. Pontifice renouatum . qui Mauros totâ Hispaniâ eiecit: & ab eo posteris successoribusque, ad hunc diem, gloriosum id & sollenne mansit.

Tene ego hîc RVDOLFE AVSTRIACE præteream? te, qui IIII.  
fluctuans per dissidia Imperium stabilijsti, & gentem fatalem CC. CC.  
sceptris regnisque propagasti. Quo merito? inquirere in Deum LXXII.  
& diuina consulta nefas, nec facio: sed non est inquisitio, quæ in aperto sunt memorare. Tu in modicâ adhuc fortunâ, nec  
B nisi



nisi Comes Habespurgensis, Pietatis multiplex studium prætulisti: & illi sequentem magnitudinem tuam vaticinia & diuinæ voces adscripserunt. Vnum videamus. Venatum fortè, vt nobilitas illa & nostra solet, cum paucis in equo exiuerat. Pluvius dies erat, & viæ fractæ & sordentes: ecce occurrit sacerdos, venerabilem & mysticam hostiam, extremum solatium, ægro laturus: & occurrit pedes. Is ad spectus pium pectus perculit. nec sine indignatiunculâ aliquâ equo defilit: &, *Me vehi, te qui servatorem meum portas, pedibus incedere? indecorum, vel impium sit: conscende, & equum hunc cape.* Iussio, non preces erant: paret ille, & iste capite reuelato humilis sequitur, ad ipsas ædes ægri deducit, ab ijs eodem habitu reducit. Iam domi & apud se Sacerdos erat. qui officio attonitus, & mente à Deo motâ, bene abeunti dixit, & simul Imperium ipsi posterisque prædixit. Alij tamen ad Suevicam vatem hoc referunt: quidam & somnio sequentis noctis edoctum ipsum volunt. Vndeunde prædictio; & res illa certa, & rata ista fuit, ac fidem etiam nunc ab euentis habet. Sed hæc narratio Monitum aliud mihi suggerit,

**MON. II. Sacrorum antistites aut administratos honorandos, audiendos esse.**

I. ALEXANDER SEVERVS Imperator tanti eos fecit, vt iudicatas à se causas, à Pontificibus atque Auguribus retractari, atque aliter quàm ipse censuisset terminari, æquo animo pateretur. Bona submissio. non minuit, sed auxit Principale culmen, infra Religionem id posuisse.

II. CONSTANTINVS MAGNVS, cùm initio, vt fit, libertatis, feruor & fluctus, & contentio aliqua, inter Ecclesiæ proceres esset: indicto Concilio Nicæno, ipse interfuit, & auctoritatem accommodavit. Ecce autem libelli plures, qui mutuas criminationes continerent, ad eum delati fuerunt: quos omnes quasi lecturus cogniturusque accepit. sed in vnum fascem collectos, in ignem statim, nec inspectos quidem, coram omnibus iecit. Duo videlicet eo facto significans, & indignum illis esse, certare æmulatione aut odijs: nec se dignum, qui de



de ijs iudicaret, quos Deus iudicare vicem suam in terris iussisset.

Iam ROBERTVS Galliaë rex quàm eisdem honorauit, & misceri ijs honorem suum putauit? Scholas & templa adibat, locum inter eos sumebat: nec orabat solum cum ijs, sed in publico psallebat. Quin & cantica eius sacra, quæ composuit ediditque, Ecclesia etiam nunc vsurpat. Vir demissæ & raræ sanctimoniae. cui Deus etiam miraculo attestatus est: cum, Auallonem urbem eo obsidente, muri sponte corruerunt. ipso interea laudes hymnosque cum sacerdotibus in tabernaculo concinente.

III.  
DCCCC.  
XCVII.

Sed hoc mirari quàm imitari plures volunt. sicut & illud, quod de OSMANE, VRCHANE, MVRATE, à quibus Turcicum hoc grande imperium fundatum coeptumque est, Annales eius gentis hisipsis verbis (digna enim ea prodi) tradunt. *Quoties conuiuias vocabant, vescebantur adhibitis Talismanis* (ita Sacerdotes dicunt:) *quorum præceptis & admonitionibus inter conuiuandum aures præbebant, & Alcoranum legi iuebant.* De Principibus, an de Monachis hæc narrantur?

IIII.  
∞. C. C.  
LXXIX.

At submissionis exemplum etiam vnum, quod horridæ & vt quorundam deliciae sunt, sordidæ Pietatis videbitur, in HENRICO II. Anglorum rege. Ille suspectus in cæde beati Thomæ Cantuariensis Antistitis, non facto aut manibus eius, sed iussu consensuue patratâ: & sæpè admonitus, ac renitens semper aut abnuens, ad extremum ipsâ conscientia salutariter adducente, ad ipsum locum sepulchrumque beati viri, Cantuariam venit. atque ibi statim in terram, simul & lacrimas, effusus veniam pacemque petijt. Sancto deinde à pænitentia impetu, ad cœtum monachorum pergit, & multis precibus impetrauit, vt à singulis eorum ordine virgis vapularet. Quid dicam? stupeo. rex fecit, sponte fecit; sui oblitus, dum Deum cogitat; iudicij hominum, dum cæli præmia. O si hîc vilem, ibi beatum! imò & hîc, dum Deus ipso illo tempore eum attollit & magnificat, rege Scotorum à ducibus suis victo, capto, & per triumphum adducto. Plura

V.  
∞. C.  
LXXIIII.



in Religione liceat: sed seorsim iam feci in libello, quem *De Una religione vulgari*.

## CAP. III.

## DE SUPERSTITIONE.

*A sitam Religioni esse, & in Vanitatem, Vilitatem, timorem inclinare.*

**R**eligio igitur laudabilis: sed sita velut inter duos scopulos, Superstitionem & Impietatem. quem vtrumque suademus, & opus est, vitare. Subit miserari humanam conditionem, siue, vt Plutarchi verbis efferam, *ἀνθρώπων ἀδυναμία, ὅπου ἐκ ἔχουσιν. ἀλλ' ἐκπεσμένῳ, ὅπου μὲν εἰς δεισιδαιμονίαν καὶ τυφόν, ὅπου δ' εἰς ὀλιγωρίαν τῶν θεῶν καὶ διεφρόνησιν: humanam imbecillitatem, quæ finem aut modum non habet. sed aliàs abripitur in Superstitionem & Vanitatem, aliàs in Neglectum rerum diuinarum aut Contemptum.* O vtraque magna pestis! sed illa crebrior, hæc deterior: atque illa Pietatis ipsâ imagine se commendat. Sed imagine. neque aliud est, quàm *humanarum mentium ludibrium, Superstitio.* Quæ rudes, barbaros, & malè factos animos maximè tangit: καὶ ἐνάλωτον (ait idem Plutarchus) εἰς δεισιδαιμονίαν φύσει τὸ βαρβαρικόν: *Pronum naturâ ad Superstitionem genus barbaricum.* Ea autem non aliud est, quàm cultus Dei, quem, aut cui, non debet; aut aliter, ac debet. Errat in eligendo: vel modum excedit in colendo, & feruiliter, muliebriter, pueriliter se gerit. Proprius autem ei timor, & inquietudo: quæ animos deprimunt, & ad nullam rem feriam aut altam patiuntur aptari. Itaque Principi fugienda maximè: et si

**MON. I.** *In tristibus aut aduersis sæpè se insinuat:*

**I.** Quod in ALEXANDRO MAGNO notatum. qui omni quidem vitâ religiosus, in extremâ eâ ad hanc declinauit. Nam ita animi & corporis æger iam se gessit, ait Plutarchus, *ut nihil esset tam paruum aut absurdum, si modò insolitum, quod in prodigium*



*digium aut omen non verteret. Itaque sacrificantium, lustrantium, divinantium regia erat plena: & plenus ipse malis curisque, mortem dum fugit, accersit.*

Annon in LVDOVICO XI. rege Galliae simile? qui ætate & valetudine iam inclinante, medicis blanditur, & auri montes promittit aut donat: deinde & sanctos viros euocat, & è silvis educit, quibus vitam suam non emendandam, sed propagandam commendat. Tanto interea metu, ut in arce munita, & fenestris ipsis atque omni aditu clathris ferreis obstructo, sese includeret: id est, quid nisi in spontaneum carcerem daret? O miser, hoc assidue times, quod semel faciendum est? hoc times, quod in tuâ manu est, ne timeas? Pietatem assume, Superstitionem omitte: mors tua vita erit, & quidem beata, atque æterna.

II.

### MON. II. *In frivolis aut parvis se ostendit.*

Cuius rei cottidiana, pænè dicam, exempla sunt. Illustre in magno AVGVSTO. qui *Auspicia & omina*, ait Suetonius, *pro certissimis observabat: sed nec Somnia sua, aut aliena de se, negligebat. ne peregrinarum quidem religionum contemptor, cum Cereris Atticæ mysterijs initiari voluerit. Quid ei quietum, in talibus occupato?*

### QVÆSTIVNCVLA.

#### *An in populo non utilis Superstitio, & Principi permittenda?*

A Principe igitur ipso remouemus: imò ausim dicere, nimiam Pietatem. Munus enim eius intueor. quod à Diuinis ad Humana etiam vocat: in quo ipso est Dei quidam cultus & honos. Nicephorus Gregoras scitè hoc mihi dixisse videtur: *Τὰ μὲν πρὸς θεῷ τὸν νῦν τῇ καὶ θεῷ θεωρία, ὅρεσι καὶ ἀσκηταῖς ἐν- Lib. III.*  
*δεδιόχθην προσήκει. ὅς τις δὲ καὶ τῆς ἀρετῆς καὶ πολιτικῶν ἡσυχασὼν ἡδὸς, καὶ*  
*πείραν ἔχει θεωρημάτων πωτῶν, ἔτος λαὸν ὁδηγεῖν ἐς τὰ βέλτεστα καὶ σωτή-*  
*ρια κράτιστος: Qui in unâ Dei contemplatione mentem defixam ha-*  
*bet, ei montes & speluncas habitare conuenit. At qui, unâ cum*  
*virtute, etiam mores ciuiles exercuit & iunxit, quique notitiam pa-*  
*rauit*



Lib. I.

Curtius  
lib. XIII.

rauit rerum variarum; ille verò populum regere, & ducere ad optima optimus est. Sed hoc cum ita sit: quid igitur? inquiunt: an non populum saltem in Superstitione habere, Principi utile, & optandum est? Sunt qui asserant, & præsertim è priscis. Nam mitigari ita animos, & faciliores reddi ad parendum. Liuius Numam, qui Romam superstitionibus repleuit, spectasse hoc vult: & omnium primum, rem ad multitudinem imperitam, & illis temporibus rudem, efficacissimam, Deorum metum iniecisse. Et verò facit ad ingenium multitudinis. quæ alioquin impotens, sæua, mutabilis, ubi vanâ religione capta est, melius vatibus suis (sive & sacerdotibus) quàm ducibus regibusque paret. Quin & Polybius Romanos laudat, & prudenter fecisse autumat, quòd partem eam, quæ Religionem & Deos spectat, in republicâ suâ sic conformarint & penè tragicè extulerint, ut nihil sit addere. Quod mihi quidem videntur, inquit, PLEBIS CAUSSA fecisse. nam si è Sapientibus viris Rempublicam fas constituere: nihil opus sit tali istâ inductione uti: at cum multitudo vana sit, & varia præter leges appetat, iracunda ac violenta, utile fuit interno hoc terrore, & Superstitionis velut tragædiâ cohiberi. Hæc isti: at nobis non persuadeant, in bonâ republicâ vitiorum caput & fontem approbare. Mites animi fiunt, inquiunt. Imò viles, & istę persuasiuncula, ut cum poëtâ dicam,

— faciunt animos humiles formidine diuū,

Depressosque premunt ad terram.

Nemo magnanimus, & alta meditans Princeps, tales subditos suos velit. Obedientiores etiam sunt? Abnuo, imò ad motus aut rebellionem proniores. Quoties olim, & nuper visum, prauæ aut nouæ Religionis titulo, populum concitatum? Vnus aliquis concionator, sanctimoniæ famâ, ut telo, armatus, & eloquentiâ aliquâ ornatus, quid non patrat? Omitto vetera, aut extera: ante annos circiter centum HIERONYMVS SAVANAROLA Florentinus, religiosi habitu (in Diui Dominici cœtu erat) tum vitæ verâ an fictâ sanctimoniâ, adhuc facundiâ, populum in se conuerterat. Pulsi Medicæi vrbe erant, & popularis status introductus: quem ille, ut ambitioni suæ opportunum, omni ope tuebatur. Plebs ab eo pendula, & verba consultaque eius, oracula habere: ipsi optimates virum colere,



colere, & per eum se suosque ad remp. (nam hæc in eius manu) promouere. Regnabat enim non in concionibus tantum & sacris ædibus, sed in curiâ, sed in comitijs: & rarò publicè, imò priuatim maius aliquid, sine eius arbitrio gestum. Dicam? non animis modò, sed & arcis, sed & armis ciuium, imperabat. Hoc regnum totos annos quattuor exercuit. sed cum inuidiâ interfectorum aliquot ciuium laboraret; alia etiam obijcerentur, quorum purgandorum, & diuinitatis famæ augendæ, cum pyram ardentem ingressurum se vltro spondidisset; mox retractans, vanitatis manifestus, & ex eo contemptior, apparuit. Denique in Pontificem summum linguæ suæ tela vibrans, primò bonorum, mox & mediorum fauore destitutus, pœnas ad vltimum ambitiosæ pietatis publico igne luit. Scio variare super eo iudicia, & benignius quosdam loqui: esto. sed exemplum tamen potentiæ in populo, per titulum Religionis, insigne & Principibus metuendum præbuit. Talia aliqua in libello *De Vnâ religione* dicta. Iam ratio firmissima & intima, Christiano Principi nefas Superstitionem fouere. Et illi exterrorum qui fecerunt, quàm turpiter & fœdè instituerunt? Exemplum libet dare, & ridere: ac primùm

**ÆGYPTIORVM.** quos omnes gentes credo equidem I.  
vanâ & stultâ Superstitione anteiuisse. Neque enim ad homines, aut ad mortuos modò Deorum cultum, *Jsim*, *Serapim*, *Anubim*, sed ad bestias, easque vilissimas transtulerunt, *Canes*, *Jchneumones*, *Feles*, *Accipitres*, *Jbides*, *Lupos*, *Crocodilos*, tales plures. O amentiam! his cibos dare per obsequium pietatis soliti; his agros & vectigalia è publico assignare; horum in signis imagines præferre; his denique defunctis cum planctu funus, & sumptu monumenta facere. Ex his si quis sciens aliquod interfecisset, interficiebatur; si quis vel insciens *Felem* aut *Ibidem*, idem. Nugari videar. sed vera suo malo sensit Romanus ciuis, æuo Diodori Siculi, id est Tullij Ciceronis. nam ipse id scribit, & testem ac spectatorem rei se ad scribit. Ptolomæus, inquit, quem Romani in regnum postea restituerunt, cum primò Socius & amicus à Senatu P. Q. Romano dictus esset, magna lætitia publica, & concursus fuit. Erant & Romani in turbâ: atque



atque inter eos miles casu (non enim sponte) selem occidit. Clamor, ira, tumultus. non in scitia miseri, non Romani nominis reuerentia, non imperium Regis, qui purpuratorum præcipuos miserat ad sedandum & deprecandum: nihil, inquam, horum iuuat, quin ille statim millenis manibus discerperetur, sic ut nec funeri aut rogo aliquid superesset. Vides quàm mitis Superstitio? rabies & furor est, cùm pectora inuasit.

II. Sed & aliter etiam sæuitia, an vesania est, in exemplo, quod eidem scriptori debemus. ÆGYPTVM aliquando fames inuasit, sic ut alimenta deessent. Quid factum? versi sunt ad humanas carnes, & pepercerunt dictis bestiis: pepercerunt? imò & aluerunt, neq; ambiguum quin & humanâ carne. Cæcitatem! ergo homo Deo proximus, infra fœda animalia ponitur: & ille horum gratiâ interit, id est quid nisi ijs immolatur?

III. Tolerabilius AFRI, qui non bestiis, sed Saturno tamen homines viuos sacrificabant, & præsertim pueros, ætatem florentem, innoxiam; & ideo crudo illi Deo gratiorem. Res ita fuit. Stabat Carthagine statua Sarurni ænea, manibus leuiter sublati, iterumque pandis in terram demissis. In eas solenniter vir aut puer impositus, statim præceps deuolvebatur in subiectum barathrum, igne & eius alimentis plenum. Id viuicomburium Deo dabatur, stato quidem die quotannis: sed aliquando & extra ordinem, & multiplicatis victimis, si clades aut tristius aliquid ciuitati euenisset. Ut in eâ, quam ab Agathocle acceperant, placuit decreto ducentos (horresco referens) optimatum filios Saturno sic immolari, & quis credat? totidem alij sponte se obtulerunt. ipsa clades an florem hunc ciuium abstulerat, quem Superstitio impendit? Indignor, an miseror? & lacrimas conditioni humanæ impendo, cui *uni Superstitionem datam* Plinius conqueritur: an non iure, cùm in hos vsus?

IIII.  
c. xx.

Sed ad ridenda magis, quàm deffenda eamus: & stultitiam, quàm sæuitiam accusemus. MAHVMETES ille, heu nimis nostris cladibus notus, cùm cupidine agitaretur nouarum opum & imperij, nouam Religionem, id est Superstitionem commentus



mentus est: ita me Deus, indecoram, futilem, nec colore vlllo veri tinctam: etsi ex Iudæorum Christianorumque libris, velut per Satyram, miscuit & confecit. Onugas, ô deliria! & lubet quædam recensere. Primum est, Deum vnum solidumque (ὁλόκληρον Græci exprimunt) eundemque incorporeum esse: Christum non Deum, sed magnum vatem & prophetam; se tamen maiorem, & proximè à Deo missum. Præmia qui ipsum audient, Paradisum, qui post aliquot annorum millia referabitur: ibi quattuor flumina, lacte, vino, melle, aquâ fluere: ibi palatia & ædificia gemmata atque aurata esse: carnes autem suauissimarum, fructus omne genus, quos sparsi iacentesque sub vmbra arborum edent: sed caput felicitatis, viros fæminasque maiores solito, magnis genitalibus, assiduâ libidine & eius usu, sine tædio aut fatione. Credet hæc aliquis dicta, & accepta? amplius. Ille verò Veneris his illecebris totam legem suam impleuit: & viro permittit vxores iustas quattuor habere, pellices tot quot lubet. Etiam, scribit hisipsis verbis: *Mulieres habitaculum viri esse, idè assiduè debere eas colere, sed & ingredi quâ vellent.* O turpitudinem! non prouocat solum ad crebram, sed ad promiscuam libidinem: & supera, infera, aduersa, auersa, eodem iure habet. Atque adeò ipse bellè & in exemplum gloriatur, *Vndecim se mulieres habuisse in contubernio, & omnes vnâ horâ singillatim iniuisse, & patrasse.* Hæc & plura in eius *Corano*: sed & Physica quoque miranda. Nam facit Solem & Lunam in equis vehi: illum autem in aquam calidam vespere mergi, & bene lotum ascendere atque oriri. Stellas in aëre è catenis aureis pendere: terram in bouini cornu cuspide stabilitam, & agitante se boue accutiente fieri terræmotum. Hominem autem ex hitudine aut sanguisugâ nasci. & quid addam? pudet, piget, miseret generis humani, cuius magna aut maxima pars his non vanitatibus, sed stuporibus est oppressa. Nam Asia ferè tota, plurimum Africæ, multum Europæ, iura sceptri & sacri Turcici accepit. Quin & multi extra Turcarum iura, vt magnus Tatarorum Chamus, vt Persa, vt alij in Indiâ & extremo Oriente, deliria hæc delirant.



V. Quid etiam omitto? ijdem T V R C A E, ad Ægyptiorum morem, feles, canes, pisces, aues, si non adorant, colunt tamen & pascunt: & his se velut largitionibus demereri diuinum Numen censent. Itaque videre Byzantijs statis horis est, cibos apponi dictis animalibus: nec viles quosdam, aut mensarum analecta, sed orizam coctam, carnes assas recens, & hoc sine ex opopolio empras. quas & perticis longis imponere solent, & sic fugacibus aut vitabundis eorum dare. Quid, quod aues etiam captas redimunt, & aëri ac libertati deinde, per pietatem, restituunt? Iam in re inanimâ, id est Chartâ, quas nugas edunt? Nefas eam abijci, aut calcari: sicubi vel fragmen vident, tollunt religiosè, & parieti adfigunt, aut imponunt. Refert Augerius Busbequius, in legatione suâ ad Soleimannum, cum ductores tutoresque viâ Genitzaros haberet, grauitè aliquando apud se questos, quod famulitio eius charta ad obscœnos vsus esset. Causa autem quàm iusta? quia *Coranus* ille in eâ scriptus.

VI. Sed lubet leui oculo alia terrarum etiam, & in ijs Superstitionem, lustrare: quæ discolor, sed vbique decolor, & candori ac veritati aliena comparet. Sunt in Orientis magno tractu, qui MALABARES appellantur, & à Calecutio, mare versus, & introrsum etiam colunt. Ijs varij Dij, & simulacra eorum fœdo habitu, colore etiam ferè in nigrum. Tempia *Pagodes* vocant: sacerdotes, *Brahmanes*. Ijs tanta reuerentia, vt & belli tempore medijs armis interueniant, solâ religione & nomine suo tuti. Insigne eorum, tria fila, quæ ab humero dextro in sinistrum latus ligant. Nomen vetus est Indorum sapientum: & quædam ex ijs habent. Sunt enim Astrologiæ periti, sed & Magiæ, ac prædictionibus plebi variè spem aut metum præbent. Finis earum, quæsticulus; vt in hoc genere solet. quem & ex sacrificijs aucupantur, cum Dijs suis cibos, sed & nummos, offerri iubent: atque ipsi ijs vescuntur, aut vtuntur. Sacra eorum & conuentus ferè cruenti. tela enim inter se spargunt, & qui ijs occumbunt, migrare ad beatorum sedes rectâ censentur. Animas immortales prædicant, sed Pythagoræ somnio, in corpora alia transire.

Sunt



Sunt & SINITAE, siue SINENSES, vltiore tractu: VII.  
 ij quoque in Deorum cultu, quos domesticatim plures habent. quosdam & tricipiti figurâ: an auditiunculâ aliquâ & adumbratione nostræ Trinitatis, quando & D. Thomam, & Christiana olim sacra, in ijs locis fuisse, constans traditio est? Sed deunculos istos adeò magni haud faciunt, vt si aliquid præter spem aut vota euênit, ab ipsis pœnas exigant, atque ad eò flagris cæsos in publicum sæpè abijciant & exponant. Mox tamen pœnitentiâ recipiunt, iterumque (ô bellum ludum!) adorant, placant, supplicant, verbis, thure, mero. Solem tamen inter omnes præcipuo cultu & æstimatione habent: atque huic extra ædes progressi, sub dio, de paterâ \* vinum, Græ-  
 co & Romano more, libant. Sacerdotes, pro deorum numero, <sup>\* Vinum eius loci, & palinæ.</sup> ipsi quoque frequentes. Sunt *Bonzij*, sunt & *Bonzie* fæminæ; & super vtrosque *Tundi*: denique vnus supremus omnium, *Zassô*. Hi *Bonzij* conuentus suos & contubernia habent: vt Religiosi apud nos cœnobita: in regno quidem Iaponiæ ita crebra, vt vna aliqua prouincia supra DCCC. recenscat: in quorum singulis haud minus sit triginta *Bonziorum*. Nomino Iaponiam. nam & ij ritus eosdem cum Sinitis & sacra habent, hauseruntque vtrique à communi doctore *Xacâ*. Eorum dogma, Animas interire, eademque omnia à morte, quæ ante natalem: exitiabile Virtuti.

Iam in nouo orbe & illâ AMERICA quid dicam? spissæ VIII.  
 & Cimmeriæ tenebræ: nisi quòd Hispani leuiter (sed adhuc leuiter) dispulerunt, & lucem nostram intulerunt. In PERUVII regni finibus receptum, Solem colere: quod Ingæ reges pro firmamento aut insigni dominationis instituerunt, cum essent dij antea diuersi. Illorum solenne, templa vbique Soli erigere, ampla, magnifica, auro laqueata, aut & strata. In ijs castæ aliquot Virgines, quarum pudicitia deuota: nec fas pollueri, nisi vt luerent morte. Excusatur, si qua iurauit à sole compressam se, & ex eo vterû ferre. Pænè is ritus fuit, qui Vestalium Romæ: sed numerus prægrandior, & in vno aliquo templo ducentæ, aut plures. Alij etiam ministri & æditui, alibi ad milia triginta: idque tantum in templi vnus cultum & vsum.



Sed earum inuirus, lanam & filum carpere, vestes texere, dijs ornandis: siue & ad factorum ritum, quo solent vestes & hæc texta vnâ cum ossibus pecudum cremare, & mixtum cinerem, in altum spectantes, Soli iactare. Has virgines *Mamaconas* vocabant: ipsa templa, aut & idola, *Guacas*. Sunt & alij sacerdotes, vestitu niueo insignes: qui Deos adeunt, salutant, fermocinantur. sed id cum hac cautione, vt terram despectent, & oculos versus eos non attollant. Imò quidam aut obligant sibi lumina, aut eruunt semel & euellunt: quod sanctius reuerentiusque habetur. Sacrificia sunt pecudes eius loci, sed homines crebro etiam, & infantes. Horum sanguine simulacra oblinunt: deinde exta inspiciunt, & è notis augurantur.

IX. In VICINIS ei regno LOCIS deorum alia portenta. Quidam tigres, leones, fera eiusmodi animalia colunt: alij felles, aut aues. Quidam (in prouinciâ, quæ *Manta* dicitur) Smaragdum insignem gemmam adorant, & pro vero numine habent. Mos omnibus, herbas certas pro thure adolere & incendere; itemque captiuos sacrificare, aut si desunt, è suis. Oracula petunt, & capiunt: tam certâ plerumque fide, vt Hispani tradant, nihil vel in eorum bellis, aut in suis ciuilibus euenisse, quod non prædictionibus fuerit vulgatum. Immortalitatem animi credunt, sed, vt videtur, cum ipso corpore, & quasi migrent: certè sepulchra laxiora, & magis apparata faciunt, quam vllas viuentium domos. Sed & cum moriuntur, comites accipiunt, quasi ad ministerium aut solatium: atque in primis carissimas vxorum. Eæ certant inter se & æmulantur, quæ cum mortuo viua (ita fit) defodiatur. Quod si insignior aliquis satrapa aut regulus obiit, turba est eorum earumque, quæ comoriuntur. Argumentum, quod ad res lætas & geniales ire se putent, hoc est, quod potum & cibum affatim apponant; sed & quotannis, velut parentalibus, per foramen supernè, de industriâ sic factum, infundant. Choreas illic, & in alijs festis diebus honori Deorum ducunt, bini & bini iuncti in seriem, duobus præfultoribus, qui dant modos. Tenent autem sic saltantes manu vas potorium (assiduè enim bibunt) & alterâ interim penem, vt infusa emittant.



Ultimi sunt MEXICANI, quos diuidit angustior ille Isthmus. Vastum regnum, & olim innumerus populus, & diu pro modo. Nam omnium fermè rerum affectuumque eos habebant, ut Aquæ, Piscium, Frumenti, Fructuum, Amorum, Bellorum, & quidquid dici fingique tale potest. Aiunt ad duo millia Deorum culta sollenniter in vrbe *Themistitan*, quæ regni metropolis, fuisse. Tempia ijs magnifica, laxa, quadratâ ferè formâ. Sacrificia cruenta, ex animato, & ex homine: atque adeò hominum ad quinquaginta, aut supra, millia vno anno immolabant. Dignum relatu est quod Ferdinando Cortesio (immortalis gloriæ, ob quæsitum subactumque hunc tractum) Cortesio, inquam, euēnit. Populi quidam ibi, nouitate facinorum eius attoniti, legatos mittunt, qui sic affantur. *Tria genera munerum ad te ferimus. Primò quinque homines. & si Deus quidem crudus es, & sanguine placandus; cape istos, & vescere. plures etiam dabimus. Sin bonus mitisque es Deus, en tibi herbas & plumas, ad supplicandum. Si porro homo es; cape has aues & fructus, quos damus in tuum & tuorum vsum. O Deus, qui cœpisti has tenebras minuere, totas pelle, & ipsum te verum nouumque Deum cum nouo imperio ostende.*

x.

Plerasque Superstitiones, quæ in partibus orbis sunt, dixi: vnâ quæ in toto est, omisi, IVDÆORVM. Ij enim sparsi per Europam, Africam, Asiam, quaquà versus colunt: pertinax natio, & qui vmbra pro luce, pro veritate imaginem tenuerunt, & tenent. Quàm multa etiam priscis illis suis, sacrisque libris, vana, superflua, inepta addiderunt? ad Thalmudem appello. Sed isti, quod mirum, & ter mirum est, toties attriti vel excisi potius, viuunt & vigent; & corpus illud gentis seruant, atque adeò propagant. Legat, qui volet, ab Hierosolymis captis, quoties à Principibus Romanis Græcisque pulsus vel cæsus, quoties à Christianis etiam regibus sint: mirabitur & vix credet, vel paucos superesse in semen. At illi, ut dixi, frequentes sunt & florent. frequentes? Bellonium audi, fidum obseruatorem. *In omni imperio Turcico, inquit, vix opidum aut pagus est, in quo non plurimi Iudæi agant: atque ij ferè variarum linguarum periti, quod magno vsui est exteris aut peregrinis.* Nec in illo

xi.



illo tantum imperio, sed in Oriente, in Septentrione, apud Christianos etiam agunt: & quamquam sic distracti, unionem & puritatem gentis seruant, à coniugijs alienigenarum decreto auersi. Quid Deus in istis struat aut molietur, nescio: nulla quidem gens ab orbe condito, aut frequentiam, aut sinceritatem suam seruauit, opinor, præter istam.

## CAP. IV.

## DE IMPIETATE.

*Eius matrem Superbiam, aut Ferociam, sæpè & Vitiorum cumulum, esse.*

**D**eflexio altera *Impietas*, siue *Irreligio*, si *ἀσέβεια* Græcorum sic licet vertere. Grande, & vt sic dicam, malorum: cum homo à ratione, imò à naturâ abit, contemptor Numinis aut negator, quod illa asseruit, & hæc in seuit. Eò veniri solet, siue à superbâ quadam & rudi Ferociâ; siue à Vitiorum magnitudine & cumulo, quæ animum manciparunt. Deo enim tum se subtrahit, & ne illum timeat, spernit: itemque præmia omnia futura, aut pœnas. Infelices hi tales! etiam in externis rebus successibusque: quia desertores sui Deus deserit, nec cadunt solum turpiter sæpè, sed ruunt. Quàm fœdi etiam sunt? super omnes Superstitiosos: quia vt illi conuiuent ad supremum Numen, aut malè vident; sic isti cæcutiunt, & nihil vident. Quis autem neget cæcitatem deteriorem lippitudine esse? Eam ego in paucis exemplis proponam: paucis, & id ipsum timidè. nec aliter quàm in templis malos Genios solemus, ad fugiendum & abhorrendum.

- I. Omitto veteres, apud quos veniam aliquam habuerit, in caligine errorum: apud Christianos quæ potest? Et sunt tamen, qui non vitâ solum eam præferunt: sed impudenter linguâ exprimunt. vt ille FREDERICVS II. Imperator. cui sæpè in ore: *Tres fuisse insignes impostores, qui genus humanum seduxerunt, Moysen, Christum, Mahumetem.* O impure, ô impie! te hoc dicere, quod



quod gentilium quidam olim, *Christum magum fuisse, & ex* Arnob. lib. i.  
*Ægyptiorum adytis angelorum potentium nomina habuisse?*

Mitior ALPHONSI X. Hispaniæ regis, sed non melior vox II.  
aut sensus. qui solitus Prouidentiam identidem culpare, & di-  
cere: *Si principio mundi ipse Deo adfuisse, multa melius ordinatus-*  
*que condenda fuisse.* Miselle, sapientiâ supra Deum es? lingua quò  
abis, mens quò abisti? Sed notabile, vtrumque istum, & Fride-  
ricum & Alfonsum, illum imperio, hunc regno priuatos, in pu-  
blico odio & infamiâ obiisse. Plura non addo, nec vel calamum  
aut chartam relatione ipsâ maculò.

## CAP. V.

## DE FATO

*Id considerandum, credendumque esse.*

**A** Tu qui Deum & Religionem colis, etiam Fatum: id est  
Prouidentiam, decretumq. diuinum. *Quid enim aliud est*  
*Fatum* (dicet pro me Minutius Felix) *quàm id quod de vnoquoque*  
*nostrum fatus est Deus?* De vnoquoque nostrum, sed & de rebus  
omnibus quæ sunt, fuerunt, erunt. Is enim qui omnia fecit, di-  
rigit eadem, mouet, seruat: καὶ δὲ περ ἡνίοχος ἀγαθὸς (verba Trifine- Cap. xv.  
gilti) τὸ τῆ κοσμοῦ ἀρχὴ ἀσφαλίστατος καὶ ἀναδύσας εἰς ἑαυτὸν, μὴ πως ἀτά-  
κτος φέεσσι: tamquam Auriga peritus, currum hunc mundi firmans in se  
atq; alligans, ne in compositè feratur. Prorsus ita est. per causas me-  
dias, variè nexas, prima illa causa omnia temperat, suauiter,  
prudenter, vtiliter: nec aliter est cèsendum. Hoc monitum va-  
riam vtilitatem Principi dabit. à Deo se & regnum; à Deo bo-  
na malaq. externa esse: ideò nec in illis elatè, nec in istis abiectè  
nimis agèdum. Constantia vbiq; esto, & volens quædam obe-  
dientia decretis diuinis. Nam longè præstat (ait Gregoras Nice- Lib. vii.  
phorus) quietum ferri à ferente Fato, quàm obnitèdo velut materiam  
& alimentum ei præbere. Hoc enim tale est, ac si quis ignem metuens  
ædes iam circumdantem, non exstinguat eum, sed sarmentorum fascēs  
aggerat, & oleum affundat: aut si quis furente Boreâ, & tēpestate exi-  
guâ fragiliq; cymbâ, contra fluctus & per eos eluctari conetur. Altera  
etiam



etiam vtilitas, inquirere leuiter & modeste in Fata, & videre quò vis illa supera, nostra hæc trahat: proque eâ inclinatione, se & consilia adaptare. Magnus est fructus; & prudenti viro vix publica Fata conuersionesque obscuræ, ex signis quæ præeunt vel adhærent. Ruere aut vertere hunc statum vult? consilia praua, & homines tales erunt, qui ad gubernacula admouebuntur. Delatio, adulatio, vanitas locum habebunt: probitas, veritas, prudentia exsulabunt. Sed &, vt in citharâ, concentus turbabitur: & obscura primum, mox palàm discordia erit. Vult attollere? omnia alia. locus consilij, locus honosque virtutibus, etiam artibus: denique siquid ægri in Republicâ, sanatur; siquid sani, fouetur. Vt qui libram tenet, in hanc aut illam lancem pondus adiici iubet, & inclinat: sic Deus. & fortunam temperat, sed manibus aut consilijs ferè nostris. Atque hæc ita palàm, vt vel hebes mens videat, si non præuideat: & dominum arbitrumque terrestrium rerum, ex euentis, illum è cælo agnoscat. O quàm mira, quàm inopinata sæpè ab illâ potentiâ? Nam & hoc gaudet atque amat, præter opinionem (non enim rationem) quædam facere, & vel sic ostendere vim illam omnia gubernantem & mouentem. Hæc vniuersè: sed in Exemplis etiam distinctius videamus, & monita pro ijs aptemus. Primum esto,

### MON. I. *Regna & Reges à Deo dari.*

- I. Quid clarius? quæ vis, gratia, aut commendatio, AGATHOCLI regnum in Siciliâ dederunt? Pater ei figulus, pueritiam in luti fordibus, adolescentiam in impuditiâ, iuentam in libidinis egit. Ab omni parte infamis, odio ciuium & inopiâ, ad latrocinium compellitur. En gradus, quibus ad sceptrum veniatur! Sed mox miles, & dux è milite: id quoque cum infamiâ, quòd defuncti *Damasconis*, cui successerat, vxorem stupro antea cognitam, sibi ceperat, & cum eâ ingentes opes. His fretus, occupare imperium patriæ bis conatus, bis repellitur; denique in exsilium agitur. Quid fit? iungit se Siculis, Syracusiorum hostibus, palàm bello patriam petit, & obsidet: nihil efficit, cum Pœni in auxilium euocati strenuè



strenuè propugnarent. Vi desperatâ, ad fraudes se vertit, *Hamilcarem* Pœnorum ducem ad pacem inuitat ( ea species & honestus titulus fuit: ) reuera ad pactionem, vt cederet, & traderet sibi Syracusas. Ita factum. regnat, cædes populi & Principum facit: & miro iterum fato, ipsis conciliatoribus sceptri Pœnis bellum infert, & in Africam transfert. Præter spem variè victor, & præter spem quoq; mox victus, deserto exercitu, liberis, amicis, panè solus in Siciliam effugit. Seruat tamen regnum, etsi in variâ sorte: immoritur ei, sed ita vt pelli vxorem liberosque videret, & ab nepote id eripi, non diu fruituro. In his talibus vbi ratio alia, quàm summa illa Ratio est, Fatum nobis dicta?

Hæc in vno illo rege. quid in quattuor ( septem in vniuersum fuere ) ROMANORVM? Primus *Romulus*, & tertius *Tullus Hostilius*, vterque ex pastore ad sceptrum peruénit: quintus *Tarquinius Priscus*, è peregrino & exsule: sextus *Seruius*, quod ipsum nomen præfert, è vernulâ & seruo. Quid hæc aliud sunt, quàm

II.

*Sidus, & occulti miranda potentia fati?*

Nam de C. MARIO minùs mirum in populari electione, si ad summa peruénit ipse popularis. Sed ex imâ tamen plebe ac municipali, miles mox factus in caligâ, tum Centurio, tum Tribunus: & in vrbe etiam petere honores ausus, sæpè repulsus, spretus, irrupit tandem in Curiam magis, quàm peruénit. Ex illo tamen Mario tam humili, tã fastidito, ille Marius emergit qui Africam vicit, regem Iugurtham, formidatum Romanis, in triumphum duxit: & parum est: ille Marius, qui

III.

— *Cimbros, & summa pericula rerum*

*Excepit:*

& trepidam non Italiam modò, sed urbem defendit. Ille, qui post sextum Consulatam ( rarum decus ) carcerem & exsilium subiuit: plenus tamen certusque spei, quòd olim iuueni in agro apricanti, Aquila septem pullos in sinum iecisset, toties iterandi scilicet summi imperij signum. Nec fefellit euentus. Redijt, hostes vicit, urbem & Consulatam septimò iniuit, & in eo exspirauit. Quidlibet sperandi & timendi, cum Fatâ volunt, clarum exemplum.

D

Nec



IIII.

Nec minus in M A S A N I S S A (*Marius* enim me in Africam reuocat.) qui mortuo patre Galâ, patruo succedente, & mox illo quoque mortuo, per fraudem exutus regno & priuatus, arma sumpsit, ac denique victoriæ & illius compos fuit. Sed non diu eâ gauisus, & hoc fruitus, à *Syphace* rege bellum excepit: qui iusto prælio eum fudit. In montem Balbum confugerat, sed illinc quoque *Bocchar* Præfectus regius eum pepulit, ad tantam paucitatem redactum, vt vix quattuor equitibus comitatus effugerit. Ventum erat ad flumen, nec vadari poterat: quid facis Masanissa, & tuum Fatum? metu vrgente in id se conijcit, & duobus comitum gurgite abreptis, ipse cum duobus alijs inter virgulta vltiora delituit. Fama tamen sparsa submersi, populares (vt quisque in eum affectus) erexit, aut terruit: cum ille vulnus (nam & id acceperat) in speluncâ auia curans, latrocinio duorum equitum per dies aliquot vixit. Mox vbi equi patiens fuit, audaciâ ingenti pergit ire ad regnum recuperandum: quibus præsidijs? haud plus quadraginta equitibus, qui in viâ se addiderant: auctisque paullatim ad VI. millia peditum, IIII. equitum, copijs, paternum totum regnum recepit. Sed nondum finis fatalis dispositionis. iterum pellitur, victus à *Verminâ Syphacis* filio, quem rex in eum miserat. Ibi omnibus opibus, sed non spe amissâ, cum LXX. equitibus effugit ad Garamantum terram: hæsitque vagans aut latitans, donec C. Lælius à Scipione missus cum classe apulisset. Iunxit se, & magnum nomen, etsi exiguas vires attulit: peritiâ tamen militiæ & locorum, aliquod ad victoriam momentum. Quæ mox secuta. victi Carthaginenses & Syphax: iste periit, & regnum eius Scipio totum Masanissæ donat, finibus etiam auctis. Quid deinde? nec sic fideliter Fortuna ei ridet. in ipso aditu iactatur, sed Veneris insidijs, non vi Martis. Erat *Sophonisba*, Syphacis antea vxor, mulier insigni facie, facundiâ, & astu. Hæc regiam ingredienti occurrit, deiecta, mæsta, sed quod deceret: & statim Numidam in amorem sui rapit. Iubet igitur bono animo esse, dextram & mox corpus iungit: sed petenti antea iurat, *Nemini se traditurum eam Romano*. In his erat, cum Lælius superuenit, & *Sophonisbam* dedi postulat: fluctuante Masanissâ, in vehementis-

fimi



simi amoris æstibus, illam desereret, an amicitiam Romanam. Sed ratio & utilitas affectum vicit: illa vitâ abit, iste ad Romanos redit, & adhæret. per eos regnum stabilit, auget, quod ad posteros etiam transmisit.

Inferit se his exemplis & fœmina. Erat *Leontij* cuiusdam Atheniensis philosophi filia, *ATHENAIIS* nomine, multo ingenij corporisque lepore, aut Venere. Pater occulto aliquo de fortunâ eius præfagio, omnes opes moriturus duobus filiis reliquerat; huic solos centum aureos, cum elogio, *Suffecturam ei fortunam suam*. Igitur cum fratribus litigat, ut iniuriâ affecta. sed infirmior sexus aliam etiam accipit, & pulsa ab ijs Constantinopolim venit, ut viam futuræ magnitudini aperiret. Insinuat se, & commendat causam *Pulcheriæ* Imperatoris sorori: cui statim ita placuit, ut percontata, ecquid virgo esset? in aulam acceperit, sed baptismo, rudem ad id Christianæ religionis, prius ablutam. Nomen eius in *EVDOCIAM* mutat: ac sic denique amat, ut fratri *Theodosio*, apud quem omnia poterat, coniugem desponderet. Hem, ascensus! sed ecce & delectio. nam diu felix eo coniugio, amata & amans, in suspicionem probri incidit, & contubernio excidit, hac causâ. Imperator insigne, & prægrande pomum dono acceperat: quod porro vxori suæ blandiens transmisit. Accepit illa, & idem mox *Paullino*, facundo & erudito viro, ideoque eruditæ fœminæ caro, nihil sequius cogitans dedit. Quod ille, ignarus unde esset, iterum Imperatori, ut regium aliquod munus offert. Mirari ille, & primum ambigere; mox agnoscere, & suspicari. atque ita properè ad vxorem veniens, callidè pomum ab eâ repetit, antea donatum. Hæc totius facti ignara, temerè & iuueniliter asserit, sese edisse: iterumque rogata dicit, atque adeò iurat. Imperator seriò tum offensus, & mendacij arguens, pomum profert: nec satis. de amore occulto & improbo suspicatus, *Paullinum* occidit, illam abdicat, & relegat. O vterque amans, vestri misereor! etsi hæc quidem casum fortiter tulit: & iuit Hierosolyma, & piè casteque viuens ibi moritur, sed præmortuo marito.

Multa hæc in historiâ veteri: nostri æui vnum addam. VI.



\* Regnare  
cepit an.  
∞.cccc.  
xcv.

PHILIPPVS II. Hispaniarum rex, quid nisi fato in illud Lusitaniæ etiam vênit? Quod ita fundatum firmumque in copiâ successorum videbatur, vt locus non esset aut rima vel improbæ externæ spei. Ecce \* *Emanuel XIII.* Lusitaniæ rex tres vxores duxerat, & ex omnibus liberos tulerat. primam, *Isabellam*, maximam natu filiarum *Ferdinandi* & *Isabellæ* Hispaniæ regum. Proles ex eâ nata *Michaël*: qui si vixisset, certus heres omnium istorum regnorum erat, quæ nunc magnus Hispaniarum rex tenet. Obijt puer, & ipsa mater eius à partione. Ergo alteram tunc filiam *Mariam*, quæ tertia erat eisdem *Ferdinando* & *Isabellæ*, nuptijs iungit: nam *Ioanna* secunda, tradita *Philippo* Austriaco fuit, è quo coniugio Hispaniæ isti reges. *Emanuel* igitur ex *Mariâ* numerosam sanè prolem gignit, sex masculos, duas filias: denique è tertijs etiam nuptijs, quas cum *Leonora* Philippi Austrij filiâ coiuit, duos liberos, filium filiamque. Obserua, te obsecro. an non hæc fundata domus, in tot fulcris, vt sic dicam, regni? Iam ad liberos istorum veni, quanta series? *vigintiduo* erant, qui *Philippum* regem anteibant, & successione legitimè arcebant: & tamen quò Fata vocabant, vênit & successit. Præmortui omnes illi sunt, quid? nisi vt vnum facerent Hispaniæ totius caput. Magnus fauor Numinis, nec semel in hac gente (Austriam dico) se ostendit: quæ per hereditates & aduenticia incrementa ferè creuit.

## II. Regna à Deo & Reges tolli.

- I. Vis illustre exemplum? *CYRVS* erit. qui per annos triginta, in magnâ gloriâ rex Persarum, finitimis, deinde longinquis, subactis, longiùs manus etiam ad Scythas porrexit. Venit cum magno & victore exercitu, ô dedecus! à fæminâ vincendus. *Thamyris* ea erat, quæ genti præerat, & filium ad fines regni repulsurum vim externam miserat: sed victus est, & insidijs à *Cyro* circumuentus. Ergo ipsa molem regni vltimam exciuit, & dat se animosè obuiam, atque ijsdem fraudibus circumuentum & clausum, ipsum copiasque cecidit. Ducenta Persarum millia erant: ingens clades: adde ludibrium. caput mortuo refecat, & in vtreum sanguine plenum merso exprobrat:



probrat: *Satia te sanguine, quo expleri nequisti.* Regnum longâ mole fundatum, vbi es? rex tot annos felix & victor, vbi es? quò Fata & ordo rerum miserunt, à summis ad ima decidisti.

Iam POLYCRATES, rex Samiorum, non fortunati, sed Fortunæ nomen videbatur. Nihil ei in vitâ aduersum: ante vota, supra vota, omnia aderant: id est, priusquam vellet, & plusquam vellet. Cælum, terra, mare fauebant, aut seruiebant: & res in exemplo raro dixit. Anulum in mare abiecit, quasi Nemesis placandæ: quid sit? in pisce mox inuentum recepit. At vltima dissident. & Oroetes Darij regis satrapa victum, captum, morte, nec eâ communi (non dicam regiâ) affecit: sed in cruce altâ suspensum, mirabile & miserabile orbi spectaculum, subiecit. O verè Deum, qui inopinatè mutat!

II.

Et in VALERIANO etiam Imperatore Romanorum, id est orbis pænè terræ, quàm simile ludibrium! Ille post quindecim regni annos in ignobilem seruitutem, & audientium aures grauaturam, vi Fati incidit. Bellum, magnis viribus, Sapor Persarum regi fecit: sed eo fine, vt victus & viuus in manus hostium veniret Imperator. Barbaro fastu victoriâ vfi sunt. siquidem Sapor, vt catenatum mancipium circumduxit; & quoties equum conscenderet, non manu eius, sed inclinati dorso, adiutus innixusque est. Quis hominum sic subitò deijcere & calcare Principem rerum potuit, præter diuinum supremumque decretum?

I II.

Affidet, quod BAIASITES PRIMVS, quem *Gilderun Chano* à fulmine Turcæ dicunt, magnus animo & rebus Imperator fuit. Atque is variè, & per decem ampliùs annos victor, magno illo prælio cum *Temire Chano*, quem *Temir-lancum* à claudicatione item vocant, conflixit. Vtrinque ingentes copiæ. robora virorum & militiæ vsus à Turcis; Fatum aliunde stetit. Nam & auxiliares copiæ Tatarorum in ipsâ pugnâ deseruerunt Baiasitem, transitione ad hostem factâ: idem milites, è regione Germiani & Mentefij. Solus se non deseruit, cum immorto Prætoriano agmine, Baiasites: & murus illic belli. Sed vis ac multitudo perrupit, ipse captus, filius eius *Mustaphas* cæsus,

I III.



\* Dominū  
notat.

& quidem felicius. Nam pater ad victorem Temirem perductus, honestè primùm exceptus est: cùm & obuiam pedes extratentorium iuisset illi, in equo aduentanti. Cùm descendisset; vterque, pro more gentis, humi in tapete confedit. atque ibi Temir (operæ pretium visum, fide Annalium Turcicorum verba dare) O \* Chan, inquit, *magnas vterque Deo gratias debemus: ego, quòd claudus ille ab ipsis Indiæ finibus ad mœnia Sinaestæ imperium extenderim; tu, quòd à Sinaestâ, ad ipsos Pannoniæ fines. Orbem terræ inter nos partiti pænè sumus. Debemus igitur gratias, atque ego reddidi, & reddam: tu verò parùm fortasse memori grataque mente fuisti, & ideò hæc calamitas interuenit. Sed age mi Chan, si ego in tuâ sic sim potestate, quid ageres? dic liberè & veraciter.* Ibi aiunt Baiafitem, qui feroci & elato animo erat, subiecisse: *Equidem te, si numen victoriam adnuisset, in ferream caueam inclusum circumduxissem, spectaculo & ostentui cunctis.* Temir eo audito, sententiâ hac in ipsum est vsus, & sic inclusit. Miser triennium ferè ita vixit: & cùm desperatâ liberatione audisset in Tataros se abducendum, caput validis iteratisque ictibus caueæ ferreæ incussit, & indignantem animam sic emisit. Multi & pulchri ludi in hoc Mundi theatro: sed tragœdiam belliolem rarò, aut nec legimus.

V. Nisi lubet & ad Sacros apices venire, & videre quomodo nec ijs vis ista parcat. CAROLVS CARAFFA à Paulo IIII. Pontifice designatus Cardinalis fuit: eius frater IOANNES Montorij Comes, & Dux Paliani factus. Omnia isti apud Pontificem, quæ vellent, poterant: & plus quàm æquum decorumque erat, volebant. Mansit aura secunda, quamdiu fidus illud luxit: post eius occasum, Pius Quartus in Pontificatum assumptus, idque operâ & gratiâ (notabile est) Caraffarum maximè. Sed iste inter primas ferè publicas actiones habuit, Caraffas euertere: fecitque initium VII. Idus Iunij, .10. LX. ipso die, quo Carolus pilei honore donatus fuerat, in carcerem eo coniecto. Additus Dux Paliani, frater; Comes Allifanus, alijque propinqui eorum aut clientes. Nouem menses in arce Sancti Angeli habiti, non nisi crimina & mortes audierunt: & hanc denique sententiâ Pontificiâ subierunt. Cardinalis nocte,



ete, carnificis manu strangulatus; Dux capite truncatus, vnà cum Allifano Comite; & cadauera in publicum spectaculum exposita. Quis sensus, & occulta vox, tibi Roma tunc fuit? cùm multi Pontificis seueritatem, & ingratitude, accusarent: sapientiores, incerta rerum humanarum, sub illustribus exemplis, agnoscerent; & vilium reorum poenâ atque ignominia perijisse, qui dignitate & opibus culmina paulloantè fuerant rei Romanæ.

MON. III. *Et causas quasdam medias, sed inopinatas, his intervenire.*

Adstruit & asserit se vbique Prouidentia: sed apertiùs, cùm causæ quædam mediæ subitæ, aut insolitæ interueniunt, & licet dicere, Quis exspectasset? In DIONIS rebus hoc elucet, cùm Syracusas liberatum iret à tyrannide Dionysij, graui & famosâ. Erat tum fortè in Italiâ Dionysius, & res alias agebat: id quod Dioni (fato sic disponente) commodè & feliciter euênit. Nam cùm ipse in Siciliam, exiguis copijs, animo quàm prudentiâ maiore, appulisset: *Timocrates*, primus amicorum Dionysij, & qui vicem eius regebat, statim hominem certum cum litteris ad Dionysium ablegat, qui Dionis aduentum, & res in Siciliâ moras nunciaret. Summa erat, omnia relinqueret, rediret, nisi à suis vellet relinqui. Homo feliciter fretum traiecit, *Cauloniam* terrâ tendit, vbi Dionysius tunc securè agebat. In viâ fortè notus occurrit, qui recens victimam immolauerat, & partem eius amicè communicat & donat. Accipit, in vidulum lateralem imponit, vbi & Timocratis epistola erat. Pergit interea strenuè, & noctem itineri cùm adsumpsisset, iam fessus, neglectim abijcit se in humum, & componit leuiter dormiturus. Haud procul à siluâ erat: è quâ ecce lupo egreditur, & odore carnis stimulatus accedit, & vidulum à latere abripit cum ipsâ carne. Paullopost homo expergiscitur, vidulum desiderat, & circâ quærit: frustra. itaque metuens offensæ aut poenæ, non sustinet ad Dionysium ire, & aliò diuertit. Hoc casu, tardiùs quàm opus erat, & alijs litteris, Dionysius cognoscit quid ageretur. Subuenire vult,  
non



non potest: à sceptro ad ferulam redigitur. à quo? Deo, Deo, qui inopinatum illud interiecit.

II. Quid in M. BRUTO, & campis Philippicis? manu Providentiam tango. Legiones utrimque, & instructæ copiæ: egregij duces. concurrunt: vincit cornu dextero Brutus, & oppositum *Octavianum* pellit, atque adeò castra eius capit: & quam pænè ipsum? Plena & certa victoria videbatur: sed quam Cassius malâ sorte pervertit. Nam ipse ab *Antonio* pulsus in suo cornu, sed fugâ & damno leuiore: & facilis instauratio, si de Bruto sciisset, aut sperasset. At campus, qui pulvere stabat, impedit prospectum: & triste, sed falsum, ei augurium in animo, victum etiam Brutum esse. Tamen adhuc dubius, substitit in colle quodam, & L. Titinnium, ex fidis amicis, mittit ad explorandum. Ille in Bruti milites statim incidit, victores &, ut sit, palantes. De Cassio, *Quam saluè?* quærunt, audiunt, & læti Titinnium circumfundunt, & unâ ad Cassium, animaturi eum tendunt. Qui cum videt, & rectâ ad se venire, hostes arbitratus, & amicum suum captum: *Quid ultra moramur?* inquit: *spes, vita, dedecus abeant:* & simul ceruices suas liberto præbuit incidendas. Vix factum, Titinnius superuenit: & casum miseratus, sibi iratus, (quasi mora in causâ fuisset) idem genus fati sponte sumpsit. Hæc res & Brutum perdidit: qui in Cassij animâ suum animum amisit.

III. Multa possum: vnum ex historiâ vetere, & de inclyto illo ANNIBALE inter omnis ævi duces. Iure hoc elogium vindicat: nec fuit aut erit, qui militari astu aut peritiâ virum equabit, non dicam superabit. Is in Italiâ dominabatur, post Cannas victor: & quid nisi Roma restabat? Frenum fati cohibuit, ne statim iret: idem consilia eius alia, consulta licet & firma, euertit. Fœdus cum *Philippo* tunc Macedonum rege perculserat, & ut is in societatem belli, aut potius victoriæ, veniret: legibus ijs, ut Italia quidem Annibalis & Carthaginensium esset; Græcia Philippi, Punicis mox armis subiuganda. In hanc rem firmandam, Xenophanes legatus à Philippo mittitur: nauigat, legit oram Italiæ, iuxta Tarentum in classem Romanam



manam incidit, capitur: & *Quis, quò, quare*, rogatur. Ille Græculus, callido mendacio se expedit; & ait à Philippo rege ad Senatum Romanum mitti, vt fædus in Annibalem & Poenos iungat. Romani, & eorum Dux Valerius Lævinus, latari, ouare: & cælitus tam opportunum auxilium, à potenti rege, in rebus arctis, missum opinari. Itaque honore honestant, prosequuntur, & in tutum Italiæ litus exponunt. Expositus ille rectâ ad Annibalem tendit, & mandata dat, accipit: denique de totâ re peragit & definit. Nihil supererat, nisi vt ipse ad Philippum, Philippus in Italiam veniret; & funus res Romanæ essent. Deo aliter visum, vigilat: & in reditu eadem naui in Romanam classem incidit, sed cui Q. Fuluius præesset. Ille prioris doli & hominum ignarus, querit solita: & Xenophanes semel mentiendi felix, eodem applicat, *A Senatu venire, ad regem suum ire*. Hæc vultu ac voce constans: iamque persuaferat. cum ecce vident inter comites, quosdam Punico habitu. & *Qui isti?* clamat Fuluius: à *Graciâ non sunt*. Turbantur, fatentur, in vincula dantur, Romam mittuntur: omnia consilia & pacta detecta, Roma seruata. Seruare enim eam fuit, vel in tempus cœpta impedire, & donec misera respirasset. I nunc, & quis Epicurus hîc Prouidentiam neget?

Iterum idem in E O D E M. Rebus iam, suâ culpâ & morâ, dubijs, & Romanis animo ac viribus auctis: vt suas pariter firmaret, fratrem *Asdrubalem* ex Hispaniâ euocauerat, cum nouis copijs, & valido exercitu. Iam Alpes transierat, iam aduentabat: quis non actum de re Romanâ censuisset, quæ ægrè vel vni Annibali resistebat? Iunge istum, veteranum ducem, tot subsidia: ad exsequias tuas Roma imus. Vide rem leuem, sed à Deo, quæ turbat. Nesciebat etiam Annibal fratrem in Italiam venisse, & in extremâ Apuliâ confidebat: cui obuiam ire, ratio alioqui & consilium erat. Miserat autem Asdrubal, præmijs inductos, quattuor Gallos equites, duos Numidas, qui omnia Annibali significarent: sed ij cum totam ferè Italiam tutò emensi ad Tarentum venissent, ibi à vagis Romanis pabulatoribus excipiuntur, Annibali iam vicini. Deducuntur ad Consulem *Claudium Neronem*, castra opposita Annibali



nibali illuc habentem : fatentur , litteras tradunt , per interpretem explicantur. Ibi cognitum , Asdrubalem in Vmbriam venire in animo habere , ac fratri ibi occursuro iungi . Consul statim , magno animo facinus ausus ( vt in magno periculo ) validissimam partem copiarum clam è castris subducit : lectos omnes , sex millia peditum , mille equites : & dies noctesque non intermisso itinere , occultus ad *Linium Salinatorem* ( is alter Consul oppositus Asdrubali erat ) venit . Ita statim duplicatis viribus cum Asdrubale pugnatum : cuius victi & cæsi caput Nero secum eadem celeritate in castra refert : ac postero die ante stationes hostium proiecit . duobus etiam captiuis dimissis , qui rem omnem ordine nunciarent . Tum denique percussus , imò desperatus Annibal , vocem hanc è pectore emisit : *Agnosco fortunam Carthagini*. Benè , benè. Tu nitere , & omnia fac : vincens non vinces , prudentia infra fortunam erit , & Nemesis Carthaginem tuam premet.

### MON. IIII. Regna à Deo & Reges temperari.

- i. Breue monitum , sed magni sensus & vsus : videre quomodo Deus disponat & cohibeat , hos ne crescant , hos ne cadant : & velut in æquilibrio res suspendat . Hoc Nicephori Gregoræ verbiis dicendum est : *Mirari mihi subit*, inquit, *imperuestigabilem Dei sapientiam , qui planè contraria vno fine conclusit . Nam cum duas aduersarias potestates inter se committere statuit , nec alteram alteri subijcere : aut ingenio & virtute præstantes utrique parti moderatores præficit , vt alter alterius consilia & conatus euertat , & utrimque subditorum libertati consulatur ; aut vtrosque hebetes & imbelles deligit , vt neuter alterum tentare , & septa ( quod aiunt ) transilire audeat , veteresque regnorum limites conuellere . Dicit prudentius nihil potuit : & Prouidentia hanc dispositionem quot exempla adfirmant ? non insisto , & vetera omitto : sed nuper Carolus v. nobis , Franciscus I. Gallis , Soleimannus Turcis imperitabant : quiuis eorum dignus orbis terræ imperio . & habuissent , aut promouissent ; nisi cōcursus ille fuisset , & alius alium interpellasset . In parte alterâ exempla , quæ verecundiâ prohibitus non dicam .*

Lib. v.



MON. V. *Clarissimè Fata in Prædictionibus elucere.*

At nulla res Fatum clariùs certiusque, quàm Vaticinia, aut Prodigia asserant: quæ diu antè, caussis notisque nullis apparentibus, cum euenta designent: quid nisi & hæc definita, & à Deo esse clamant? Daniel ille VATES, & SIBYLLE, multis antè sæculis multa & magna prædixerunt: unde, & quomodo, nisi quia in Prouidentia libro hæc descripta? & Deus reuelauerat. Nam ita amat Numinis illa benignitas, per *Somnia*, per *Signa*, per *Speetra*, & *Vaticinia* res futuras ostendere: diuinitati suæ adstruendæ, nobis instruendis aut præparandis. Latus latusque campus est, placet ingredi, & leuiter lustrare? fiat. Ac primò de SOMNIIS, nobile est quod ASTYAGI ultimo Medorum regi factum. Vidit per quietem, ex naturâ filia, quam vnica habebat, vitem enasci, & sic mox diffundi, vt totam Asiam palmitibus suis obumbraret. Consulti vates aiunt, *Nasciturum ex filiâ, qui Asiæ regnum occupet, suo eum nudet.* Territus hac denunciatione, & vt fatum auerteret (miser, quid operam ludis?) iamprimùm filiam suam extero, & obscuro tunc viro, *Cambysi* despondet. deinde eandem partui vicinam ad se traducit, & vt quod natum esset se teste necaretur. Ergo infans *Harpago* traditur occidendus, notæ fidei, & cui arcana illius regis iamdiu innixa. At ille veritus, ne si mortuo Astyage imperium ad filiam veniret (nec enim virilis ei sexus liberi) poenam obsequij lueret: non necat, sed pastori regij pecoris tradit exponendum. Fortè & vxor huius pepererat. quæ re auditâ, summo rogat opere maritum, puerum ad se deferri, & oculis saltem libari. Maritus indulget, it in siluam vbi reliquerat: repperit canem feminam, quæ mammas præbebat, & vnâ alites ferasque abigebat. Tactus miraculo, & vel à cane doctus miserari, tollit puerum, vxori defert; quæ videt, amat, alit. & crescit in virum, in regem: qui Astyagem vicit, sceptrum ad Persas transtulit.

Sed & ANTIGONI somnium mirabile, super *Mithridate*. II.  
Iste è Persarum magis oriundus, erat in comitatu Antigoni  
E 2 Mace-



Macedonum regis, Perfide scilicet deuictâ, & fortunâ suâ cum publicâ inclinâtâ. Visus videre noctu Antigonus, sementem auream in magno campo se facere, eam surgere, adolescere & maturescere: sed mox omnia demessa item videre, & culmos spicasque iacere inanes. Vocem adhuc audire, *Mithridatem in Pontum Euxinum fugere, auream messem secum asportantem*. Non obscurum somnium, aut significatio. itaque rex, ubi euigilasset, exterritus tollere statim Mithridatem statuit, & cum filio *Demetrio* communicat, fidem silentij iureiurando stipulatus. Erat familiaris, in pari ætate, Mithridati Demetrius: & fortè iste se obtulit, à recenti indicio. Miseratur adolescens, & adiutum velit, sed religione iuramenti cohibetur. Quid facit? apprehensum seducit ab alijs, & nihil effatus, hastâ in terræ puluere scribit: FUGE MITHRIDATE S. Quod ille arripit, & verbis istis, & vultu ipso Demetrii monitus, in Cappadociam clam aufugit, & regnum mox potens & inclytum Ponti condidit: quod stetit in octauam ab eo stirpem, alterum illum *Mithridatem* Romanâ potentiâ vix cuersum.

III.

Affidet istis, & primo utique, somnium quod ERTVCVLES pater *Osmanis*, à quo potentes isti Asiatici *Osmanide*, vidit: sed vidit de die, cum post cibum sumptum meridiaretur. Experrectus igitur, & imagine eâ confusus, primò corpus aquis abluit, & se purgat, uti religio gentis eius habet. tum ad *Edebalem*, virum inter ipsos sapientem & sanctum, venit atque infit: *Somniaui vir venerabilis* (Annalium Turcicorum verba pono) *splendorem Lunæ è sinu tuo prodire, eumque in meum deinde sinum peruenire. Eò cum delatus esset, ex meo Umbilico enasci arborem, quæ regiones varias, montes & valles inumbraret. Ad ipsas autem radices arboris, aquas emanasse, quibus vineæ & horti rigarentur: atque ibi somnium me somnusque deseruit. Edebales audito, aliquamdiu secum reputans, effatur: Nascetur tibi filius, vir bone, cui nomen erit Osman. Is multa bella geret, victoriam & famam pariet, ac posteri tui Principes Regesque terrarum erunt. Mea autem filia Osmani nubit: atque is splendor est: qui è sinu meo prodiit, & in tuo coiuit: ex utroque autem arbor. Quam*

mira



mira, & vera prædictio! sed & de *Lunâ* notabile, quam scimus inter signa prima esse Turcicæ gentis.

Iam ad SIGNA transeo: quæ *Magna* aut *Parua*, sed certa pariter se ostenderunt. TIMOLEONTI Corinthio, cum in Siciliam, ad pellendum tyrannum, exiguâ manu iret: fax ei in mari, totam noctem, nauiganti præluxit. Amplius, Delphos paulloantè profectus, ut Apollini sacra & vota faceret; è donis suspensis vittam, in caput suum deciduam, ita excepit, ut coronæ aut diadematis ritu cingeretur. atque erat ea vitta victorialis & corollis intexta: prorsus ut à Deo coronari, & victor pronunciari videretur. Quid, quod eidem ante pugnam cum *Scete* contigit? Contentio honesta inter Centuriones & manipulos de ordine erat, & præire omnes volebant: cum ille, liti dirimendæ, sortem definire iubet, & anulos Centurionum in eam poscit. Coniiciuntur in sinum vestis, commiscuntur: qui primus educitur, is trophæum pro insigni habebat insculptum. Aucti omnes ab omine animis, in hostem alacriter eunt, cædunt, vincunt.

MARCIANO Thraci, plebeio genere, & mox Imperatori, plura hæc potentia Signa euenerunt. Ad militiam primam eunti, & ut nomen daret, cadauer hominis occisi in viâ offertur: ad quod substitit, & miseratione tactus in eo est ut sepe-  
liat, & terrâ tegat. Dum facit, deprehenditur, accusatur ut homicida, & Philippopolim abducitur. Iam poena imminebat infanti: cum verus homicida casu superuenit, & agnoscitur: ipse liber ad vicinos numeros tendit. quibus inscribitur, & (pulchrum omen!) in locum defuncti militis, *Augusti*. Et iam cum legionibus in expeditionem ibat: cum morbus eum inuasit, & in Lyciâ substitit, hospitio apud duos fratres exceptus, *Julium* & *Tatianum*. Cum meliusculè ei esset, recreandi causâ, tres simul venatum eunt: & fatigati decumbunt, & obdormiunt. Æstus solis erat, & ipse meridies: ibi aquila, panis alis, leuiterque corpus librans, super Marcianum se suspendit, & vnam fecit. Tatianus experrectus id videt, ac fratrem excitat, & ostendit. Vterque mirabundus haud vanè augurantur, auem regiam regnum ei portendere: & Marciano futuram sortem



gratulati, ducentos etiam aureos in viaticum donant. vnum hoc apprecati, vt memor gratusque esset, cum ad Imperium venisset. Idem hoc prodigium iterum ei sic factum. In Africam, sub *Aspare* copiarum duce, profectus est: atque ibi pugna cum *Ganzerico* rege parum prospera, capitur asseruaturque. Cum pluribus sub diuo recumbit, calido item sole: ecce aquilam quæ aduolat, Marciano supersistit, & in coram omnibus vmbraculum ei sedulo præbet. Vidit ipse *Ganzericus*, & miratur, & vocat: ac liberum hac lege amittit, vt Imperator pacem cum Vandalis colat. Nec diu post, mortuo *Theodosio*, *Pulcheria* eius soror Principem hunc, & sibi maritum, destinat. sed maritum sermonis causâ: stipulaturque vt nomine contentus, cetero fructu corporis sui abstineat: quod castum pia virgo Deo consecrasset. Numquid veracia, & palam à Deo hæc Signa?

VI.  
DCC.XII.

Atque eadem, sed tristioris fortunæ nuncia, in Hispaniâ apparuerunt, *RODERICO* vltimo Gothorum rege. Palatium *Toleti* erat, sed clausum & validis vectibus ferroque munitum. Fama tenebat, reſeratum id excidio Hispaniæ futurum: quod *Rodericus* ridere, & thesauros oculi ratus, seras perfringendas curauit. Thesauri nulli, ceterum arca reperta, & in eâ linteum: in quo insolentes hominum facies vestesque depictæ, atque ipsi militari habitu atque impetu grassantes. Verba Latina inscripta, *At tali eâ gente exitium Hispaniam manere*. Quid plura? fides factis facta: *Iulianus* Comes, cuius filiam rex stuprauerat, ex Africâ hostes inducit, regem occidit, patriam perdit.

VII.

Sunt & *Parua* magnarum sæpè rerum signa. Nostro æuo, cum in locum *Paulli* IIII. Pontifex creandus esset, & in conclaue purpurati patres venissent: en super *IOANNIS ANGELI* Cardinalis Medicæi, qui post *PIVS* IIII. nomen habuit, columba aliquamdiu circumuolitans, cellam confedit: nec aliter omnes interpretati sunt, quàm velut à Numine missam, Pontificem hunc ostendere designandum.

VIII.

In translatione Lusitanici sceptri ad *PHILIPPVM* Hispaniarum regem, notatum à curiosis est, *Sebastianum* regem Lusitanæ,



niæ, cum in Africam magnâ molæ moueret, & pecuniæ inopia esset, edicto permisisse & aditum dedisse in Lusitaniam *Regalibus Castellanis*: quod genus monetæ antea ibi spretum. Item, in ipso apparatu & cultu nobilium, sub discessum omnes subito variasse, & ad Hispanicum transisse. Clariora sunt, quàm vt interpretatione illustrentur.

At verò *Spectra* etiam sæpè & Genij, variâ specie, prædicunt. IX.  
Vt ille, qui DIONI SYRACVSIO apparuit, postquàm patriam magnâ suâ gloriâ à tyrannide liberasset. Domi sedebat, & clarâ luce habitu Furia mulier se obtulit, grandi staturâ, horrendâ sæditate. Ea domum scopis cœpit verrere, nihil aliter prolocuta: & territo Dione, cum familiares aduocasset, spectrum abscessit. Sed non noxa, quam signabat. nam filius eius grandior, incertum an per insaniam subitam, an iram, è summâ domo præcipientem se iecit, & sedè occidit. Sed & ipsum Dionem mox insidiatores domi interfecerunt, vxore & sorore eius in carcerem abductis. Quid? non egregiè domus hæc versa, si non euerfa fuit, monstro significatum?

M. BRUTO Dionis æmulo, simile etiam spectrum oblatum. X.  
Parabat traicere ex Asiâ exercitum in Europam, & funestos illos Philippos, vbi mox certatum. Nox alta erat, Luna lucens, & Brutus aliquid serium animo voluebat, aut, vt alij, lucubratur: cum ecce sonus strepitusque ad cubiculi ianuam, & ingreditur vastâ formâ Æthiops, sæuo & terrente aspectu. atque is silentio ante Brutum constitit. Qui animo & ore constans, interrogat: *Quis hominum deorumque es? quæ res huc egit?* Responsum rettulit: *Malus tuus Genius sum, in campis Philippicis me videbis.* Iterum animosè Brutus: *Videbo.* Disparuit. sed vt dixerat, in ipsis illis campis comparuit, nocte quæ pugnam vltimam antecessit: cum à bono Genio Brutus desertus, malo succubuit; atque adeò ipse occubuit, & Romana cum eo Libertas.

Compar istis, quod patrum æuo LVDOVICO Hungariae regi accidit: cui bellum *Soleimannus* Turcarum Princeps parabat, atque ipse pariter se accingebat. Prandeat in arce Budæ, XI.  
∞. 13.  
XXVI.  
foribus



foribus tunc regiæ de more clausis. Astat ad portam quispiam humanâ specie, sed claudus, distortus, & habitu cerero cultuq; fædo: qui acri & stridulâ voce clamat, poscitque colloquium regis. Negligitur, & putabant mēdicabulum hominis esse: cū magis magisq; inclamat, & opus conuento rege, nec alio, esse. Re ad regem delatâ, mittit è splendidioribus aulicis, iussu nomen & personam suam præferre, & hoc quidquid esset elicere. Venit, & appellat claudum de arcano. qui inspecto, abnuitt hunc regem esse: & *Quoniam*, inquit, *audire aspernatur, abi, nuncia breui & certò periturum*. Et cum dicto ex oculis adstantium euauit. Nimis vera comminatio fuit. rex ad *Mohatzium* vrbein, grandi prælio victus, & fugiens in paludes incidit: & dum enititur, equo super eum corruente obteritur, aut suffocatur. Annum agebat vigesimumprimum.

XII. Ad *Vaticinia* aut prædictiones venio: è quibus *Thrasylli* *TIBERIO* facta, quàm testata est? Erat in comitatu Tiberij, Mathematici titulo, cū Rhodi in exilio ageret. In exilio: & quàm procul à Principe? & *Caius* ac *Lucius Cæsares*, etiam viuebant. Non desinebat tamen iste identidem Tiberio fidem facere certi Principatus. Sed parum credulo, & iam de dolo etiam suspectanti: & ne subornatus ab æmulis, ad eliciendas arcanas aliquas voces esset. Atque adeò perdere eum statuit, & clàm necare. Domum Rhodi habebat. & in eâ turrim, quæ rupibus imposita, mare ex alto despeçtabat. In hanc turrim ducit Thrasyllum, cum vno fido & valente liberto comite: certus, vt dixi, tollere, nisi fidem ei faceret fidæ prædictionis. Cū ascendissent igitur, cœpit interrogare: *Soli sumus, dic per quidquid carum habes, vera hætenus mihi dicis? de imperio etiam adfirmas*: Ille iterare, & sidera sic velle. *Si de meo igitur statu comperitum*, inquit, *ex sideribus habes: de tuo ecquid ais? inspicere*. Ille thema ponere, situs ac spatia siderum considerare: denique timere, pallescere, & exclamare, *Anceps sibi, ac propè vltimum, discrimen instare*. Eo dicto complexus hominē Tiberius, verè consciū futurorum asserit: & quod de ipso meditabatur, si non satisfecisset, pandit. Quâ arte hoc Thrasyllus potuerit, verè siderali, an potius Geniali, alibi videndum sit: nunc aliud eius



eius mirandum addo. Ambulabat in litore, cum eodem Tiberio. navis longè conspicitur: ille statim affirmat Româ venire, & litteras nunciosque ab Augusto de reditu eius afferre. An & hoc tale ex fideribus? nugæ: ex instinctu.

Neque minùs nobiles istæ (plures enim sunt) in DOMITIANI Principis rebus. Fuit *Largius Proculus* quidam, vir inter illustres: qui publicè in Germaniâ prædixit, ipso tali die Domitianum obiturum. Cumque res ea ad Præsidentem dimanasset, gratificaturus Domitiano, & simul quia hæc præfagia vetita, vinctum eum Romam misit. Nec negavit, cum introductus ad Domitianum esset, imò magis magisque asseveravit. Iussus igitur in carcerem recludi, & asseverari donec dies is transisset, tum puniendus: imò, ut res docuit, tum liberandus, & præfagij suscipiendus. Aliud. Fuit eodem tempore *Ascletrio* Mathematicus, qui & diem & genus mortis Domitiani apud quosdam dixit. Vocatus ab ipso, eadem iteravit: quærentiq; Domitiano, ut eluderet, *Tu igitur, quâ morte periturus?* ille statim, *Fore, ut à canibus laniaretur.* Tum Imperator, ad fidem coarguendam, exemplò abduci, & vivum exuri iussit: siue, ut Suetonius, prius interfectum. Sed utrùm horum, tamen extra urbem, viâ Latina, homo vritur, scilicet ut nihil reliquum è cadauere esset, quod canes laniarent. Sed ecce nimbus subito ortus rogam exstinguit, & ministri semivivum relinquentes diffugiunt. Canes superueniunt, & vorant. Vespere cananti Domitiano, inter alias fabellas eius dici, id refertur: & valdè eum, sed frustra commovet. Munit se, domi hæret, neminem admittit: sed sui eum reperiunt, & Stephanus, cubiculariorum primus, eadem patrat. Quâ ipsâ in re, *Apollonei Thianei* nobile vaticinium non est omittendum. Erat tunc Ephesi in Asia, tanto tetrarum & marium abiunctus. Is dissertationem fortè in publico habebat, ac primò hæsitare & loqui remissiùs, mox palescere, & silere: denique passus aliquot exsiliens, ut mente motâ, *Euge Stephane, inquit, rectè. Percute tyrannum, percutite homicidam. Benè est, percussisti, vulnerasti, occidisti.* Hæc in publico dicta & gesta, ipsâ horâ, quâ Stephanus percussit: ô mira, sed vera. Attexerur autem non indecorè

XIII.



## Q V Æ S T I O:

*Liceâtne igitur & debeat, in euentus inquirere,  
& vates aut diuinos consulere?*

Denteron.  
ca. xvii.

lib. iiii. de  
Africâ.

Lib. lxx.

1. Histor.

Non arbitramur: etsi suprâ tetigi, prudentiâ aliquâ scrutari posse & odorari, quò tendant fata. Sed distinguenda tota res est: & sic habe. Indicijs aut notis, quas vir prudens ex lectione, ex usu, & obseruatione similium collegerit, aliquid suspicari aut præsumere de fatiis, id licet: sed cautè, & timidè. At ex artibus magorum, ariolorum, diuinorum, mathematicorum, & quod aliud tale genus, id verò nefas est, nec diuina aut humana lex permittit. Deus palàm edicit: *Non inueniatur in te, qui ariolos sciscitetur, & obseruet somnia atque auguria: nec sit maleficus, nec incantator, nec qui Pythones consulat, nec diuinos, & quærat à mortuis veritatem. Omnia enim hæc abominatur Dominus.* Et nostra diuina lex tantùm? etiam falsa illa Mahumetis. Ioannes Leo scribit: *Magiam & caballisticas artes lege Mahumeticâ vetitas, & velut hæreticas haberi.* Huius enim, inquit, *Alcoranus OMNE DIVINATIONVM genus vanum esse asserit, Deumque solum arcana nosse.* Benè hoc & prudenter Mahumetes: atque omnis bona Respublica damnat. Illa Romana, quot decretis & legibus? notæ sunt: nec causæ etiam ignotæ, aut diu quærendæ. Eruo istas, primam, quòd turbant prædictionibus animos, & ad nouas aut magnas spes impellunt. Mecænas apud Dionem, in Oratione ad Augustum de Republicâ constitutendâ, dignâ quam Principes legant: *Τοις δὲ μεγάλαις, inquit, πάλιν ἐν ἑῷ παροήμει. πολλοὺς γὰρ πολλὰ καὶ οἱ τοῖστοι, τὰ μὲν πρὸς ἀληθείαν, τὰ δὲ πλεῖον ψευδὴ λέγοντες, νεοχρῆν ἐπαρῆσι: Diuinos & vates in republicâ esse, prorsus non oportet. Multos enim hitales, dum vera quadam, plura falsa proferunt, ad res nouas impellunt. Rem dicit. & quid tam proprium istis, quàm magna & blanda prædicere, & animos ad fortunæ fastigia attollere? facili nostrâ credulitate, tamquàm peritiâ, & monitu fatorum (ait Tacitus) prædicantur; & cupidine humani ingenij, libentiùs obscura credi. O veriloquia! inclinamus: & vidi & risi Principes viros, auribus atque animis*  
in



in hæc pronos, imò alia omnia artium præ his spernentes. At, vt Dio aiebat, turbas & res nouas dant. Quis nescit, qui historiam veterem legit? & ad scelus (ait iterum Tacitus) ab huiusmodi votis facillimè transitur. Hinc conspirationes in Principem, aggressiones, deiectiones: & quæ copiâ exemplorum deterreor affirmare. Poëta sufficiat, aut veriori nomine hîc vates:

— Nos prauum ac debile vulgus

*Scrutamur penitus superos. hinc pallor, & ira,*

*Hinc scelus, insidiæque, & nulla modestia voti.*

Statius.

Apollo veriora dicta numquam dedit. Sed caussa altera, Fallacia. Nihil in prædictionibus istis firmum, nihil ex arte certâ (quidquid assimulent) haustum: & qui veriora dixisse videntur, à Genijs habent. Sed ipsi quàm ament & gaudeant nos fallere, id quoque scimus. Quid, quòd vel inuiti etiam fallunt? neque enim sunt omniscij, & quamquam subtiles, & arcanorum Dei per notas scrutatores: tamen aberrât, & abyssum illam Fati non peruadunt. Itaque benè iterum Tacitus: *Mathematici, genus hominum potentibus insidum, sperantibus fallax.* Certè vtrumque. nam & potentes destituunt aut decipiunt, aliò transgressi: & vanitatibus fallunt. *Pâtere* (ait iocosè Seneca) *quando Mathematicos vera dicere.* Patior. & tot sagittas cùm emittant, vnâ tangere, aberrantibus centenis. Enimuerò ridiculi Principes, qui huc se donant. Vide Agrippinam, Neronis matrem: quæ mortuo Claudio, domi eum aliquâdiu tenuit, & famam de morte suppressit, vt progressui scilicet & auspicijs *tempus prosperum, ex monitis Chaldaeorum, attentaret.* O dii deeq̃ue, tetigit! quàm salutaris ille rector, quàm diuturnus, quàm illi & sibi letus etiam fuit! Bellum aliud in Nicetâ Choniæ, prudenti illo (fatendum est) historię scriptore. Tangit vitium sui (vtinam non & nostri!) xui, atque ait: *Nostris temporibus IMPERATO-*  
*RES NIL SINE PRAESCRITO ASTROLOGORVM agunt: &*  
*rebus gerendis dies atque horas eligunt, vt sidera dictarunt.* Itaque *Alexius Imperator, diu cunctatus, quando opportunè Blachernas re-*  
*diret: tandem dies & hora ex astris eliguntur. Redit. & quidem ita*  
*feliciter, vt cùm primùm se moueret, terra ante ipsum profundè debi-*  
*sceret: atque ipse euaderet, sed Alexius gener eius, & multi illustrium*  
*in specum delaberentur, læderenturque: Eunuchus verò vnus è gratio-*

1. Histor.

Tac. xii.  
Annal.



*sis planissimè periret.* En, & hîc veracem ac felicem artem! quam Deus de industriâ ridendam sic propinat, vt nos auertat. Recitat magis ridendum, de *Manuele*. cuius imperio, cùm Siculi & Latini mare occupassent, vicinum Byzantio, & damnum ac dedecus in oculis cottidie esset: semel iterumq; in eos classem misit, sed cum clade & ignominiâ semper repulsam. Igitur Mathematici & alstra consuluntur, eligitur dies felicior, nec ambigitur de successu. Parat se *Constantinus Angelus*, vir illustris, & prodit iam in hostem: sed ecce citis nuncijs è medio cursu reuocatur: quia explorauerat Princeps parùm certò & sagaciter indagationem factam, & erroris aliquid interuenisse. Ergo thema iterum statuitur, magnâ curâ: & diu disputato inter peritos, tandem conuenit de benefico & salutari siderum aspectu. Constantinus emittitur: & quid quæris? victoria in manibus. Adeò quidem certò, vt vix in mare progressus Constantinus, non dicam vincatur, sed ipse cum suis capiatur: quo nihil deterius potuit euenire. Eant Principes, & his credant. Atqui peritiores aliquos fortientur. Ita, peritiores ad fallendum, non ad sciendum: & quidquid dicitur, extrema fraus & noxa occupabit, rideant licet prima. Valerij verbis claudam: *Mathematici* (& alios intellige) *leuibus & ineptis ingenijs, fallaci siderum interpretatione, quæstuosam mendacijs suis caliginem iniiciunt.* Audis Princeps? *leuibus & ineptis ingenijs* adhærent, placent: & tu inter eos censeris velis? Audi & de *quæstu*, quod addit: finem hunc omnes istæ præstigiæ (non enim artes) habent: caue, sperne. Tantùm, si *Somnia, Signa, Spectra, Vaticinia* Deus palàm mittit (& viros tunc pios doctosque consule:) insuper ne habe.

*De Mathematicis*

## C A P. VI.

### DE CONSCIENTIA.

*Eam curandum esse, atque obsequendum.*

**A** Religione priusquam abeam, de Conscientiâ etiam admonéo, & adnecto. Quid ea est? ex religione & Dei metu animi iudicium ortum, bona approbans, mala abhorrens.

Omnes



Omnes illuc vocamur ab interno isto iudice, velut ad tribunal: & homini formato indelebilem hunc characterem Deus impressit. Tertullianus pulchrè: *Potest obumbrari, quia non est Deus; exstingui non potest, quia à Deo est.* Vtrumque rectè. nam & nubes aliqua siue aulæum ei obducitur, affectu aut contemptu iubente: sed prorsus non amouetur aut tollitur, imò ipsa aulæum tollit. Mali doctores in Politicis, qui hanc seponunt aut calcant: qui externam virtutum speciem nobis ingerunt, ipsas admitti negant. Bis terque miseri, etiã mne animo huic & Conscientiæ imponent? Vela te, & verte in varias formas: vbicumque vera virtus non est, vitium subsequetur, & ex eo inquires in animo aut timor. Vetus ille idem scriptor: *Omne malum aut timore, aut pudore natura suffudit.* Quanto melius, securius, firmitus, rectâ aperta que viâ incedere, Deo, sibi, hominibus, se probare? Exclamare cum Philosopho nostro: *Nihil opinionis causâ, omnia Conscientiæ faciam. Populo spectante fieri credam, quidquid me conscio faciam?* Ades, ades, quisquis populum ducis, hanc habe consiliorum actionumque tuarum ducem & magistratam. *Nihil hac luce clarius, nihil hoc gloriosius testimonio, cum veritas in mente fulget, & mens in veritate se videt.* Vis vnum, sed illustre, probæ vitæ, probæ mentis exemplum? cape.

Apolog.  
cap. i.

Seneca.

Bernard. in  
Cantic.  
Serm.  
1 XXXV.

LIVIVS DRVSVS, cùm domum in Palatio ædificaret, & architectus offerret, ita se structurum, vt libera ab arbitris & omni despectu esset: *Quin tu potiùs, inquit, si quid in te artis est, ita compone domum meam, vt quidquid agam, ab omnibus inspicere possit.* Vox magnifica, vox laudanda! vita an pro eâ fuerit, ambigo, neque inquirō.



## CAP. VII.

## DE PROBITATE, ET CONSTANTIA.

*Vtramque Principi conuenientem, aut necessariam esse.*

**H**As Virtuti & Religioni addidi: quæ iure vbique vtraque in Principum factis se ostendat. Quid enim *Probitatem* appello? nisi rectum & sine fuce Virtutis amantem animum, qui quæ ipsam propter ipsam, non commodum aut famam, amat. Talem in Principe requiro, & ex descriptione Amphiarai, apud Æschylum:

Οὐ γὰρ δονεῖν δίκαιος, ἀλλ' εἴθ' ὀλέει,  
 βαθεῖαν ἄλωνα δὲ φρενὸς καρπύμενος,  
 Ἀφ' ἧς τὰ κεδνὰ βλαστάνει βελύματα.  
*Nam iustus esse, non viderier studet,  
 Sulcum profundum in mentis agro conferens,  
 Consilia de quo germinant salubria.*

Bona descriptio, & monitio. Iustus probusque esto: & ex profundâ mente pullulabunt honesta, & vtilia, consilia. Ne enim ista separemus: non inquam Honestum ab Utili. & errat ab Italiâ doctor, qui ducit aliò; qui tyranniones minutos, non Reges aut Principes legitimos format. Abeat. tolle tu fucum & fraudem: quæ nec valida, nec diuturna esse possunt. Postea super hac re plura. At verò *Constantiam* dico, animi erecti magnitudinem, qui vtrique Fortunæ par est, nec attollendus à lætâ, nec alterâ deprimendus. Sicut adamas, nobilissima inter gemmas, infractam vim habet: sic Princeps debet animi robur. Et verò quàm ei opus est? in altam illam fortunam quot nimbi, procellæ, fulmina incidunt, aut incurrunt? Nihil miseriùs Principe, qui ad singula moueatur, aut se inflectat. Debet & ab usu, & tractatione rerum, induere Constantiam. Videt adfiduè incerta rerum humanarum: publicè aut priuatim casus & calamitates audit: versetur in ijs, non inhæreat. & ut rota in curru per terram voluitur, sed super eam exstat: sic ipse.



ipse. Tractet humana, & norit: sed ijs se etiam eximat, & secum  
 dicat: *O quàm contempta res est homo, nisi super humana se erexerit!* Seneca.

Denique poëtæ hoc imbibat:

*Lege Deum, minimas rerum discordia turbat,*

PACEM SVMMA tenent.

Lucanus.

Sed exempla aliquot veræ Probitatis, & tum Constantiæ vi-  
 deamus.

ARISTIDE inter Græcos, quid probius aut simplicius? I.  
 qui cum gloriæ & nominis causâ periclitaretur in exsilium de-  
 cennale mitti, quod à genere suffragij *Ostracismum* Græci di-  
 cunt: minuendæ scilicet priuatæ potentiæ, & muniendæ publi-  
 cæ libertati: ille, inquam, cum in suffragia iam iretur, ipse quo-  
 que aderat, & stabat permixtus plebi. Ibi aliquis de numero,  
 scribere imperitus, hunc propinquum rogavit, ut in testulam  
 nomen *Aristidis* inscriberet, damnandi scilicet eiiciendique.  
*Ergo eum nosti?* inquit: *aut alibi is te læsit, nocuitque?* *Neutrum,* in-  
 quit alter: *sed hoc malè habet & damnatum eo, quod passim vocari*  
*audio iustum.* Testam accepit Aristides, & paruit, ac nomen  
 suum promptè inscripsit. O summa Probitas, & alio quàm po-  
 pulari illo theatro digna!

In iisdem Græcis, EPAMINONDÆ tota vita nil nisi probi- II.  
 tas & rectitudo fuit: adeò in factis non obliquus, ut nec in ver-  
 bis: & *ne ioco quidem mentitum unquam*, fidi scriptores tradide-  
 runt. Idem, cum invidiâ premente, bello præfectus non esset, re-  
 tamen & necessitate talem Ducem postulante: imò & alius im-  
 peritus eiusce artis dilectus esset: ipse nihilum motus, pro gre-  
 gario milite nomen dedit. Ac cum mox, ignaviâ ductoris,  
 ventum in verum & grande discrimen esset; cunctis circum-  
 spicientibus & Epaminondam requirentibus, ille alacris, & de-  
 tersâ iniuriæ memoriâ, prodijt, & exercitum obsidione ere-  
 ptum, incolumem in patriam reduxit.

Simile aut gemellum tuum Q. FABII factum, qui cum III.  
 per iniuriam equatus imperio, ipse Dictator, cum *Minutio* Ma-  
 gistro tuo militum esses; quin & diuisio legionû, ut inter Con-  
 sules solet, facta: haud diu fuit, cum temeritas & vanitas in  
 laqueos



laqueos incidit, datura Annibali pœnas, nisi tu patriæ & ciuium caritate, & probitatis illo stimulo, copias tuas statim de castris eductas hosti obiecisses; & ciues non libertati solum, sed sanitati reddidisses. Pœnituit enim actorum, atque ipsum adeo auctorem Minutium. qui reuerentiâ & admiratione virtutis, signa, se, & suos in castra tua reduxit, & serio submisit ac subiecit.

IV. M. PORCII CATONIS nomen, in duplici homine meruit, vt Probitatis & Virtutis habeatur. Sanè ille senior, quantâ integritate vixisse debuit, qui causam quinquagies dixit, & obtinuit? nec id gratiâ aut opibus, sed contra gratiam aut opes totius ferè ciuitatis. Nam inimicos plurimos ei aut inuidos, cum Probitas tum & Seueritas faciebat: qui nemini parcere aut amicus esse didicerat, qui reip. non esset. Atque adeo (miræ fiduciæ factum) ex hoc numero inimicorum *Tib. Sempronium Gracchum*, cum senex accusaretur, vtrò iudicem poposcit & sumpsit: sed & aduersario iudicante absolutus, in posterum & gloriam sibi & securitatem peperit.

V. Quid Iunior CATO VTICENSIS? sed ille Constantiæ referuetur, cuius pectus templum & sacrarium proprium ei Diuæ fuit.

VI. In eius locum M. BRUTVS prodeat, qui & in contubernio eius vixit, cum Cyprum peteret; nec virtutibus solum, sed adfinitate se iunxit. Duxit enim *Porciam* eius filiam, tali patre, tali marito dignam. Sed ipse Brutus, fallor, aut vnicum exemplar est in omni vitâ benignæ & mansuetæ Probitatis. Quàm compositus ille animus fuit, qui instante Pharsalicâ pugna, ipso vespere ad multam noctem legit, & scripsit, Polybij Epitomen commentans? Vnde ea quies, nisi ab animo introrsum quieto & puro? Qui nec Cæsarem quidem cum perturbatione aut odio occidit: testante M. Antonio, cuius hæc vox fuit, *Unum se putare M. Brutum, exsortem affectus, Cæsarem adortum, patriæ & legum amore*. Atque ita est. alij in regem surrexerunt, ipse in regnum. Quàm certum argumentum in ipso M. Antonio? quem cum vno ore coniurati occidendum



dendum cum Cæsare censerent; solus restitit, iustitiam magis quàm commodum spectans, & quia ex normâ legum modò putaret, tolli tyrannum. Eâdem animi rectitudine, cum alij optimatum ad Octavianum deflecterent, illum colerent: restitit, & palàm denunciauit, imponi & tolli in humeros tyranni heredem, grauiori mox seruitute. Nec id quidem metu suo, aut odio. quem ille odisset, qui nec armatum & insidiosum hostem, C. Antonium? Bis eius copias & ipsum cinxit, & in manu habuit capere aut occidere: dimisit. Quo tam benignæ virtutis fulgore milites percussi, ad eum transierunt, atque ipsum ducem captiuum tradiderunt. Quid deinde in Lycios? acres & peruicaces hostes erant: tamen captis per vim arcibus aliquot & opidis, omnes sine pretio liberos dimisit. Nec sic placantur. igitur Xanthios obsidet, premit, & fortuitus ignis urbem comprehendit: quem ciues introrsum, desperatione & peruiciâ, augent, alimenta iniiciunt, se interficiunt: Bruto miserante, restinguente, salutem offerente. Sed & lacrimas vbertim emisit in tristi casu, & præmium militibus pronunciauit, si quis hominem Lycium conseruasset. Talis & in Patarense fuit, petinaciter item resistentes. Atque ipse cum animi dubius esset, oppugnaret an omitteret; non victoriæ diffidentiâ, sed metu similis vesaniæ: ecce habuit in potestate plerasque eorum fæminas, quas omnes intactas in urbem remisit. Perfregit ea res animos, & sponte opidum Virtuti, quod non Terrori aperuerunt. Tamen ille tam mitis in hostes, qualis in suos fuit? seuerus, vbi meruissent. In ipso ardore ciuiliū armorum, cum multa militi, omnia ferè ducibus licent, accusatum apud se à Sardianis *L. Pellam* Prætorem, reperundarum, nihil cunctatus damnauit, & infamiâ notauit: improbante & indignante Cassio, quòd id temporis amici non alienandi, sed noui adiungendi viderentur. At ille in Virtutis & Iustitiæ orbitâ firmus, nec in communi excessu excessit: & deferi, ac deserere omnia maluit, quàm illas. O virum, cui vel hostis meritò lacrimas impendit! Is fuit *M. Antonius*, qui intercepti (sponte, & suâ manu) corpus liberto cuidam sepeliendum tradidit: atque adeò paludamento suo velaui. Quod ille cum auaritiâ interuertisset, neque vnâ cremasset; gnarus iratusque



Antonius, protinus interfici iussit, cum hac superdictione: *Et tu nesciebas, cuius tibi viri sepulturam mandaueram? Nesciebat vile ingenium: sed viri hercules magni, & vel primi, vel ultimi (vtrumuis dicas) Romanorum.* Transeo ad exempla

## CONSTANTIAE.

- I. Quorum agmen ducat PHOCION Atheniensis: vir qui contra vulgus, contra potentes, contra fortunam & mortem ipsam immotus stetit. Oraculo aliquando Athenis recitato, *Esse vnum virum, qui à concordi ciuitate dissentiret: quærentibus omnibus, & freudentibus: Quæso, inquit, quiescite: ego ille sum, quem queritis. nam mihi nihil eorum, quæ agitis, placet.* Proh animus! sicne vnâ voce totum populum reum agere peruerfatis, & insipientiæ? Sed causa tamen erat: & illis Alexandri temporibus, populus Atheniensis delirabat senectute. Idem igitur, cum Dux electus, trepidos suos in bello videret, & linguâ solâ fortes, prudenter abstinuit à pugnâ. Mox, cum rediissent, & pace factâ incusarent illum ignauia, & quasi vincere nescisset, aut noluisset: inquit, *Felices vos, qui Ducem habetis vestri gnarum! nam alioqui iamdiu periissetis.* Festiuè & mordaciter, exprobrans ignauiam & imbelliam, quam in animo gerebant, ore auertebant. Iterum in populum, & eius aurigam Demosthenem. cum ille quasi coercens libertatem Phocionis diceret, *Interficient te Athenienses, si furere cœperint: iste, At te, inquit, si sapere.* Terigit illum, vt improbum; hos, vt parum sanos. Et constans hic tenor per omnem vitam, nec in morte deseruit. ad quam publico iudicio damnatus, scissâ ciuitate in factiones: cum duceretur in carcerem, præcurrerunt improbi, in viâ obuij & conuicantes. inter eos vnus, sputum in os eius congeffit. Ille conuersus placidè ad Archontes, *Nemon' huius, inquit, reprimet proteruiam?* Cum amicus eius in carcere quereretur, quod iniustè cum Phocione interficeretur: *Et tu, inquit, non in magnâ gloriâ ponis, quòd cum Phocione?* Alio rogante, *Numquid ad filium vellet?* Maximè, inquit: *iubere me, vt iniuriarum populi Atheniensis obliuiscatur.* Alio amico petente, vt priori sibi bibere cicutam liceret: *Gravis mi Nicocle, inquit,*



quit, ( id ei nomen ) hæc petitio : sed cui per omnem vitam nihil ab-  
nui, hoc quoque indulgeo. Ita constantissimus vir obiit, cum sui  
famâ, Atheniensium infamiâ æternâ.

Quid verò mulier in eâdem Græciâ? CRATESICLEA II.  
fuit, mater Cleomenis, qui rex Sparta res ibi nouauit, aut potius  
lapsas in antiquum locum reponere tentauit. Is cum grandi  
bello cum Achæis distineretur, sed & Antigonum ac Macedo-  
nas timeret; à se impar, opem & opes à Ptolomæo Ægypti rege  
petebat. Qui spem fecit, eâ lege, vt hæc Cratesiclea mater  
eius, itemque filius, obsides fidei in Ægyptum mitterentur.  
Durum & insolens satis visum Cleomeni, nec ausus matri pro-  
ponere, etsi necessitas adigebat. Itaque aliquoties loqui eâ de  
re conatus, abscondit, & abscessit. Mulier acuta animaduertit ali-  
quid esse, & amicos eius percontata, *Ecquid vellet effari Cleo-*  
*menes, nec auderet?* Quin hortata eos est, vt incitarent & sub-  
monerent. Tandem ergo Cleomenes postulata regis aperuit:  
illa autem in cachinnum effusa, *Et hoc erat, inquit, quod di-*  
*cere aggressus, non dicebas? Mitte verò hoc corpusculum quocum-*  
*que terrarum, vbi vsui Sparta sit, potius quam hic senio & desidia*  
*soluatur. At tu vir & rex esto.* Statimque institit mitti, & na-  
uigare. Deduxit igitur Cleomenes cum toto exercitu Tana-  
rum vsque, Laconia promontorium, vbi parata naus. Illic in  
templo Neptuni congressi, priusquam nauim conscenderet,  
inutuo complexu & lacrimis ( quis matris & filij affectum ne-  
scit? ) diuelluntur. Sed illa egrediens, *Age rex Spartanorum, in-*  
*quit, compone vultum & animum, ac caue quisquam, qui foris adsi-*  
*stunt, lacrimantes nos videat, aut Sparta aliquid indignum admitten-*  
*tes. Hoc enim in nobis est, casus dii gubernabunt.* Sic fata egreditur  
alacri aspectu, puerum manibus trahens: nec faminam solum  
exiit, sed matrem. Eadem paullò post, cum Ptolomæus parum  
ex fide ageret; & Cleomeni occasio esset paciscendi cum Achæis,  
sed cunctaretur ob matrem: illa audito, rescripsit animosè, *Age-*  
*ret quod ex vsu & dignitate Sparta esset, nec Ptolomæum hunc ti-*  
*meret, ob vnâ animum & puerum, quorum esset compos.* O mulier,  
non quidem filio meliore, sed fato digna! nam & tu, & ille,  
postea sub ignauo & infido rege periistis.



III.

Licet & alteram fœminam addere MONIMEN Milefiam, quæ insigni formâ & lepore, sed ingenio melior, *Mithridati* regi, placuit. Tentavit pudicitiam eius, blanditijs, donis, & ad quindecim millia aureorum simul misit: quæ fortiter spreuit, & reiecit procum regem, donec nuptiarum titulo & pacto eucit. Sed nec eæ fregerunt magnitudinem animi. mærebat, & sortem suam deplorabat, quod pro marito dominum, pro liberis & familiâ, custodiam nacta esset eunuchorum & barbarorum. Victus tandem Mithridates à Romanis, & animi atque amoris æger, ne in potestatem Monime veniret, misit qui mortem indiceret, eunuchum *Bacchidem*. Illa nihil cunctata, & cupienti propior, diadema detractum capiti (nam vt regina ornabatur) collo aptauit, atque ex eo se suspendit. Sed imbecillo & diffracto, indignabunda, *Infelix fascia*, inquit, *nec hîc mihi eris vsui?* Et abiiciens illud ac conspuens, iugulum Bacchidi alacriter obtulit, ac tantum non læta periit.

IV.

Quid Græca me tenent? M. CATO ad se vocat, ille inclytus Constantiæ sacerdos: cuius vel à puero dedit specimen. Nam cum apud Liuium Drusum auunculum, vnâ cum Cæpione fratre educaretur, ac Latini sub id tempus de impetrandâ ciuitate agerent: euēnit, vt *Popedius Silo*, vir inter primos Latinorum, hospitium item apud Drusum haberet. Itaque cum pueris familiariter cauillans & iocans, & *Heus vos*, inquit, *ecquid apud auunculum pro nobis, & ciuitate capiendâ, intercedetis?* Ibi Cæpio blandè statim annuere, Cato silere & toruū intueri. Tum Popedius, *Quid tu igitur? non promittis?* & simul sustollit, & extra fenestram elatum, pendulum habet, cum minis & terrore deiiciendi. Vocem etiam & vulgum exasperat: sed Cato nihil motus, intrepidè sustinuit, & perstitit silentio negare. Ibi Popedius, relato & deposito, submisit ad amicos: *Et quid si hic vir sit? ne unum quidem suffragium, credo, in populo feramus.* Benè diuinabat. nam Cato firmus & certus, nihil in remp. vllò metu dicere aut facere; sed nec ab alijs, quod in se erat, fieri. Eiusdem roboris, in Sullanis temporibus, à paullò iam grandiore exemplum. Annum enim agebat quartumdecimum: & sæpè *Sarpedon* pædagogus & do-



& doctor eius ad Sullam ducebat, honoris causâ, salutatum. Atque ipse admittebat, quia amicus patris eius fuerat, & comi sermone excipiebat. Domus autem illa parùm à carnificinâ aberat. ita capti, vincti, torti, ducebantur, sed & capita inferebantur & efferebantur interfectorum. Cato inhorruit, & vidit alios clàm ingemiscientes: atque ad magistrum suum, *Hunc hominem*, inquit, *quid ita nemo interficit?* Subiciente illo, *Nam metuumt eum magis, quàm oderunt. Quin tu ergo mihi*, inquit, *gladium dedisti, vt eum interimam, & patriam è seruitute asseram?* Quæ dixit vultu atque oculis ita acribus & minacibus, vt Sarpedon deinceps & rariùs ad Sullam duceret, nec nisi tentatum & excussum. Tertium, à iam viro. *Metellus Nepos* Tribunus plebis remp. turbabat perniciosiis rogationibus, quas Catoni certum erat impedire. Ille hoc prouidens, Cæsare adiutore, forum de multâ nocte seruis & mercede conductis operis occupauerat, vim haud dubiè factururus in resistentes. Amici igitur Catonis, & tota domus, mæsti & anxij; solus ipse securus cibum cepit, dormijt, manè ad forum ijt. Cùm venisset, videt templum & gradus Castoris armatis infessos, ipsum Metellum assidente Cæsare, supernè imminentes, quasi duces: omnia ad pugnam & tumultum parata. Risit, & ad proximos: *O hominem timidum, qui aduersus unum & inermem tantum habuit dilectum!* Et Munatium Tribunum è bonis, manu secum trahens, eluctatus per gradus est in summum: atque ibi medium se statim immisit & composuit, inter Cæsarem & Metellum. Stupuit ipsa audacia, ad hoc robur: & cùm trepidè Metellus legem per scribam recitari iussisset, Cato inhibuit: donec ipse Metellus, arrepto codice, recitaret. Sed & hunc Cato è manibus ei extorsit: ac Metellus, signo dato, armatos immisit, dissipatâ statim concione, & nemine, præter Catonem, restitante. Hunc cùm lignis lapidibusque peterent, *Murena* Consul agrè texit, & abduxit: sed confirmatis iterùm ciuibus redijt, & solâ suâ constantiâ pestilentem rogationem disiecit. Quartum. Pompeius ab Oriente redux, & in magnis opibus ac gloriâ, vidit quid animorum in viro esset, & quanta sibi accessio si hunc adiunxisset. Itaque ad affinitatem adspirauit, & sororem (siue sororis filiam, vt alij) petijt vxorem. Votiua



conditio omnibus visa, atque ipsis maximè fæminis: sed non Catoni. qui renunciari liberè iussit, *Non capi aut illaqueari se per fæminas. quòd si Pompeius rectam in rep. viam iniret, vltro se amicum fore, sin aliam, nullo pacto aut pretio.* Quintum. C. Cæsar Consul legem de diuidendo agro Campano ferebat, priuatim utilem, publicè exitiosam. Vnus Cato resistebat acerrimè. adeò vt Cæsar pro imperio, abstrahi à Rostris hominem, & duci in carcerem iuberet. Ducebatur, sed & sic inter viam de lege identidem differebat, incommoda & insidias eius ostendens. Iamque peruenerat pænè ad carcerem, deducente pleraque parte Senatus & optimatum; cùm Cæsar à constantia victus destitit, & è Tribunis vnum submisit, qui eximeret & liberaret. Sextum. Præturam petebat Cato, & impetrasset, nisi Cæsar, Pompeius, & illa potentium manus se obiecisset: vnum hunc reueriti, vt progressibus suis impedimentum. Itaque effusà & apertâ largitione effecerunt, vt præferretur ei Vatinius, mortalium pænè postremus. Quid Cato? accepit & tulit iniuriam eo animo, quo alij beneficium: & vultu etiam nihil deiectus, eodem die in forum venit, ambulauit, & pilâ lusit. Deus immortalis, an non super affectus & motus humanos hic vir fuit? an non dignus, de quo poëta scriberet:

*Quippe malo vnum Catonem, quàm trecentos Socratas?*

Dignus. & robur etiam in morte sileo, quod variam interpretationem habere potest, & nostræ religionis scito, culpam.

V. PORCIAM subnecto, patri filiam. Nupserat ea M. Bruto, marito heroinâ hac digno. Is cùm agigaret de nece Cæsaris, etsi sedulò filebat, tamen vultu manifestus erat grande aliquid & atrox agitare. præsertim amanti, & coniugi. Suspicata igitur tale aliquid, & maritum filere quia diffideret imbecillitati: statuit sui sumere experimentum, & fecit. Cultro tonsorio, cùm sola esset, grauitè in femore se læsit. Secutus sanguis largior, debilitas, atque etiam febris: cùm Brutus domum venit, trepidus & re inopinatâ mæstus. Illa remotis arbitris, *Age mi marite, asside, est quod seriò fabulemur. Ego tibi cùm nupsi, coniux in domum tuam veni, non amica aut pellex: nec mensæ aut tori tantum, sed tristium latorumque consortem me dedi. Catonis filia sum:*

*Et pro*



& pro illâ stirpe me cense. Quid ergo? de te queror? minimè, si alia specto, & sollemnia coniugiorum, aut benivolentiam suæ & amorem hunc externum. Sed altius spiro, & amicitiam etiam volo: atque unus ille in animo dolor est & pungit, fidem non haberi fidei meæ. Nam quid dissimulas? nōne curam video, quæ te coquit? arcani magnique aliquid, quod agitas? Cur me celas? auxilium si non speras, solatium exspecta: nam de silentio, possum apud te spondere. Non respice ad alias mei sexus: ego ( iterum dico ) Catonis filia sum: & addo, M. Bruti uxor. Vel natura me à tali patre, vel consuetudo à marito, fortem constantemque reddant, etiam aduersus extremos metus. Quid verba facio? rem vide. Cepi ipsa mei experimentum: & ecce hoc vulnus, quod sponte intuli, ut discerem ecquid dolori aut tormentis par essem. Sum, confide. possum ferre, possum contemnere: & mori o Brute cum marito, & pro marito possum. Proinde siquid tu honesti agitas, quod utroque nostrum sit dignum, ne sile. Brutus admiratus animum, & osculatus affectum, manus præ gaudio in altum sustulit: & O omnes calites, adeste volentes propitij, ac dignum me Porciæ maritum præstate. Tum ordine coniurationem aperit, & consortes: nihil territæ aut deterrenti, imò animanti. Atque hoc primum eius Constantiæ, ut sic dicam, sacrum: alterum à mariti morte. Audiit enim de tristi in Philippis pugna, & Brutum suum fuisse. nihil igitur morata, mori voluit: sed amici & custodes impediabant. Illa ipsis & iam sibi irata, Quid? inquit, mortem aliquis impediat, aut neget? non potest: & pater vos docuit. Ac cum dicto profiluit, & è foco prunas arden-tes haustas ori ingessit: & spiritum, quem emittere non potuit, suffocauit inclusum. Probas hoc? inquires. non, sed miror: imò & probet aliquis, sed ab illo æuo.

Ad Christiana & nostra exempla tutius transeo: quæ in sanctis viris & martyribus sunt infinita. Nullâ re hæc religio magis abundat, magis se commendat & adfirmat. Sed ea in suis locis sunt prompta: nos sparsa in historijs colligimus. & in ijs vnum ALFONSI PERESII GUSMANI, in Hispaniâ Bæticâ, cui à moribus cognomentum BONI fuit. Magnus pace & bello ille vir, clarus opibus & earum usu: atque ecce specimen. Rex Castellæ Sanctius Tariffam ( quæ veterum Carteia siue Tarte-  
tessus

VI.  
∞. CG.  
XCIII.



*teffus* est) de Mauris ceperat, sed anxius custodiendi & tenendi, ob hostium viciniam, & ingentes sumptus. Suscepit vtrò in se curam Alfonsus, & partem stipendij de suo daturum promisit: rex interea res alias ageret. Paullò pòst, frater regis, *Ioannes*, à ambitione prauâ ad Maurum transijt, & copijs ab eo acceptis subitò Tariffam obsedit. Obsessi nihil trepidare, in suâ & ducis virtute fidere, animos supra periculum habere: nisi quòd infregit eos subitò inopinata res, captus Alfonsi filius (in agris fortè interceperant:) & ante mœnia ostensus. Vnicus porrò patri erat. Illi minari, nisi opidum dederetur, sub oculis interfectorum se, & fœdè lancinatuos. Motis flexisque alijs, ille nec hillum: & altâ voce negat, *Si centum filios in potestate haberent, non ideò se à fide & honesto abiturum.* Quin, inquit, *si tanta libido ingulandi est, en gladium:* & suum è mœnibus proiecit. Stupor me habet hæc scribentem: quid spectantes? Ille sic abiit, & ad prandium se composuit. cùm ecce clamor & eiulatus dissonus auditus eum euocat: iterumq; in mœnibus se sistit. Quærenti consternationis causam, refertur, *Filium barbarâ crudelitate interfecitum.* Hoc erat? inquit, *credebam urbem ab hostibus captam:* & pari tranquillitate ad prandium vxoremq; redijt. Creditis posteris? sed credite. res ita gesta est: & hostes magnitudine viri attoniti, nihil vltra tentantes, discesserunt. Libet hîc exsultare: estne factum vel in omni antiquitate fortius, vel laudabilius? Gratulor tibi gens & domus illustris Ducum *Methymæ Sidoniæ*, quæ ad hunc auctorem stemma & sanguinem refers. Felix origine, esto imitatione.

VII. Hæc ad miraculum exempla sunt: alia non tam ferientia, sed haud minùs sapienti approbanda. De FERDINANDO Hispaniarum rege traditur, postremo isto qui Mauros eiecit, per omnem ætatem firmo constantiq; ingenio fuisse: & cùm vtramque sæpè sortem expertus esset, prospera atq; aduersa sic cõpositè & sedatè tulisse, vt nulla vinqum in vultu eius consiliorû aut affectuum vestigia deprehenderetur. Idem cùm Barcinone, à furioso quodâ graue vulnus in ceruice subitò accepisset, neq; animo turbatus est, nec gemitû aut vocem doloris indicè emisit: tâtum seruari paricidâ & examinari iussit, quo auctore fecisset.

Vxor



Vxor eius ISABELLA virilis animi curæque mulier, & hac laude æquauit, aut superauit maritum. Nam cum nuptias adornaret cognominis suæ filiæ, cum *Emanuele* Lusitaniæ rege, & subito nuncius adferretur de morte *Joannis* vnici filij; illa hoc agere, & dolorem comprimere, vultumque fingere tamdiu potuit, donec Emanuel ab alijs id rescisset. Eadem non in aduersa solum valitudinis, sed in partus acutissimis doloribus, & gemitum & vocem suppresserat. rem incredibilem, nisi à fidissimis matronis, quæ à cubiculi curâ erant, id certò se cognouisse *Marineus Siculus* adfirmaret:

Horum nepos CAROLVS QVINTVS Imperator, cum in Germaniâ copias & castra ad Ingolstadium haberet, cinxissentque eum ingenti numero militum fœderati hostes: nec illi visum dimicare, vel quia sui nondum conuenissent, vel quia præuidebat tutam mox & sine cæde victoriam: ecce isti æneorum tormentorum copiâ validi, tantum ferreæ grandinis in castra iaculati sunt, vt vno die ad VI. millia maiorum globorum numerarent. Itaque omnia ictibus peruia, ipsum Cæsaris tentorium, & ad latus eius & tergum occisi: cum ille nec locum, quid locum? nec statum, nec vultum mutauit. Quinetiam monentibus amicis sibi, atque omnibus in se, parceret; dixisse arridens fertur, *Considerent, neminem Imperatorem tormenti ictu perijisse*. Breuia hæc relatu, examinanti ingentia sunt, & digna memoriâ ac laude sæculorum. Atque hæc talis constantia, & morum actionumque grauitas, in omni reliquâ eius vitâ fuit:

Etiam in sanguine. Nam ab hac stirpe PHILIPPVS II. rex, familiarium testimonio, Constantiæ laude veteres novosque æquauit. extra aut supra affectus; non gaudio, non dolori peruius, neque animo solum, sed vultu æquabili & immoto. Quis Sapientium, & qui vnum hoc egerunt, eò peruénit? Sed quod alij verbis; ipse factis sibi vindicauit, NEC SPE NEC METV. Finiui, & addo, non aliam virtutem Principe digniorem, aut in eo, vt sic dicam, honestiorem esse.



## DE PRUDENTIA,

*Quam Vfus & Historia gignunt, & pro-  
ducit Doctrina.*

**P**OST Virtutem, cuius caput est Religio siue Pietas, Prudentia necessaria est Principi, atque ijs qui in republicâ versantur. Hæc non aliud est, quàm notitia rerum euentuumque, & iudicium in ijs rectum. Tria illam pariunt, Natura, Vfus, Doctrina. Natura multum potest, & ab eâ solâ, aut certè leuibus alijs auxilijs, prouecti quidam operæpretium fecerunt. Sed vsus si accesserit, etiam mediocris Natura attollitur, & in consilijs actionibusque se probat. Quid si doctrina? plurimum: & tria hæc vbi concurrunt, mirum quàm valida ea mixtio, & vera ex ijs firmaque Prudentia oriatur. Nam profectò vbi aliquid horum solitarium, Superbia, Pertinacia, Error comitantur: & in multis scio me obseruisse. Quid tamen ex his ad rempublicam optimum? puto, Vfus: & Theognidem sapienter scripsisse,

*Δόξα μὲν ἀνδράποισι κακὸν μέγα, πέρα δ' αἰετον.*

*Est mala Opinio, at est homini longè optimus Vfus.*

Nam vbi sola Natura, siue & Doctrina; profectò Opinio innascitur, & gnari scientesque esse volumus, vbi non sumus. At Vfus firmior, & in artibus per se valet. Age, fabricam quàm multi solo opere & vsu didicerunt? quid artem navis gubernandæ? & ciuilis & militaris in republicâ quædam ars est: ab Vsu igitur discenda. Nectamen plenè satis aut perfectè. quia illa, quæ dixi, vniforme aliquid & simplex sunt; ista, Deus bone, quas varietates, quos sinus & recessus habet? Lumen vndique inferendum, vt peruideamus: & maximè à Doctrinâ, non illâ tamen argutâ aut subtilium scientiarum, sed memoriæ rerum præsertim, quâ Historiam appellamus. Nam ea, si attendis, quid nisi alter Vfus est? Quæ in isto video, tracto, facio; in illâ lego, haurio, disco: & tanto plura, quanto plus rerum



rerum euentuumque complectitur, ab omni æuo. Mihi paucis annis experiri licet, & in vnâ aliquâ orbis parte, siue angulo: illuc sæculorum res sunt; illuc, quàm latè patent sola hæc terrarum. Itaque materies discendi maior: & discas, si oculos mentis in illo velut speculo defigis exemplorum. Accedit, quòd prudentes multi, & vsu docti, olim ferè historiam conscripserunt: & ijdem sensus breues, aut monita inseruerunt, Deus bone, quàm recta, quàm salutaria, si bona mens eligit & excerpit? Sed Historiæ laudes pertexere, non hîc est locus, nec decet: addo, de *L. Lucullo* tradi, eo qui Mithridatem & Tigranem vicit, potentissimos reges, vix aliam imperandi bellandique peritiam, quàm ab Historijs attulisse. Et istas igitur præcipuè ego Principi; sed & adhærentem *Geographiam* commendem: *Geometriam* leuiter: & tum maximè *Philosophiam*, id est *Ethicam* *Physicam*que. Duæ istæ partes forment eius animum, vel ad Virtutum amorem & pretium; vel ad notitiam cælestium & terrestrium, è quibus Magnitudo animi oritur, & simul Modestia, collatione vtrorumque. Non insisto (alibi feci:) sed *Peregrinationem* etiam obiter suadeam: quæ valdè ad notitiam sui status, tum & ad Prudentiam facit. Hæc omnia quæ Principi, magis ijs & plenius, qui circa ipsum, suggeram: quibus plus scilicet otij, & sæpè ingenij est, ad talia pernoscentia. Sed age, pro instituto, Exemplis hæc illustremus aut firmemus.

**SOLON** Atheniensis, horum omnium vnus exemplum præbeat: in quo Natura, Vsus, Doctrina viguerunt. In republicâ assiduus ille fuit: sed etiam in peregrinationibus, & *Ægyptum*, *Cyprum*, *Asiam* lustrauit: atque id discendi causâ. Vsum vides: quid Doctrinam? scripta & versus docent, quos reliquit. Atque adeò tantâ eius cupiditate exarsit (sic loquendum est:) vt ipse in Carmine quodam gloriatur, *Cottidie adiscentem se aliquid senem fieri*. Cottidie. itâne? etiam circa ipsam mortem. Nam cum langueret, & assidentes amici aliquid inter se differerent, ille caput sustulit, & flexit ad audiendum. Interrogatusque, Quo fine tunc aut fructu? nobilem illam vocem edidit, *Vt cum istud sciero, doctior moriar*. O desiderium!



& quid in vitâ, aut eius flore faciendum: cùm ille hæc in morte?

II.

Lib. v.

Lib. xv.

EPAMINONDÆ verò, etsi in crassiore aëre nato, tantum litterarum studium, philosophiæ doctrina tanta fuit, vt *mirabile videretur*, ait Iustinus, *unde tam insignis militiæ scientia homini inter litteras nato*. Quod mihi tamen non mirabile. imò cum Diodoro Siculo sentio, qui ipsam hanc scientiam causam fuisse vult rerum ab eo præclarissimè gestarum. Philosophatus ille scilicet est, sed *ἀνδρὶ μάλα κατὰ*, vt Thucydides loquitur & approbat: *sine mollitie, aut desidia*: & habuit ad robur & ad prudentiam magistratam. Sanè Pythagoricis dogmatibus addictum maximè, & Physicæ scientiæ fuisse, idem Diodorus monet.

III.

Huius discipulus & alumnus PHILIPPVS MACEDO, non *Alexandri* solùm, sed & *Magni* pater. Ille inquam, omnem hanc magnitudinem aut institutione, aut instrumento & instructo reliquit. Gracia domita, & firmus ille ordo militiæ, veteranus miles, optimi Duces, hæc omnia à Philippo fuerunt: & ipse Philippus ab Epaminondâ, & doctrinâ. Nam obses triennio Thebis habitus, in eius domo diuertit, optimo magistro vsus ad dicendum, sapiendum, faciendum.

IIII.

Ipsè ALEXANDER haud aliâ re mihi quidem magis laudabilis, quàm doctrinæ studio videtur, & moribus quos hausit à doctrinâ. Ij fuere, Magnanimitas & Clementia. Sed à puero mitioribus artibus imbutus, mox in Ethicis & Politicis, alijsque Philosophiæ, præceptorem habuit Aristotelem: quem virum? ipsius Sapientiæ prolem aut alumnus. Felix doctore, sed & felix ingenio. cùm non, vt plerique, leuiter imbutus ijs animum, nec statim, vt ad arma veniit, artes fastidiret: sed & doctos in contubernio suo habuit, audiuitque; & ipse, cùm licuit, assiduè legit. Idque *Homerum* maximè. quem ita non amavit, sed coluit, vt cùm in Darianâ prædâ scrinium, gemmis & auro cultissimum, repertum esset, alijsque aliò destinarent; Imò, inquit, *Homeri carminibus reseruetur*: quasi pulcherrimum opus, pulcherrimo conditorio dignum esset. Sed

&amp;



& incubuisse, & indormisse eum sæpè Homeri libris, traditur: vel ex eo, non vulgaris scientiæ aut iudicij æstimandus, qui altum & super omne vulgus poëtam æstimaret.

Vltimus, inter Græca exempla, PHILOPOEMEN esto: V. quem vltimum Græcorum, magnâ eius laude, quispiam dixit. Is etsi in militiam studio & indole propenderet, tamen (ait Plutarchus) & Philosophorum præcepta ac monita legebat, sed non omnium; eorum dumtaxat, è quibus progressum se ad Virtutem sperabat facturum. Habebat & hoc in ore: Doctrinam debere ad facta tendere, non otij aut inutilis loquacitatis causâ usurpari. Atque utinam hoc alijs, vt mihi, probet! Sed nos facere id decet, Principes debent.

Ad Romanos transeo. quorum conditores ROMVLVS & VI. REMVS, non tam rusticuli fuerunt, quàm vulgò eos faciunt: si verum est, quod Dionysius & Plutarchus tradiderunt, Gabijs in adolescentiâ, liberalibus studijs operatos, atque omni eorum liquore perfusos. Et sanè facta atque ordo Romuli, non olent barbariem: minùs Numæ, Seruij, aut Tarquinij regum.

Etsi fateor iacuisse post, aliquot ætatibus, Romæ Doctrinam; donec Græciâ captâ, ab hac caperentur. Longum sit omnes aut plures dicere: M. CATO VTICENSIS, pronepos VII. illius qui Græcos & omne id genus pelli vrbe volebat, ita studijs eorum se dedit, vt & in Senatu, obiectâ leuiter togâ, libros legeret: vir, cuius nomen rectè factum defendit, quidquid fecit.

Quid IVLIVS CAESAR, ille sic acer militiæ, & Martis VIII. verè pullus? haud minùs Musarum fuit. Scripta eius id docent, quorum pauca exstant, pleraque perierunt: quæ inter ipsos rerum ciuiliū aut militarium æstus iactationesq; confecit. Nec in itinere quidem vacuus: sed amanuensem in vehiculo apud se habens, dictansque aut legens. Itinere Hispaniensi, spatio XXXIII. dierum, siue vt alij, septem, poëma composuit, quod inscripsit *Iter*. In ipsâ Hispaniâ sub tempus Mundenſis prælij (& quando vnquam magis, non dicam occupatus, sed sollicitus?) libros duos de *Analogiâ* confecit, & totidem *Anticato-*  
nes.



nes. Mirabitur, qui breuitatem temporis, & occupationes viri nouerit: sed non mirabitur, qui vigilantiam & instantiã, quando pleraque hæc & alia, ipsis noctibus, sub pellibus scribebat. Maeste diuini, & indefessi simul ingenij, vir! cuius & hoc signum, quod sollenne tibi *scribere & legere simul, dictare & audire* (verba Plinij sunt: ) *epistolas verò maximarum rerum quaternas pariter librarijs dictare, aut si nihil aliud ageres, septenas*. En aquilam! & quis ad hoc æui sublimis sic volauit?

IX. Nec degenerauit ab eo OCTAVIANVS, iudicio filius, postea Augustus. qui *Eloquentiam & liberalia studia*, ait Suetonius, *ab ætate primã cupide & laboriosissimè exercuit*. Ipso Mutinensi bello, in tantã mole rerum, & legisse, & scripsisse, & declamasse cottidie legitur. Itaque opera pluscula scripsit, quedam & versibus; à tempore tamen, & eius inuidã falce, præsecta. Nec in se modò eruditionem volebat, sed in Administris necessariam censebat. adeò, *vt cuidam Legato Consulari, tamquam rudi & indocto, successorem dederit, cuius manu* IXI. *pro IPSI scriptum animaduertat.*

X. TIBERIVS verò, vel ad culpam, vtriusque linguæ studijs artibusque se dedit. Affectabat enim & rara & obscura, & quæ pauci scirent, scire gloriabatur. Itaque adsidui in cohorte eius Græculi, quos & præmijs honorabat, & quæstionibus exercebat. Hic tamen est Tiberius, cui nemo in calliditate, & firmã regendi arte, se componat.

XI. Non eo per Imperatores ceteros: nam quis eorum non ferè talis fuit? Vsq; adeò vt M. ANTONINO *Philosophi* cognomẽ hæserit: quòd supra alios in eo studio deditus esset, Stoicam etiam sectam professus. Et quis tamen vitã melior, imperio mitior, aut felicior dabitur?

XII. Quid autem Christiani deinde nostri? de THEODOSIO IUNIORE traditur, eum historias Græcas Latinasque assidue euoluisse: tam pertinaci in libris studio, vt cùm diem militaribus aut ciuilibus occupationibus daret, noctem ijs seponeret. Quin & candelabrum sibi strui adfabrè curasse, eo opificio, vt oleum sponte ad lychnum perueniret ac suppeteret: ne  
vel



vel interpellarerur lectio, vel ministri cum vigilante (ô humanitas!) vigiles essent.

CAROLI MAGNI amorem & honorem in litteras multa lo- XIII.  
quuntur. Quid clarius, quàm, velut vexillo proposito, vocati  
vndique viri docti Lutetiam, in castra quædam litterarum!  
Felicia castra, quæ tot præclaros non milites, sed duces dedistis  
& datis, in militiâ hac togatâ! Sed illud quoque in *Paulum*, A-  
quileiensis Ecclesiæ Diaconum eminet, genere nobilem, inge-  
nio litterisquæ nobiliorem. His dotibus conciliatus olim *Desi-*  
*derio* Longobardorum regulo, dum fata erant: postquam ea ad  
Carolus transissent, huic ipsdem causis carus, & inter intimos  
familiares admissus. Sed Paulus veteris beniuolentiæ & aulæ  
memor, consilia agitabat liberandi Desiderij, & è finibus exsi-  
lij educendi: quorum conuietus, ipse in exsilium, in Diomedis  
insulas, seponitur. Sed nec illuc fidei aut legum satis reuerens,  
rupit transcenditque terminos, & ad *Ragaisum* Beneuenti Du-  
cem confugit. Itaque procures certatim accusant, damnantque  
capitis duplicem perfidiam: & in ipsum Ragaisum arma sua-  
dentur. frustra, apud mitissimum & litterarum amantissimum  
regem: quod solum nomen & titulus Paulum seruauit, ipsum-  
que cum Paulo Ragaisum ei conciliauit. Impositum mo-  
dò munus, vt Historias à fine Eutropij scriberet, item seorsim  
Longobardica, aliaque in profanis aut sacris. O dignum Prin-  
cipem, qui in digniorem hæc conferret!

Neque abnuo tenebras deinde fuisse, & nescio quo malo fa- XIII.  
to barbariem: præsertim in Principum aulis, & priuatum modò  
bonum Doctrina censebatur: an addâ, & nunc censeret? Tamen,  
velut stellæ, interluserunt pauci. vt ROBERTVS rex Neapoli-  
tanus, cui litteræ & litterati pericari fuerunt. Ille est qui *Petrar-* ∞. ccc.  
*cham*, & poësi, & serijs scriptis nobile ingenium, fouit: ille qui *XL.*  
*Boccatium* in amoribus habuit. Quid ipsam doctrinâ? Vox eius  
audita: *Cariores sibi litteras regno esse*. Desipuit, an altè sapuit?

Et quàm similis vox & animus ALFONSI illius magni, XV.  
in eodem regno fuit? Neque enim semel edixit: *Malle se om-*  
*nium regnorum* (septem ea numerabat) *iacuram facere, quàm mi-*  
*nimam*



*nimam doctrinæ*. Et sanè amauit in se, in alijs: & *Laurentium Val-*  
*lam*, *Antonium Panormitam*, *Bartholomæum Faccium*, *Georgium*  
*Trapezuntium*, *Joannem Aurisperm*, *Iouianum Pontanum*, & exa-  
 men deinde iuniorum, huic regi debemus. Ille Athenæa in re-  
 gnis passim, ille Bibliothecas instituit, aut exornauit: nec gra-  
 tius ei munus offerri poterat, quàm rarior aut electior liber.  
 Quin ipsum *Librum apertum* pro insigni vsurpabat: significans  
 Scientiam Principibus conuenire, ex ijs hauistam. Et cùm ali-  
 quando audiret regem Hispanum dixisse, *Non conuenire Prin-*  
*cipibus litteras*: stomachans subiecit, *Bouis, non hominis, vocem*  
*eam esse*. Itaque legit assidue: *Liuium & Cæsarem* maximè. nec dies  
 fuit, vt familiares tradiderunt, quin his inuersaretur. Idem,  
 quod miremur, *Annaei Senecæ* magnus amator: adeò vt ipse,  
 suo Marte, in Hispanicum sermonem Epistolas verterit, vsui  
 suæ gentis. Sed nec sacrâ lectione abstinebat: gloriatusque est,  
 totum *Vetus & Nouum testamentum*, vnâ cum *Glossis*, decies &  
 quater se perlegisse. Hæc Rex, hæc senex: vbi priuati & iuue-  
 nes estis? Senex, inquam. nam vix ante quinquagesimum an-  
 num studia attigit, institutione eius in adolescente neglectâ.  
 Tunc Grammaticam, operâ *Martini* cuiusdam didicit: quem  
 ita carum deinceps habuit, vt numquam à latere dimiserit. Vi-  
 deor non de Principe, sed litterione aliquo loqui: at ille etiam  
 quantus vir belli domique fuit? quàm magnus, quàm felix re-  
 bus gestis? Elogium ei demus. à *Carolo Magno* maiorem virtu-  
 te & fortunâ Principem Europa non habuit: & (mentiri ve-  
 lim) non habebit.

xvi. Addamus è Pannoniâ *MATTHIAM CORVINVM* regem.  
 qui clarissimo militari patre *Joanne Hunniade* natus, nec in eo  
 studio degener, Doctrinæ istud adiunxit. Ferox ad id æui ca-  
 natio, & tota Martis, cultum ingeniorum morumque à *Mat-*  
*thiâ* accepit: & quis nescit regum exempla subditos æmulari?  
 Itaque Italos Germanosque, siqui litterarum gloriâ clarent,  
 euocauit: Bibliothecam instituit in ipsâ regiâ Budæ, rarum  
 thesaurum, & quem cum dolore recordamur Barbaris, cum  
 ipsâ Pannoniâ, obuénisse.

xvii. An & mulier his se inseret? inseret meritò *ISABELLA*,  
 Ferdi-



*Ferdinandi Catholici* regis vxor. quæ ad omnia alta nata, & verè virilium curarum mulier, etiam Doctrinam vnice amauit. Delectatam semper constat (nescio quâ inclinatione animi) ipso Latinæ linguæ pronunciatu & sono: nihil vt libentiùs audiret. Et mox respirans paullisper à grauissimis curis & bellis (reuera enim particeps & thori & sceptri erat: ) respirans, inquam, statim se ad Grammaticum demisit, eique annum ita assiduam operam dedit; vt Latina non solum capere, sed vertere ipsa in suum sermonem, posset. Sacris etiam & diuinis officijs cum interesset, lapsantes, aut vel in sillabâ peccantes sacrificos aduertebat, sed & sæpè admonebat.

Enimuerò nec olim aut nunc Barbari (tam clara utilitas est) ab hoc cultu alieni. testor *MITHRIDATEM* illum veterem Ponti regem, qui variè, & in ipsâ medicinâ doctus; hoc præfert eximium, Tenuisse vigintiduas linguas, sic vt omnes subditos, quemque suâ dialecto, promptè & scienter alloqueretur. XVIII.

*CHOSROES* autem Persarum rex, *Iustiniano* & Romanis per suas clades notus, & eloquentiam Græcam adamauit, & Philosophiæ ipsius non limen, sed adyta penetrauit. *Aristotelem* totum percalluisse aiunt, *Platonis* lineas & numeros: sed & ipsa Græcorum opera in suam linguam multa transtulisse. Hæc aiunt: & demus famam aliquid adstruere: vel conatum ista. nōne magnum in magnis istis regum? XIX.

*MAHVMETES* etiam Turcae tenet, *SECVNDVS* eo nomine. qui cognitionis illustrium virorum facinorumque maxime cupidus, *Historias* sibi verti in suum sermonem iussit, Græcas Romanasque: & ipsos viros depingi à *Gentile Bellino*, elegantis pictore, quem ad hanc operam à Venetis exambierat. His ille stimulis, vtinam ne ad tam alta, & nobis tristia, animum æmulatione erexisset! XX.

*CAROLVM V.* de industriâ totum hoc agmen volo claudere, & simul salutare monitum suggerere. Eum magnitudo statim rerum & imperij, tenerum adhuc à studijs abduxit: et si amorem tamen & reuerentiam non excussit. Ac quondam XXI.



cùm Genuæ oratorem aliquem audisset Latinè dicentem, nec plenè satis cepisset, tristi & ingenuo ore confessum Paullus Iovius scribit (is arbiter coràm & testis erat:) confessum, inquam, *Dare se nunc puerilis incuria penas: & presagum Hadrianum præceptorem fuisse, qui hanc penitentiam ei prædixisset.* Credimus optime Princeps. & quàm multi hodieque tecum, iam grandiores, id est sapientiores, dolent in hoc neglectu? Cogitent parentes, emendent, filiorum & publico bono. Voueo.





IUSTI LIPSI  
 MONITA ET EXEMPLA  
 POLITICA.  
 LIBER SECVNDVS.

CAPVT PRIMVM.  
 DE PRINCIPATV.

*Eum præferendum alijs imperijs videri.*



VAE adhuc dixi, etsi ad Principem aptauimus, communia cum alijs sunt, & in omni imperio adhibenda. Hunc formare magis, & propius dirigere incipiam: si tamen prius breuiter adstruxero eum, & laudaro. Nam ambigere multos, & differi variè de optimâ Imperij formâ olim & nunc, scitum est: at nos istum præferimus, & causas distinctè, & velut per titulos libabo. Primò, quia liquet

MON. I. *Antiquissimum hunc esse.*

Homines autem primi, & origini suæ id est Deo proximi, malis artibus fraudibusque nondum corrupti, censendi sunt optima elegisse: elegerunt Principatum. In familijs, quod primum imperium, vnus fuit. Plures deinde familiæ cognitionibus iunctæ, vnum habuerunt: & ex istis societates, conuentus, oppida; vnum. donec magna imperia nata, & oppressio cœpit, ab ambitione exorta: & sic quoque ferè vnus. Seneca verissimè:



Epist. xci. rissimè: *Primi mortalium, quique ex his geniti Naturam incorrupti*  
*sequebantur, eundem habebant & Ducem & Legem, commissi me-*  
 r. De Cle- *lioris arbitrio.* Itaque idem alibi: *Natura commenta est regem. quod*  
 ment. *& ex alijs animalibus licet cognoscere, & ex apibus: quarum regi am-*  
 Epist. xci. *plissimum cubile est, medioque & tutissimo loco.* Sed quibus alijs ani-  
*malibus?* in parte alibi explicat: *Mutis gregibus aut maxima cor-*  
*pora præsunt, aut vehementissima. non præcedit armenta degener tau-*  
*rus: elephantorum gregem excelsissimus ducit.* Idem in ouibus, in  
 auibus, & alio genere congregum animantium, est videre. Est  
 igitur antiquissimus, & Sacrae etiam nostræ litteræ ostendunt:  
 in quibus à condito orbe ad diluvium, moderatum in familijs  
 imperium fuit: à Diluvio, ambitio miscuit, & *Nimrodus* Noa-  
 chi pronepos, imperium in Assyriâ & finitimis inuasit. Hic est,  
 quem profanæ litteræ (ad primorem sillabam allusione) *Ni-*  
*num* appellant. Sed addo etiam,

### MON. II. Communissimum hunc esse:

Neque olim tantum, sed & nunc plutimo orbis sic notari.  
 Olim quidem, Sacra dicunt. ubi Iudæi regem poscentes sic au-  
 diuntur: *Constitu nobis regem, sicut & VNIVERSAE ha-*  
 r. Reg. *bent nationes.* Sed & in Italiâ, primi illi Romani (apud Liuium)  
 cap. VIII. *in varijs voluntatibus, regem tamen OMNES volebant.* Etsi post-  
 Lib. I. *eà mutarunt, & ad Optimatum statum iuerunt: quid ita? na-*  
*turali hac sæpè mutatione, ut à rege in tyrannum, à tyranno*  
*ad optimates aut populum Respublica eât: iterumque ab istis*  
*ad tyrannum, & regem.* Fastidio & odio hoc fit, non Principa-  
 tus, sed Principis alicuius malè eo vsi. Ceterum & vetus hic  
 orbis Principes ferè vbique habuit, in Asiâ, Africâ, Europâ  
 (pauca loca, neque diu excipias: ) & nouus item repertus, sic  
 est, aut fuit. Argumentum, optimum vsu & ratione esse, quod  
 tam diu, & tam multis placuit: atque, ut dixi, ab ipsâ naturâ.  
 Sanè rationem si excutimus, eam videbis hinc stare, ab his  
 caussis. Primò dicimus,

### MON. III. Iustitiam magis in eo exerceri.

At Iustitiæ fruendæ causâ Imperia primùm sunt reperta.



Ea igitur magis in Principatu floret, vigetque: nec sunt noxæ aut corruptelæ, quæ in alijs illis formis. Vide. Rex aut ipse ius dicit (olim & \* nuper etiam factum:) aut qui dicant, eligit & designat. Si ipse, supra metum aut gratiam est, magis auaritiam: & nihil istis, quæ præstringere oculos iudicantium solent, donat. Si alij; sunt tamen ab ipso. & curâ eligit, & electis iam superest & intendit. Non sunt ijs sic libera iudicia, vt non iudicium huius metuant; & siquid foedius patrent, pœnam. In alio statu quid simile? Si ad Optimates is; factio, & agnati, & amici occurrent, & alternis inter se ius aut iniuriam gratificantes. Si ad Populum; magis peccabitur, & irâ aut affectu damnatos passim videbis, aut dimissos. Ad Athenienses aut Romanos leuiter transi: ostracismi optimorum sunt, & exsilia, & mulctæ. Contrâ, pessimis honores habitî, & iudicijs per vim & manum etiam crepti. Quid de corruptelis dicam? hîc regnant. Secundò,

\* Vide hoc  
libro, cap.  
x i.

**MON. IIII.** *Tranquillitatem & concordiam coli:*

Quod optimum aut optatissimum in Societate est, viuere quietos, à vi & iniuriâ tutos. Metus vel auctoritas hoc facit Principis. quem vnum omnes respiciunt: qui vnus omnia potest: & ius vitæ necisque habet. Itaque meritò animi magis domiti & fracti sunt, & colla ad iugum inclinant. Non sic inter plures dominos: quorum potentia sparsa est, & ideo minor, vt flumen in plures riuos diductum. Alius alium respicit; patronum contra hunc aut illum habet: & addo, quod nec coërcitio seuera aut libera. quia in suffragijs aut comitijs, popularium operâ egent. Itaque conuiuent & indulgent, gratiam singulorum quærunt. Ita minuitur Auctoritas; & quod sequitur, Reuerentia aut metus, vinculum obedientiæ & quietis. Parte alterâ minùs tranquilli, quia ad rempublicam sæpè auocantur. sunt comitia, sunt leges: & suffragia sua habent. In ijs deinde ambitio & factio interuenit: quid præterea? seditio sæpè, & turbæ, atque etiam pugnæ. Vt mare rarò quietum est, ventos plurimùm, & sæpè procellas habet: sic respublica,



I. Annal.

blica, vbi comitiorum potestas. Noster Tacitus rem tetigit: *Suspectum Senatus Populique imperium, ob CERTAMINA potentium, & AVARITIAM magistratuum.* En duas assiduas ibi Pestes: *Certamina*, & factiones, & exitum siue exitium, Ciuilia deinde bella: *Auaritiam*. & sunt nundinationes, rapinæ, corruptelæ, in magistratibus, in prouincijs, in iudicijs. Tertiò, & vniuersè dico,

MON. V. *Modum regendi meliorem tutiorémque esse.*

Princeps diutiùs imperat, vnus & idem semper manet: itaque & discit magis assiduo ipso vsu, & rem etiam, vt propriam, cordi habet. Aliter in magistratibus, qui mutantur. Sunt ferè annui: id est, abeunt imperio, cùm discere imperare coeperunt. Sed neque intentio eadem aut cura est, in breui & alieno imperio. Tradunt enim ignotis, aut inuisis sæpè successoribus: satis habent quomodocumque defungi, in posterum securitate. At Princeps non se solum cogitat, sed heredes. Deinde, arcana consilia aut litteræ sæpè interueniunt in gubernando: cum vicinis Principibus consilia aut pactiones, quas nolint intempestiue vulgari. Quod secretum hîc inter plures erit? quis liberè accedet, aut tutò credet? Hæc in Principatu cessant. & aut vnus ipse tractat; aut fidi ministrorum, quibus committit. Quid etiam de secretâ corruptelâ dicam, crebrâ inter plures? Vnus aliquis emi contra rempublicam potest, & sana consilia aut euertere, aut impedire. Athenis suis quàm hoc factum Demosthenes conqueritur, à callido Philippo! & *hunc esse scopulum* (ita loquitur) *ad quem res adhaerescant.* Quid Romæ? idem: & Tribunus aliquis emptus res turbabat, & hunc aut illum super capiti ciuium imponebat. Poëta ingeniosè,

*Mutatusque fuit momentum Curio rerum.*

Ita. vnus Curio à Cæsare corruptus, Cæsarem Pompeio antetulit, reipublicæ & libertati finem dedit. Quartò denique dicimus,

MON.



MON. VI. *Maximè hanc imperij formam  
diurnare.*

An non faciat, cum à Naturâ maximè & Ratione sit? Deus fauet & tutor est; vnus ille rector, vnus. Vide Status alios, pauci æuum tulerunt, quantumuis legibus bonis & institutis: excipio paruas quasdam respublicas, & validiorum tuitione aut amicitia firmas. Sparta, quâ nihil videbatur moribus aut viris melius, vix quingentos annos tenuit libertatem. Athenæ sæpe mutarunt, & oppressæ iterum caput extulerunt: sed turbidæ semper, & in metu, aut potèrioribus obnoxia. Roma quadringentos paullò plus annos liberum illum statum seruauit. Quid ista ad Principatus? Ille Assyriorum, vt à vetustissimo ordiar, *mille ducentos quadraginta annos stetit*: siue, vt alij largiùs, *mille trecentos*. Ita enim vel Historici, vel Chronici scriptores, consensu tradiderunt: nec Appiano vbi mens fuerit, ego scio. qui initio operis scribit, nec *Assyriorum, Medorum, Persarum tria regna simul congesta*, æquare illud spatium æui potuisse, quod in Romano imperio ad suum tempus esset. Profectò fallitur, nec excuses. nam à Româ conditâ ad Hadriani æuum *nongenti* circiter anni sunt, & sic ipse supputat: quanto plures, vt dixi, in solis Assyrijs? Iam Medi *ducentos sexaginta* ferè annos vindicant: Persæ *ducentos triginta tres*. Quamquam de Persis, mirum & notabile, haud diu ab Alexandro iterum reuixisse, & vires regnumque recepisse, duce Arsace quodam (vnde *Arsacida*) sub bellum Punicum primum, siue annum vrbs D. III. Sed quia tamen initium asserendi à *Parthis* fuit, inde Romani atque alij, Parthorum hoc regnum appellarunt: reuera tamen in iisdem ferè gentibus & finibus, mansitque ad *Alexandrum Mammææ* filium, per annos circiter CCCC. LXXX. Tum iterum nomen *Persarum* surrexit, duce *Artaxerxe* quodam, qui *Artabanum* demouit & sustulit, vltimum Parthorum Regum. Exinde autem ad hoc æui (diuturnitatem agnosce, & mirare) Persæ viuunt & regnant, etsi grauiter ab *Heraclio* Imp. confusi, postea à *Tamer-lan-co*, & nuper ab vtroque *Selymo* Turcarum, auo & nepote: sed viuunt.



viuunt. Quid de *Aegyptiorum* olim regibus dicam? millia plura annorum numerant, ad vltimam Cleopatram. Quid hodie de *Sinarum*? iidem millia: & à *Vitao*, qui primus fuit, ad *Bongum*, qui nuper imperitabat, reges in serie continuâ habent ducentos quadraginta tres. Rarum exemplum: neque in nostrâ Europâ reperiendum. Tamen & in eâ Principatus longæui. Gallorum regnum potens & florens, à *Faramundo* primo rege vsque ad *Henricum* IIII. qui nunc feliciter regnat, computat sexaginta tres reges: idque per annos  $\infty$ . C. XC. At in Hispaniâ Gothorum reges ab anno Christi CCCVIII. ad *Rodericum* & Maurorum inuasionem numerantur triginta nouem. Et sanguis quidem ille, sed non regnum defecit: suscepitque *Pelagius* anno Christi DCCXVII. à quo perpetuâ serie, nec interruptâ, ad *Philippum* hunc III. sunt reges quadraginta octo. Alia exempla in minoribus Principibus liceat dicere: omitto, sicut & Respublicas minores. Sola *Veneta* est, quæ æuum *milleñarium* iactet: felix fati, sed & legum atque institutorum felix, quibus velut vinculis firmata est adhuc contra lapsum. Maneat, Floreat, fauemus & vouemus.

## CAP. I I.

*In eo Viros Fæminis præferendos, & has vix feliciter imperare.*

**P** Principatus igitur optimus, & cum Solone,  
Εὐδαίμων πολίτην ἐνδὲς κήρυκος ἀνδρῶν:  
*Felix vrbs, quæ iussa vnus Principis audit.*

sed quis ille Princeps esse debet, vnus & melioris, an & alterius sexus? Vtrimque argumenta & exempla sunt: sed magis pro nobis. Vir ad virtutem, ad regimen natus: animo, corpore, voce, visu robustior, & quem magis vereare, aut venerere. In fæminâ omnia leuia, mollia; quæ amorem, non reuerentiam creent. A naturâ ipsâ timidæ magis sunt, quàm timendæ: non igitur hîc Auctoritas. Iam in viro prudentia & constantia: in illis calliditas aut argutia, imbecillitas  
 deinde



deinde iudicij, & in decretis sensibusque Euripus. Septies in die mutant. Rarò etiam altum aut honestum spirant: sunt in vanis aut vilibus curis: non ergo ad sceptrum & publicum decus idoneæ. Duæ etiam virtutes Principum primæ, Iustitia & Fides, firmiter vix sunt in istis. Non prior, quia inclinant facilè & miserantur: facillimè & gratiæ aut affectui obsecundant. Non altera, quia mobiles ingenio sunt, & mutant vt ventus. Ne Clementia quidem sit, quæ putetur: & benignior ille vultus, nescio quomodo, sæuum sæpè animum & vindicem celat. Quid de lasciuiâ aut luxu dicam? vtrique vitio opportunas scimus, & pudorem atq; opes prodigere: præsertim cum sui iuris ac spon- tis, frænum non habent quod adstringat. O quale regnum, vbi *Cleopatra* aliqua, *Messallina*, aut *Ioanna Neapolitana* imperat? Neque sine causâ Sacræ litteræ inter pessima comminantur: *Feminarum imperijs subiectum iri*. Sed parte tamen alterâ, exempla nos redarguant, itemque instituta gentium. Nam & alibi succedunt in regna, & feliciter atque industriè administrarunt: cui rei vtrique lubet Exempla ex Historijs dare. ac primùm

*Muliebris imperij infelicitis.*

LAODICE *Ariarathis* Cappadocum regis, cum marito mor- tuo in regni administratione esset, quas clades, in mediâ pace, dedit? Sæuijt passim in proceres, & in vulgus: parùm est. sæuijt in liberos, & suum sanguinem & (ô sancta pietas!) sex ex se na- tos veneno omnes sustulit: quâ causâ? tantùm, vt diuturnior in imperio esset. Vnus paruulus fato euasit *Medeam* illam: quem populus mox ad regnum sustulit, illâ prius communi- bus votis & suffragijs extinctâ. sed quid? vnâ & simplici mor- te extinctâ, quæ toties paricida, tot culleos meruisset.

Tale olim, & vetustius, in Sacris litteris, malum nomen *ATHALIA*, quæ *Iosepho* est *Gotholia*. Ea cum filius *Ocho- zias* per insidias interfectus esset, inuasit ipsa regnum: & nepo- tes ex eo, & totum semen regium sustulit: conuiiente in sex annos diuinâ Nemese. donec *Ioas* à mulierculâ cædi subdu- ctus & seruatus, & iam adultior, regnum, & tot agnatos, vindica-

K

vindica-

*Mulieres ad  
II. mala groupos*



vindicauit, belluâ illâ occisâ. Nam quid fœminam dicam, supra omnes feras immanem & sæuam?

## III.

Tragicum aulæum complicemus, scænicum siparium aperiamus: & lasciuiam pro sæuitiâ magis demus. CLEOPATRA in theatrum veniat, à paruulâ ad nequitias, libidines, & luxum facta. Tirocinium fuit in *Iulio Cæsare*. qui cùm Alexandria obsideretur; illa velut fati præsaga, fratrem *Ptolomæum*, & potiores (vti videbantur) partes deseruit, ad Cæsarem translata. Verè, inquam, translata. nam & hunc astum ad fallendum, & tutò transeundum, cogitauit. Portæ seruabantur, atque exitus: illa *Apollodorum* quemdam inducit, culcitâ se inuoluere & adstringere, vt farcinam: ac sic in regiam, vbi Cæsar, deferre. Factum est, deponitur ante pedes eius: & ecce soluta emergit Venus, non è mari, sed è culcitâ: & culcitellam mox se Cæsari substernit. Nam ille, etsi in medio actu & æstu etiam rerum, tamen & ingenio illo, & mox formâ ac lepore captus, adinauit: & pretium libidinum adolescentula necem fratris, & regnum Ægypti, tulit. Hoc, vt dixi, tirocinium fuit: fallor? an virgineam prætextam iam in amoribus *Cn. Pompeij* filij paulloantè posuerat? quod credere nos *Plutarchus*, bonus auctor, iubet. Credo tum, cùm missus ille à patre in Ægyptum, ad arcessendam classem & auxilia fuit. Sed hæc puella peccauit: quid iam mulier? flagitia, cum ætate, magis adulta. Post pugnam illam Philipensem, *M. Antonius* & *Octavianus* partiti inter se sunt operas; vt alter in Italiam rediret, & veteranos in agris disponderet: alter in Asiam & Orientem iret, pecuniæ vndique corrogandæ. M. Antonio istud euênit. qui dum reges, tetrarchas, vrbes, omnia excutit, & colligit: visum & de Ægypto cogitare, illâ diuite, & quæ offendifse videbatur, non semel auxilijs aduersæ parti submissis. Nam ipsa Cleopatra *Cassio* suppetiata dicebatur. Itaque, etsi succinctus iam ad Parthicum bellum, tamen *Q. Dellius* Senatorem ad eam mittit, & questum simul & denunciatum, vt in Ciliciam sibi occurreret ad dicendam causam. Ah miser! ad causæ dictionem euocas, tuam mox dominam & arbitram, & apud quam fatalem seruiæ seruitutem! Dellius venit,



venit, fœminam vider, & homo sagax quid futurum prævidet: quippe & huius Veneres, & simul obnoxium talibus Antonium notat. Itaque captare iam nunc huius gratiam, audacter monere ad Antonium iret: mite & venustum ingenium reperturam. Persuasit, & conscia formæ erat: ac pro eâ, & spe quam agitabat, cultum & comitatum sumpsit. Cydno fluuiio subuehi se molliter iussit, naui auratâ, remigio argentato, velis purpureis, ad modulos tibicinum & citharædorum. Ipsa recumbebat sub cælo aureo, gemmis distincto: pueri formosuli, habitu Cupidinum adstabant & ministrabant, quidam ventulum ei facientes. Virgines & ancillæ, instar nympharum, per foros & tabulata nauis disponebantur. Ad ripam vtramque frequentes ab obuijs, & visoribus, aræ & odores. Quid verbis opus? passim voces (& res ita erat) *Venerem ad Bacchum venire comessatum*. Iam propinqua Antonio erat. & ille, magnitudinis scilicet Romanæ retinens, pro tribunali etiam sedere, atque eam exspectare: quid nisi supplicem & excusaturam? At vide fiduciam. rectâ in hospitium abijt: & Antonius, ab omni cœtu destitutus, relinquitur solus. Itaque submittit paullum fasces, & ad cœnam eam inuitat. Recusat, & excusat: quid iam Antonius? malè sumptam personam abiicit, & prior atque vtrò ad eam venit. Cœnat ibi, edit & bibit amorem: quem illa non tam vultu, vt aiunt, quàm verbis & ingenio inspirabat. quæ vtraque tam mirifica possidebat, vt semel audita caperet & deuinciret. Argumentum sanè ingenij, quòd varias linguas docta, Hebræum, Græcum, Arabicum, Æthiopicum, Parthicum sermonem efferret, scito & natiuo cuiusque sono. Hem M. Antoni quid facis? ictus es, habes: & omisso bello omni, aliam militiam militas, & cum tuâ reâ in Ægyptum, id est in casses & carceres eius vtrò abis. Ibi quæ deliciæ, luxus, conuiuia? Non *Fulvia* tua abstrahit, mori in angore & æmulatione adacta. non postea *Octavia*, noua vxor: hæres, peris, ipsa tecum, & cum vtroque (infelicis fœminei regni exitus) ipsa Ægyptus.

Quid MESSALLINA in Romanis? illa sæuitiæ, avaritiæ, IIII.  
impudiciæ, impudentiæ, omnium flagitiorum (fas sit in illâ



fordidâ tali verbo vti) cloaca. Hæc vxor erat *Claudij* Imperatoris; nomine quidem. sed quem ipsa & liberti, vt elephantum paruus æthiops, regebant. Itaque iure hanc pono inter imperantium exempla. Omitto cædes tot nobilium, quas patrauit, tot exsilia & fugas: in libidine non credo ab æuo tale monstrum fuisse. Cottidie adulteria, nouæ conditiones & admissarij: nec clàm, sed in ipso Palatio, coram matronis & viris, quasi infamia delectaret, Veneriabatur. Quin noctu, vestetecta, & Messallinam dissimulans, ad publicum lupanar ire solita, prostare inter infelices illas victimas, cellam suam & titulum habere, accipere æra & poscere, & explere libidinem nec satiare. Quid etiam? marito ipsi illudere, & hunc adigere non testem flagitiorum, sed exactorem. Vide. Erat *Mneſter* quidam, nobilis Pantomimus, in quo ardere mulier coepit: & pro suâ verecundiâ, sollicitare ipsa, & poscere. Ille subduxit, & renuit, Principem reueritus; siue etiam veritus, ne torum eius non impunè macularet. Mulier ad hoc ridere. & *Quid ais?* inquit. *si ipse Claudius meus iubeat, parebis?* Incrediblem videbantur: fiunt. It ad maritum, persuadet illi stipiti, vt Mneſterem vocet, & iubeat, in omnibus dicto sibi audientem esse. Factum est: & mox histrio liberè, quasi iussu domini, res domini egit. Estne quod supra etiam possit mulier repperit. Vulgaria adhuc hæc probra videbantur: nouum excogitat, & cui post factum vix sit fides. Erat *C. Silius* Romanæ iuuentutis pulcherrimus. hunc allicit, fruitur, & palàm in amoribus habet. Præmium etiam eorum, facit Consullem, opes & decora Aulæ ad eum transfert: & iam colebatur; velut alter Princeps. Non est satis: oportet languentis voluptatis nouum aliquod esse condimentum. Itaque hoc addidit, vt maritum eum palàm caperet: viuo marito? viuo: Principe? Principe. Nec longiùs differtur, quàm dum maritus Hostiam iret, & quasi de compacto paullùm secederet. tum nuptiæ, & nuptialis tota pompa: flos Senatorum & Equitum adsunt, mensæ apparantur, lectulus Genialis sternitur, auspices adhibentur, alia sollennia: quin & in mariti gremio noua nupta recumbit, oscula, complexus, & reliqua licentiæ coniugalis. Dum scribo, stupeo: & adhuc etiam Claudius, nec excitabatur,



tur, nisi liberti, & in quorum manu res erant, metu mutationis, eum commouissent. Itaque tandem finis fabulæ impositus, venit Romam, tollit æmulum, & mox coniugem: nec id quoque, sine astu liberti.

Consortem an non liceat addere, F A V S T I N A M, & hanc V. etiam Romani Principis coniugem? Agebat in matrimonio M. A N T O N I N I *Philosophi* cognomento, optimi non Principum solum, sed virorum. Infelicem tantum hac fœdâ labe: quia & hæc libidinum sic promiscua & vilis erat, ut vulgò se vulgaret: in balneis, in arenis, & Xystis, ubi homines nudabantur, legere conditiones solita, & benè vasatos adnotare. Atqui non imperavit, inquires. Dedit qui imperaret *Commodum*, non falsâ opinione, gladiatore genitum: & hic rem Romanam perdidit, ab illâ matre.

In Galliam transeo, ubi reginam video F R E D E G V N D I M, V L. nec scio an scelestius aliquid Sol vidit. Ea diu pellex duarum reginarum, *Chilperici* regis Galliæ vxorum: alteram *Andoveram*, ut pelleretur, effecit; alteram *Galsuindam*, per insidias curavit occidi. Ita totum Chilpericum, & sola iam possidens, legitimam vxorem & reginam egit: sed, pro ingenio, parum fidam. Nam cum *Landrico* magistro equitum furtim consueverat: & res marito casu quodam detecta fuit. Ibat venatum, & vxorem conspicatus, quæ capillum comebat, & lotum siccabat in sole, accedit tacitus, & per lusum à tergo virgâ percussit. Illa suspicata amatorem suum esse, & nomine compellans, *Quid agis mi Landrice?* inquit: *quin si vir es, aduersam me, non auersam pete.* Confessio flagitij erat: & cum dicto se obuertit, plura etiam dictura; sed attonita maritum videt, & silet. Etiam ille, & porro venatum, ut instituerat, pergit: iram coquens, & vindictam, ut reserat, meditans. Sed præuenit mulier, & Landrico suo vocato: *Perijmus uterque*, inquit, *incautâ meâ voce*: & rem narrat, additque: *Quid stupes? virum ostende: patiendum, aut patrandum est scelus.* Landricus suo metu, & illo stimulo excitatus, rem suscipit: deligit duos è fidissimis, qui Chilpericum serâ nocte è venatu redeuntem, turbæ mixti, ferro inuadunt, & singuli singulis ictibus conficiunt.



Clamor est ab ignaris, & conscijs: atque isti, quasi externæ insidiæ essent, *In silvas*, vocem tollunt, eoque se proripuisse paricidas. Ita auctores celantur: & felix Fredegundis ad alia scelera animum adiicit, infensa inprimis *Prætextato* Rhotomagensium antistiti, non ob noxam aliquam, sed viri eximiam virtutem. Itaque lætissimo die Paschatis, cum in frequenti templo sacra perageret, non Deum non homines verita, percutiendum curavit letali quidem vulnere, sed cui aliquamdiu superuixit. Mæsta eo ipso, venit visere, siue vt exploraret, siue vt oculos in eius angore pasceret: atque ibi bellè, vt putabat, dissimulans, questus & iram miscuit, quod in tali die & loco, in talem virum, patratum esset facinus, & auctor lateret. Sed *Prætextatus*, vicinâ morte liberior: *Minimè*, inquit, *latet. & testor me eius scelere percussum, quæ reges occidit*. Benè ille de regibus. nam præter maritum suum, etiam fratrem eius sustulerat *Sigibertum*, *Mediomatricum* (vt tunc diuisio erat) regem. Sustulerat autem scelerato astu, immixtis duobus percussoribus: quos, cum facinus exsecuti essent, ilicò iussit interfici: vt vocem cum vitâ amitterent, & in tuto auctor agigaret. Ita iustitiæ victrix, si non famæ, egit: & paullò post *Childebertum* etiam regem, prælio prius victum, cui ipsa interfuit stans in primâ acie, veneno tolli cum vxore, eodem vtrumque die curavit. Quot palmas vna mulier meruit? habeat: & siccâ etiam suaque morte abeat, *Providentiâ* apud imperitos laborante.

VII.

Fastidio eiusmodi narrationum: nam quis modus sit, si velim persequi? Ecce in vno Neapolitano regno duæ IOANNAE, æuo suppare, in nequitia comparere: quarum flagitia atque etiam scelera (nam & hæc mixta semper adulterijs) Annales texam, si velim recensere. Et propero magis ad alia Exempla: neque enim desunt ea

### *Muliebris imperij boni, & felicitis.*

- I. PHILE vxor *Demetrii* regis, filia *Antipatri*, illius qui *Macedoniam* & *Græciam* viuo mortuoque *Alexandro* gubernavit. Hæc iam tunc puella, & in annis teneris, natiuâ quadam prudentiâ sic visa excellere, vt ipse pater consilia ab eâ peteret, & au-



& audiret. Pater, ille senex, ille usu & tractatione rerum sic peritus. Quid Demetrius, cum iam vxor eius esset? erat ipse vario ingenio, & vitijs propior: sed mirâ temperie hæc maritum flectebat, ne dicam regebat: calumnias supprimebat, iras mitigabat, iusta & honesta inferebat. Iam populi verè mater, renuiorum filias dotibus datis elocabat; afflictos à fortunâ releuabat, bonos prouehabat: quid apud ipsos milites? Saluo pudore fæmineo, & ijs se miscebat: alloquebatur, erigebat, tantâ auctoritate vel gratiâ, vt sola tumultuantes reprefferit, & in seditionem lapsos reuocarit. Quæ fides deinde & amor in ipsum maritum? cum victus à *Pyrrho* rege esset, castris ac regno exutus: viuere non vltra sustinuit, & morte spontaneâ inuidiam Fortunę fecit.

Æuo, non animo, inferior ZENOBIÆ Palmyrenorum regina. Hæc stirpem & sanguinem à *Ptolomæis*, & ipsâ Cleopatrá, sed non mores (dij boni, quàm aberat!) ducebat. Vxor erat *Odenati*, fortissimi viri, & qui ad imperium Romanum ausus adspirare. Illo viuo, ijsdem cum eo exercitijs, in venatu, in montibus, in siluis, in ipsâ militiâ vti. Amans eius vtique, sed ob matrimonij finem, liberos: quos vt concepisset, tangi à marito mox abnuebat. In alijs virtutibus, scientiæ etiam auida; & historiæ Orientalis ita perita, vt ipsa eam suo stilo in compendium redegerit, vsui posterorum. Nec Græci Latiniq; sermonis, aut rerum, ignara fuit. Formâ autem corporis egregiâ, *oculis supra modum vigentibus* (verba Pollionis dabo) & *nigris*; *tanto candore in dentibus*, vt margaritas eam plerique habere putarent, non dentes. Vox præterea clara & virilis. Cum his dotibus, vt dixi, nupta, & forti quidem viro, etsi haud felici. Nam Gallieno illo ignauo Imperatore, cum decus omne imperij labaret, aut rueret: ipse Persidem & Orientem inuasit, quasi *Valerianum* captum, & Romanam ignominiam vindicaturus. Res magnas gerit: adeò, vt ipse Gallienus consortem imperij sumpserit, & vtrò Augustum declararit. Nec diu in hoc honore, insidijs *Mæonij* consobrini sui vitam & potestatem amisit, aut hanc potius transiisit. Nam Zenobia illa vxor, laborum & victoriarum antè particeps (assidue



duè enim comitari maritum, ipsa etiam sub armis, solita) imperium suscepit fortiter, & gessit. Bella cum Romanis, & *Aureliano* Principe habuit: *Ægyptum* inuasit, & victo ac caeso eius præside *Probo*, occupauit. Denique *Aurelianus*, sed ægrè, fregit, non enim profectò vicit: imò velut tacito pacto, passa in triumpho se duci, sed vt vitam & dignitatem in parte seruaret. atque adeò sunt, qui filiam eius Imperatori dicant nuptijs iunctam: imò & stirpem eius diu post Romæ, inter illustres familias floruisse.

- III. Hæc militaris fæmina: pacatius exemplum *PVLCHERIA* dabit. Ea *Theodosij* iunioris soror, vitam & virginitatem Christo deuouit: paullò maiore natu, quàm ille. qui septuennis ferè à patre *Arcadio* relictus, hanc habuit morum & institutionis magistram. Atque adeò iam grandiore illo, adhæsit, & curas imperij participauit: salubriter omnia, & piè, modesteque disponens. Et verò quamdiu habenas tenuit, felix imperij & rectus cursus: postquam inuidiâ aliorum, & calumnijs Eunuchorum (*Chrysaphij* præsertim) submota est, & loco pulsa: contulit ea se in *Hebdomon*, locum Byzantio suburbanum, atque ibi summâ pietate & quiete victitabat. Donec post annos septem, fraude calumniatorum agnitâ, & imperio vndique concusso, fulcrum iterum rebus labentibus adsumitur, aut reparatio iam lapsis. Fit vtrumque: & restituit pleraque omnia, aut tuetur. Specimen animi eius & prudentiæ hoc esto. Fratrem *Theodosium* videbat, & dolebat, temerè libellis sæpè subscribere, & nec lectis: alienâ commendatione aut fide, vt fit, nixum. Dolum bonum hunc repperit, ad emendandum. concepit enim & ipsa libellum, atque obtulit: quo *Eudociam* eius coniugem petebat mancipari sibi in seruitutem. Caput, & subscribit statim: quidni in sororis petitione? atque illa, scænæ instruendæ causâ, *Eudociam* apud se aliquamdiu habet. Miranti, & euocanti, negat missuram, & suam eam, vt quæ OPTIMO MAXIMO QVE iure, esse. Profert mandum & subscriptionem, confuso iam illi, nescio an emendando. Reuera enim secors ingenium fuit, & alter *Claudius*, in fæminarum aut effæminatorum (Eunuchos intelligo) potestate. Mor-



te. Mortuo autem illo, & sine liberis, re celatâ, *Marcianum* euocat, vitâ & bello bonum, & ad imperium producit. Quoquē magis commendaret, nuptias suas ei donat, sed titulo tenuis: stipulata, ne sacrata Deo virginitas libaretur. Rexit cum illo annos aliquot, mirificè à nostræ religionis apicibus, *Leone* Pontifice, *Hilario* Episcopo, alijsquē laudata. Vixit annos circiter LVI.

Similem, non enim parem vndique, ei iungo ISABEL- IIII.  
LAM *Ferdinandi* coniugem, Hispaniarum reginam. Parem? in quibusdam superiorem, & solâ fortasse virginitate cedamus. Hæc, si pietatem spectas, in sacrorum cultu mirifica, & assidua; nullâ occupatione aut delectatione demoueri; horas suas Canonicas (vt loquimur) sacerdotali exemplo cottidie legere: ipsos sacerdotes honorare, templa exornare. Atque id suis aut suarum ferè manibus. cum & ipsa acu pingeret aulæa aut vestes, aut à familiaribus puellis pingi texique iuberet. Iam reliquæ virtutes instructæ huic fundamento. casta, sic vt nec rumor de eâ mentiretur; & maritum pariter eò ducens, pelli- ces, amicas, & id genus callidè scrutata, & ab Aulâ amolita. Frugalis adeò, vt in omni virâ nec vinum libarit: quæ virtus fomes, vt scimus, est castitatis, & modestæ grauitatis. Quam sanè habuit, exosa mimos, scænicos, ludiones, totum hoc leuitatis instrumentum, & nec priuatim aut publicè audire sustinens, vel spectare. Eorum vicem, viros graues, matro- nas serias apud se habere: item pueros aut puellas nobiles, & vtrosque, pro sexu, artibus studijsquē informare. Aula illa, nil nisi palæstra honoris & virtutis erat. Itaque insignes viri, etiam militiâ, ex eâ prodierunt: & magnum illum *Consaluum*, cui regnum Neapolitanum Hispania debet, hæc refert expensum. Matrona ipsa ciuiliū rerum gnara, bellicarum nec ignara. Quid magni in regno sine illâ, imò nisi per illam ferè, gestum est? Rex maritus & consiliarij, vsu edocti peritiam eius & felicitatem in sententijs, quæ edicebat pro oraculis (nec id per adu- lationem) amplecti. Illa factionibus, latrocinijs, infestum re- gnum purgauit, & pacauit: illa iustitiam restituit, potentio- rum iniurijs exulantem. Et quid alia commemorem? quàm  
L in



in graui animaduuerit, argumentum esto: quòd nec alex aut tessere ludum tolerauit, & edicto vetitum sic repressit (etsi prona eò gens est) vt nec furtim & in angulis luderent, soliti in cauponis, vijs, angiporis. Iam verò & militiæ non consilio tantum, sed operâ interuenit: modesta quædam Zenobia: & bellum Lusitanicum, absente marito, confecit; & Maurico siue Granatensi, quod plures annos traxit, pluries interfuit, & summam manum præfens cum marito imposuit. Magni ad omnia animi, & res spesque magnas complexa. itaque Nauarræ regnum consilijs eius iunctum; Canariæ insulæ occupatæ, & infessæ; ipse Nouus orbis, Naturæ occultior pars, per eam reiectus & subiectus. Nam maritus, cetera vir egregius, restrictior aut timidior erat, retinere sua melior, quàm augere. Hæc dilatabat. & cùm *Christophorum Columbum* diu rex duxisset, & ad extremum destituisset: bono Genio stimulante ad ipsam Reginam venit, conatus suos & perficiendi vias exposuit, & instrumenta, id est naues, viros, arma ab hac impetrauit. Salue, salue heroina, priscis par aut maior: & in quâ iure claudam exempla faminei boni imperij. quid enim tale addam?

## CAP. III.

## DE ELECTIONE.

*Quæ commendare eam, quæ abijcere possint.*

**V**iri igitur potiùs imperent, & soli. Sed quomodo? Electione, an Successione admoti? Electio antiquior videtur, & heroicis illis temporibus vix aliter factum; & Principatus pace aut bello, virtutis aut roboris prærogatiuâ assignati. *Natura enim est*, ait Seneca, *deteriora potioribus submittere.* Itaque Brasilienses quidam, cùm ad *Carolum IX.* Galliarum regem Rothomagum deducti venissent, valdè mirabantur, *Quomodo validi illi & proceri viri* (Heluetios intelligebant) *parèrent paruo & tenello regi.* Nimirum pro suo more, & sensu, iudicantes:



cantes: satis læuè, quasi à solâ corporis magnitudine præstantia esset. Sunt etiam rationes, quæ commendare Electionem videantur. Prima, quòd optimi & aptissimi per eam capi; non item à Successione possint, in quâ quoscumque genitos admitti. Item, quòd iustâ ætate capi, & idoneâ iam regere: aliter in Successione, vbi pueri sæpe aut infantes ius sumunt. Deinde, quòd regnum ita moderatius videatur. cum nec innutriti sint potentia, & ex eâ superbiæ; & quòd neque proprium habeant, ab alijs acceptum, ad alios transmittendum. Eò minùs intendunt imperium, aut subditos opprimunt: in quem enim post-vsum? Aperitur & virtutibus campus: ac multi ad eas adspirent, vel spe Principatus. Hæc & talia Aristotelem mouerint, vt Carthaginieneses laudaret hoc nomine, & Spartiatis præferret, qui stirpe reges legebant. Sunt & hodie, aut nuper fuerunt inter Christianos, electi reges: hodie quidem Polonia, nuper Bohemia, Daniaque. Ista pro Electione, plura in eam possunt. Primò quod dicitur, veterem esse: fatemur, sed vsus illis rudibus subiecit, hîc & alibi, meliora. Additur, optimos sic posse eligi: & verum est. sed etiâ mne eligi? si rem & experimenta vides, sæpe falsum. Rara electio, quæ sine priuato cuiusque affectu aut respectu fiat: nec rei publicæ vtilissimum, sed suæ legunt. Quærunt opportunos. vt omittam, pecuniam & corruptelas suffragia sæpe trahere, & rem geri promissis donisque. Atque ea nec fortasse meliore aliquo sæculo excludas: sicut nullo, odium aut amorem. Nicetas Choniates in hac re prudenter iudicat, vbi res Alexij Imp. Græcanici narrat: qui fato vicinus, & sine liberis, de eligendo successore cum suis agitabat. Scribit: *Igitur alij atque alij variè nominabantur, sed omnes qui sibi opportuni aut viles essent, nominabant. De eo autem eligendo, qui optimè & ex vsu publico imperaret, nulli cura aut cogitatio erat.* Verissima dicit, & vsu probata ac probanda. Iam quod terriò inquirunt, iustæ ætatis, & maturæ imperio, sic eligi: ita habet, & commodum est. Sed enim illud adheret incommodi, quòd regnum interea vacat, nec possessorem habet. Quod si quis considerat, maius malum est, & plura sæpe daturum, quàm imbecilla in imperio ætas. Sanè vbi interregnum est, iustitia &



leges silent, licentia & vis valent: atque id sæpè hebdomadas, menses, annos manet. Quæ intereà confusio, aut scelera sunt? quæ ambitio & prensatio? per quas fraudes, & artes? Germaniam vide, vbi Imperator demortuus: boni omnes in præfenti & futuro sunt metu. Ipsa Roma nunc, in sacrorum Pontifice, hæc mala est cùm sentit. Quid deinde in eligentium dissensu? dissidia, & bella. Quæ nec inter paucos electores semper effugias: appello ad illos Imperij Septemvirates. Appello ad ipsam iterum Romam: & cum noxâ religionis, & pænè dicam probro, audimus legimusque, plures vno tempore Pontifices, à tali causâ, se gessisse. Nota mihi istud, & incertum illud fluctuansque in successione: magna ratio & efficax est, ad totam Electionem repudiandam. Iam quartum erat, Moderatius ita fore regnum. Non abnuam: sed addam, solutius etiam, & minore curâ administrandum. Ut quidenim rei nec diu meæ, nec postea meorum, nimis acriter intendam? Frui satis est. Obnoxij etiam viuunt, siue ijs qui elegerunt, & quibus hoc velut beneficium debent; siue omnibus, qui in occasione minuere possunt potestate, aut priuare. Poloniam adi: hæc fiunt. Itaque & Iustitiam minus colere, necessum est: & Principem indulgere, aut oculos claudere, in potentium noxis. Dixi etiam, minus curæ aut custodiæ esse regnum: an non ita est? Germaniæ Imperatores video, ex facili aut opida, aut prouincias totas, vel liberis agnatisque suis, vel & exteris, auulsas à corpore contribuisse: sæpè per gratiam, aliquando & pecuniam aut mercedem. Non sic fiet in proprio & hereditario regno. Neque Principes solum secordes: sed ministri eorum tunc tales. Nam & ipsi futurorum securi, præsentibus inhiant, lucellum in omni occasione captant, subitis auidi, & vt inter incerta festinantes. Iam quintum illud, Virtutes sic excitari: vix colorem habet. Valde scilicet, quia vnus aliquando, nec meritò sed casu, bonus eligitur, boni esse elaborent. Si ad euenta imus, quocumque in regno; Electiones mixtas videbis, & sæpè deterioribus pronas. Vel Roma in Principibus suis, vel Germania, dicat. Vltimum, Aristotelem approbare: & hodieque alibi esse. De Aristotele, non mirum: Græcus & liber, regna amat proxima libertati. De  
usu



vsu hodierno aut nupero, leue est: nam præponderant exempla alia, & pro vno Electionis, centena sunt Successionis. Quæ vis hîc igitur? Quòd si illud dicatur, etiam nûc melius regi aut cre-scere regna ab Electione: magnum sit. sed non dicetur, & ocu-li ac sensus refutabunt. Ego verò amplius dico. vbicumque bo-gypto, in Sinensibus, in Hebræis ipsis, Successionem valuisse: etiam in Romanis, quoties Principum liberi aut geniturâ, aut (quod laxius) adoptione essent. Iterumque amplius dico. nec fuisse vlla Comitialia regna, nec fore diuturna. Exoritur semper aliquis, animo & consilio inter Principes maior, qui creditum vni sibi regnum, suis stabilit gratiâ, arte, præmio: & vis inter-dum adhibetur. Dania & Bohemia ostendunt, alia magna re-gio fortasse ostendet. Sed in fine non me teneo, quin Nicetæ et-iam verba, & ego eius sensibus, subscribam. Exclamat: *O quan-to deterius est multorum suffragium & electio, quam vnius! Tu in-clytum Romanum imperium, & gentibus adoranda maiestas, quos ty-rannos pertulisti? quales amatores te petierunt? quibus substrata, tui copiam fecisti? quales coronâ, & diademate, & puniceo vestitu exor-nasti? Grauiora vtique tulisti, quam Penelope procorum illâ frequen-tiâ obsessâ.* Res ita habet. Romanum imperium statim à Clau-pignerauit, in vilissima capita & pessima hac Electione vênit: Electione, an palàm Emprione? Nam & hoc scimus, velut sub hastâ, vanale pependisse: & non aliud magis clarum certum-que exitium rei Romanæ fuisse. Sed exempla quædam Electio-nis videamus, bonæ aut malæ mixtim.

**AVRVNCANI** populi barbari sunt, in Perüanò tractu. Ij à i. solis viribus corporis ductores legere soliti: experti eas in graui aliquo ligno. quod qui diutissimè humeris baiulat, nec suc-cumbit, putatur & regendi oneri par futurus.

Melius qui ab animi viribus aut præstantiâ sumunt: quod ii. Romani olim veteres in suis regibus, *Romulo, Numâ, Seruio*, vix alio aspectu fecerunt. Secuti quàm aliter? & stirps Augu-sti cùm defecisset, casus aut corruptio Principes ferè dedit.



Primum in CLAUDIO. qui C. Caligulâ occiso, rumore cædis exterritus, & sui quoque anxius, prorepfit ad solarium, & inter ianue prætenta vela delituit. Miles aliquis è Prætorio, discurrens ad prædam, hunc repperit, protrahitque: & interrogato Quis esset? acceptoque, impetu aut instinctu, Principem salutauit. Quanta vnus, & gregarij quidem, in re tantâ audacia? Produxit ad alios Prætorianos, fluctuantes adhuc, nec aliud quàm frementes: qui vt cælitus oblatum arripuerunt, & lecticæ impositum in castra sua, vicissim succollantes, tulerunt. Senatus & urbanæ cohortes diffidebant, & Libertatem præferabant: inane nomen vicit militaris electio, & fatale Romanis seruire. At Claudius iam imperij compos, vt militem magis obstringeret, *quinadena sestertia* singulis (sunt nobis *trecenti septuagintaquinque* Philippici) promisit, & dedit.

III. Idem casus siue error clariùs in VITELLIO se aperuit, longè ab omni Imperatoriâ aut virtute, aut stirpe. Homo ventri & abdomini factus erat, nullâ vel specie virtutum, nisi quòd candor aut simplicitas in eo placerent. Is Legatus inferioris Germaniæ à Galbâ electus, & quattuor legionibus præfectus (amabant autem hos ignauos, & altioris cogitationis non suspectos) præfectus, inquam, agebat Colonia Agrippinæ, cum nuncium accipit, superioris Germaniæ legiones defecisse à Galbâ, & in S. P. Q. R. nomina iurasse. Dum consultat, quid facto opus, vis in defectores an consensus placeat: ecce *Fabius Valens* è Legatis legionum, cum paucis equitibus, opidum intrat, ipsum Vitellium Imperatorem salutat. Vnius vox omnium fuit. secutæ legiones, alæ, cohortes, ciues, socij, ardore magis quàm iudicio: & inuasit imperium atque armis peperit, armis mox amisit.

IIII. Lubet etiam hos fortunæ ludos videre, & in theatrum producere PROBVM. *Tacitus* Imp. absumptus erat, & *Florianus* frater eius adspirabat: sed dum electio pender, Orientales exercitus eam occupare, & sui beneficij Principem habere voverunt. Conueniunt ad eligendum: & Tribuni, quasi per decorum, eos monent, *fortem, clementem, probum Imperatorem* requi-



*requirendum esse.* Arripiunt vocem, & statim acclamant, *Probe Auguste dii te seruent.* Inde purpura, tribunal, & legitimus Princeps.

Quid in REGILLIANO, quàm confimile? Dux Illyrici erat, & milites malè in Gallienum animati, res nouas agitabant. Fortè vnà plures cœnitabant. fuitque *Valerianus* Tribunus qui in ioco & vino diceret, *Regilliani nomen vnde credimus ductum?* Subiecit statim alius, *A regno:* & milites communiter, *Ergo potest rex esse?* & occasione solâ temerarij dicti, fecerunt.

O ludos! & lusum etiam adiungo, qui PROCVLO tradidit Principatum. In Galliâ milites ad latrunculos ludebant, item conuiuantes. Fortè decies Imperator Proculus exiuit: atque ibi quispiam ludens, *Aue Auguste:* allataque lanâ purpureâ, humeros eius velauit. Timor mox eorum qui adfuerant: & ne accusarentur apud veterem Imperatorem, nouum hunc faciunt consensu.

Ridere in illis liceat, in istis indignari, vbi Corruptio suffragia temperauit. Sicut in M. SALVIO OTHONE, qui clâm & palâm militibus pecuniâ subornatis, & in *Galbam* armatis, eum sustulit, se immisit, sed Principem non diuturnum.

Non item, à simili foeditate, IULIANVS perennauit. qui post cædem *Pertinacis*, cùm vœnale in castris Prætorianis pendêret imperium, & *Sulpicianus* licitaretur: iste, pecuniosus & ambitiosus senex, eodém aspirauit. & ad muros subiens, modum pecuniæ certum promisit: cumque illi ad *Sulpicianum* rettulissent, plus aliquid adijcientem, iterumque ad istum (prorsus vt in sollenni auctione) tandem peruicit Iulianus: finisque fuit, vt *vicenaquina sestertia* (sunt *sexcenti viginti-quinque* Philippæi) viritim Prætorianis darentur. Immanis summa! quam ille concussionibus & rapinis mox coëgit: atque hæc omnia, qui inter claros Iurisconsultos nomen vindicabat. adeò facilius est peritum esse legum, quàm seruante. Sed pœna à tergo pressit: statimque *Seuerus* superueniens, vitâ



vitâ & imperio illum, Prætorianos zonâ & militiâ exuit.

IX.

Anno ∞.  
x l.

Sed hæc fœda, exemplo vno aut altero eluantur laudabilis Electionis. Quæ autem laudabilior illâ, quam Deus iniecit, & direxit? CASIMIRVS fuit, filius *Miecislai* vnicus, qui ob teneram ætatem regno minimè aptus, sub curâ & gubernatione matris *Rixe* conqueuit. Sed ea mulier auara, superba, exteris Germanisque addicta, prouocauit odia Polonorum: quæ fugâ denique vitauit, ablatâ secum regni gazâ, & filio mox in Saxoniam secuto. Qui in exilio isto animum ad litterarum studia appulit, & Lutetiam Parisiorum deuenit. Illinc in Italiam porrò; & denique pietate impulsus, in Cluniacensi cœnobio Benedictinum monachum professus, Deo totum se vouit & sacrauit. Interea turbæ & fluctus in Poloniâ, vt in naui rectore vacuâ, & oculi atque animi requisierunt suum Casimirum: decretumque publicè, vt missâ legatione vbiubi terrarum esset, requireretur. Ad Reginam primò ventum, ab eâ Cluniacum: & inueniunt non iam Casimirum, sed *Carolus* (nam & nomen mutauerat) eundemque sacramenti religione, sed & Diaconatus vinculo, obstrictum. Illi præterita excusant, patriæ discrimina & calamitates proponunt; & hunc, vt vnicum præsidium & subsidium, Principem deposcunt. Ipse fortiter recusare; alienæ potestatis se iam ostendere, nec quidquam cum mundanis rebus commercij esse. Tamen vrgent; ad Abbatem reijciuntur, ab illo ad Pontificem. atque iste indulget, laxat sacramenti atque sacerdotij vincula, datâ etiam veniâ coniugij: cum lege, aiunt, vt Poloni caput deinceps in coronam tonderent ritu monachali, itemque nummum annuum in luminaria & cereos Diui Petri Romam conferrent. Hoc eiufce indulti monumentum esset. Ita in regnum ducitur, gaudio & consensu excipitur: prudentissimè & fortissimè administrat, domi pace partâ, hostibus foris victis aut repulsis. Piè vixit, piè obiit, regno in posteros (nam & vxorem duxit, & liberos ex eâ tulit) propagato. Quis abnuet hæc à Deo esse? profugo, monacho, Diacono, patriam, sceptrum, vxorem, cum gratiâ, laude, veniâ.

x. Sed memorabilis illa quoque electio, siue Iudicium fuit, quo



quo regnum Aragoniæ, auorum quo ad FERDINANDUM ∞. cccc. xi.  
*Henrici* Castellæ regis fratrem transiuit. Obierat *Martinus* rex,  
 idque sine liberis: & inter agnatos vel cognatos variè certaba-  
 tur. Ius, fauor, factio comparabantur: & iam ad cœtus & arma  
 res spectabat: quippe inter potentes competitores, *Ludouicum*  
*Andegauensium Ducem* & *Neapolitanum regem*, *Iacobum Comitem*  
*Urgelitanum*, *Alfonsum Marchionem Villenæ* & *Ducem Gandiæ*,  
 & nostrum illum iam dictum. Sed visum consensu proceri-  
 bus (rarum in tali ambitu) iudices siue arbitros super hac re le-  
 gere, & quemcumque Regem ij dixissent, esse. Electi nouem,  
 sanctimoniâ vitæ, & doctrinâ aut prudentiâ, conspicui: terni  
 ex ipsâ Aragoniâ, totidem è Catalauniâ, iterumque totidem è  
 Valentiâ: quæ tria regna scilicet in vnum corpus contributa.  
 Dies igitur dicta electioni, locus captus arx *Caspa* in Aragoniâ.  
 Magna expectatio, concursus, aperta & occulta vota aut me-  
 tus: denique ipso iam die, tribunal pro foribus templi ere-  
 ctum, auleis instratum & regifico ornatu. Confederunt iudi-  
 ces, præfedit ijs (nam adesse voluit) Summus ipse Pontifex, et-  
 si in schismate, *Benedictus*: tum surrexit *Vincentius Ferrerius*  
*Dominicani ordinis*, magnâ sanctimoniæ opinione, & insi-  
 gni ac feruidâ eloquentiâ, qui concione ad rem appositâ, pro-  
 ceres & populum consentire, obedire denique nouo Regi hor-  
 tatus est. *Quis is erit?* suspendit aliquamdiu omnium animos,  
 & grandi tandem voce protulit *Ferdinandum*. Clamor coronæ,  
 & iubilus, fausta precantium. nam plurimum in hunc & virtu-  
 tes eius inclinatio: quorumdam tamen & mœstitia, qui suos  
 candidatos decidisse tantâ spe indignabantur. At ipse coronam  
 mox Regni, sollenni ritu, accepit: pacem vbique repperit, aut  
 peperit. & magnum illum *Alphonsum* genuit, Aragoniæ, Sici-  
 liæ, Neapolis regem.

Pulchra electio, & quam in manu Lusitanorum erat nu-  
 per imitari. Nam plures regnum illud, mortuo *Sebastiano*, com-  
 petebant, suis quisque titulis, *PHILIPPVS* rex Hispaniarum;  
*Alexander* Parmæ Dux liberorum loco; *Ioannes* Dux Bragan-  
 tiæ, ab vxore; *Antonius* nothus, sed qui legitimum credi se  
 volebat. Concorrebat & regina Galliæ, *Catharina Medicea*,



vetusto & obsoleto titulo à Comitibus Bononiensibus repetito. Rex senex *Henricus* mederi futuris malis poterat, & velle videbatur: sed fortior animus deerat, & cunctantem mors occupavit. Sed & post eum quinque *Gubernatores* electi, & vndeni *Iudices*, tarditate aut frigore peccarunt: & quamquam proni in Philippum regem, non ausi ius ei adscribere, ob populi studia dissentientis. Quem suum ferè *Antonius* fecerat, & plenis velis per plebeias illas vndas ferebatur. Ita factiones, dissidia, & denique arma. Quæ tamen priusquam Philippus inferret (& parata habebat) pro suo ingenio leniter ac tardè agere, legationibus quàm legionibus velle rem conficere: à vi quidem adeò alienus, vt cum *Antonius* ille, caput turbarum, eiectus ab Henrico rege, in Castellâ esset, & in coenobio quopiam Diui Benedicti, gnaro rege Philippo, latitaret: ille ne extraxit, nec repulit, cum in illo velut torre exstinguere incendium surgens posset. Simile in altero competitore Duce Bragantiæ: cuius filium captum à Mauris, infelici illo prælio, redimi per Legatum suum curauit, & eundem iam in Hispaniâ, cum essent qui omni vi & viâ retinendum censerent, imò retinerent; ille firmus in quietis consilijs, & iure suo nixus, liberum dimisit. Sed neque sic, cum alij arma pararent aut caperent, inuasit, aut eiecit. sed ante omnia ius suum disputari à Theologis, & Consultis eius, fecit: iamque de eo certior, copias promouit. In limite erat Lusitaniæ, & omnis mora noxia: tamen iterum moratur, iterumque peritos conuocat, & per Deum & Fidem obtestatur, liberis vocibus sensibusque edicerent, ecquid iuris sui esset. Hoc non cupere se modò, sed iubere. Omnes vno ore ius affirmant. Tum denique *Ferdinandus* Dux Albæ inuadit, & septuaginta dierum spatio Lusitaniâ totam subijcit: vno prælio Antonio, qui regem se ferebat, pulso. Si tamen prælium dixerim, veterani exercitus, cum semiermi & vrbânâ turbâ congressionem. \* Annos paullo minus *quingentos* auulsa Lusitaniâ fuerat à reliquo suo corpore: redijt, vt retuli. sed cum admiratione aliquâ eorum qui attendent, in re tam opportunâ, vtili, facili, cunctatorem Philippum sic fuisse. Imitentur reges, nec temerè ambitio ad arma impellat.

\* Auulsa  
anno .  
c. x.



## CAP. II II.

## DE SVCCESIONE.

*Hanc præferendam, et si incommoda  
etiam habet.*

**M**Eliores eam Electione tutioremque esse supra ostendimus: & duplex certè caussa euincit. Prior, quòd nullum hîc interregnum; atque ita nec competitio, nec bellorum materies: præsertim cùm iura successionum legibus aut moribus vbique firmentur. Secunda, quòd caritas vtriusque maior. & subditorum in genitum & sanguine Principem; & Principis in subditos, certo & veteri iure suos. Addam tertiam, astrictioris imperij, & reuerentiæ aut obedientiæ promptioris: quia vitari aut differri vindicta ægrè potest, cùm patri filius succedit, & illius iniuriam suam putat. Non sic in exteris: qui tutius contemnuntur, & si offenderis, secessu aliquo vitas, donec illi abeant è vitâ. Duo tamen incommoda adhærent (& quid purè bonum in rebus humanis?) quòd vel mali vel inutiles sic capiendi interdum sint; vel pueri & infantes, quos ætas arcet à regendo. Quod ad prius, sciamus idem & in Electione euenire posse, atque adeò sæpe euenisse. Ferendum est, & melior exspectandus: vt post hiemem, aliqua æstas. Quod ad alterum, grande incommodum, fateor: & ferè Deus sic disponit (ipse met dicit) vbi visum ei punire regna aut immutare. Quid ni feramus tamen, si à Deo? Hanc ei viam castigandi adime, aliam reperiet, fortasse tristiorem. Leges viam suam teneant, itemque fata. Et tamen in illa ipsâ puerili Successione remedium, si viuit mater. Hanc admoueri, & vices pueri gerere, cum prudenti aliquo Senatu, è re sit: & exempla docent, feliciter euenisse. Nam procures regni eligi, anceps. si vnum, ceteros offendis, vt spreto; & hic fortasse proprias opes cogitet: si plures, non euades factiones inter eos, & turbas. Mater igitur melior. Sed exempla ali-



quot, aut iura diuerſa Succeſſionis videamus: in quâ conſenſu gentium receptum.

### MON. I. Certos Liberos præferri:

Circa an-  
num 100.  
XIIII.

I. Sed, vt dixi, certos legitimosque. Cui rei, vbi fraus timeri poterat, cautiones video adhibitas, calumniæ aut ſuſpicioni vitandæ. Sicut in OGINA Lucemburgicâ, quæ penè *quingena*ria, in matrimonio *Baldvini Pulchro-barbi*, Flandriæ Comitidis, grauida eſt facta: & res ea ſuſpecta multis, ne vanus aut factus tumor, non à naturâ & puero eſſet. Igitur circa dies iam partitioni ſollennes, maritus in medio Arrebatium foro, tabernaculum tendi iuſſit, laxum & pretioſi operis: edixitque, omnibus feminis, famâ & loco honeſtis, fas eſſe adſiſtendi, & oculis arbitrandi verus an ſuppoſiticius ille partus eſſet. Factum ita. viderunt plures, obſeruarunt: & omnes ita rumuſculos diſſiparunt, qui de ſterilitate eius erant ſparſi.

II.  
100. c.  
XCIIII.

Planè idem in CONSTANTIA, Neapolitanâ reginâ. quæ nupta *Henrico* Imperatori, quingenaariâ etiam maior vterum cœpit ferre, fraudem aut fucum ſuſpectantibus multis. Quod vtrumque prudenter amolitus eſt Henricus. ac primum, cum vxor ad eum in Germaniâ agentem adſpiraret: vetuit, iuſſitque in regno ſuſſiſtere, & aduentum ſuum exſpectare, coram ſuis (cum bono Deo) heredem regni parituram. Deinde, vxore etiam ipſâ ſic volente, in foro tentorium expanſum, factâ poteſtate nobilibus fæminis veniendi, & parientem ac partum pariter oculis uſurpandi. Peperit igitur, in tali, vt ſic dicam, ſcænâ *Fridericum*, paterni aui nomine appellatum. Hæc ſatis mira, in illâ ætate. etſi rei fides aliqua iamantè ab Abbate *Joa-chimo* facta, illo cuius vaticinia tunc clara erant, & nunc quoque tradita ſcriptis leguntur. Quippe parituram prædixit, & quidem filium, tali vitâ, & ſorte: quæque alia *Friderico* euenerunt.



MON. II. *Præferri ætate primos, et si in exemplis interdum aliter.*

I. Liberi igitur succedunt: sed mares supra fēminas, quod liquet; inter autem mares, ij qui ætate antecedunt. Tamen hīc interdum quæstio, an ex causā, minore aliquis natu non præferatur? Causæ plures esse possunt. vna, quæ olim inter *Darij* liberos litem mouit, *Artemenem*, & *XERXEM*. Nam ex his *Artemenes* regnum iure & more gentium petebat, natu prior: at *Xerxes* controuersiam non de ordine, sed de nascendi felicitate faciebat. Nam illum *Dario* priuato prouenisse, sese regi. Ita priuatas illi opes deberi, quas tunc habuit; at sibi regnum, in quo genitus, educatusque esset. Contentio, quamquam de regno, intra arma stetit: & arbitrum patrum sumpserunt *Artaphernem*. qui re pensulatā, præponendum *Xerxem* putauit. siue ratione iam dictā, siue & indole vtriusque motus. De patruo iudice, in *Iustino* scribitur: in *Herodoto* pater ipse definit. qui idem *Herodotus* alterum fratrum non *Artemonem*, sed *Ariobarzanem* appellat.

II. Ipsum hoc in eodem Persarum regno, diu post mouit *Parysatis*, *Darij* alterius vxor: mouit, sed non eodem successu. Nam ægro marito persuadere conata, vt *CYRVM* minorem filium *Arsace* ( qui postea *Artaxerxes* dictus ) in iure sceptri præferret, ipsā illā dictā causā, & quod in regno natus esset: non impetrauit, & stabile priori ius suum fuit. Etsi callida mulier *Xerxis* exemplum suggereret: sed quod paullò diuersum inueniet, qui explorabit. Nam *Artemenes* tunc natus *Dario* fuit, cū verè priuatus esset, nec in stirpe aut iure vllō regio ( quippe postea à Magis inopinatō electo: ) at *Arsaces* patri quidem nondum regi natus, sed nato è regibus & in hanc spem sublato. Itaque discrimen apparet in vtraque sorte: etsi nec id quidem alibi obseruatum, & quomodocumq; primogenitis sceptrum ferè delatum.

III. Excipio, in causā etiam alterā: si minor aliquis virtutibus excellat; & contrā, inopiā sit in maiore. Tum enim præponendus



nendus videtur, quem Deus honestauit: idq; ex publico etiam bono. Tale *Joannes Comnenus* prætextum habuit *MANVELEM* filium præferendi *Isaacio*: idque moriens persuasit. Cepit igitur imperium, & tenuit: sed reuera non pro spe rexit, nec fratri fortasse, nisi ab affectu patris, præponendus.

IIII.

Et verò rarò felix, nec nisi turbandis rebus, talis electio. vt in *PTOLOMAEO LAGI F.* qui cum minorem item, rupto gentium iure, regno imposuisset: ipsa naturæ iura violata mox sunt. cum alter fratrem suum paricidio sustulisset.

V.

In *PTOLOMAEO Physcone* haud dispar euentus, sed purus à scelere. Blanditijs vxoris illectus iuniorem seniori antehabuit, & sceptrum credidit: sed populus eo mortuo, huic redidit, & illi exsilium dedit.

VI.

Quid in *LVDOVICO Pio, Caroli Magni filio*? ille item *Iudithæ* vxoris suadâ *Carolus* minorem *Ludouico* in multis prætulit: cum eo fructu, vt bellum ipso viuo adhuc motum sit, & arma adeò, iunctis etiam alijs fratribus, in patrem sumpta.

VII.

99. XC.

Ideò non nimis ridendi fortasse *Pannonij*, qui peruicaciter hoc ius sunt tutati in suo *COLOMANNO*. *Vladislaus* rex, liberis ipse orbus, *Almum* fratris sui filium adoptauerat, animo & corpore meliorem, æuo inferiorem. Vt autem rata magis electio esset, *Colomannum* fratrem sacris initiauit, & procul à patriâ *Lutetiam Parisiorum*, specie studiorum, ablegauit dicam, an relegauit? Hæc facta, & ipse obiit: sed statim procures & populus *Colomannum* reuocant, & veniâ execrationis à Pontifice impetratâ, regem simul & maritum fecerunt. Quem autem hominem? ridebis Lector: statu pusillum, linguâ balbum, oculo luscum, pede claudum, dorso gibberum. Non monstrum vides? tamen hic placuit, & ius hominum etiam in ambiguo, penè dicam, homine seruarunt.

VIII.

In hac totâ re tamen fateor morem *ABYSSINORVM* (in *Africâ* latè dominantur) non improbandum videri, aut improbum. qui gentiles omnes agnatosq; Regis in vnâ quadam arce educant, remotos à populo: quia & arx in monte penè inaccessa est



so est (*Angam* nominant) & valido præsidio custoditur. Tenentur illic igitur, ne turbas aut partes faciant: & mortuo rege, eum qui maximè idoneus optimatibus & custodibus videtur, assument & substituunt.

MON. III. *Patrum, aut fratris filium,  
varie præferri.*

Quid autem, si filius maior præmoritur, prole ex se relictâ? Rationes & exempla in diuersum trahunt: id est, vtraque vtroque. Nam qui patrum præferunt, rationem proximi sanguinis adspiciunt, à patre rege: & nepotem toto gradu antecedit. At nepoti fictio iuris subuenit, & idem cum patre censetur: cur non ergo & in iura succedat? Sed exempla etiam, vt dixi, variant: & pro patruo sunt ista.

LVDOVICI Pij primum. Qui *Bernardum* Italiae regem deiecit, & vinclis ac carcere coërcuit, quia ius sibi à patre *Pipino* primogenito vindicabat, contra patruum *Ludovicum*. I.

ROBERTI regis Neapolitani. cui & Pontificis auctoritas pondus addit. Nam hic *Clemente* v. sic censente ius regni tenuit, contra *Carolum Numbertum* Hungariae regem: etsi iste natus è *Carolo Martello* esset, Roberti maiore fratre. Res clara est, & Annalibus testata: sed *Baldus* Ictus arbitratur, in regni vsum hoc à Pontifice factum, & quia optimus & prudentissimus Robertus esset, quod res docuit: itemque salubri temperie & partitione, quod Carolus iam regnum Hungariae teneret, in eoque posset acquiescere. II.   
 cc. ccc.   
 ix.

Iamolim etiam *Nymidae* pro communi iure habuerunt, patrum nepoti præferri. III.

Quod & *Vandali* vsurparunt: IIII.

Itemque hodie *Moscovitae*, sed restrictius. nempe v.   
 si impubes filius relictus sit, tum patruus sceptrum accipit: in   
 *Basilio*



*Basilio* nostro quo factum. Aliter autem, si iusta nepoti ætas : atque ea discretio rationem suam habet.

VI. Hæc pro Patruo : plura etiam sunt pro Nepote. *S P A R T I A T A E*, sapiens populus, sic seruauerunt : & ipse *Lycurgus* regnum *Charilao* fratris filio cessit, quod in manu eius erat, omnium gratiâ, tenere.

VII. *ROBERTVS* Neapoleos rex, etsi alio iure, ut dixi, promotus, hoc velut equius melius restituit, & sententiam publico iudicio sic tulit, in lite super *Comitatu S<sup>i</sup> Seuerini*. Quæ inter patruum & nepotem vertebatur, & Iurisconsulti variè trahebant : meliores & ipse ad nepotem flexerunt.

VIII. Ita ille rex : at *O T H O Magnus* Imp. iudicio armorum rem commisit. Pugnarunt singulari certamine, barbaro illo ritu, & vicit nepos. quod iterum ita sub *Henrico I.* Imp. adnoto euenisse. Ergo & Deus hanc causam videatur comprobasse.

IX. Sed quod iudicium, publicum aut priuatum, isto Hispaniensi clarius? Rex *Henricus* defunctus erat filio infante relicto *Ioanne*, duos & viginti menses nato. Patruus ei erat *F E R D I N A N D V S*, vir vel solo virtutum merito ( ut sanguis seponatur ) omni summâ fortunâ dignus. Itaque coniecti in eum oculi, vulgi & procerum : nec ambire opus, ambiebatur. Atque id non à singulis tantum, & in priuatis colloquijs, ubi adulatio timeretur; sed in Conuentu publico, huic rei indicto, omnium non studia, sed aperta suffragia in eum ibant. Incitabat non ipse solum æui maturus, & virtutum, ut tetigi, spectatus; sed & ætas pueri, quæ quando tandem gubernationi suffectura esset? Longum annorum intervallum, bella in manibus, turbas & dissidia in metu esse : quæ semper ferè comitari, ubi penes alios regimen esset. Ergo ageret cum Deo benè iuuante, expergisceretur, & vel regni causâ, caperet fraternum regnum. Surdæ aures ad has voces, & ius infantis ostendebat, & Hispaniæ consuetudinem : quæ eo magis tutanda ipsis, quò minus ille puer ( hoc ipso miserandus ) posset. Nondum tamen persuaserat ; iterumque Conuentus, si fortè penitentiâ subeunte mutasset. Non ignarus ipse eius rei & affectuum, infantem chlamyde tectum occultè



cultè intulit : & cùm *Danalus* magister equitum , de comuni consensu, iterùm tentaturus dixisset, *Quem regem, Ferdinande, renuntiari tibi placet?* ille acri voce & vultu, *Quem autem, inquit, nisi Ioannem, fratris mei filium?* Et simul puerum in sublimè extulit, nomen *Joannis* idemtidem & *Regis*, vt mos est, ingenians: iussitque vexilla explicari, & alia solita fieri in nouo regno. Tu Fides, tu Modestia, è cælo paullisper descendite, & hunc alumnum vestrum lætis oculis videte: quanto illustriorem spreto sic regno, quàm si decem fraude vel ambiguo iure quæsisset? Sed pauci isti *Ferdinandi*: cui Deus tamen regnum Aragoniæ paullò pòst contulit, pretium virtutum, & Electione (de quâ dixi) siue iudicio delatum.

## CAP. V.

## DE FRAUDE ET VI.

*Has quoque priorum specie interuenire.*

**S**ed violat Successionis iura aut polluit sæpe Ambitio, quæ vim & fraudem miscet. Quàm sæpe sceptrà sic delata non ad longinquos tantùm, sed indignos? & hîc quoque ludi interueniunt: quos lubet paullùm, Sapientiâ volente, spectare. Venite qui regna æstimatis, cælo æquiparatis: en seruulum, aut infimum homuncionem, suo ingenio ad ea sublimatum. Videte:

Et primùm *PISISTRATVM*, qui fraude quidem, sed virtutibus pænè debitum regnum Athenis quæsiuit. Ille comem & benignum se ciuibus ostendere, etiam liberalem vbi opus; adeò vt refugium & asylum iniuriâ aut inopiâ pressis haberetur. Suspecta ista optimatibus: neque nesciebat. quos vt in ordinem redigeret, & satellitium pararet aliquo prætextu, ipse se vulnerauit. Sic faucius, in forum delatus, sanguinem & vulnera ciuibus ostendebat, à potentibus illis, præmium scilicet benignitatis suæ in ipsos, accepta. Quin & vitam



suam periclitari, nisi subueniant, quibus eam consecrasset. Fremitus & indignatio populi, mox suffragia, & custodia illi decreta. Quâ cinctus, & inimicos suos statim, & mox populum tyrannide oppressit. Nec omittendum hîc *Solonis* dictum, qui dolum odoratus ei ingessit: *Non rectè*, inquit, *ô Pisistrate*, *Homericum Vlysses imitaris. siquidem ille flagris se conscidit, ut hostes falleret; tu te vulneribus, ut ciues.*

II. Ac genera sanè fraudium plura sunt: sed vna ad rem hanc Successionum apposita, quæ crebra. Est eorum, qui inferunt se in alienam familiam & callidè adoptant: histrionio toto & ludicro initio, sed quoties in turbas & cædes iuit? Fuit in Macedoniâ *ANDRISCVS* quidam, homo vltimæ fortis, diurnâ mercede vitam tolerare solitus: qui *Philippum* se subitò, *Persei* regis filium dixit. Et oris similiudo ad auum inclinabat. Ipse dixit, alij credunt aut credere simulant: Macedones & Thraces maximè, tædio Romani imperij, quod nouitate & asperitate displicebat. Itaque ingentes mox copiar, & Prætorem Romanum fudit: donec à *Metello* idem victus, & in catenis Romam ductus triumphatusque est.

III. In eodem imperio, sed sub *Tiberio* Principe, *CLEMENS* quidam exstitit, reuera seruus *Agrippæ Postumi*, quem nepotem suum ex *Julia* Augustus in Planasiam insulam relegauerat: sed famâ & fallaciâ, mox ipse Postumus effectus. Iuit enim magno animo, auditâ morte Augusti, in insulam, ut dominum furtim educeret, & ad Germanicos aut alios exercitus ferret. Sed dum tardiùs nauigat, interfectum *Agrippam* repperit: & huc iam delabatur, ut sese eum ferat. Venit in Etruriam, ignotis locis se abdit, crines barbamque in squalorem promittit: mox per idoneos homines spargitur, viuere *Agrippam*. primùm occultius, ut verita solent: tum vago rumore apud imperitos aut turbidos, eoque noua cupientes. Iamque in municipijs & colonijs se ostendebat, sed leuiter & obscuro diei, & copiam sui haud plenè facturum. Augentur asseclæ, audet Hostiam venire, atque adeò in urbem, & occultis cætibz celebrabatur. Tiberius, non ignarus periculi, ambigebat, vim militarem, an fraudem fraudi opponeret: & hæc  
magis



magis placuit, electique *Sallustij Crispi* operâ duo milites, qui simulatâ conscientiâ adiuerunt, pecuniam & pericula sua offerentes. Mox noctem speculati & solitudinem circa eum, acceptâ idoneâ manu, vinctum & ore clauso, in palatium ad Tiberium attraxêre. Ibi interrogatus, *Quomodo Agrippa factus esset?* respondisse liberè fertur, *Quomodo tu Caesar:* dolum & illi maternum obijciens, quo ab Augusto adoptatus esset. Secretò interfectus est, magnâ inter tormenta constantiâ, cum neminem conficiorum edidisset: nec Tiberius (prudenter in talibus) vltra quæsiuit.

In Syriâ similis dolus, etsi vix dolus. *Demetrius Soter*, ille IIII. qui Româ obses profugerat, ijs imperabat: cum certâ, nec iniustâ de causâ, Antiochenis offensus, bellum ijs infert. Ipsi extremorum metu, ad noua remedia confugiunt, & vilem quemdam è plebe ALEXANDRUM salutant, & *Antiochi* filium faciunt, ac repetere optimo iure paternum Syriæ regnum. Fraus cui non apparebat: sed nouitatis studium (insitum popularibus, & addo Orientalibus) siue odium Demetrii effecit, ut crederet quæ non crederent, & certatim Alexandrum omnes amplexi. Ipse mirabatur nouam suam sortem, & tot comitum militumque agmina: ac vires propè Orientis trahebat. quibus stipatus pugnat, primò parùm feliciter; mox aliter, & non vincit solum Demetrium, sed cædit. Eo facto pacificus Syriæ possessor, quod solet, in vitia & luxum se effudit: paruis Demetrii liberis, nec ab ijs metu. Sed cum adoleuisset *Demetrius* Demetrii F. cum parua manu Cretensium rem aggressus, adiutores repperit, & pari leuitate ad se transcentes, qui à patre defecerant; in his, ipsos Antiochenos. Itaque solutum illum, & inter scorta ac menfas iactatum, inuadit, superat, trucidat. Hic finis scænici & imaginarij Regis, sed satis tamen diuturni, quique annos nouem & menses decem in imperio alieno fuit.

Alius ab isto, sed tamen ALEXANDER, & in finitimâ Iudeâ, V. ipse Iudæus genere, adoptauit se in familiam *Herodis* regis. Occasio erat, quia facie *Alexandrum* referebat, ab illo extinctum. Igitur mortuo Herode hic reuixit, & fucum etiam



acutioribus faciebat, naturâ & ingenio vaser, tum ipsâ illâ similitudine valde geminâ, & vel noscentes fallente. Venit igitur Cretam, & Iudæos illuc induxit sese agnoscere, pecuniam & alia vsui dare: quod idem in Melo insulâ, omnibus subtractum verum neci Alexandrum, aliunq̃ue suppositum, credentibus, vulgantibusq̃ue. Ita Puteolos appulit, pari illuc Iudæorum credulitate & gaudio: ac mox Romam, grandi comitatu, regiâ pompâ. nam & Iudæi, qui Romæ frequentes, & in his hospites notiq̃ue *Herodis* obuiam ire, iurare eum esse, lecticam eius deferre: prorsus vt à regio cultu & fastigio, præter Cæsaris auctoritatem, nihil abesset. Et sanè Cæsar Augustus moueri quoque cœperat: sed retentabat, quod vetus ille & veterator *Herodes*, non videbatur, in re tantâ decipi potuisse. & denique vt experimentum caperet, mittit *Celadum* vnum è libertis suis, qui olim familiariter cum *Alexandro* & *Aristobulo* fratre (nam & is seruatus dicebatur) versatus fuerat: sed quid? impositum ipsi Celado, & ille quasi notor & assertor ad Cæsarem redit. Tamen dubitat, ipsum Alexandrum vocat. & sagaciter animaduertit manus callosas, & duratas opere; item in sermone & moribus non illum Principalem Genium & gratiam, quæ solet sic natis comitari, & vel inuitis inscijsq̃ue adesse. Tum etiam interrogat, quid factum *Aristobulo* esset, & cur non ille aduenisset? Causante ipso, Cypri hæsisse, ob pericula maris & itinerum, & ne, siquid durius euenisset, totum Mariamnes genus vnâ periret. Hæc illo canente, & doctore eius accinnente, qui simulatâ grauitate aderat; Cæsar seductum adolescentem monet & interminatur vera dicere, & propositâ impunitate, *Quis esset?* interrogat. Ille verò metu instantium, & splendore illo præsentis territus, vera fatetur, seriem fabulæ denarrat: & à Cæsare ad remum damnatur, vt fidem in vitâ datâ non falleret, doctorem eius exuit vitâ. Reliquis satis supplicij censuit credidisse, & pecunias effudisse.

VI.

∞.cc.

LXXXIII.

Hæc vetera, aut longinqua videbuntur: addam haud longè ab æuo, aut finibus nostris. Ecce in candidâ & simplici illâ Germaniâ, exstitit PSEUDOFRIDERICVS, tempore *Rudolphi Habsburgensis* Imperatoris, qui verû se *Fridericum* diceret, mortuum



ruum ante\* plures annos. Obsidebat tum Rudolfus Colma-<sup>xxii.</sup>  
riam; sed haud vanè territus, quòd impostor ille in Germaniâ  
nostrâ inferiore magnas sibi vires, nobiles, vrbesq; adiungeret;  
solutâ obsidione, Rheno prono descendit, & quasi veneraturus  
veterem Augustum accessit. Sed eius cōpos, interrogatum quis,  
vnde, quare sic esset, igne in opido *Vitzlariâ* combussit.

Pòst in eadem Germaniâ nobilis impostura circa Marchio-<sup>VII.</sup>  
nem Brandeburgensem *V O L D E M A R V M* euēnit. Is ante<sup>∞.ccc.</sup>  
annos triginta & vnum amissus, siue mortuus peregrè erat:  
cūm *Rudolfus* Saxoniae Dux despicit, quâ viâ *Ludovicum Baua-*  
*rum Ludouici Augusti Filium*, Principatu Brandeburgensi pelle-<sup>XLVIII.</sup>  
re posset. Componit fabulam, ipse inquam eius poëta & a-  
ctor. nam molitorem quemdam secretò habitum, omnibus  
notis insignibusque arte & astu instructum, ad verum illum  
Marchionem, producit tandem in scēnam: atque ecce po-  
pulares, desiderio & more plebis, accurrunt, se & sua, ple-  
rique arces & opida etiam tradunt. Resistentes, partim Saxo-  
nis copijs, partim *Caroli Bohemi*, qui Imp. à quibusdam de-  
signatus, ad deditionem coguntur. Ipsi Bauari, & auxilia-  
res eorum Palatini, variâ fortunâ certant, & grandi vno præ-  
lio vincuntur: capto *Rudolfo* Palatino Rhenensi, cum <sup>LXXIX.</sup>  
nobilitate equestri. Denique triennio toto elusit, aut potius  
illusit ille molitor: donec captus tandem ignem ipse, infamiam  
fautores eius subierunt.

Sed in vicinâ etiam nostrâ & sociâ *Flandriâ* factum, omnia <sup>VIII.</sup>  
dicta adæquat aut superat. Fuit *Balduinus Octauus* Flandriæ<sup>∞.cc.</sup>  
Hannoniæque Comes, & idem grandi ausu progressuque O-<sup>xxv.</sup>  
rientis siue Byzantij Imperator. Dum illîc res gerit, in prælio  
contra Bulgaros cadit: nec ambigua res erat, donec quidam  
*BERNARDVS RAINSVS*, Campaniâ Gallicâ oriundus, &  
specie religionis iuxta Valentianas in siluâ quadam Anacho-  
reta; donec is, inquam, vulgaret fingeretque post annos xx.  
reducem & rediuiuum se Balduinum esse. Impulsus à nobi-  
lium quibusdam creditur; & ætas, forma, astus, atque etiam au-  
dacia aderant ad fallendum. Igitur, rebus in Hannoniâ motis,



in Flandriam ipsam cum hac famâ venit : & rarâ quadam oris grauitate , commemoratione hominum rerumque priorum , stemmatis totius notitiâ , etiam sagaces cautosque inducit. Desciscunt & adhærent passim , fastidio etiam & contemptu fæminei imperij : quod *Joanna* id temporis , *Balduini* filia , rebus præsidebat. Quin ipsa profligata , & propemodum in *Querceto* opido intercepta , præsidium & refugium ad regem *Ludovicum Octauum* Gallix habuit : qui subuenit , sed cum prius à Senatu *Joannæ* examinatus inquisitusque planus ille esset. Eius enim Præses sic dixit , rogauitque : *Tu quocumque nomine appellandus , si te verum Balduinum iactas , cur Orientis magnum imperium deseruisti , ad hoc minus properasti ? Cur apud notos atque optimè de te meritos duces ac ciues , mortem simulasti , vitam dissimulasti ? Quæ commenti causa , aut merces ? An numquid ij oderant ? etiam nunc resument , si verus es Augustus . Obnoxij semper subditi fuerunt , atque vtinam illi domino esse possint ! Quid ad nos potissimum venisti , tot lustra non visus , nisi vt inter ignotos ignotus falleres ? Vingtini anni iam sunt à morte illius , quem te dicis : quibus tenebris , & quâ causâ , tam curiosè te oculuisti , sic vt nec aura famæ de te spirauerit ? Passi multa mala fuimus , & id ob te mortuum : mederi vnâ voce , vno scripto poteras , VIVO : cum non feceris , ego etiam si viuus , viuum te habebo ? Impietas tua non meretur : abi ingrata à patriâ , cuius caritatem exuisti ; à Principatu , cuius curam abiecisti ; à ciuibus , quos obliuione sepelisti . Dixerat Quæstor : at ille mirum quâ confidentiâ , & ex ipsâ fidem præstruens : Domi , inquit , inclementiores ciues , quàm foris hostes , repperi . Tu me Flandria , mater & altrix reijcis , quem Græcia , Macedonia , Thracia aduenam excepit , coluit : ipsa Barbaria , maiestatem verita , seruauit . At enim , vbi delitui ? audite , & casuum humanorum miserefcite , si quid tamen humani in pectoribus istis habetis . Captus prælio ad Hadrianopolim à Bulgaris , ab iisdem in custodiâ habeor , satis lentâ & remissâ : vsque eò vt effugium etiam patuerit , & animo isto ac Deo ducibus me liberarim . Cum ad meos propero vagus & erro , in alios barbaros incido , ignaros fortune meæ , & ab ijs in Asiam trahor ac vendor . Heu miseriam ! pudet , sed vos narrare cogitis : Syri me habent , & in ergastulum rusticum damnant . Ego Balduinus , Comes , Imperator , quâ manu sceptra tenui rastra tractavi , plures per annos : donec à Germanis*

merca-



mercatoribus casu transeuntibus, quibus me aperui, pretio liberarer. Si me domum remiserunt: vos expellitis? ingrati, immemores veterum beneficiorum, quibus avi vestri, patres, etiam tu atque ille, à me affecti estis. En senium & hanc canitiem, quò reseruati sumus? post tot fluctus, scopulum repperi, vbi portum putabam: ipsa mea filia, mea Joanna, patrem non agnoscit, ne Comitem cognoscat. Hæc & plura opportunè differens, magnitudinem suam vel fallaciam tuebatur: vario animorum motu, & plerisque ad illum inclinatis. Adeò, vt nobilium populariumque bona pars statim adhæresceret, Comitem & Augustum saluaret: donec re iam in præcipiti, Ioanna ad Ludovicum Regem supplices Legatos mitteret, vt Balduini, auunculi quoque sui, magnam sanctamque memoriam, ab impuri nebulonis contagio tueretur. Suscepit negotium Rex, diem homini dicit: venit ille magno comitatu, solitaque fiducia & fastu. Vestis erat purpurea, alba in manu virga, barba promissa, à quâ vulgò Peregrinus Logobarbus vocabatur: sistitque se Regi, Perone. Ille orditur, succinctus nobilitate & Senatu: Flandria in fide & clietela mea est, ne mireris te huc vocatum: quod more & iure, non ambitione aut usurpatione factum. Siue iniuriâ afficeris; à me vindicandus es; siue afficis, puniri debes. Vtinam Deus & calites facerent, vt tu sis ille Balduinus, mihi auunculus, amitinae mee pater, nec vno nomine Gallia mea illigatus. Vtinam! inquam. sed fama tot annorum, tam constanti, quid faciam? illa te iugulat. Credere me abnuis, & vnus tot millibus contradicis: sed fidem ex genere humano tollis, si consensui mortalium non vltra credimus. Tamen effare, faueo siquid habes quo famam redarguas, quo Balduinum te asseras, quo veterem meum cognatum aut potius parentem à mortuis restituas. Si ille es, breuiter ad hæc respondere, & statim, potes. Quæro, Tene pater meus Flandria Comitem dixerit, iura dederit? quo teste, loco, tempore, ritu? Baltheone te & insigni militari donarit? Quæ mulier ex Francica nobilitate, quo conciliante, quo auspice, loco, cætu nupserit? Quid hæres? hæc ignorare de se verus Balduinus non potest. Ista rex: tamen audacia illa, velut deprehensa, hærebat, & spatium cogitandi recolligendi que sui petebat. Inde pro impostore haberi, & contemptim dimitti: dimitti tamen, quia sub fide publicâ venisset. Nec diu post in Burgundiâ captus, ab equite gentis Chastenaia, Joanna offertur:



fertur: quæ conuictum confessumque, ut dicunt, laqueo strangulauit. Non tamen sine plebeculæ rumoribus, quæ patrem ab improbâ filiâ in ligno suspensum, tunc & diu postea differebat.

IX. Nónne consimile in Hispaniâ, cum *Alfonfus* Aragoniæ rex esset, iuuenis & vndecennis, matre gubernante? superuenit qui se *ALFONSV*M veterem adfirmaret, ante annos viginti & octo ad Fragam cæsum. Pro colore adferebat, tædio se rerum humanarum in Asiam & Terram sanctam iuisse, illuc bella pro Deo & religione pugnasse, redisse ad suos culpis expiatis. Cur spernerent, & puero ac mulierculæ potius adhærescerent? Mouerat multos, res turbaturus haud dubiè, nisi Cæsaraugustæ captus laqueo gulam fregisset.

so. cccc. xxii. X. Tædium iure vereor in paribus ausis & euentis: quàm tamen duos *MVSTAFAS* fileam, in Turcarum imperio, ut nec id sit à scænicis his ludis immune? Prior fuit, *Muratis Secundi* principatu, *DVSMIS*; sed qui se *Mustasam* diceret *Baiazitis* primi filium, quem fama & res erat, infelici illo prælio cū *Temir-lanco* perijsse, ubi & pater eius captus. At enim post annos *vigintiduos* iste se sufficit, & fraudes ac turbas *Murati* miscet. quas turbas? tantas, ut Begi, Bassæ, & primorum plerique ad eum deficerent, ipsi Christianorum Principes foedus inirerent, & Byzantij Imperator. Denique per triennium Muratem sic exercet, ut incertum imperij & vitæ faceret: donec ad *Lopadium* lacum collatis castris (& Murates ipse aderat) arte quàm viribus magis vincitur, & transfugijs paullatim nudatur. Iuuat ad hanc rem commetum callidum Legatorum, quos Byzantium vno tempore, ad foedus & societatem, ipse & Murates miserant. Sed Muratis irriti dimissi, illius impetrauerant: cum tamen Muratæi, cursim præuenientes, audaci astu spargunt, sese voti compotes, & Græcos à se stare. quod creditum sparsumque in vtrisque castris, multos *Mustasæ* detractos *Murati* iunxit. Denique fugit ille, sed retrahitur, & Hadrianopoli ad pinnam muri laqueo suspenditur.

XI. Alter *MVSTAFAS* miri & noui commenti est, sed ab alieno impulsu, & in alterius, ut putabatur, fructum. Ne graue sit  
me



me diducere paullum, quæ faciunt ad grauem illum nobis hostem. *Soleimanno*, maximo inter Turcarum principes, duæ vxores fuerunt, & ex ijs liberi: altera *Bosphorana*, è quâ *Mustafas*; altera *Roxolana*, è quâ isti quattuor, *Mahometes*, *Selymus*, *Baiazites*, *Giangir*. Sed omnes hos ætate & gratiâ apud militem *Mustafas* anteibat; nec dubium illius imperium, si id exspectare, quàm habere maluisset. Pater sanè cum suspectum nimix spei interfecit. Iam è quattuor illis *Mahometes* obierat, & mox item *Giangir*: duo competitores supererant, è quibus *Selymus* fata & pater promouebant, *Baiaz* item mater, mirificè in eum prona. Frustrâ maritum aliquoties tentauerat, vult fraudem & fortunam. Itaque re cum filio collatâ, visum illis initium res nouandi per falsum *Mustafam* facere, ad cuius nomen & gratiam miles facilè concurreret: ipsi deinde eo in rem suam vterentur. Reperiunt iuuenem audaciâ & facie idoneum, instruunt & dimittunt. Personam sumit & agit, venit in Thraciæ loca quæ Valachiam & Moldauiam spectant, vbi equitum copia, & qui plerique viuo nuper *Mustasæ* addicti. Ibi clanculùm & quasi timidè se ostendit, comites qui aderant mussitant *Mustafam* esse; fugâ elapsus à patre, & alium ab amicis substitutum qui interfectus pro ipso esset, incuriâ, nec serio agnitum aut inspectum. Id argumentum fabulæ erat, ad quam spectandam agendamque statim concursus. Veniebant & ij, qui oculis suis *Mustafam* interfectum viderant: sed vel falli volebant, vt locus esset si non recipiendi *Mustasæ*, saltem vindicandi. Iam penè exercitus erant: sed Sangiaci trepidi rem ad *Soleimannum* referunt, qui fraudis certus eos acerbè increpat, *Quid ita initijs non obstitissent? vel nunc facerent, aut iram ac poenam à se exspectarent. Mittere se Pertavum Bassam, cum validis fidisque copijs; sed melius gratiusque fore, si ij quod neglectum est sarciant, & ignem nondum validum exstinguant.* Sangiaci ijs monitis minisque excitati aduigilant, concurrunt; aduentantes reprimunt, manus iam factas dissipant & spargunt; nihil reliqui sibi ad diligentiam faciunt, vt fidem & operam suam Domino probent. Tamen Bassa superuënit: nec res adhuc *Mustasæ* satis validæ aut constitutæ erant. itaque à præsentis metu fluctuare multi incipiunt, dilabi alij & transfugere,

O

donec



donec desertus miser cum præcipuis ministrorum in manus venit. Viuus trahitur Byzantium, examinatur, nihil celat: cura iam non de illo puniendo (quod statim factum) sed de filio patrem subit. Hócne illum ausum, in tam recenti Mustafæ infelici exemplo? dolor non ab impietate solùm erat, sed ab impudentiâ & temeritate ira. Et iam magnum aliquid parabat: sed mater filium non deserit, callida mulier & mariti sui diu potens. Venit & rem fatetur, excusat & deprecatur. *Quid enim enim magni miri, inquit, si in fratrem (non enim in te, ne cogita) aliquid molitus est, non tam ambitu, quàm metu impulsus? Leges siue fata nostræ gentis sunt, vnum non imperare solùm, sed vivere; & exordium novi Principatus est, fraternum paricidium. Quid inquam mirum igitur, si fugere triste & extremum hoc voluit? si vitam prorogare? Naturâ impellimur, & te consule. Hic scopus huius conatus fuit, miseratione, si consideras, quàm irâ dignioris. Tu illam da. cui? filio. cui? & mihi vxori. nam certum non superuivere illi, & in vno duos occides. Quamdiu autem dature? me miseram, instant fata, & in tuâ senis animâ adolescentis illius spirat, & mea.* Mouit intimum senile pectus & concussit mulier: dat veniam, sed eâ lege vt filius se videat, & ipse eam petat. Ergo aduocatur, & à matre quoque excitatur iam securâ vt tutò veniat. Venit, sed cùm in aditu paterni hospitij est (extra urbem conueniebant, nec temerè filij patre viuo in ipsam intrât:) ecce milites, qui descendantem ex equo tradere pugionem & gladium iubent. Id in alijs de more fiebat, sed conscientiâ stimulante omnia timet, & multus in oculis Mustafas vterque erat. Mater tamen dat animos. quæ de industriâ ad ianuam exspectat, & per fenestram linteo obductam hortatur intrepidè pergat, viam omnem à se præmunitam. Accedit ad manum patris, petit veniam & accipit, monitus magis quàm castigatus. Atque vt plenam fidem reconciliationis faceret, potum de more gentis iussit offerri: sed nec hunc sine metu bibit, venenum suspectans, donec pater ex eodem poculo hauustu ducto, omni eum curâ liderauit. Atque hæc Fraudiû sunt, addam

Violen-



*Violentia exempla.*

Heu, quàm multa ea occurrunt ! passim video aditus atque exitus Regiarum sanguine resperfos. Sed temperabo, & eligam. Ab Oriente ordior. atque ibi, in Iudæâ, triste fatum Gedeonis familiæ video, vnius ambitione consumptæ. Laudatus ille vir, & dux per quadraginta annos populi, liberos genuit & reliquit *septuaginta* : atque hos legitimos. vnum è concubinâ *Drumâ*, cui nomen ABIMELECHI. Hic post mortem patris imperio imminens, & adiutus maternâ pecuniâ atque amicis, copias collegit è vagis & sordidis hominibus: cum quibus *Sichimâ* vênit inopinatò, atque omnes ibi fratres *septuaginta super lapidem vnum* (vt sacra loquuntur) interfecit, & velut immolauit. Quid si totidem alienos & extraneos ? ô facinus ! at ille imperium inuadit, & in triennium etiam retinet, vt cœperat, fauens, & subditos variè affligens, sic vt *Sichimitæ* arma caperent & rebellarent. Frustrâ. domuit eos & occidit, & ipsum opidum deleuit, salemque in eo consperfit. Sed cælestis vindicta tamen consequitur, & cùm turrim quamdam oppugnaret, fragmine molaris lapidis mulier supernè caput eius contriuit. quo ictu collapsus, & iam moribundus, ad satellitem suum, *Tume*, inquit, *gladio iugula, ne muliebri manu dicar cecidisse.*

In Parthis *Orodes* regnavit, ille qui *Crassum* victum iactat & occisum. Is cùm senuisset, in luctu ob *Pacorum* filium à *Ventidio* cæsum, aquæ intercutis vitio laboravit, neque longè iam à morte. Quam tamen longum *PHRAATI* filio visum expectare : & veneno eam maturat. Sed id contrâ fuit, nec aliud quàm motâ aluo in medicinam abiit, & totius morbi senem alleuauit. Quod ille indignatus (neque enim pænitentia subiit sceleris, cui vel Numen videbat aduersari) ad apertum parricidium ab occulto transit, atque hominem palàm suffocauit, lāmne finis ? minime: catenata sunt scelera, & post patrem fratres *triginta*, quasi inferias, adiecit. Quis tamen illius finis ? consimilis. nam cùm in pace & fœdere cum Augusto esset, cui & signa Crasso crepta remisit; hic vicissim dona dedit, inter

O 2

alia,



alia, pellicem insigni formâ Italici generis, quæ prolem ei genuit *Phraatacem*. Hic ipse ut adoleuit, conscientiam & operam matris, patrem interfecit. Benè, benè. quidni dicam? tulit, quæ meruit, & quæ docuit: redijt in auctorem exemplum.

III. Breui stilo lata scelera in MITHRIDATE PONTICO strigam, cui bellum & clades fuit à Romanis, sed mors ab ipso filio. An & hoc immerito? ecce ille matrem iam primis annis sustulit, mox fratrem; deinde tres filios, totidemque filias. Cælum, terra, mare, aspicere, ferre, purgare toties impium potuistis? Ignosco Pharnaci, & animos ad scelus pænè addo: vindica adolescens auiam, patrum, fratres, sorores, tot mortes (leue est) in vnâ.

IIII. Iam in PRVSIA Bithyno tyranno, Romanorum non socio rege sed seruo, vix memorabile est, quod is filium *Nicomedem* tollere è medio voluerit: quid ita? ut locum alijs filijs faceret ad regnum. Peruersa aliqua pietas hæc fuerit. sed ecce filius, rei conceptæ gnarus, scelus in ipsum vertit, & defectione populorum, regnum ei ademit, & deinde vitam.

V. Relinquo te Oriens, fatiges me si perambulem: centesimam partem (verè loquor) non libaui: sed vnum tamen abiens hîc consignem. PTOLOMAEVS inter Alexandri successores, pulso *Antigono*, Macedoniam occupauerat, pacem cum *Antiocho*, foedus & affinitatem cum *Pyrrho* fecerat: securus iam omnium, nisi sororis, & ex eâ liberorum. *Arsinoe* erat, quæ in matrimonio *Lyfimachi* fuerat Macedoniae regis. Itaque animum & artes intendit ad eam vnâ cum liberis captandam: cautam tamen, monitam, & omnia timentem. Quid adhibet? machinam in hunc sexum validissimam, amorem. soror erat, sed quid ad rem? incendit, non absterret ea cognatio Orientales barbaros, & res in mores & iura vertit. Itaque munera, legatos, litteras missitare, offerre ipsi societatem regni, liberis hereditatem: nec alio fine se armis id occupasse, quàm ut ijs posset relinquere. In has res fidem se paratum dare quam vellet, & ubi vellet, apud sanctissimas aras & templa. Quid multa?



multa? persuadetur mulierculæ, ex fidissimis amicis mittit, qui iuramentum accipiat: quod ille incunctanter, & pænè invitans, in veterrimæ religionis templo concipit, ipsa simulacra & altaria deorum tangens; se suumque caput inauditis ultimisque execrationibus deuouens: *Sincerâ se fide matrimonium sororis petere; nuncupaturum eam reginam; eiusque liberos, suos heredes habiturum, nec alios.* Ergo Arsinoe spe iam plena, in conspectum colloquiumque fratris venit: qui vultu ipso & oculorum acrimoniâ amorem simulans, fabulam peragit, vxorem ducit, capiti diadema coram milite populoque imponit, & Reginam appellat. Secura quæ solent nuptijs: & læta *Arsinoe, Cassandream*, munitissimam urbem (quod vnum petebatur) vbi thesauri & liberi, præiuit, maritum introductura, & festo apparatu exceptura. Viæ, templa, domus ornantur; aræ & hostiæ disponuntur; filios quoque suos, *Lysimachum* sedecim annos natum, *Philippum* triennio minorem, patri & auunculo occurrere iubet. Quos ille extra portam obuios, cupidè & vltra modum solitæ affectionis amplexus, oculis fatigat, nec dimittit. Portam & arcem ingressus, ponit personam, sumit suum vultum & affectum, statimque milite introducto, pueros iubet interfici in gremio ipso matris, ad quam confugerant. Illa hoc miserior, quod mori cum ijs non licuit (sæpe se gladijs interposuerat & obtulerat:) in exilium cum duobus feruulis pulsa est: *Ptolomæo* tamen haud diu ab hac victoria triumphante, cum Galli Macedoniam inundantes, victo ei caput paullò post abstulerint, in hastâ, ad terrorem & fidem, circumlatum.

Ad Occidentem iam ire mihi licet, & ordiri ab Hispaniâ: VI. in quâ cum Cn. Scipio, post Africanus, victorales & funebres simul ludos daret, captâ *Carthagine nouâ*: en duo fratres patruales, CORBIS & ORSVA, qui de regno armis certaturi eum adeunt. Ipse, vt mitis ingenio, omnia conatur & tentat, vt ratione non Marte iudice, rem componant: frustra: campum & arenam volunt. Concesso, magnis animis concurrunt, sed maior natu *Corbis*, facilè minorem natu, astu & armorum usu vicit, atque occidit.



VII.

Dicam in Italiâ de ROMULO, *Tarquinio Superbo*, *Nerone*, tot alijs, qui scelere & sanguine sceptrum pepererunt? multa, & nota sunt, ideoque cum veniâ omittenda.

VIII.

∞. 13.  
XI.

Venio ad æui nostri parricidam nobilem, & quod indigne-  
tur aliquis, felicem. Sceptra imperij Turcici tenebat *Baiazites*  
*Secundus* rebus gestis clarus, & numerosâ prole succinctus, in  
quâ natu minimus SELYMVS erat, de quo eo dictum. Sex ille  
fratres habebat: è quibus duo primæui suo fato obierunt, tertius  
paternâ vi: duo supererant, ætate & iure imperij ante ipsum.  
Sed imperium tamen animo agitabat: & vt perueniat, patrem  
impedimento futurum, è medio vult sublatum. Id variè ten-  
tauit, & primò colore aliquo pietatis. Mos Turcarum habet,  
filios Principis in certo loco aut opido claudere, nec finibus  
ijs egredi, nisi permissu aut iussu patris. Id contra spes aut res  
nouas institutum videtur, & ne militibus aut populo miscean-  
tur, capienturve aut capient. At Selymus fines istos audacter  
migrat, comites & milites colligit, & cum hac manu ad pa-  
trem pergit. Miranti, & per legatos etiam exostulanti, *Ec-  
quid sibi vellet? patrie leges, patris iussa sperneret? quo fine, aut  
causâ?* ille refert: *Non prauitate, sed pietate motum facere. Et Ma-  
humetis legem esse, tertio quoque aut quarto anno visere ad paren-  
tes: velle se parere, & parentis optimi manum* (ita Turcarum  
etiam sermo habet) *osculari*. Baiaziti haud placitum, iterumq;  
legatos & asperiora mandata mittit: quorum summa, redi-  
ret. Ille pergere nihilo sequiùs, & iam Hadrianopoli appro-  
pinquare: nixus, vt putabatur, occulto fauore & gratiâ Ge-  
nitzarorum, quos in partes traxerat. Erat in ea ipsâ tunc vrbe  
pater. qui fraudes aut vim metuens, & simul vrbi dominæ  
timens Constantinopoli, vbi thesauri & regia gaza erat, illuc  
concitus pergit. Idem filius, & patrem in vico assequitur qui  
*Tzurulus* appellatur: quid? ad manus osculum? imò ad ma-  
nus confertionem, & suos instruit, & vim parat facere: pa-  
tre contrâ, cùm eò ventum videt, dirigente. Pugna commit-  
titur, anceps & cum discrimine, maiore etiam metu Baiazi-  
tis; qui haud de nihilo fidem suorum suspectabat, & Deum  
ac Mahumetem altâ voce inuocabat, vindices patriæ & impe-  
ratoriæ



ratoriæ maiestatis. Audiuit ille (non enim iste) & fugit Selymus, vasa & impedimenta omnia amittit, animum & impietatem retinet: ac *Capham* cum venisset, copias iterum colligit, & primâ hieme in Thraciam redit. Fiduciam etiam Genitzari dabant, qui in vrbe tumultuati, *Achmetis* (is frater maior erat) imperium aspernabantur, atque adeò legatos eius qui tunc aduenerant, per ignominiam eiecerunt. Occultè ad Selymum etiam missis, vt appropinquaret: sese cætera exsecuturos, & manu viam facturos ad solium & ad sceptrum. Imperium illud miles tēperat, prauo & noxio more: nec alia caussa exitij aliquādo erit. Sed *Achmetes* horum non ignarus, cum ipse quoque iuxta Constantinopolim venisset; & militum quidam operam ac fidem obtulissent, adnuit, sed quod momentum inclinationi aliorum facturum erat, aurum præfens, & amplioris stipendij spem, non adiecit. Imò vocem iecit, liberam, sed intempestiuam, *Sese vel inuitis illis imperaturum*. Offendit, & alienauit: iamque Selymus ad urbem venit, tentoria in pratis fixit: cui obuiam factus *Corcutes*, frater alter, modesti ingenij, & sapientiæ ac religionis studijs deditus, vt captus est gentis. Genitzari audito aduenisse, statim cocunt & tumultuantur: decem è suis ad Bassas (Præfectos sic nominant) ablegant, qui postulent, *Dominum & Sultanum Selymum esse: Baiazitem ultra non esse, ætatis & virium imbecillum, nec molem imperij sustententem*. Hoc ipsi edicerent, suaderentque volens faceret, quod vel nolens adigeretur: & cederet, aut cædi ipsi Bassæ expectarent. Sententiâ omnium sic ferre. Hæc dicta, & prompti facere erant: ergo timor Bassas incessijt, & Baiaziti rem & discrimen exponunt. Generosus animus, & veteris laudis factorumque conscius, indignari; nihil indultum velle, arma & manus suorum spectare, & implorare. sed abnuentium: atque ibi primus Bassarum (*Vizirium* dicunt) *Mustafas*: Ergo supremum Vale Imperator, inquit: nam nos quidem morituri te alloquimur, nescio an moriturum. Hoc animi tui decretum, vltimum nobis iam dicit: & minas militares addit. Mouetur ille, & ipsos miseratur, atque inquit: Ergo certum ijs, vitam nobis adimere? & huc ventum? *Mustafas*: Huc ventum, quod ad nos attinet: de te, Deus meliora. sed vt optima, spiculis tamen hastarum (verba ponimus) de solio imperatorio scito te de-



*te detrahendum.* Senex videt necessitatem vltimam esse, & paulisper vocem compressam soluit: *Agite igitur, inquit, ad filium ite, nuntiate rerum summam illi permitti.* Filius venit, pater excipit, vultu quidem lætus, & thesauros ei atque alia imperij resignat. Tum & solium conscendere iubet, sed recusantem: & subdolâ modestiâ, solam pietatem, affectumque visendi patris, præferentem. Iterum iubet, propinquo etiam periculo monitus, & minaces militum vultus vocesque audiens, aut videns. Admittit filius, sed in sequentem diem. Conueniunt frequentes, equites peditesque: sedet pro tribunali, & imperij iurisque vsurpandi causâ, vnum è Genitzaris suspendi laqueo iubet: ceteris spe factâ benigni simul, & fortis dignique maioribus imperij. Cuius primum facinus, relegatio patris *Dimotucum*: & priusquam perueniret, interitus veneno procuratus. Aiunt medicum eius corruptum id obtulisse, adamante minutatim confrecto, & cibis immixto: cui tamen pretium operæ mors fuit, & ceruix incisa, cum voce Selymi præuiâ: *Veteri domino infidum, nouo fidum non futurum.* Itum in alias cædes. & quinque fratrum filij occisi: tum ipse frater *Corcutes* neruo arcus strangulatus, cum è fugâ reprehendi curasset. Supererat *Achmetes*, primus fratrum, & societate *Ægyptiaci* etiam Sultani validus: sed falsis Genitzarorum litteris elicuit, tamquam fastidientium nouelli & iniqui imperij: prodiret modò, arma cum ipso in hunc fociaturis se daret. Prodiit, pugnavit, victus, suffocatus est: & solus iam certusque Selymus Princeps. Qui in Bassas & proceres variè item seuijt, homo cedis totus & sanguinis: idem tamen Fortunæ (non enim Deo) carus, & qui res maximas in imperio suo gessit. Persas vicit & reppulit, Sultatum *Ægypti* sustulit, & amplum id regnum sibi posterisque firmiter subiecit. Nihil etiam priuatim aduersum: & dormire videbatur cælestis Iustitia, nisi quòd in extremo actu se ostendit, & peste correptum exstinxit, ipso loco & vico, vbi prima cum patre signa contulisset. Sed & filio tamen felix fuit, magno illo & infesto nobis *Soleimanno*: vt externarum rerum fluxus, non sint tesseræ semper beniuolentiæ diuinæ.



PHVS EGMONDANVS, cui pater *Arnoldus* Geldriæ Dux & dynasta erat. Ille adoleuerat, iste senuerat, & ægrè ferre cœpit patris diuturnum imperium & vitam. Itaque per factiones, quosdam è popularibus in arma trahit, & patri bellum palàm facit. Sed pater viribus & causâ melior, obsessum in opido *Venlone* tenet: ac denique Principum vicinorum interuentu pax coit: hac lege, vt iuuenis urbem *Noviomagensem* sibi accipiat teneatque, in quâ liberè & solus dominetur. Sed exigua hæc ei portiuncula visa, resilit mox à fœdere, familiares quosdam patris in eius contumeliam laqueo enecat: & cùm videt à se vim frustrâ tentari, ad alienam potentiam fugit, ad nostrum *Philippum Bonum*. Bruxellam venit, patrem accusat, sese approbat, promittit multa: sed apud verè *Boni* Principis surdas aures. Desperatis igitur auxilijs, ne patrem videat, Hierosolyma properat, homo facer scilicet ad terram sacram: paullò post redit, omnium inops, quò nisi ad patrem? Recipitur amicè, & ipse pœnitentiam & amorem simulat, sed vultu non animo bonus. Nam fraudem & insidias patri statim ita struit. Erat senex *Gramia* ditionis suæ tunc opido, cum vxore: venit quasi per officium filius. More gentis epulantur & bibunt largiùs, saltant etiam in multam noctem: ipso sene Duce sustentante, & in filij gratiam præter vires & morem lætiore. Tandem cubitum sese confert. Vix fecerat, cùm adsunt à *Noviomago* (ij iuueni parebant) ciues armati, & ab *Adolpho* clam intromissi; rectà ad cubiculum Ducis, duce filio, tendunt. Pulsant fores. ille è lecto, iocos & choréas etiam tunc cogitans, negat id noctis saltare ultra posse: iuvenes faciant, & abeant. At illi effractis iam foribus adstant, iubent surgere & se consequi. Quò autem? ait senex, & ubi filius? Miser, vbi auxilium putat, exitium est: & ille improbus, Pater, inquit, necessitati parendum est, age sequere. Nec tantillum expectant, vt tuniculam interiorem aptet atque induat, ne tibialia quidem sumat: sed pater equitantes filium, nudis pedibus & corpore, ita sequitur *Buram* vsque. Ibi carceri tætro includitur, & sex annos totos (non illius, sed & popularium impietatem culpo) sex inquam annos detinetur. Tandem improbitas querelas vulgi excitat, sed & minas Principum vicinorum: è quibus *Joannes Cliuix*

P

Dux,



Dux, ipsius *Adolphi* auunculus arma etiam sumit. Qui tamen à se parum validus, auctoritatem vel auxilia à Pontifice *Paullo Secundo*, & *Friderico* Imp. petit. Illi statim annuunt, ad *Adolphum* acres minacesque litteras scribunt, & ut patrem luci & libertati reddat, iubent. Nihil fit, ridet. Itaque ijdem *Carolo Audaci* nostro, valido Principi, totam rem committunt: liberet senem, reconciliet filium, denique faciat quod ex æquo & usu videretur. Ille utrumque coram se sistere iubet, qui in Galliae finibus *Dorlani* tunc erat. *Adolphus* haud spernendam iram, & iussa, tam potentis vicini ratus, patrem secum eò ducit: accusat in consilio, fœda & falsa in eum ingerit: quorum facile purgatus senex, bonorum & illustrium virorum testimonijs, tandem impatientiâ & fiduciâ eò prorumpit, ut filium ad singulare certamen prouocaret, ferro & Deo iudicibus innocentiam suam asserturus. Mos tunc satis creber in Martiali nostro populo erat: sed *Audax* tamen abnuitt, fœditatem rei proponens & insolentiam, & simul in euentu incerto certum scelus, *vrerumque* vicisset. Ita re cum suis deliberatâ, pro sententiâ dixit: *Arnoldus* pater solus titulo Ducis utatur: sed filio opida arcesque totius Geldriae cedat, solâ *Graniâ* sibi exceptâ. Accipiat in alimoniam de manu filij tria quotannis aureorum millia. Hæ conditiones: quis abneget, imò quis non miretur filio tam bonas? Sed non silent historici, *Carolus* nescio quâ occultâ causâ an pacto, in filium proniorem. Quid tamen deinde? refertur ad filium, & quidem à viris primarijs & grauibus, inter quos *Philippus* ille *Cominæus* erat, qui hæc scripsit. At ille respondit in ipsa verba: *Malle se præcipitem dare parentem in puteum, se deinde superijcere, quàm ut in has condiciones paciscatur. Quid malum? inquit, pater alibi imperet, qui totos quadraginta annos omnibus præfuit? Æquum est, ut nostræ quoque iam vices sint: nec aliud admiserō, quàm de pensione trium millium, sic quoque, ut pater totâ Geldriâ cedat, atque adeò excedat, nec vnquam pedem in eam referat.* En responsum, non tam impium (& ita tunc omnibus visum) quàm insanum. Igitur *Carolus*, cui aliæ res præuertendæ, cum idipsum temporis *Ambianum* Galliae rex intercepisset; dilatâ hac cognitione, expeditioni se parat. Iuuenis suspicatus detentum se iri, auersione animorum cognitâ, fugam cum duobus comitibus,



tibus, Gallicâ veste, ad suos capit: omnia in reditu vi & armis occupaturus, aut turbaturus. Sed ecce *Namuri*, dum Mosam flumen cymbâ transmittit, agnitus ab vno alteroq; vectorum, mox à pluribus, capitur, & ad *Audacem* reducitur. qui *Viluordiam*, atque inde *Cortracum* duci, & in honestâ custodiâ asservuari iussit. Mansit ad *Audacis* ipsius mortem: cum *Gandauenses*, pro suo tunc more turbas daturi, hunc idoneum ducem arbitrati, eum solvunt, & bello in *Tornacenses* præficiunt, quos tunc Galli habebant. Iuit cum manu aliquâ, adequitat mœnibus, erumpunt præsidarij, & miser inter primos cecidit. Quid tu nunc pater? talionem aliquâ parte à iusto Iudice vides. Carcere te puniuit? ipse sustinuit. Mortem machinatus est? ipse subiuit. Nec sanguis hîc multus fusus, aut violentæ cædes, fa-teor, vt in prioribus: mihi tamen libranti, impiæ Impietatis exemplum visum est, & supra omnia infixæ & obstinatæ. Nero, Tullia, aut alius aliquis, impetu peccauerint & calore: hîc meditaturn, hîc diuturnum scelus est, nec adhesit animo, sed insedit.

Apud nos hæc gesta. quid si in Græciam nouellam, & BY- x.  
ZANTIVM abeo? si ad illos à *Constantino* Imperatores? Fideliter dico, plura scelerum ab hac Ambitione exempla, quàm in aliâ Europâ totâ reperiam. Sollennia illa erant, necare, excæcare, excæcare: hæc patres in filios, item matres ipsæ; hæc filij in v-trosque patrabant. Quid patruos, fratres, agnatos dicam? in le- ui suspitione, & minimo metu hæc facta: quasi per ludum ali- quem & iocum. Et vide ingenium sæuitiæ! certum est, non aliâ re hominem magis abijci, & animo conatuq; cadere, quàm Exsecutione illâ aut Excæcatione. Qui aut virum viro, aut lu- men demit: nihil ab eo viri vltra formidet, & in pœnam aut lu- dibrium modò viuut.

Sed claudio hoc totum de Ambitione, vno eoq; iocoso ex- XI.  
emplo. CHAN TARTARORVM (eorum Princeps sic dicitur) cum *Stephanus* haud ita nuper optimus fortissimusque Polo- niæ Rex obiisset, in comitijs de Rege creando, ipse quoque per Legatos interuenit. Dixit & proposuit ista: *Potentem se esse, & posse myriades aliquot equitum* (vera sunt) *educere è suis terris,*



*Polonia tuenda vel augenda. Item, frugalem se & continentem esse, ac sine ullis ciborum delicijs, solâ equinâ in fame contentum. Tertiò, quod ad Religionem, de quâ disputari audiebat, Tuus, inquit, Pontifex, meus Pontifex esto; tuus Lutherus, meus Lutherus esto. Si risu excepta Legatio fuit, nemo quærat. effuso maximè: & ecce hominem paratum omnia sacra & deos deferere, regnandi causâ.*

## CAP. VI.

## DE PRINCIPVM INCLINATIONE.

*Deteriores eos sæpe fieri, & mutari.*

**N**escio quâ causâ occultâ, præter apertas, etiam euenit: ut cum in alijs artibus usu homines discant, & meliores fiant, in hac regendi ferè contrâ, & Principes inclinent. Omnis ætas dicet, & rarò decursum ad metam æquabiliter hunc cursum. Causæ partim in Principe, partim Nobis, partim Principatu ipso videntur: atque obiter examinemus. In Principe, quia initio magis intendit, & pudor est, & bonæ famæ studium: quæ calcat paullatim, & in omnium obsequijs audaciam, & proteruiam, & contemptum sumit. Itaque rumor ille (ait Lampridius) qui plerumque nouis solet dominari Principibus, nisi ex summis virtutibus non permanet. Benè initio audiunt, & faciunt: sed rarò constans est illa virtus, nisi firmo fundamento nixa & instructa. Secunda causa, ab infirmitate ingenij humani est. grande illud imperij pondus aliquamdiu rectâ ceruice sustineri, vix semper potest: lassantur, & se inflectunt. Quò facit natura, prona in vitia: & magis, ubi non metus aut pœna retinet; sicut in Principe, qui est super ista. Et nisi ipsum illud Honestum eum teneat, & Religio: quis est qui possit? Accedunt deprauatores, insitum Aulæ malum: & qui prauè etiam facta laudantes, magis istuc ducunt. Itaque ut qui vinum bibunt, initio pares sunt, & sensibus subsistunt: mox alienantur, & compotiores etiam inuitant aut urgent: sic in potentiâ,



tentiâ, cum noua & modica, ferunt: diuturnâ corrumpuntur, & fiunt ebrij, & magis tales faciunt adulatorem. Panegyricus scriptor rectè: *Ubi sub tanto onere infirmitas lapsa est, faciunt licentiam de potestate*: habenas omnes ingenio suo & cupidini laxant. Causæ etiam in Nobis & subditis, sunt istæ. Credulitas prima. quod temerè initio, etiam de malis aut ambiguis benè speramus: & quid mirum igitur falli? Neque illi se mutant: sed nos opinionem. Inde iactatum apud nos proverbium: *Flandros amare futuros Principes, odisse factos*. Cum præsentem enim displicent, alios adspicimus & optamus: atque ut ægri, mutationem remedium destinamus. Secunda, quod refractarij sæpe & prauis simus, & communiter etiam erga optimos ingrati: donec esse desinant. Id Principes grauantur & indignantur, & paullatim affectum & curam à talibus abducunt. Magis autem, cum seditio, rebellio, aut infidiæ sunt: tum & iustè putant se opprimere aut affligere, & plurimum noxam omnes luunt. Ausim dicere, bonos Subditos facere aut seruare Principes bonos. At causæ in Principatu ipso sunt. quod is ad Superbiam & contemptum inuitet: & vel firmissimos conuellat, & à statu paullatim abducatur. Sicut cæli à supero illo abripiuntur, & quamquam contrà nitentes obsecundant: sic Principes ab ipsâ illâ potestate. Vidēsne priuatos homines in opibus magnis, aut prosperitate, deprauari, & à veteri viâ & vitâ flectere? idem fit istic. Potentia impotentiam gignit, licentia libidinem, vitia: & ut pondera ab alto lapsa, in præcepseunt. Quid, quod interdum ipsa Infelicitas mutet? ut quibus domi aut militiæ res sunt improspere, ipsi fortunæ, ipsis subditis (etsi extra culpam) obirascuntur; & ut in tempestate, clauum abijciunt, & dant vela ventis. Priuatim saltem oblectamenta quærunt, conuiuia, ludos, mulierculas: publicum omne decus aspernantur. Exempla horum pauca videamus.

Insigne primum in DIONYSIO IUNIORE tyranno Sicilia: I. qui mortuo patre, mirè clementem se exhibuit & benignum. Tria millia nexorum, ob æs alienum, soluit; tributa per triennium remisit; alia, in gratiam & famam populi. Sed mox iam



dominationis certus, rettulit ingenium, quod paullisper seposuerat: auunculos interfecit, quos verebatur aut timebat; item fratres suos, nequis æmulus superesset; mox in omnes promiscuè sæuijt, ille *Dionysius* effectus, cuius non tyranni, sed tyrannidis, nomen habetur.

- II. At hic naturâ prauus: à causis, & vi aut vitio Regni, *PHILIPPVS* Macedonum rex pænultimus, cui cum Romanis bellum fuit. Erat sanè ille (Polybius testatur, qui nouit & vidit) plerisque dotibus corporis atque animi ornatus: vultu decorus, corpore erectus, eloquentiâ promptus, ingenio & memoriâ validus, lepore & dictis etiam facetus, atque omnia cum regio quodam decore & maiestate. Accessit virtutum studium in togâ, & in bello, animi magnitudo, & liberalitas: vno verbo, vix alium tantâ indole aut spe Regem Macedonia aut Græcia viderat. Sed ecce momento omnia vertuntur: siue Fortunæ culpâ, quæ aduersa ei in Romanos, animum infregit & ab instituto ad gloriam cursu reuocauit; siue delatorum vitio & suo, qui aures eis temerè & facilè præbebat. Sanè optimos quosque à se spreuit, veneno & ferro grassatus: sed nec sanguini & filio suo *Demetrio* tandem parcens. Denique ille *Philippus*, de quo omnia bona sperata & videri cœpta, in omnia mala desijt, prauus, inuisus, infelix.
- III. *HERODEM* Iudææ regem licet addere, insignem, mitem, magnificum, primis sex annis, siquem alium: reliquos triginta & vnum sic immanem, trucem in suos alienosque, vt septuaginta Senatores regiæ stirpis interfecerit, vxorem suam, & tres filios: denique moriturus, ex omni Iudæâ nobilissimum quemque, quasi ob aliam causam, euocari ad se iusserit; & cum venissent, ambitiosè ab amicis petijt, vt inclusos Circo, ad vnum interfici à militibus curarent. non ob noxam, sed (vt aiebat) quò verus iustusque dolor funeri suo exhiberetur, cum nulla familia immunis ab hac clade esset.
- IV. Quid *TIBERIVM* Romanum Principem loquar? res pernota est, bonum fuisse, donec *Germanicus* ac *Drusus* superfuere; mixtum virtutibus ac vitijs, matre incolumi; pòst in omne scelus,



scelus, flagitium, & infamiam prorupisse, ut ipsum quoque interdum non factorum solum (animo torquente) sed vitæ pæniteret.

NERO in eâdem re Romanâ notatur, magnus initio Princeps, magnum postea monstrum: & Traiani elogium de illo fuit, *Omnes etiam optimos Principes longè à primo quinquennio Neronis abesse*. Quod in alijs fortasse verum fuerit; sed domi tamen veneno frater sublatus, secundo statim anno, dedecorat hanc laudem. Plura exempla notare est: plura? imò plurima: sed fastidium paritatis vitandum est, & nihil hîc, quod singulariter narretur.

## CAP. VII.

## DE FINE PRINCIPATUS:

*Qui est, Publicum Bonum.*

**A**T Princeps, ne inclinet sic & labatur, sed bonus sit & perseueret: quid magis eum fulciat & firmet, quàm Finis semper in oculis, quò spectet? Neque enim Principatus ipse finis est, absit, aut altitudo illa & splendor: sed populi bonum, id est directio eius & tutela. *Officium est imperare, non regnum*, ait Seneca noster. Græci ἀνάρχες reges dixerunt, ut Plutarchus interpretatur, ἀρὸ τῆ ἀναρχίας ἔχειν: quod est, curam gerere, & tueri. Certè debent. ipsum Regis nomen apud Latinos eodem vocat: ut ordinem seruet, compositè imperet: quod qui negligit, non regit ille, sed dissipat & perdit. Cogitet secum Princeps: *Ego ex omnibus mortalibus placui, electusque sum, qui Deorum vice in terris fungerer: ego vitæ necisque gentibus arbiter: qualem quisque statum sortemque habeat, in meâ manu est positum.* O dignitas! vicarium Dei esse, & non esse æmulum? Vide ut ille ab orbe condito dispenset, & regat, æstates, hiemes, anni tempora; fruges, fructus, tot vsui nostro aut voluptati; cælos, terras, maria, omnia in statu & concordia, etsi maximè discor-

Epist. xci.

Sen. i. de Clem.



Ibid.

discordia, seruet; parcat plurimum, interdum puniat; verus pater simul & dominus generis humani: quid desideres, præter hoc exemplum? Subsequere: & à Deo reges, ad Deum eant. Sint igitur in assiduâ curâ, sed cum tranquillitate & pace: & hæc vtraque suis, quantum potest, procurent. Absit otium. *neque enim specie tenus* (ait Panegyristes) *ac nomine, fortuna Imperij consideranda est.* Sunt trabeæ, & fasces, & stipatio, & fulgor, & quidquid aliud huic dignitati adstruximus: sed longè maiora sunt, quæ vicissim nobis, auctoribus fautoribusque potentia, debent. *Admittere in animum totius reipublicæ curam, & populi fata suscipere: & oblitum quodammodo sui, gentibus viuere. Accipere innumerabiles vndique nuncios, totidem mandata dimittere, de tot urbibus, nationibus, & prouincijs cogitare: NOCTES OMNES DIESQUE, perpeti sollicitudine, PRO SALVTE OMNIUM cogitare.* En breuiter tuum munus, & in fine Finis, Populi salus. Exempla addamus, qui fecere, aut facturos se sunt professi. Inter istos

I. TIBERIVS Imperator. qui pulchrâ voce (utinam & re!) testatus, in pleno Senatu: *Dixi & nunc, & sæpe aliàs P. C. bonum & salutare Principem, quem vos tantâ & tam liberâ potestate instruxistis, Senatui SERVIRE debere, & VNIVERSIS civibus: sæpe ac plerumque, etiam SINGVLIS. neque id dixisse me pœnit.* Pulchrâ, inquam, voce, & quam sine Numine conceptam non reor, aut emissam. Quid verba facimus in instruendo Principe? ecce hîc compendium. *Seruiat*, id est audiat obsequaturque *Senatui* & bonis consiliarijs: *seruiat vniuersis*, in bono omnium procurando: *seruiat singulis*, in Iustitiâ administrandâ, iniuriâ arcendâ. Sine istis, non est Princeps, sed tyrannus.

II. Quod TRAIANVS, item Imperator, considerans, cum Præfectum suum Prætorij, de more, gladio succingeret, daretque vitæ & necis potestatem: *Cape hunc*, inquit: *& si quidem rectè & EX UTILITATE OMNIUM imperauiero, pro me; sin aliter, contra me utere.* Optimam Optimi illius vocem! Viuam, si reipublicæ viuo: si mihi, arma hæc in me verte.



Iam HADRIANVS Imp. quoties auditus est dicere: *Ita se rempublicam gesturum, ut sciret REM POPVLI esse, non suam. Iterumque, quod eodem ducas: Talem se praeiturum Imperatorem, qualem sibi optasset priuatus.* I I I.

VESPASIANI etiam caeleste dictum est, qui sanus valensque, semper in publicis occupatus, etiam aeger perseuerauit: & reuocantibus amicis, utque sibi parceret, *Imperatorem inquit stantem mori oportere.* I I I.

Inferiore auro HENRICVS Imp. Friderici filius, ita affiduus in rebus, ut vix serò cibum caperet. Cumque idem moneretur, valetudinem & vires cordi habere, respondit: *Priuato quidem homini omne tempus cibi esse, cum id lubet, aut solet: at Regi, si nomen suum non abdicat, id solum, quo vacat.* V.

Itaque rebus hominibusque se dant, etiam vilioribus: nam & ij Principatus membra. Insigni hinc monito RVDOLFI Imperatoris Austriaci, qui cum submoueri à satellitio suo tenuiores quosdam videret, ad se affectantes, non sine stomacho edixit: *Per Deum ( ipsa eius verba sunt ) finite homines ad me venire. Non enim ideò ad imperium sum vocatus, ut in arcula includar. Melius nihil possum, desino, & hoc infigo.* V I.

## CAP. VIII.

## DE EXEMPLIS PRINCIPVM.

*Ea facere ad Virtutes aut Vitia subditorum.*

**P** Principem ob se bonum esse oportet, sed etiam ob alios: quos talis emendat, aut alius deprauat. Nam homines in primis ad alta ista flectunt oculos, & exempla sibi suis inde moribus sumunt. Sallustius: *Qui magno imperio praediti, in excelsa aetate agunt, eorum facta cuncti mortales nouere. Ita maxima fortuna, minima licentia est.* Sicut igitur regulam maximè rectam esse oportet, ad quam cetera diriguntur: sic Principem.

Q

Et



Et ut in corporibus grauissimus est morbus, qui à capite diffunditur: sic qui ab illo. Pindari, ad Hieronem Siciliae regem, aurea dicta sunt:

Αλλ' ὁμῶς κρείσσων γὰρ οἰκτιρμῆς φθόνος

μὴ παρέρη καλὰ νῶ-

μαι δικάϊον πηδάλιον ἔχον. α-

ΐδου δὲ δὲ πρὸς ἀκροῖν χάλ-

κυνε γλῶσσαν.

εἴ τι καὶ φλαῦρον ὠδύνην

σε, μέγα τοι φέρεται

πᾶρ σέθεν πολλῶν ταμίαις

ἑστί· πολλοὶ μάρτυρες ἀμφοτέρω περὶ.

*Attamen (melior enim miseratione Inuidia.)*

*Ne omitte honesta. gubernam*

*Iusto clauo populum,*

*Veracemque ad incudem*

*Fabrica linguam.*

*Si enim vel leue eruperit,*

*Magnum feretur*

*Abs te. multorum dispensator*

*Es: multi testes utrisque fidi.*

I. ALPHONSVS rex Aragoniæ & Neapoleos, cùm de Subditorum moribus disputaretur, dixit: *Ut herbas quasdam ad Solis motum, sic populares in Principum mores verti.*

II. ALEXANDER MAGNVS ceruice leuiter incuruâ & pandâ fuit, quod certatim procures & aulici imitati, quasi ipsum sic effingentes. Adeo & minuta obseruant, atque æmulantur: utinam sic interiora & virtutes!

III. Luxus in conuiujs, veste, supellectile, familiâ, ad VESPASIANI tempora nimis Romæ inualuit: nec vel legibus potuit coerceri. at statim, illo Principe, sponte exoleuit. Causa in Tacito: *Præcipuus adstricti moris auctor Vespasianus fuit, antiquo ipse cultu victuque. obsequium inde in Principem, & æmulandi amor, validiora quàm pœna ex legibus & metus.*



## CAP. IX.

## DE IUSTITIA:

*Quam Princeps in se, & suis, seruet.*

**I**Nter omnes autem Virtutes, sunt quædam velut Regiæ, & Principales, vt *Iustitia* primùm. à quâ Homerus Reges *δυναστές* appellauit, circa ius occupatos & versantes. Nihil ijs conuenientius, nihil dignius: & seruata, regna seruat. Seruanda autem, etiam in ijs quæ Principes, aut qui circa ipsos sunt, tangunt. Mali doctores, qui à legibus eximunt: qui cum Caligulâ censent, *Omnia ipsi, & in omnes, licere*. Siue cum Sallustiano Memmio: *Impunè quidlibet facere, id est regem esse*. Abite qui docetis, qui discitis: imò qui præest Iustitiæ, ad eam præeat, & exemplo commendat. Theodosium imiterur, de quo Panegyristes: *Idem es qui fuisti; & tantum tibi per te licet, quantum per leges antea licebat. Ius summum, facultate & copia commodandi, non securitate peccandi experiris*.

Dixit, sensitque ANTIGONVS Macedonum rex, cui cum blandiens aliquis suggereret, *Omnia regibus honesta iustaque esse*: respondit: *Sunt hercules, sed Barbarorum dumtaxat regibus. at nobis ea honesta, quæ honesta sunt, & iusta quæ iusta*. Retudit adulatorem, & docuit, non regulam iustitiæ regem, sed ministrum esse. Quid idem iterum? Scripsit ciuitatibus, vt *Siquid fortè iuberet, quod aduersaretur legibus, ne admitterent: ac pro eo haberent, atque si inscio se scriptum esset*.

ZALEVCVS verò & insigni facto iustitiam asseruit. Legem, inter alias, Locrensis tulerat, vt *Adulter oculis orbaretur*: iustissimè, quia ij ferè ad hoc crimen illices sunt, aut duces. At ecce filius paullò post adulterauit, & legis reus etiam pœnæ erat. quam tamen populus consensu, miseratione moti (vnicus enim erat) & in patris gratiam, remisit: sed patre abnuente & indignante. *Lex, inquit, sancta & pœna, etiam in nobis esto: sed viam repperi, quâ illâ saluâ humanitati indulgeamus*.



*Ipse & ego, unum sumus. mihi ergo unus oculus, alter ipsi eruat: atque id factum.*

III. CHARONDAS autem Thuriorum legislator, in eadem magnâ Græciâ, seuerior & in se fuit, aut verè dicâ crudelior. Nam & ipse legem tulerat contra ciuiles factiones & cædes, *Nequis cum telo in concionem venisse vellet: qui aliter, capitale id esset.* Accidit, vt ipse rure veniens, & indictâ subito concione, vti erat, ad eam armatus accederet. cumq; æmuli occlamaissent, *Soluere eum legem, quam tulerat, ac palam cum telo esse: ipse errore cognito, Mehercule ita est, inquit, sed idem ego sanciam.* statimque stricto ferro incubuit. A fine aliquis laudet, à facto non probet.

IIII. At PHILIPPVS MACEDO, Magni pater, quàm obnoxium se iustitiæ præbuit, & aures suas verberari vel conuicio passus est, quod ægrius quàm gladio, Principes ferant? Dicebat apud eum caussam *Machetas* quidem: & Philippus parùm intentè visus audire, &, re non benè totâ cognitâ, damnassee. Machetas non tulit, & Macedonicâ ac militari libertate, *Appello*, inquit. Philippus miratus & iratus, *Tu à rege? & ad quem?* Machetas: *Ad ipsum te*, inquit, *sed vigilantem & attentum*: Siue, vt alij efferunt, *Ad Philippum sobrium*. Sed siue incuria, siue vinolentia regi obiecta; excussit vtramque, & re propiùs periculatâ, iniuriam Machetæ factam agnouit, & vindicauit. Quomodo? saluo tamen priore decreto: & æstimationem litis ipse à se dependit. Dupliciter laudandus. & quòd se, saluâ rei iudicatæ firmitate, immutauerit: & pænitentiam, pœnam etiam suam fecerit.

V. Hæc in ipsis Principibus: circa ipsos, ista. ARTAXERXES Persarum rex, *Longimanus* cognomento, identidem obtundebatur (sic loquendum est. importunè, & sæpe, alter ingerebat) cum, inquam, obtunderetur à *Satibarzane* gratiofo satrapa, in re quapiam iniustâ, quam alteri volebat impetratam: ille tandem resciiuit *triginta Daricorū millibus* emptum Satibarzanem, vt confectum hoc daret. Vocat ad se igitur, atque vnâ *Quæstorem*: & *Heus tu*, inquit, *triginta millia huic illico adnumera:*

*tu au-*



*tu autem hac cape, & tibi habe. Cum enim dederò, nihilo pauperior ero; at si tuum illud concessero, multo iniustior. Laudo, laudo. neque amicum alienauit, fidei cognitum; neque Iustitiam ullâ re violauit.*

PHILIPPVS iterum Macedo consimile: neque par tamen vndique. nam æquitate affidet, liberalitate non conuenit. Harpalus pro amico quodam, iniuriarum postulato, acer & multus apud Philippum intercedebat, & liberari volebat. Addebat, se pro eo multam, quanta esset, depensurum. Hic Philippus: *Quid tu igitur satagis, si multa dependitur?* Harpalus: *Nempe ut fama sit ei salua.* Philippus: *Quid tu ais? & non æquius illum malè audire, qui malè fecit, quàm me innoxium, eius causâ? bonum factum, bonum dictum.*

Nostri aut patrum æui vnum adiungam. Erat CAROLO AVDACI, Burgundiæ & nostro Duci, vir nobilis in feruenti gratiâ: atque ei præfecturam opidi in Zelandiâ dedit. Ipse ibi in otio, amorem concipit in fæminam corpore scitam & moribus, animo meliorem, ut docuit euentus. Primò aspectus, obambulatio, suspiria, & quæ solent amantes: mox audacior & verba miscet, & affectum aperit, & solatium orat. Neque promissis abstinet, & omnia tentat, quæ sint expugnandæ. Frustrâ, munita vndique castitas erat. Igitur desperatione ad facinus se vertit. Præfectus erat, ut dixi, & Carolus noster in bello: maritum igitur amatæ fæminæ proditiōis insimulat, & statim in vincla missum carcere custodit. Quo fine? ut vel hoc metu minisque illam moueat, & obnoxiam sibi reddat: vel maritum ipsum amoueat, remoram amori. Custodit igitur, & mulier casta & viri amans statim ad carcerem, à carcere ad Præfectum, deprecatura aut liberatura, si possit. Præfectus: *Et tu o mea me rogas? imperium, quod in me habes, ignoras? affectum saltem mutuum redde, & maritum ecce reddo. Detinemur enim uterque, ille in meo, ego tuo carcere aut vinculis: ah, quàm facile vtrumque soluis!* Quid renuis? amans peto, & per meam vitam; Præfectus peto, & per mariti tui vitam. Utraque agitur: & perire si debeo, perdam. Atqui miserere, & mulierem te, & coniugem ostende. Mulier rubere ad ista, & stupere: & tamen pro marito



marito etiam timere. Constat magis animo, quàm corpore: & trepidat, & paller. Atque ille, quia moueri visa, & leuiter vim verecundanti adhibendam ratus (soli erant) in lectum impellit, fruitur fructum, vtrique mox acerbum. Nam mulier confusa & lacrimabunda abiens, pudoris magis quàm peccati ægra, iram & vindictam coquit: quam magis etiam accendit barbarum (quomodo aliter appellem?) Præfecti factum. Nam ille voti potitus, & cetera prolixa autumans, si æmulum sustulisset: maritum damnari curat, damnatum capite plecti. At id non in publico, sed carcere ipso factum: atque ibi cadauer in arcam ligneam inclusum, mox sepeliendum. Venit intercà mulier, siue accita ab ipso (vt quidam tradiderunt) siue sponte & super salute mariti anxia: sed venit, & vel ex pacto maritum recipere se sperat. Ille benignè affatus, *Et maritum, inquit, queris? habebis. Abi* (& digitum ad carcerem intendit) *inuenies, & tolle.* Nihil suspicata abit, videt & percellitur, & animo ac corpore lapsa super cadauer se abiicit: ac diu lamentata, recipit animum atque iram, rediensque atroci vultu & verbis. *Et hercules, inquit, reddidisti maritum: gratia debetur, exsoluam.* Retinere & placare conatur, frustra: non tigris magis sæuiat, sætu erepto. statimque amicorum fidis aduocatis, rem denarrat, eius ordinem, & culpam suam non culpam: ac consilium viamque vltioni exquiri. Censent omnes ad Principem eundum: qui inter alias virtutes (insignes habuit, nisi superbiâ & peruicaciâ corrupisset) eximius Iustitiæ cultor erat. Accedit duobus amicis comitata, auditur: vix creditur. & indignatur & dolet Princeps, hoc in suo solo, & è suis, quemquam ausum. Sed & mulieri edicere minaciter, nisi vera & certa afferret, malum habituram. Iubet manere in Aulâ, & in vicinum cubiculum secedere, dum Præfectum vocat: nam fortè & ipse in Aulâ erat. Venit, introducit & mulier. *Hanc nostin?* ait Princeps. Colorem homo mutat: & Princeps exsequitur: *At querelas, quas super te defert, etiam nosti? Atroces sunt, & quas nolim esse veras. Quid ais?* Vacillat, perplexè loquitur, negat aliquid & annuit: donec Princeps ex vultu ipso & sermone culpam suspicatus, vt tamè certior esset, remotis omnibus solum alloquitur. *Quam*

*fidem*



*fidem mihi debeas, & quam beneficijs meis gratiam, non nescis. Per hanc & illam te adiuro, ut quid in hac re sit, liquido & sine ambagine denarres. Fatenti gratia, aut aliqua severitas, non deerit: nec abnuenti tormenta. Ibi ille ad genua se abijcere, factum agnoscere: denique mulierem culpæ omnis liberare, se onerare: sed in gratiâ Principis refugium & solatium ponere. Quam ut magis impetret, illicitam libidinem purgaturum matrimonio offert. Princeps, quasi aures præbens & iam mitior, mulierem reuocari, quosdam è suis adfistere iubet. Et heus tu, quoniam huc ventum est mulier, placetne maritum hunc habere? Illa abnuuit: & tamen voluntatem aut iussa Principis timens, adspicit circumstantes. Qui certatim innuunt aut suggerunt, accipiat conditionem viri nobilis, diuitis, apud Dominum gratiosi. Victa dat manus: quas Princeps iungi cum Præfecti iubet, & sollemnibus verbis matrimonium firmani. Firmato, iterum Princeps: *Tu noue marite hoc iam nunc largire, ut si prior sine liberis obeas, hæc coniux heres omnium bonorum tuorum sit.* Libens concedit, testes audiunt, tabularius scribit. Et his iam peractis, noster *Carolus* ad fæminam: *Dic sodes, animo tuo factum iam satis?* Satis, inquit mulier: *At nondum meo,* ille subiicit: & ablegatâ fæminâ, iubet Præfectum in illum ipsum carcerem duci, in quo maritus cæsus, & pariter cæsum in arcam ligneam siue capulum deponi. Facta sunt. tum mulierem ignaram eò mittit: quæ inopinato iterum casu conterrita, duobus maritis eodem ferè tempore, eodem certè supplicio amissis, mox in morbum incidit, & facto obiit. Hoc solum alteris nuptijs lucrata, ut liberos ex priore coniugio diuites relinqueret, nouâ hereditate. Tragœdiæ exemplum est: sed gratulor Belgicæ talem exitum, sub tali Iustitiæ vindice: & vos successores seruate.*

Atque hæc circa Amicos breui, sed memorabili, facto claudam MAHVMETIS *Secundi* Turcarum Principis, quem veriùs *Muchemetem* scribi, gnari linguæ persuadent nobis. Memorabili, quia circa filium: & quid propiùs tangat? Is igitur *Muchemetes* filium habuit *Mustafam*, imperio destinatum: & cetera bonum, libidinibus pronum. Hic *Achmetis* Bassæ uxorem, insigni formâ, adamabat, & blanditijs diu peruincere conatus,

VIII.

S. 120



conatus, cum non succederet, insidijs tentauit. Speculatus est tempus, quo in balneum mulier iuit (& sæpe lauant se Turcæ:) & mox secutus cum paucis suorum, ibi nudam & frustra renitentem compressit. Illa ad maritum, maritus ad Imperatorem flagitium detulit, pœnas poposcit. *Muchemetes* primò cunctari, tum asperioribus verbis (sed alius in mente sensus erat) *Bassam* excipere: *Et quid*, inquit, *sic grauiter de filio queri tibi visum est? An nescis te, & tuam, iuris mancipijque me esse? Si filius igitur illam amplexus est, & anima suo morem gessit; nempe ancillam meam amplexus est. sine ullâ quidem culpâ, si me volente. Hac cogita, atque abi: cetera mihi permitte.* Sed ista iuris tuendi causâ magis, quàm quia sentiret, dixit: atque animi ager & faucius, filium ad se vocatum primò examinauit; tum confesum pessimis verbis minisque acceptum dimisit. Et mox minas in rem confert: ac triduo post, cum aliquamdiu in pectore filius & Iustitia pugnassent, hac vincente, fauces *Mustafa* neruo arcus iussit effringi, & morte *Pudicitia* litare.

## CAP. IX.

## DE IUSTITIA.

*Quam Princeps erga subditos seruet.*

**Q**uid enim potius faciat? prima institutio & admissio regum ab hoc fine fuit. Sine Iustitiâ viuere inter nos, id est in Societate, non licet: ergo aliquis, aut aliqui eligendi, qui huic administrandæ præsent. *Liuius* benè: *Multitudo coalescere in vnius populi corpus, nullâ re, quàm legibus, potest.* Planè nulla. hæc vinclum est, & vt sic dicam, coagulum: solue, dissipamur, & vt feræ solitariae, vagamur. *Homerus*, qui omnia sciuit, de Iustitiâ istud:

Lib. I. :

Odyss. 6.

Ἡ' τ' ἀνδρῶν ἀγορὰς ἢ μὲν λυεῖ, ἢ δὲ καὶ δέσσει.

*Quæ cætus hominum cogit, soluitque vicissim.*

Cogit & seruat, si seruas: soluit, si negligis & seponis. Mirum & breue, sed verum est: nullâ re (ad vsum prouoco) quæcumque



que Respublica magis florebit aut floruit, quàm rigidâ & immotâ Iustitiâ: nullâ re magis flaccescet & deficiet, quàm illâ tali. Hęc felicitas regnorum & statuum, interna & externa. Interna quidem. nam quis nescit scelera & flagitia per eam remoueri, virtutes promoueri? Externa. quia agri, viæ, maria frequentantur, & securitas vbique ac tranquillitas regnant. Boëtius egregiè: *Annum bonum, non tam de magnis fructibus, quàm de iustè regnantibus, existimandum.* Quid iterùm Homerus?

1. De Con-  
sol. phil.

Ὡς ἔτεός ἡ βασιλῆος ἀμύμονος, ὅς τε θεοδῆς  
Ἀνδράσιν ἐν πολλοῖσι καὶ ἰφθίμοισιν ἀνδράσων,  
Εὐδικίας ἀνέχουσι· φέρουσι δὲ γαῖα μέλαινα  
Πυρρὲς καὶ κελδάς, βριθῆσι δὲ δένδρεα καρπῶ,  
Τίπτει δ' ἔμπεδα μῆλα, θάλασσα δὲ παρέχει ἰχθυῖς,  
Ἐξ εὐηγροῖας ἀρετῶσι δὲ λαοὶ ὑπ' αὐτῷ:

Odyss. T.

Ut cùm Rex bonus imperat, & metuens Diuorum,  
In multis populis & fortibus. ille quoque idem  
Iustitiam colit: obserues & tunc sola terræ  
Fructus ferre suos, & fruges fundere, itemque  
Fætificare armenta, & pisces exundare:

Nempe ex Iustitiâ. populisque benè atque beatè est.

Si attendas, & dilates: quam laudationem vberem Iustitię non scribas? Ergo felicia regna reddit: eadem alia, si languet aut perit. O pulchrum, cùm licet gloriari aut dicere, quod GVILIELMI, quem *Acquisitorem* vocant, temporibus in Angliâ: *Totum regnum puellam onustam auro posse peruadere!* Vt possit, Iustitia

∞. LXXXV.

### MON. I. Seuerè administranda.

Etiam in paruis rebus, aut iniurijs. Quod fecit ANDRONICVS *Comnenus*, Imperator Byzantijs: qui nullo discrimine nobiles aut nouos; tenues, diuites; suos, aut alienos, solitus culpæ conuictos damnare. In his *Theodorum* quemdam è suis caris, quem agricolæ detulerant, diuertisse apud se cum seruitijs, nec in discessu quidquam soluisse. Res erat (vt hodie) non nimis noua aut insolens Palatinis. Tamen Imperator hominem statim corripi, fusti duodecies in publico cædi iussit, tum agricolis damnum largiter rependi.

I.

R

Scripsit



- II. Scripsit IDEM ad Præsides & Magistratus hisiphsis verbis:  
*Aut iniurias, aut vitam relinquire, nam vos iniuste agere, & vivere,  
 nec Deo gratum, nec mihi eius ministro ferendum est. Tu verò nunc  
 viue Imperator, & mapalia nostra ordina.*
- III. LEO ARMENVS ibidem Imperator, cùm Palatio digressus  
 adiretur à tenuioris fortis homine, qui vxorem suam diceret à  
 Senatore raptam, stupratamque: & id se facinus ad Præfectum  
 detulisse, nec ius adhuc sibi dictum: *Leo* confestim mandauit,  
 vt reuerso sibi actor, reus, Præfectus sisterentur. Quos deinde  
 auditos, cùm noxæ reum, negligentia Præfectum comperisset:  
 hunc dignitate, illum vitâ exiit. O factum, Dei hominumque  
 fauore dignandum!
- IIII. Neque aliter in causâ simili TOTILA rex: eo laudabilior  
 quòd barbarus patrauit, & in militem, non sine metu seditio-  
 nis militaris. Accessit eum Calaber quidam, incusauitque è sa-  
 tellitio eius militem filia suæ per vim compressæ. Totila statim  
 in vincla hominem dat, pœnas sumpturus: quas tamen mili-  
 tes remorantur, miseratione, an cupidine similis licentiæ: at-  
 que agmine adeuntes petunt dimitti, & sibi donari, commili-  
 tonem notæ virtutis, & facinorum clarum. Totila auditos acri  
 oratione castigat: *Quid agitis parùm prouidi, aut vobis vultis? Si-  
 ne iustitiâ rem civilem, aut militarem, stare non posse, satis vos Theo-  
 dahadas rex docuisse debuit: qui pretio aut gratia eam largitus, quas  
 clades ipse passus est, & per eum gens Gothorum? Nunc me rege, &  
 illa renixit, ac statim caput sustulit. Vetus illa gloria nostra ac fortuna:  
 & vultis illam & hanc iterum (nexa ea sunt) corrũere ac labi? Quo  
 autem pretio? vnus è vulgo scelus admisit: & placet gentem totam  
 luere, & vos venire, strenuos & integros, in communionem noxæ?  
 Nam venitis: & assident inter se, ac panè paria sunt, delinquere &  
 tueri delinquentes. Paria? imò maius hîc peccatum est, viam aperire  
 & struere peccaturis. Sed. de vobis, vos videritis milites: ego altâ  
 voce & corde proclamo, non feram: & si ferre vultis, me auferre. Ecce  
 corpus & pectus. Moti sunt, & animos ponunt, rem ei permit-  
 tunt. qui hominem carcere eductum audit, ac capitis damnat:  
 damnati bona vitiata velut in dotem donat.*



ALFONSVS rex Hispaniæ, sed *Imperator* cognomento, quia V.  
huic dignitati destinatus, insignis æqui iustique cultor fuit. Exemplum. Nobilis quidam in Galæciâ, stirpe suâ fîsus, & temporum perturbatione confîsus, rusticulum bonis omnibus spoliauit. Prætozem ille adit, hic nobilem monet desistere & reponere: non audit, rex aditur. Iubet idem, nec obtemperat, in locorum longinquitate spem etiam ponens. At rex, ceteris omnibus omîssis, priuati habitu, quo res occultior esset. Toletum in extremam Galæciam pergit. Militis ædes obsidet, dilapsumque comprehendi è fugâ, & pro ipsis foribus laqueo suspendi, & cum ignominia strangulari mandauit.

In nostrâ verò Belgicâ BALDVINVS *Septimus* Comes Flan- VI.  
driæ, *Petrum* virum nobilem, & *Orscampi* toparcham, ob duos boues pauperulæ viduæ reclamanti abductos, re ad eum delatâ, subito arripi iubet, & atroci morte puniri. Fortè lebes aque feruentis in medio Brugenfi foro erat, monetario puniendo destinatus: in hunc sine morâ hominem conijci iubet, sic vt erat, ocreatum, vestitum, gladio accinctum. Quid ais? sic calidè, & an non temerè? Nihil. nam inquisitio præcesserat, & culpæ conuictus, per aliam causam euocatus, pœnas sic luit: meo animo, rectè & salubriter.

Ille IDEM vndecim equestris loci viros, quòd tres mercato- VII.  
res per viam bonis, & deinde vitâ exuissent, vocatos in Palatium damnauit. Statimque se coram laqueis iniectis, destitui super tabulam annexos ad trabem iussit: ac manu tum suâ tabulam subduxit, ac pensiles fecit suffocauitque. Rem laudo, modum improbo: ac potuit debuitque manibus hoc alienis.

MON. II. *Sine affectu vel aspectu administranda.*

Quod nobili exemplo præiuit C. MARIVS, ille septimùm I.  
Consul. Cimbricum terribile Romanis bellum erat, & ei, postquam aliorum ducum pertæsum esset, Marius præfectus. Fecerat Tribunum in legione sororis suæ filium, militiæ fortasse fortem, libidinis impotentem. Amare cœpit in legione suâ



*C. Plotium*, tironem militem, & in flore adhuc æui: nam Romani ab anno decimoseptimo eos scribebant. Igitur aliquoties tentare, & de stupro eum appellare: iste aspernari, & conuicio mox repellere. Tanto flagrantior, & ad imperij vim versus, noctu adolescentem in tabernaculum vocat: & capitale erat non parere Tribuno. Venit, & solita audit, & flagitij tentamenta, aut præmia: quæ cum fortiter reijceret, manus Tribunus iniicit, & vim parat. cum ille boni sanguinis, gladio educto, *Virum me scito*, inquit: & Tribunum transadigit. Clamor in tabernaculo, tumultus in castris: nouum & atrox facinus omnes concitat, Tribunum à manipulari occisum. Ducitur manè ad C. Marium, qui fortè eâ nocte non fuerat in castris. qui tribunali conscenso, voces & præiudicia militum audit, disciplinam castrorum, & suam etiam cognationem cogitat: atque omnia prædamnabant militem; sed eius innocentia, & Marij firma æquitas, eripiunt. Nam cum ille ægrè & inuitus; sed victo pudore denique, rem explicasset: Marius nihil cunctatus, sententiam & infamiam in defunctum vertit, & hunc noxæ absoluit. Absoluit tantum? imò & laudatum coronâ donauit, cum elogio: *Quòd pulcherrimum facinus eo tempore edidisset, quo fortibus exemplis opus esset.* Maecte Mari! Pudicitia te amat, atque ipsa Disciplina amat: quam soluisses, nisi sic soluisses.

- I. — Talis ANDREAE regis Hungariæ iustitia, nec in causâ nimis dispare. Iuit in terram Sanctam cum copijs, religione impulsus, & curam regni *Bancbano* commisit, fidei eius & vxore *Gertrude* commendatâ. Quæ apud eum sancta, non ipsam fuit. nam cum frater Gertrudis, adolescens lasciuus & petulans, absente rege, visum ad sororem venisset: illa iuueni gratificatura, vxorem Bancbani, pudicam ad id formosamque fæminam, fraudibus & pellacijs ei substernit. Quæ post facinus penitentiâ ducta, rem omnem marito exponit, & simul reginæ fraudes, & iram à se in illam vertit. Quâ iustissimâ Bancbanus accensus, vt erat doloris recens, reginam adit, exprobrat factum, & gladio vlciscitur. Cæde patratâ Byzantium abit, Andreæ regi occursum, illac in Syriam tendenti: quem



quem mox reperit, & rem aperit: illum vnum iudicem, & si meruit, vindicem poscit. Rex differt in suum reditum, & vultu atque animo composito: *Tu verò abi*, inquit, *& in regnum redi: Vicem meam, ut antè, functurus.* Nam reduci mihi, si Deus annuit, stat hanc causam cognoscere & decidere. Si innocens es, tunc libens absolvero: sin autem nocens, ne nunc quidem damnatum volo, nec expeditionem hanc in hostes fidei sumptam, Christiano sanguine auspico & perfundo. Vterque abiit: ille in Asiam, hic in Hungariam: & cum rediisset, causâ seriò inquisitâ & cognitâ, pronunciat, *Vxorem suam iustè cæsam videri.* O multa in hoc facto insignia! Quòd nihil sacræ expeditioni anteposuerit: quòd suspectum, si non conuictum, iterum regno præposuerit: quòd amorem coniugalem Iustitiæ postposuerit. Salve vel hoc facto magne rex: & tu CROYORVM inclyta familia, ramus ab illâ stirpe.

At OTHONIS Tertij Imperatoris affectus, etiam in suo capite & salute, domitus Iustitiæ cessit: si vera est narratio, quam ab illo æuo plures scriptores tradunt. Aiunt vxorem ei fuisse, parùm casti corporis: & hanc cum ad *Mutinam* Italiæ Imperator esset, cuidam Comiti in ijs locis copiam vsuramque sui obtulisse, sed repulsam tulisse. Id perdolitum fæminæ (veteres ab eo iras & calumnias scimus:) atque ausa est ipsa crimen vltro struere, & tentatæ pudicitia suæ Comitem accusare. Imperator calidè audit, credit, damnat, occidit. Comes tamen antè mortem rei seriem vxori suæ aperit: & rogat vt mortuum vindicet, & famam, quoniam vitam non potest, feruet. Dat consilium, vt iudicio candentis ferri, Deo freta, rem committat: qui mos tunc frequens, nuper & hodie meritò exoleuit. Ille ita moritur: & paullò post dies aderat, quâ sollenniter Cæsar ius dicebat, viduis maximè & pupillis. Vidua igitur Comitis, mandatum exsecutura, venit ad tribunal, & caput mariti occultum in sinu gestat. Stat ante Cæsarem, & veniam præfata rogat: *Ecquâ pœnâ dignus esset, qui vitam alteri iniuriâ ademisset?* Hic Imperator: *Id quidem, liquet mulier*, inquit: *mor-te.* Tum illa, *Ergo pœnam hanc tu, Cæsar, te iudice subibis, qui innocentem maritum meum sustulisti. En caput, quod recidisti. Inno-*



centem autem esse, quoniam testes & alia desunt, tractatione igniti ferri probabo. Dixit, & sine noxâ fecit: miraculum Imperatorem & adstantes commouit. sed hunc maximè, qui Deum etiam vindicem timebat. Itaque permittit se femine, ut suâ voce damnatum: sed veniam vitamque, quattuor castrorum donatione redemit. Ea sunt in Erruriâ, Lunensi tractu, & *Decimum, Octauum, Septimum, Sextum* appellant: à numero dierum, quibus prorogationem supplicij à fœminâ, ante plenam veniam, impetrauerat. Haud negauerim, à fabulâ quàm historiâ hoc videri propius: sed bonis tamen auctoribus scripta, quæ culpa est describere?

IIII. Minus aspera, & ut sic dicam, Tragica sunt, quæ subiungam: sed in quibus affectus tamen egregiè calcati. ARISTIDES Atheniensis, qui meritò, & à pluribus caussis, cognomen *Iusti* vindicat, iudex inter duos captus sedebat: cum aduersarius, ut illum aduersario suo alienum redderet, sibi propitium; multa dicere de hostili eius in Aristidem animo, & documenta adiungere. Sed ille interrumpens, *Quintus*, inquit, *siquid te læsit, hoc dicis, & alia mittis? nam huic rei nunc sedemus.*

V. GRATIANVS Imperator Romanus lepidè etiam hîc ludit, & ablegauit mulierem stultè importunam. Accessit, & de marito quæsta est, & aspera multa dixit. Ille placidè, *Quid hoc ad me mulier? At enim subiecit ipsa, etiam in te malè animatus est, & loquitur.* Ille iterum, *Quid hoc ad te mulier?* & confusam irrisamque sic dimisit.

### MON. III. *Subtiliter interdum vel sagaciter inquirenda.*

- I. SALOMONIS regis Hebræi factum innotuit, celebratæ subtilitatis in eruenda veritate: cui æquitas comitem se dedit.
- II. GALBAE Imperatoris. qui, cum de proprietate iumenti quæreretur, incertis vtriusque argumentis, ita decreuit, ut ad lacum, ubi aquari solebat, capite inuoluto duceretur: atque ibidem revelato, eius esset ad quem sponte se recepisset.

Sunt



Sunt alia huius generis: sed omnia æquat aut superat RUDOLPHI Austriaci istud. Agebat Noribergæ, & rebus imperij ac publicis intendebat: cum ad priuatas eum vertit leuiter mercator quispiam, ius & vindictam petens in hospitem siue diuersitorem ibi notum, à quo grandi pecuniâ fraudatum se aiebat. Nam bonâ fide deposuisse apud eum in saccululo *ducentas argenti selibras* (Marcas appellant:) quas ille impudenter abnegabat, iniuriosè retinebat. Imperator de fide dictorum rogat: ille affirmat, sed suâ fide, nec alijs (vt solet ferè in Deposito) argumentis. Igitur Imperator, re perpensâ, astum adhibendum censuit, & vestigijs verum indagandum. Quærit ab homine, ille sacculus siue vidulus cuiusmodi esset? Describit formam: nec aliud Cæsar, quàm secedere eum in proximum cubiculum, & præstolari iubet. Habebat in animo euocare hospitem, sed Fortuna commodius instituit, & vtrò ad eum mittit. Nam veniunt primarij vrbis ciues, vt solet, gratulatum Principi, & salutatum: inter quos iste infidus hospes. Norat adeò iamantè Cæsar, & vt comitas eius erat, benignè & per facetias appellat: *Heus tu, scitum illuc pilleum habes. mihi dona, & permutemus.* Ille arrisit, pilleum libens dimisit, & honori hoc factum duxit. Cæsar secedit paululum, quasi publicum negotium auocaret: & fidum ac notum eius opidi ciuem, cum ipso pilleo illo, ad vxorem hospitis mittit cum mandatis. *Heus matrona, maritus iubet vt sacculum illum talem ad eum mittas. opus habet: & ecce tesseram fidei meæ hunc eius pilleum.* Mulier agnoscit pilleum, & sacculum descripserat: itaque nihil ambigens ascendit, tradit, quasi ad maritum deferendum. At ille rectà ad Cæsarem. qui vidulum vocato tunc denique mercatori ostendit: & *Hicne est? & agnoscis?* Affirmat, exultat: tum & Hospitem Imperator adhibet, & *Hic*, inquit, *de te queritur, & perfidiam accusat: quid ais, & refellis?* Audacter ille, *mentiri eum dicere, aut dementire: nihil sibi rei cum eo esse, aut fuisse.* Denique Imperator sacculum profert: ad cuius aspectum ille confunditur, & animo ac lingua labitur. Quid multa? mercator pecuniam, hospes infamiam recipit, atque etiam damnum. nam grandi pecuniâ aliâ Cæsar eum mulctat. At Rudolfus omnium ore & sensu laudem: & de-



& decantatum in Germaniâ satis hoc factum fuit. Sed quoniam nunc, & antè, Principes dedi, qui ipsi & suo ore, statim & de plano ius dixerunt, oriri pro moribus nostris potest

## Q V Æ S T I O:

*An ergo deceat, aut expediat, ipsum Principem ius dicere, reddere?*

Ego putem decere, expedire, debere. Non alia res imperium magis asserit & ostendit, quàm hæc in bona vitamque nostram potestas: & cur Princeps cunctetur exercere? Expedi etiam, quia contra potentes sæpe causæ aguntur: nec minores illi aut delegati iudices, satis in eos oris, aut roboris, semper habent. Seuerior igitur ita, sed & breuior Iustitia: & tricis remotis supremus ille decedit. Addidi, debere. quidni? In *Politicis* docui, reges iustitiæ fruendæ causâ primis institutos. Si hoc fine, cur munus suum refugiant? Homerus audiatur:

Εἰς βασιλεὺς, ᾧ ἔδωκε κρόνα παῖς ἀγκυλομήτεω

Σκῆπτρον τ' ἠδ' ἐδεμῖα, ἵνα σφίσιν βασιλεύῃ:

*Vnus rex, cui concessit Saturnia proles*

*Sceptrumque & leges, ut iudicet & dominetur.*

Leges & iura Deus in manu eius, cum sceptro posuit: hoc ostendit & præfert, illas alijs demandet? Non debet: & vel veteres ab omni æuo, in omni ferè orbe, reges videat: ius ipsi dixerunt. Hæc & plura in istâ parte sunt: sed & alia acres habet assertores. Aiunt incommoda multa fuisse, & esse, si Princeps iudicet, ijsque animaduersis, ad hodiernam hanc rationem ventum. Primum ecce, da Imperitum Principem, quî par erit? qui non faciet recta curua? Item, da Ineptum in sermone, in gestu: quid nisi irrisui se exponit? Amplius, crebra hæc ostentatio sui, & in populo locutio, nōne vulgat Principem, & detrahit maiestati? Quartò, vel seuerè iudicabit, & Odium pariet; vel remissè, & Ius violabit. Melius ergo res asperas, & sine bonâ gratiâ, in alios inclinari. Quintò denique, sunt nunc Curia maiores minoresque, & cuique rei stata sua iudicia: quid Principem in nouas curas arcessimus, variè



variè & affatim distractum? Quin melius tutiusque nil nouare, & siquid in iam statutis labat, firmare & vincere. Ista nec malè, nec abs re prorsus dicuntur, fateor: sed responderi tamen potest, & iustitiæ causâ, debet. Primum de Imperitiâ, dico. plurimum & principem, & quemcumq; alium, naturâ duce in magnis aut enormibus causis iudicare posse, nec opus grandi scientiâ (ad hanc rem) Iuris & Legum. Da simplicem, da probum, affectuum expertem: audeo dicere, rara causâ erit, in quâ verum, aut quod iuxta verum, non videbit. Imò Deus plerumque inspirat, & talibus mentem mouet. quod sacer ille scriptor voluit: *Divinatio in labijs Regis, in iudicio non errabit os eius.* Et tamen fac interdum caligare: quid? nonne in aperto remedium, & damus ei Adseffores? damus, comitentur eum ad hæc talia exeuntem, nec auxiliij solum causâ, sed decori. Atqui in Sermonem aut gestu aliquis ineptus est. Scio esse, & tamen si alibi loqui eos deceat; hîc vel maxime, in re seuerâ, graui, paucorum verborum. Itaque aut Principem talem mutum, nisi fortè in cubiculo, faciant: aut patiantur & hîc loqui. Etsi talia exempla rara sunt: cur adducimus, aut insistimus? Ad tertium, Vulgat se nimis ita Princeps. Fortassis, si in rebus alijs: at hæc per se talis est, vt reuerentiam sui gignat, vel terrorem. Videmus in cottidianis istis iudicijs, quàm plebecula eos veneretur & timeat, etiam illa innoxia, & cui nihil cum ijs negotij est aut fuit. Benè à Deo ita facti sumus, vereri hoc numen & nomen ipsum Iustitiæ, & quicunque ei administrant. Quanto magis in Principe, si se non mandare tantum (in occulto id fit) sed exercere, cum summâ potestate, ostendat? Et sanè nihil hîc familiariter aut comiter fit: verba, gestus, aspectus, apparatus, omnia tristitiæ aut seueritati propiora. Ergo hoc faceflat: quartum videamus, de Odij metu. Incurret in id, inquiunt, si seuerè iudicat; in Iniustitiam, si remissè. Extrema accipiunt, & eunt extra ipsas Iustitiæ meras. Quid? an semper damnationis materia? fac esse: in caipsâ certè alter sic deprimitur, vt alter alleuetur. Hunc lædis, illum iuuas: ergo ab illo Odium, ab hoc Gratia, paria sunt. Sed nego etiam in seueritate crebrâ, odia excitari populariter: & contrâ est in rectis animis, qui acclinant se magis ad tales &

Prou. cap.  
xvi.



attrahuntur. In aspectu illa offendunt; cogitata & cum vſu publico collata, delectant. Vidēsne vt in medicinā quoque tristia & tætra ſæpe propinentur, ſed ſalutis cauſſā? itaque ab hoc fine, adeò non odimus medicos, amamus & laudamus. Simillimum in Iuſtitia: à cuius acerbâ ſectione aut vſtione ſalus generis humani pendet: & quis id vel è plebe nescit? Iam de Remiſſione, non abnuo naturas quasdam ad mitiora ſemper inclinare: & quid mali erit? imò ſit nobis talis Princeps. Nam hunc ſic clementem ratio tamen reget, & norma iuris & legum excitabit: nec deerunt, qui ad vtiliora & triſtiora, cū opus erit, ſeſtrent. Aliqua verò interdum remiſſio, planè ex vſu erit, ſi tamen terror iſte, & ſub magno Iudice, præiuit: Ignouit illi Princeps: ſed metu, ſed ignominiâ perſuſo. Ignouit illi Princeps: ſed Princeps, id eſt ſine corruptelâ, aut affectu alio ſordido, humanitatis tantū amore. Hoc ipſum quàm Amorem omnium conciliet? & verum eſt, ſi opportunè adhibeatur. Vltimò, nobis Mos opponitur, & Conſilia ac Curia iam definita. Equidem cum More haud temerè pugnem: ſed quàm vetuſto? Aui vel proauī noſtri aliter fecerunt: vide quàm longinqua repetamus. Quin totum hoc de perpetuis Curijs iudicum, nuperum eſt, & è Gallia ad nos manauit. Cōcludimus, & moderamur: Principem decorè & vtiliter ius dicturum, ſed aliquando: id eſt, vel certis temporibus, vt id ſciri poſſit; vel in cauſſis grauib, ſiue atrocibus; vel denique, contra potentes aliquos, & partibus graues. *Caroli Magni legem, quæ exſtat, traxerim in exemplum: Hoc miſſi noſtri notum faciant Comitibus & populo, quòd nos in omni hebdomadâ vnum diem ad cauſſas audiendas ſedere volumus. Populo autem dicatur, vt caueat de alijs cauſſis ad nos reclamare, niſi de quibus aut miſſi noſtri, aut Comites, eis iuſtitiam facere noluerint.* Ecce erant illo æuo paſſim in opidis & pagis etiam *Comites* ſiue *Grauiones*, qui communiter ius dicebant: interueniebant extra ordinem & *Miſſi* ſiue *Delegati* à Principe, qui idem. At *Carolus* ipſe tamen audire cauſſas voluit, idq; hebdomadatim: cauſſas ſcilicet grauiore, aut in quibus læſio aut iniuria interuiſſe ab ipſo iudice videbatur. Si non alius in hac re fructus, quantus iſte eſſet? Coërcere hoc modo iudices, & vigilantes attentosq; reddere: cū Principem cogita-



cogitarent iudicij sui iudicem, & fortè vindicem mox futurum. Sed Exempla, pro instituto, hîc addamus.

PHILIPPVS MACEDO, de communi tunc more, crebrò ius dixit. Sed cùm fortè in viâ, & aliò festinantem, mulier de re suâ appellasset, negavit *Sibi vacare*. Tum illa audacter: *Noli igitur regnare*. quasi admonens, siue exprobrans, regium hoc ita munus esse, vt sine eo legitimus rex non esset. Admisit, & mulierculam statim audiuit, & siquis alius inibi veller.

Aliter DEMETRIVS *Poliocetes*, in eâdem Macedoniâ rex: qui per proteruiam illudit etiam supplicibus. Nam cùm libellos adeuntium benignè in viâ accepisset, quasi lecturus, & cogniturus: mox cùm ad pontem Axij fluminis venisset, excusso chlamydis sinu, omnes in subiectam aquam abiecit. Non impunè. nam Macedones, qui talem *Philippum* suum non viderant siue audierant, mox spreto illo ad *Pyrrhum* transierunt, & Iustitiæ desertorem deseruerunt. Meritò, meritò. sic habeant, & luant.

AVGVSTVS Cæsar, quàm aliter! *qui ius dixit assidue* (ait Suetonius) & *in noctem nonnumquam*. Quòd si infirmior etiam esset, & à corpore minùs valeret; lecticâ pro Tribunali positâ, & in eâ recubans, vel etiam domi, ius reddebat. Quid ad hanc diligentiam addi potest, præter *Euge*, & *Bellè*?

Iam CLAVDIVS Imperator item assiduus. imò & suis suorumque sollennibus diebus, atque adeò festis & religiosis, non abhorruit iurisdictionem.

Omitto vetera. in ipsâ Galliâ vicinâ, CAROLVS *Octavius* patrum æuo rex, sub finem vitæ rebus iam attentior, omnibus septimanis binos dies destinavit iuri in publico reddendo: idque aditu tam libero, vt nemo vel è facie plebis regio conspectu & affatu arceretur.

Sed dixi, vtiliter imò necessariò (quid enim si res subtilis, aut in legum ambiguitate sit?) Adseffores adhiberi. quod plerique Romani Principes, aut prouinciarum Præsides, fecère. Imò ALEXANDER *Seuerus negotia & causas prius à scriniarum*

Lamprid.  
in eius vita.



principibus, & doctissimis Iurisconsultis, & sibi fidelibus, quorum primus tunc Vlpianus fuit, tractari ordinarique, atque ita ad se referri præcepit. Prouidè, ius ipse dixit, sed inquisitum priùs & euolutum. Sed alia hîc etiam

## Q V Æ S T I O:

*An Curias, & ordines Iudicium perpetuos esse conueniat?*

Lib. xxx-  
lrr.

Hodie sic habemus, nec cùm Princeps intendit, & velut censuram interdum exercet, improbemus. Tamen suæ etiam rationes sint improbanti. Vt, quòd tempore omissiores segnioresque fiant: & assiduâ Iustitiæ tractatione, minùs eius reuerentes. Redditur enim cottidianum opus, & cum tædio aliquo aut fastidio vsurpandum. Secundò, factio aut coitio facilè oriri potest, & superba etiam quædam dominatio. quod Liuius notat in *ordine iudicium perpetuo* apud Carthaginienses: & qui *unum eius ordinis, idem omnes aduersos habebat*. idque inter causas lapsæ illius reip. quidam habent. Tertiò, corruptelæ interueniunt: & quibus ex diuturnitate securitas adest, facilè aures & manus ijs laxant. Itaque vt in alijs imperijs, breuia plerumque meliora, & peccare minùs obnoxia: ita quidam hîc censent, & mutandos esse. Romani ita. qui Decurias Iudicium scribebant, ex honestissimis, & ex censu (ne paupertas ad culpam impelleret:) sed non eas omnes adsiduè iudicare volebant, dumtaxat quotannis certum & necessarium numerum sorte legebant, reliquis tunc feriatis. Sed re tamen benè examinatâ, cùm iam ad hanc multitudinem legum, & ex eâ tricas aut capendulas ventum: bonum est perpetuos esse, eosque iuris benè peritos. Quod ad *Omissionem*, aut *Coitionem*: Princeps facilè arcebit, si, vt dixi, ijs intendit. Quod ad *Corruptelam*: idem, si stipendia & præmia digna donat. Operè est ex Annalibus Turcarum inferere, quod huc mirè facit. B A I A S I T E S primus, cùm fraudes & iniurias *Cadiorum* suorum (ita Iudices vocant) sæpe iam audiret: commotus denique *Neapolim* omnes ad se venire iubet,



iubet, ibi in domum quandam includi, & igne iniecto comburi. Faciendum erat: cum *Alis Bassa*, vir prudens, rationem quæsiuit, & repperit, Principis molliendi. Habebat *Baiafites* *Æthiopem* puerum, garrulum & lepidum, inter delicias: hunc instructum quid diceret, faceretque, ad Principem misit. Venit igitur in meliore veste, & ornatu omni: *Quid hoc rei?* inquit Princeps: *quid extra morem hic vestitus?* *Æthiops*: *Vt peregrè eam, & ableger à te ad Imperatorem Constantinopolitanum.* Princeps: *Ad illumne hostem nostrum? quid facturus?* *Æthiops*: *Nempe* \* *Ca-*  
*logeros aliquos arcessiturus, ut nobis ius dicant: quoniam Cadios tuos*  
*omnes vis occisos.* Princeps: *At o mi Æthiopille, numquid isti periti*  
*legum nostrarum sunt?* Hic *Alis Bassa* opportunè interloquitur:  
*Et non sunt o Domine: cur peritos igitur tollis?* *Nam*, inquit, *cur*  
*malè indicant?* Iterum *Alis*: *Ego Domine caussam edam. hi nostri sti-*  
*pendium è publico nullum accipiunt, capiunt igitur mercedulas à pri-*  
*uatis.* Hoc corrige, eos correxisti. Placuit consilium *Baiafite*: vi-  
 tam illis dedit, Ali potestatem in hac re, quod ex usu esset, sta-  
 tuendi. Ille decreuit (& postea mansit) *Vt cuicumque hereditas*  
*tot millium Asprorum obuenisset, is in singula millena Cadio suo da-*  
*ret Aspros videnos.* Amplius: *Vt in matrimoniorum, & eiusmodi*  
*contractuum, instrumentis, item videnos.* Ita inopiæ subuentum,  
 & simul Iustitiæ quæ laborabat. Alia munera nefas accipere,  
 nec certè, quocumque colore aut velo, decet. *Ægyptius* rex Iu-  
 dices sculpi fingique iussit, velatis oculis, truncos manibus:  
 significans, nec affectu flecti, nec muneribus capi debere. Ali-  
 quid laxant quidam. ut duntaxat leuia munera, & cibaria:  
 item, post sententiam latam: quæ talia, quid nisi rimam primò,  
 tum ianuam patefaciunt corruptelæ?

\*Sunt mo-  
nachi Græ-  
corum, aut  
religiosi.



## CAP. X.

## DE LEGIBVS.

*Eas nec multas, nec item lites, probari.*

**L**Eges in republicâ, vt medicamenta, esse debent: atqui nec hæc multa aut varia probentur: non item illæ. Plato verissimè: ὅτι παρ' οἷς πλείους νόμοι, καὶ δύναιτο ὡρᾶν τέτοις, καὶ βίαις μοχθήσαι: Quod vbi plurimæ leges, ibi *ET* LITES, itémque MORES improbi. Deus bone, quàm rem tetigit! & vsus vbique gentium, aut temporum, hoc affirmabit. Maneamus in Romanâ republicâ. paucas ea initio habuit: paullò plures Decemviri addiderunt: & ita ad Principes ferè mansit. Tunc sanè plures: & à Iustiniāno plurimæ, quibus vtimur; Lothario Imperatore, cùm diu siluissent, eas reducente. Nam Gallia, Hispania, Germania, earum ad id æui ferè expertes erant. Receptæ igitur sunt: & quo fructu? Certè illo litium, nemo negauerit: quæ ex eo nimium quantum succreuerunt. Europam vide, & mentior, nisi maxima eius pars circa istas occupatur. Alij iudicant, alij instruunt, alij agunt, &, qui miserissimi sunt, eas habent. Bone Lothari, manes tui per me quiescant: sed rosæ aut lilia sepulchrum tuum non ornent, qui tot tricas & spinas nobis seuisti. Nam quæ tam clara caussa est, quæ non aliquâ lege, lege? imò interpretatione (nam & has admissimus) obscuretur? Quæ tam improba, cui non dent colorem? Ars enim facta est Caussidiciā, & peritè captare aut capere laudem habet. Atqui opus est, inquiunt, multitudine: vt varij factorum euentuumque velut vultus & species discernantur. Nam si paucae leges, quid? an iudici libera pleraque relinquentur? fenestram siue ostium ad iniquitatem pandemus? Non ego censeo: sed neque sic iudicem coerceri. Obsecro, quæ illa copia est, quæ omnia comprehendat, aut distinguat? Ipsum Iustinianèum ius vide: hîc deficit, & multa ex similitudine, aut obscuris ex eo argumentis, iudicantur. Imò vbi copia, plus intricati erit: & semper argutia aut calumnia



lumnia in sinu aut recessu huius illiusque legis latebit, & se defendet. An non videmus cottidie? præter ius illud Romanum, Statuta & Decreta opidatim, pagatim, populatim habemus: claudimur undique, & velut obsidemur, à legibus: at litium tamen copia, quanto non alio æuo, & controuersiaæ assiduæ super ipso iure, aut querelæ. Pulcherrima Strabonis nota est, & vel aureis litteris signanda: *Zaleucum illum Thurijs olim* PAV-  
 CAS & SIMPLICES *leges dedisse, sed secutos, alias per subtilita-* Lib. vi.  
*tem & nimiam curam addidisse: ex quo factum sit, vt celebres ma-*  
*gis quàm boni redderentur.* Additque dogma quantiuis pretij: *Ευνομείδης γὰρ, ὃ τοῖς ἐν τοῖς νόμοις ἀπαντὰ φυλαττομένοις τὰ τῆς συνοραγῆς,*  
*ἀλλὰ τοῖς ἐμμένοντας τοῖς ἀπλῶς κεμένοις:* Bonis enim *ὑπὸ* legibus, non  
*qui omnes ijs* *συκοφαντίας* aut calumnias cauent & excludunt, sed  
*qui* SIMPLICITER LATIS *firmiter inhaerent.* Oraculum est,  
 oraculum. non multæ leges bonos mores, bonum ius faciunt:  
 sed paucæ, fideliter seruatae. Atqui interueniunt calumniæ.  
 Quid igitur? quo fine iudex? quo fine Princeps est? ille vir  
 bonus, & os Iustitiæ; iste potens, & viua ipsa lex, an non ver-  
 bo vno decideret? Et da, quod alibi malè: quid magni mali est?  
 primùm in re obscurâ, & in quâ haud valdè interfit, Titius an  
 Seius vincat. Deinde (vera dicam) in re parua: in agello, in  
 prædiolo, in pecuniolâ: habeat, cui iudex donat. Absit tan-  
 tum aperta iniquitas: neque aliter in maximâ orbis parte ho-  
 die viuunt. Alterum in Platone, de Moribus malis, palàm ve-  
 rum. Improbilas huic Caussidicinæ adhæret: excipio semper  
 eos, qui ex dignitate & veritate ius habent. Ecce, vbi lites, non-  
 ne discordia: nonne odia deinde, iniuriæ, & sæpe cædes? Plato-  
 nem iterum aduoco: *Οὐκ εἶεν ἂν ποτε πολῖται φίλοι, ὅτε πολλὰ μὲν δύναι* v. De Le-  
*ἐν ἀλλήλοις εἶεν, ἀλλ' ὅτε ὡς ὅτι συμπρόσθεν καὶ ὀλίγαι:* Non fuerint con-  
 gib.  
*cordes* *ὑμῶν* *ἄνquam* aut interamantes ciues, vbi mutue multæ lites iudi-  
 ciales sunt, sed vbi eæ BREVISSIMAE, ET PAUCISSIMAE. Nota  
 hæc vltima: vult nō Paucas solùm lites, sed Breues. Ego tecum:  
 nunc vbi sumus? vna aliqua lis Metonis annum tenet. Fit inuo-  
 lucris legum, fit sordibus aduocantium: & comperendinationes  
 istæ ad quæstum & lucellum eunt. Per Symplegadas, naviga-  
 tur Colchos & aureum vellus. Quid iam in ipsis litiganti-  
 bus? peruicacia est, & sæpe impostura, aut improbitas: *neque*  
*enim*



enim bona *Conscientia* (ait scitè Celsus) *sed Victoria, litigantis est premium*. Enimuerò nec publicè sic expedit. nam quanta pars hominum in istis dedita? in scholis, in foris, in curijs: & pulchrius meliusque sit, in agriculturâ, in mercatu, in militiâ, & quæ maioribus nostris studia fuere. Vt concludam (& satis fucos irritaui) Princeps lites minuat, Princeps & leges minuat, pro meo sensu. Vt imputata vitis latè se spargit, & infructuosa est: sic Ius profectò illud vetus, & labruscas iam pro vuis gignit. *Justinianus* ipse olim reformauit, & nouauit; ante eum *Theodosius*; post vtrumque *Carolus Magnus*, & tum *Friedericus*, Imperatores; denique in Hispaniâ rex *Alfonsus*. Quid? Principibus hodie potentibus & magnis, non idem ius sit? habent, sumant. His monitis robur ab exemplis etiam demus.

- I. C. IULIUS *Cæsar destinabat* (ait Suetonius) *ius Civile ad certum modum redigere, atque ex immensâ diffusaque legum copiâ, OPTIMA quæque & NECESSARIA in paucissimos conferre libros. Fata inuiderunt.*
- II. VESPASIANVS, post bella ciuilia, cum *litium series Ubique maiorem in modum excreuissent* (iterum Suetonius) ipse sorte elegit, *qui iudicia, quibus peragendis vix suffectura litigatorum etas videbatur, EXTRA ORDINEM diiudicarent, redigerentque ad BREVISSIMVM numerum.*
- III. Et verò extra ordinem sic eligi, vbi reformatione opus, utile: fecitque IUSTINVS *Curopolates* Imperator Byzantijs. Cum enim ipse morbido corpore esset, ac rarò ius diceret; iniuria & lites creuerant, adeò vt pro desperatâ res pænè (Byzantijs præsertim) videretur. Ecce adit eum quidam, & ingenium operamque obtulit ad coercendum, eâ lege, vt ipse Præfectus plenâ potestate in tempus certum esset. Annuuit Imperator, sumit potestatis infulas, & pro Tribunali sedet. ac primò accusatur ex composito apud eum vnus ex illustribus Senator, in Aulâ ipsâ graciosus: accusatur, spernit se sistere, & contemptum, præter ipsum tribunal, in Aulam pergit. Pergit extemplò & Præfectus, videt Principem in conuiuio, & ibidem hunc reum: Nihil deterritus: *Imperator, inquit, iuri dicendo Præfeturam*



*Eturam à te habeo: & ab ipso te auxilium & praesidium meritò sperabam. Nunc quid? vides his oculis homines palàm iniurios, & legum nò fractores solùm, sed spretores aut illusores, in tuà domo, gratià, mensà esse. Itaque insignia hæc tibi habere irrita potestatis: ego abdicò. Imperator mirari, & excitari: Tu verò, inquit, quod es esto: & ius tuum vel in me, quidni meos? exerce. Duc si peccaui, sequor: duc si quis hic alius, & sequetur, aut trahetur. Præfectus iam animi erectior, oculos & manus in illum Senatorem conijcit, per apparitores renitentem etiam trahit: atque in iudicio conuictum damnatumque, primùm verberibus afficit, tum & grandi pecunià mulctat. Hic ictus, qui tam validum illum concusserat, multos terruit: & in paucis diebus vim & vitam Iustitia recepit.*

Sed de ijs, qui lites aut leges minuere voluerunt, CAROLVS IIII. etiam *Nonus* in Gallià nuper fuit. is prurigini sistendæ, vectigal iudicarium excogitauit, *Vt quicumque litem ordiretur, deponeret & dependeret in fiscum Regium duos aureos, recipiendos si iure litigasse iudicatus esset; si aliter, omittendos.* Sed non diuturnum id fuit: & leue etiam remedium in grandia & vetera mala.

Seuerius, & fortasse vtilius, illud IACOBI Aragonum regis, qui litibus & litigiosis semper infensum se præbuit: & ex ijs *Se-* V.  
∞.ccc.  
XXVI. *menum Radam*, insignem & primarium eâ etate Iurisconsultum, quòd eius argutià aut malitià multi se afflictos, quererentur, Præuaricatoris lege postulatam, regni finibus eiecit.

Quid GALEACIVS Dux Mediolanensium? cùm aliquoties VI. audisset vafro ingenio Caussidicum esse, qui lites serere, & fatas producere atque alere, etiam in liquido iure posset: hominem ad se accitum affatur. *Debeo, inquit, Pistori meo centum aureos. non lubet soluere: tu ecquid tueri me in iure, & rem protollere potes?* Annuit largiter, & Principi promptè se dedit: sed ille ei malum. Nam fraudis sic confessum, verbis prius increpitum, laqueo publicè necari iussit.

Heu, percutiunt hæc aures rabularum! desino: si MAHV- VII. METANVM siue *Turcicum* iudiciorum morem, & in ijs breuitatem,

T



tem, explicaro. Qui alium in ius vocat, ne lictorem quidem aut publicum apparitorem adhibet ad vadandum: sed ipse aduersarium adit, & coram testibus *ad Dei Iustitiam* (sic loquuntur) vocat. Hic nec verbo refragari ausit, sed statim vnà ad Iudicem siue *Cadium* suum eunt. Ille autem semper paratus, totum diem ante ædes, sub tecto aliquo sedet, & copiam sui facit. Isti, nullo a duocato aut caussidico, quisque rem suam narrat: testes, si eos habent, adhibent: iudex, ibidem re pensitatâ, in hanc aut illam partem decîdit. Quod postea aliud alleges, aut approbes, nihil est: arbor ea cecidit, releuari aut erigi vltra non potest. Quid? inquires. non interdum Iudices improbè, aut improbi? credo esse: sed in rebus humanis nihil sinceri est, & eligenda quæ minus noxæ habent.

## CAP. XI.

## DE IUSTITIA DIVINA:

*Atque eam rebus interuenire.*

**P**Rincipi Iustitiam commendauimus: sed vt magis, discat à Deo interdum asseri, si quis violat, aut contemnit. Exempla mira, & supra fidem videantur, sed fidis, aut certè priscis, auctoribus scripta.

I.  
∞. C.  
LIIII.

*Friderico Ænobarbo* Imperatore, Antistes Moguntinus fuit **HENRICVS**, vir pius, tranquillus, suarum rerum: & ideo Romæ accusatus vt ineptus siue inutilis muneri, quod gerebat. Accessit *Arnoldus*, qui postea in locum eius venit, & fertur ab ipso Henrico missus ad purgandum, igni oleum addidisse; & purpuratorum quosdam patrum corrupisse, & in se vertisse. Eò ventum, vt Cardinales duo Moguntiam missi, de causâ quæsuerint, Henricum damnarint, abdicarint, Arnoldum illum subrogarint. Henricus patienter id ferens, hactenus questus est, vt diceret: *Iniuste iudicastis. appello igitur ad IESVM CHRISTVM, æquissimum iudicem, ibi me responsurum exhibebo, venite.*



*venite. Illi ioco eludentes: Cum præcesseris, nos sequemur.* Profectò factum est. nam ille post annum ferè & dimidium fato concessit: & rumore ad aures Cardinalium delato, iterùm illudentes, *Ecce præcessit, inquit, nos sequemur.* Secuti sunt, & vno die uterque subito obierunt. Addunt Annales de genere mortis, quæ sileo: nec assensum huic narrationi firmiter etiam dono.

Firmiùs *Lamberto Schafnaburgensi*, egregio, ut illa tempora tulerunt, scriptori: qui narrat *BVRCHARDVM* Episcopum Halberstadiensem, iniquam diu litem cum *Abbate Herueldensi* fouisse, super decimis Saxoniae, quas Episcopus monachis ereptum, sibi vindicatum manu magis, quàm iure ibat. Neque spes aut ratio erat valenti aduersario resistendi: cum Abbas, paucis ante mortem diebus, Comitem Palatinum *Fridericum* ad se vocat, & extrema hæc mandata ferre Antistiti rogat: *Se quidem lite imparem, lege meliorem, cedere: atque etiam vitâ cedere. sed Deum iudicem futurum, ad quem appellaret. Pararent igitur se ambo, ut causam in Tribunali dicerent, ubi gratiâ & potentiâ spretis, sola Iustitia posset polleteretque.* Neque diu post Abbas ipse febri obijt, statimque Antistes, cum equum conscendere vellet, ut fulmine ictus, concidit: desijtque in vocibus, *Abripi se ad diuinum tribunal, ibi iudicandum.* Hæc mira quamquam, fidem merentur à tradentibus, & ex usu etiam vitæ est credi.

Certissimum verò habetur, quod *CLEMENTI Quinto* Pontifici max. euēnit. qui cum *Templarios*, cœtum religiosum, & diu bonum atque vtilem, Viennæ in concilio damnasset, & in sodales ferro atque igne passim vel animaduertisset, vel (ut alij) sæuisset: à pluribus eorum citatus ad Tribunal superum, paulò plus anno post obijt, quasi ad vadimonium obeundum à supremo Prætoris arcessitus.

Sub idem tempus (quod admirationem auget) in eadem causâ *PHILIPPVS* rex Galliae: cui bono damnationes illæ fuisse putabantur, opibus ad eum translatis & confiscatis. Si à casu, miremur: si à Deo, vereamur.



V.  
ccccc.  
xii.

At res etiam nota, & cognomine prodita in FERDINANDO Quarto Hispaniæ rege, ipso illo æuo, si non anno. Bello & pace bonus habebatur, sed in iudicando præceps aut rigidus, & ad sæuitiam inclinare videbatur. Fuit ut *Caruualij* duo fratres, *Petrus* & *Joannes*, suspecti essent in occultâ cæde *Benauidij*, primarij viri inter nobiles. Sed suspecti: neque testibus, aut alijs probationibus conuicti, neque crimen sanè, vel in vinculis, fassi. Tamen, ut rex erat, duci eos iubet, & de rupe altâ præcípites dari. Cum id fit, clamant & vociferantur, *Innocentes se mori: & quoniam regis aures iustissimæ defensionis obstructæ essent, sese igitur ad summum Iudicem prouocare, & regi diem dicere, ab isto (qui sibi ultimus esset) trigesimum*. Dicta nihil valuerunt, sententia tenuit: etiam ipsorum vadatio, nec tempore nec die fallax. Nam cum rex, animi securus, *Alcaudetem* in castra abiisset, contra Mauros: ibi morbo statim tentatus, sed leui, *Giennium* se contulit: atq; ecce VII. Idus Septembris, id est, ipso trigesimo à supplicio die, in lecto exanimatus repertus est, in ipso ætatis flore, annos natus XXIII. menses nouem. Quis neget diuinum, aut Geniale aliquid, hîc interuenisse, sed supremo Numine consciscente?

*Discite Iustitiam moniti, & non temnere diuos.*

## C A P. X I I.

### D E C L E M E N T I A.

*Eam quoque Principi decoram & utilémque esse.*

**D**Ecet sanè magnos animos & fortunam lenitas: &, quod notes, non nisi in eos cadit. Barbari aut viles homines, vbi licentia adest, plerumque sæui sunt: mites in eâ & moderati, ingenui sanguinis & stirpis. Sed quid? inquires: ad hanc ego Principes inuito, quæ aduersa Iustitiæ, & soluere eam videtur? Videtur: in re non facit, imò eundem vtraque finem & scopum habet. Iustitia seueritate & inerti emendat: Clementia benignitate & remissione. Illa pœnam, hæc veniam dat:



dat: sed cum iudicio vtraque, & vbi debet; & addam, à quo debet. Non enim quorumuis est Clementia; sed eorum qui in supremâ potestate constituti sunt, & temperare aut flectere ex vsu aliquo leges possunt. Est, vt verbo dicam, Principum. Itaque definitur à Senecâ, *Clementia, lenitas superioris in inferiorem*, 11. De Cle. cap. III. *in constituendis pœnis*. Ais, *constituendis*? in parte verum est: sed adde & partem alteram, *in remittendis*. nam & Clementia hoc solet. Sed est *superioris*: & *nihil pulchrius*, ait idem Sophus, *in fastigio collocatis, quàm multarum rerum veniam dare, nullius petere*. Quarum autem rerum? nec enim omnium, & multas lex adstringit non resoluendas: sed earum ferè, quæ Principem ipsum tangunt, vt sunt Iniuriæ, Calumniæ, Violentia: & quæ alia meritam pœnam habeant, sed contentus potestate, remittit & donat. Cogitat publicum se parentem esse. vt autem priuati isti parentes liberos peccantes sæpe castigant, interdum virgas modò ostendunt, & metum incuriunt pro pœnâ: sic ille facit, & faciendo sic emendat. Mirum enim & varium ingenium hominum. quosdam benignitas, & ex eâ reuerentia, quosdam seueritas, & ex eâ terror, meliores faciunt: Princeps vtitur omnibus, ad dictum hunc vsu. Est & communiter illud dogma verissimum: *Verecundiam peccandi facit ipsa clementia regentis*: & in domo meâ ac familiâ sum expertus. Plura super hac Virtute liceat: sed pudor sit post Senecam, cuius aurei libelli duo, & Principibus meritò legendi, satis eam reuelant. Nos Exempla, pro more, demus: & quàm multa ea sunt? & nemo magnus laudatusque Princeps sine istis.

Sed agmen ducat diuinus ille dux, M O S E S. Qui cùm populum ex Ægypto cælesti voce & monito, clavis miraculis adstipulantibus, eduxisset: isti tamen identidem ingrati, refractarij, rebelles erant. Nunc carnem, nunc panem aut aquam petebant: & ita petebant, vt voces proteruas, & pænè lapides ac manus in illum mitterent: sed tamen illa, & veniam etiam dedit. Nec vulgum modò procacem habuit: etiam procures, etiam proximos. & ecce Aaron frater, & soror Maria, in mitissimum virum insurrexere: quâ causâ? priuatâ, & leui, quòd Æthiopissam quæ animo eius collibita esset, vxorem duxisset.



*An huic soli*, inquebant, *Dominus locutus est? nōne & nos celestem vocem auribus his accepimus?* Et iam se Mosi non opponebant solum, sed æquabant: cū Deus pro viro mitissimo super omnes homines (ita Scriptura appellat) iratus est, & Mariam vitiligine ac leprâ subito percussit. Quæ sic cum fratre ad sanitatem mentis reuersa, ad Mosē respexerunt, ille ad Deum: & post septem dies, precibus eius sincera puraque à morbo apparuit. Quid plures seditiones enumerem? fuere enim plures: sed Moses ille semper in mansuetudine constans, vsque eò amans & ignoscens suorum, vt Dei iram vel hac voce sedaret, *Dele me*, inquit, *de libro vitæ, potius quàm vt hos tollas*. O verè diuine viri non nisi ab æthereo Spiritu hic spiritus: & venerari magis in hac parte te fas, quàm imitari.

II. Tamen & DAVID imitatus est: quis? ille quoque Deo & cælo plenus. qui, cū *Abſalomus* filius fratrem *Ammonem* proteruē in conuiuio interfecisset, & triennio apud auum maternum in Syriâ exsulasset, fractus & misertus reuocauit. Quid tamen? ille à scelere ad scelus maius, quasi gradu facto, properat, & regno patrem pellit: vitâ quoque, si potuisset. David arma necessaria capit, *Joabum* Præfectum militiæ cum dilectis viris in illum mittit, sed cum mandato, *Seruate mihi puerum Abſalomum*. Adeo nec in iram, nec in vindictam exarserat; vt tunc quoque, cū ambiguo euentu arma caperet, sollicitus de veniâ magis, quàm de victoriâ esset. At Deus pro illo exarsit & vindicauit, & filius non filius interfectus est: scis quàm inuito & dolente? Luctus eius in publico, & istæ voces: *Fili mi Abſalome, Abſalome fili mi! quis mihi tribuat, vt ego moriar pro te Abſalome fili mi, fili mi Abſalome?* Proh superi! vbi Orientales vos Reges, & hodie Turcici estis, qui patres, liberos, fratres interficitis, prompti libentesque pro regno? iste nec infidiatorem sceptri & vitæ, vitâ vult exutum: & exutum veris lacrimis luget.

III. Exempla hæc pænè supra hominem: at nostræ fortis PERICLES fuit. qui morti iam vicinus, & spiritu ac vitâ abeunte, cū amicos affidentes queri & lamentari audiret, atque alium prudentiam, eloquentiam, victorias, alium alia laudare: ille modicè



modicè erecto capite, *Et quid hoc est?* inquit: *aut parua aut fortuita laudatis: at illud maximum omittitis, quòd nemo meâ operâ pulchram vestem sumpserit.* Mirum iudicium! hoc vir ille magnus in summis suis laudibus ponebat, quòd comis in omnes & humanus, numquam acerbitem aut vindictam exercuisset. Maeste Pericles! vel hoc nomine cognomen *Olympij* meruisti: qui sic extra istos turbidos affectus, vt nulla non dicam crudelitas, sed asperitas, mentem tuam obnubilarit.

PHILIPPVS Macedo, non maior Alexandro: sed fortasse IIII. melior, & certè moderatior: is, inquam, Philippus famam & immortalitatem vel solâ hac virtute meruit. Amici stomachabantur & deferebant, quòd Peloponesij tot beneficijs affecti, criminarentur eum, atque adeò ludis Olympicis exhiberent: ille in iocum rem vertit, & *Quid ergo, inquit, facient, si læsi à nobis fuerint?* Idem, suadentibus, vt seuerius paullò cum Atheniensibus ageret palàm ingratiss: *Nihil agitis, inquit: an ego qui ad gloriam omnia refero, theatrum gloriæ meæ eueritam?* Sciebat Athenienses ingenio & stilo valere: eoquæ (etsi alibi humanissimus) hîc magis esse voluit, vt hanc quoque materiem & amandi & prædicandi præberet. At illud in hoc ipso incredibilis non clementiæ, sed & patientiæ. quòd cum iidem Athenienses legatos super aliquâ re ad eum misissent, atque ipse benignè audisset atque indulgisset; dimittens, pro cumulo adiecit, *Ecquâ aliâ in re gratificari ijs posset?* Hîc Demochares è legatis, *Ita verò, inquit, si te ipse suspenderis.* Hem, vocem & conuicium importunum, & vt rem dicam, flagro aut cruce dignum! Itaque amici & adstantes exarserant: sed compescuit se & illos Philippus, ac Therfitem illum nullâ vel re, vel voce acerbiorè, læsum dimisit. Tantùm hoc ad legatos alios, *Nunciate Atheniensibus, impotentiores esse qui ista dicunt, quàm qui dicta comiter audiunt.*

Ad Romanos flecto. inter quos M. MARCELLVS qui Syracusas cepit, iam tum cum cepit, clementissimi animi signa, in medio furore Martis, misit. Parci ciuibus, quâ potuit, iussit: edicto, Nequis liberum corpus, manu, ferro, stupro violaret, seruitia modò & pecuniæ prædæ essent. Sed vel sic  
cùm



cum multa sæuitiæ aut libidinis exempla editum iri videret, ut in vrbe per vim captâ, conscendisse editum locum dicitur, & subiectâ eâ oculis, casum eius, paulloantè sic florentis, humentibus illis defleuisse. Priuatim etiam cum de *Archimede* eiusque ingenio audisset, & vidisset; mandauit incolumem seruari, & curæ hoc omnes haberent. Non mirum in rudi adhuc æuo, & Romanis ad artes istas parùm factis? Sed mandauit, etsi frustrâ. nam miles discurrens, cum *Archimede* reperisset in puluere figuras describentem, & totâ mente illuc versâ ignarum publici fati, interrogat gladio super caput intento, *Quis tu?* Ille nihil, nisi puluerem suum manibus tegens; & *Oro ne turba*, inquit. Ita miles indignatus, & contemni ratus, occidit. Hæc in Siciliâ, & victoriâ: post ipsam ista. Siculi parùm grati, & ab inimicis eius impulsî, questum ad Senatum super eo venerunt, scilicet alienas etiam iniurias adscripturi. Consul tum erat, & collega *Valerius Leuinus* fortè in Senatu non erat. Itaque facile ei turbare aut disturbare rem & homines, & irritos illusosque dimittere. Non fecit, & audiri voluit, sed cum collega aduenisset: sedit in subsellijs inferioribus, & finitâ accusatione, cum Senatus illos faceessere iuberet; ille verò retinendos censuit, & ut suæ quoque defensionî, non ut partes, sed velut iudices interessent. Quâ absolutâ, excessit curiâ, ut liberiùs sententiæ dicerentur: sed quid opus? clara eius innocentia, istorum impudentia omnibus, atque etiam ipsis fuit. Nam statim è partibus in fautores se transferunt, sunt supplices, atque adeò Patronum illum Siciliæ adoptant: & suscepit, tam bonâ fide, ut præsentium oblitus, alijs super alia beneficijs exornaret.

VI.

M. etiam *BIBVLVS*, etsi fortunâ parùm attollente aut prosperâ semper vsus, tamen virtute, & hac animi clementiâ, excelsuit. Duos filios præstantissimæ indolis, cum in Syriâ Proconsul ipse ageret, *Gabiniani* milites in *Ægypto* per sæuitiam, an proteruiam, interfecerant. Eos *Cleopatra* regina, iram iustam magnatis viri verita, comprehensos ad ipsum misit, arbitrio scilicet eius puniendos: at ille, etsi in recenti dolore, patrem, & aliquis dixerit, hominem exuit, ut humanitatem retineret.



tineret. ac sepositâ omni vltione, eosdem ad Cleopatram intactos remisit, vindicare potuisse contentus.

Quem autem *Bibulo* adiungam? veterem collegam, IV-  
LIVM CAESAREM: in omni quidem vitâ & proposito hostes,  
sed in hac virtute geminos, nisi quòd copiâ vincit, qui om-  
nes vicit. Ecce iam adolescens, in freto illo æui, quàm susti-  
nuit se & moderatus est? Captus à piratis, iurauerat sæpius,  
se cruci omnes suffixurum, si in potestatem redegisset. Rede-  
git, sed tamen æstuat. Homines crucifigat? crudele erat. Re-  
mittat? religio adstringebat. In hac pugnâ naturæ & fidei,  
clementia viam repperit: & iugulari prius iussit, deinde suf-  
figi. Item sub hoc æui, *Cornelius Phagita* quidam fuit, ex asse-  
clis & emissarijs Sullæ, homo nequam & ad bonorum cædem  
aut pericula factus. Is latitantem in ciuili diffidio *Cæsarem*, tam-  
quam Marianarum partium acriter & sagaciter indagarat, &  
subinde mutantem latebras ægrè, \* pretio accepto, dimiserat: \*  
huic tamen in mutatione temporum, cum posset, fortasse & de-  
beret, nocere numquam sustinuit. planè quasi post nimbium  
& tempestates, non Æolo non Austro vltra offensus. Ista  
priuatus aut impotens fecit: quid in imperijs? mitior seipso illo  
priuato. Initio bellorum ciuilium, cum quæri terror & ad-  
hiberi consilio solet, ad reprimendum aut reducendum: ip-  
se diuersissimâ viâ veniam, libertatem, vitam omnibus non  
dabat solùm, sed vltrò offerebat. *Corfinij* quid euenerit, di-  
gnum memorari. Tenebat hoc opidum *L. Domitius*, vetus &  
acer eius inimicus, cum cohortibus triginta. Inerant Senato-  
res plurimi, equites Romani, & flos aut robur Pompeiana-  
rum partium. Ipse obsedit: milites vim non exspectarunt, sed  
inclinatis in Cæsarem animis, transire ad illum, dedere duces  
& opidum parant: & iam colloquia erant. Domitius sibi præ-  
timens, & ex conscientia diffidens, vitam ponere suo, quàm  
Cæsaris, arbitrio (heu, quàm ignarus eius animi!) elegit. Ita-  
que seruum medicum aduocat, iubet venenum sibi dari.  
*Quid deliberas?* inquit: *dominus rogo, & armatus rogo.* Seruus  
quasi paruit, sed astu facinus discussit. nam soporem ei tempe-  
rat pro veneno, & filio mox indicauit. Præuidebat scilicet fu-  
turum,



turum, ut hominem pœniteret præcipitis consilij, maximè si spes veniæ à Cæsare esset. Atque ea statim affulsit. Nam ille vir omnes honestiores ad se in castra vocavit, benignè affatus est, ad pacem & pacata consilia hortatus, dimisit cum rebus incolumes: & quò? stultitiam rideat aliquis: plerosque iterum ad Pompeium. Sed hæc illorum, non Cæsaris culpa. Domitius interea cùm audisset, atque expectatus esset, torqueri & angì de veneno: donec famulus metum discussit, rem aperuit. atque ille quoque rectà ad Cæsarem, vitam, libertatem, pecuniam recepit. Eodem bello, in Hispanià ad Ilerdam, cùm hostes ad pacis necessitatem adegisset, & iam conditiones ferrentur, milites sermones & conuiuia miscerent, & ex binis castris vna facta essent: en *Petræius* & *Afranius*, Pompeiani duces, subitâ pœnitentiâ, an perfidiâ, arma capiunt, Iulianos inuadunt, occidunt: ipse, cùm facinus reponere posset, & Pompeianos detinere vel item occidere, illorum dissimilis, sui similis, summâ diligentiam conquiri omnes iussit, & remitti. In ipsâ acie Pharsalicâ, medio ardore pugnæ, ita vincere voluit, ut perdere timuerit; & vox eius obequantis passim excepta, *Parce ciuibus*. Atqui non fecit, inquires. Imò ille fide optimâ: nisi in acie, nisi resistens, nemo occisus est: & seruare promptior, quàm illi seruari. O inauditam, nec nisi cælestem, clementiam! è tanto numero, tam pertinacium aduersariorum, non nisi tres (*L. Afranius*, *Faustus Sulla*, *L. Cæsar*) interfecti post aciem, eius iussu siue permissu reperiuntur: atque ij sæui & crudeles in eum, & veniâ, quam antè impetrauerant, iteratâ rebellione, corruptâ. Omnibus etiam suæ partis nominatim vnum, quem vellent, seruare & excipere ex hostibus concessit: denique tandem vno Edicto, etiam quibus nondum ignouerat, redire in Italiam, ad opes, honores, imperia, permisit. In ipsius *Pompeij* morte, qui alieno scelere & inuidiâ ceciderat, tantum à gaudio aut insultatione abfuit, ut lacrimas non tenuerit: & auersatus homicidas, bello etiam mox persecutus sit, & cæde ac sanguine manibus illius parentarit. Quin & memoriam statuasque eius, disiectas à plebe, restitui iussit: cauilemur aut interpretemur, ut volumus, magno animo, & (ut ego censeo) verè miti & clementi. Verba  
eius



eius ex epistolâ quadam ad *Oppium & Balbum* nota ui& amari, ista: *Gaudeo me hercules, vos significare litteris, quàm valdè probetis ea quæ apud Corfinium sunt gesta. Consilio vestro utar libenter, & hoc libentiùs, quòd meâ sponte facere constitueram, ut quàm lenissimum me præberem, & Pompeium darem operam ut reconciliarem. Tentemus hoc modo, si possumus, omnium voluntates recuperare, & diuturnâ victoriâ uti. Hæc noua sit ratio vincendi, ut misericordiâ & liberalitate nos muniamus.* Ex pectore sunt ista verba; & familiariter apud homines familiarissimos prolata. Ego te Cæsar, ob alia tua & cauſas belli, non nimis amo: in ipso bello, & ob hanc clementian, inter heroas numero, & meo calculo, hac quidem re **DIVVS** esto.

Aliquid ab hac stirpe aut multum traxit **OCTAVIANVS VIII.** **CAESAR**, adoptione filius, sanguine eius nepos. Is in republicâ varium clementiæ specimen dedit, adeò ut in theatro cùm recitaretur *O dominum æquum & bonum!* vniuersi oculos ad ipsum referrent, & voce gestuque comprobarent. Sed in priuatâ etiam vitâ (vbi natura maximè appâret, nec gloriam aut sermonem sibi proponit) præbuit insignita exempla. Ut in *Diomede* seruo suo dispensatore. qui, cùm vnâ ambularent, & repentè ferus aper in eos incurreret; ipse dominum obijciens, manibusque propellens, post eum latuit. Atque Augustus quidem fato, aut animo suo, seruatus est; sed & hunc nihil læsit, timori potius factum, quàm noxæ adscribens. Idem, cùm in Hispaniâ *Corocotta* quidam famosus latro esset, & paci publicæ ac priuatæ diu infestus, præmium proposuit, si quis hominem viuum adduxisset, \* *decies sestertium*. At ille, spe euadendi aut latendi abscisâ, magno animo ad Cæsarem <sup>\* xxv. m. Philippicum.</sup> uenit: & *Quæsitus tibi Corocotta*, inquit, *ecce adsum: facies, quod voles, huic capiti.* Cæsar irâ omni depositâ, & memoriâ tot facinorum, non solùm ignouit ei, sed & præmium promissum (quia *Corocotta* *Corocottâ* stiterat) appendit. Sed superat priora, hoc de *M. Bruto*: cuius statua ærea, adfabrè facta, Mediolani erat: credo, monumentum virtutis & modestiæ, quâ Galliæ illi Cisalpinæ, sub Cæsare, præfuerat. Hanc, diu post, transiens Augustus conspexit, & represso gradu substitit:



vocauitque coram omnibus ad se magistratus, quasi in re graui: & cum venissent, *Quid vos?* inquit, *inimici nostri estis? & hostes meos apud vos habetis?* Illi timidi, nec gnari quò accusatio spectaret, negare, & mutuò sese intueri. Cæsar iterum, ostensâ statuâ: *Nónne hic ille est meus hostis?* Tum verò illi seriò trepidare, & mussitare: at Cæsar arridens, laudare etiam eos benigno vultu & verbis cœpit, quòd iudicium aut animum cum fortunâ non mutarent: & vt talis viri statua maneret, porrò præcepit. Duplex clementia. & in defunctum Brutum, cuius memoriam honorat; & in Mediolanenses, qui rigidè interpretantibus deliquisse in maiestatem Principis videbantur.

IX. An dignus est, qui inter hæc nomina locum habeat NERO CAESAR? monstrum crudele, tætrum, sed vnâ voce meritum clementissimis accenseri. Initio imperij, cum duo milites deliquissent, & morte puniendi viderentur; *Burrhus* Præfectus Prætorio, chartam de more ad Imperatorem tulit, vt is subscriberet & mortem, & causam. *Nero* allatam aliquoties reiecit & distulit: tandem cum repeteret & instaret *Burrhus*, nec vltra esset effugium, tristis accepit, & cum hac voce: *Quàm vellem nescire litteras!* O dictum magnæ, vtinam diuturnæ, lenitatis! O dictum, quod laudes magni *Senecæ* illius meruit, & libros de *Clementiâ* expressit! Amemus laudemusque, vel hoc nomine.

X. Diuersi ab isto vterque VESPASIANVS, pater & filius: qui ante Principatum & sub initia, multo sæuitiæ & luxuriæ rumore, in ipso mutati in melius fuêre. Patris quidem quanta benignitas? qui & *Vitellij* hostis sui filiam (adeò stirpem ex eâ non veritus) splendidissimè maritalit, dotaui etiam & instruxit. Atque idem, cum sub *Nerone* interdicta ei aula esset, trepidusque abiret; accurrit quidam ex Admissionalibus, qui asperè eum compellans, & simul expellens, *abire Morboniam* iussit. Hunc postea, & iam Princeps, vitæ suæ anxium & deprecantem, non nisi ioco asperfit, & pariter *abire Morboniam* totidem verbis iussit. Denique communiter hoc de illo *Tranquillus*: *Neque cæde cuiusquam vquam letatus est, iustis supplicijs illacrimauit etiam & ingemuit.*

At fi-



At filius TITVS, amor & deliciæ generis humani, nil nisi bonitas & lenitas. Pontificatum maximum ideò se capere professus est, vt in summo sacerdotio, puras à sanguine manus seruaret: & re præstitit. *nec auctor posthac* ( verba Suetonij ) *cuiusquam necis, vel conscius, quamuis interdum vlciscendi caussa non desset, sed* PERITVRVM SE POTIVS, QVAM PERDITVRVM adiurans. Duos patricij generis, conuictos in affectatione Imperij, fatis habuit verbis monere, vt desisterent. *Principatus fato dari: à se siquid aliud vellent, peterent impetrarentque.* Et statim etiam ad alterius matrem, quæ procul agebat, ne tristiore nuncio percelleretur, cursores suos misit, qui & periculum filij nunciarent, & salutem. Fratrem *Domitianum* ex professo insidiantem, & exercitus in eum sollicitantem, nullâ re læsit aut minuit: imò precibus sæpe egit, mutuo in se animo esse vellet, & conforsem successoremque imperij nihilo secius semper nominavit. Non fregit improbum. veneno eius paullò post periit, cum publico generis humani damno.

CAROLVS verò MAGNVS inter nostros (nam ad propiora veniendum est) gloriam & gratiam hac quoque virtute collegit. *Pipinus* eius filius in patrem coniurauerat, res clara erat, ignouit: fecit iterum, ignouit: at ne tertium tamen tam lubrica mens laberetur, adstringendum religione censuit, & monachum eum fecit. Duplici beneficio, & veniæ, & viæ ad melius regnum ostensæ. Peccauit in eum & filia, sed ridicula narratio est, tamen expromenda. Erat *Eginhartus* in aulâ *Carolo* ab Epistolis, vir, vt illo æuo, doctus & prudens, sed non in Amorem. Concepit eum in Domini sui filiam, etsi impar erat, & ipsa vicissim arsit. Restinxerunt, vt solent amantes, furtiuâ sui copiâ & congressu, qui aliquamdiu latuit: donec hiemante quadam nocte, cum in secretiore cubiculo *Eginhartus* fuisset, & sub ipsam lucem exire vellet, videt multam niuem cecidisse. Hæret, & timet ne à vestigijs deprehendatur vir in gynæceo fuisse. Consilio & astu subuênit amica, & illum in humeros sublatum & pendentem, dulce onus, aliquamdiu tulit. Ecce (ô sortem iniquam pariter, & æquam!) videt hoc casu *Carolus*, & cum dolore suo & risu simul vtrum-

XII.



que benè notat. Dissimulat, die pleno conuentum Principum virorum habet, narrat iocosum & fœdum factum : rogatque (sed nomina tacuit) famulus qui sic in dominum, filia quæ in patrem peccasset, quâ pœnâ digni viderentur? Illi, *Mortis*, respondent. Tum igitur vtrumque aduocat, & coram se sistit. *En*, inquit, *isti sunt qui peccarunt. Tu Eginharte, tu filia, qui ausi hoc estis? Nec negandi locus est: me inspectorem, accusatorem, iudicem, vindicem habetis. Quid meruistis? isti dixerunt, Mortem: sed & animus vester vobis idem dicet. Tamen, mitem tu Dominum, tu Patrem videte: ignoscimus, hac lege quam dicam. Eginharte hanc tuam latricem uxorem duces: concordēs estote, & mutuum deinceps quoque inter vos ferte. Dixerat, illi à summo metu in summum gaudium translati, grates agunt, gratulationes accipiunt: *Carolus* in gloriâ est, isti in famâ.*

xiii. Nec nimis seuerum est, quod addam. CAZIMIRVS erat Dux Sendomiriensium, potens Princeps, idemq; postea rex Polonorum. Visum illi aliquando fuit tempus ludo fallere, & domesticum quendam suum, *Joannem Conarium* Equitem, ad aleam vocat. Ille pâret, ludunt, alternat fortuna: & tandem cum multa nox esset, atque incaluisset, placuit vno iactu de totâ summâ decidere. Is felix *Cazimiro* fuit: & pecuniam totam ad se attraxit. Indignatus *Joannes*, & forti suæ iratus, per calorem Principem inuadit, & fortiter os eius depalmat. Clamor & ira omnium, famulus Dominum, eques hunc Principem? Capitale erat: sed beneficio noctis elabitur, & manè tamen captus reducit, & *Cazimiro* sistitur puniendus. Ille re benè consideratâ, in prudentem hunc sermonem erupit: *Amici, iste minùs, quàm ego, peccauit: imò quidquid peccatum est, est meum. Calor & subita ira (cui nec sapientes semper pares sunt) transuersum eum egit, & mentem ac manum mouit: ego causam cur præbui? cur oblitus conditionis & dignitatis meæ, quasi cum pari lusi? Imò tu Joannes, non veniam à me solum, sed gratiam accipe. vtili castigatione me docuisti, nequid in posterum indignum Principe committam, & intra decori ac grauitatis metas me sistam. Ita dixit, fecitque. ô clementiam, ô patientiam, ô prudentiam! omnes hæ virtutes concurrunt, sed primas tamen prima, me iudice, ferat.*

At in



At in **LVDOVICO Duodecimo**, Galliæ rege, spectabilis eadem **XIIII.** virtus fuit. Prefferat eum *Carolus Octavus*, rex, vt heredem proximum: & qui doleret prolem, sibi non esse. Ita prefferat, vt in custodiam etiam daret, & vitæ suæ parùm securus videretur: plerisque procerum & vulgi pro præsentī fortunâ stantibus, & aduersantibus, certè auersantibus infelicem. Intereâ Deus in occulto alia destinat: *Carolus* subitò tollit, hunc ad regnum euehit: attonitis multis, & vultum sermonemque mutantibus, & ad gratiam noui regis se acclinantibus. Erant enim qui superbiebant, constantes antea in eius cultu aut obsequio: è quibus vnus magnâ fiduciâ ad eum accedit, & bona petit ciuis cuiusdam Aurelianensis, qui tristi illo tempore inter acerrimos Ludouici hostes fuerat. Hic rex, animo planè regio, effatur: *Tu verò aliud à me pete, & meritis tuis gratia erit. De isto, omitte: nam rex Gallie* (verba eius sunt) *non exsequitur iniurias ducis Aurelianensis.* Optimè. Dux enim antea, cum hoc titulo, fuerat: & significabat argutè, dignitatem se, atque etiam affectus cum eâ mutasse. Ille verò eâdem magnitudine animi (mater hæc semper Clementiæ) edixit publicè: *Habiturum se eosdem consiliarios cum defuncto rege, ministros, stipatores, eodèmq; honore & salario.* Deus bone, eosdem cum illo sic infesto, & iniquo? Fiducia virtutis hoc facit: & præstari sibi spondet, quæ scit deberi.

Tempora confundere liceat, sed re eâdem. Quàm enim geminum est, quod olim **HADRIANVS** Imperator cuidam, qui **XV.** ante imperium inimicitias secum gesserat? Ille occurrit trepidus, & vix verba ad preces reperiens: cum statim Hadrianus: *Euasisti*, inquit. Benignè simul, & acutè. *Perieras*, inquit, *si pares contendissemus: nunc superior omitto, & potentiam meam, non nisi beneficio, ostendo.*

Te autem **ALPHONSE** filebo? qui totus bonitas & beneficentia, *Titum* nobis, sed diuturnum, repræsentasti. Obsidebas Caietam, pertinaciter in te rebellem. constabat obsessos inopiâ commeatuum premi: atque ipsi hoc fassi, senes, pueros, fæminas, & inutilem omnem turbam emittebant. Agitatum in consilio, vt reijcerentur & reprimerentur, dedendam **XVI.**



dam enim ita mox urbem. ille misertus, emitti eos maluit, & diutius assidere. Sed cum nec potitus eâ esset, quidam ausi obijcere, *Nisi tu illos emisisses, vrbs iam tua fuisset*: ille constanter respondit, *At mihi pluris tot hominum incolumitas est, quàm centum Caietæ*. Tamen nec ea diu defuit: & ciues tam insigni virtute moniti & resipiscentes, vtrò se ei tradiderunt. Simile in *Antonium Caldoram*, potentissimum regni Neapolitani, & peruicacem hostem. Is prælio deinde magno victus, itemque captus; cum omnes suaderent de tollendo importuno homine, & *Aragonij*s semper infesto; vnus restitit, atque adeò non vitâ solùm, sed omnibus bonis redonauit. Quin & supellectilem atque instrumentum eius, magnæ elegantiae & pretij, quod in manibus habebat, totum vxori eius dedit: vnicâ modò paterâ cristallinâ sibi asseruatâ. Hæc facta viri, & consonæ item voces. Interrogatus, *Cur erga omnes, etiam malos, ita lenis esset?* Quia, inquit, *bonos iustitia conciliat, malos clementia*. Iterum, cum de nimia eius lenitate quererentur ministri, nec decere Principem: *Quid ergo?* inquit, *vultis vrsos ac leones regnare? Nam hominum Clementia, belluarum Feritas est propria*. VERA dixit. quò quis maior, & magis, vt sic dicam, homo est; hoc virtuti huic pronior, quæ & *Humanitas* ideò est dicta.

## CAP. XIII.

## DE FIDE.

*Hanc quoque Principi convenientem, vel necessariam potius haberi.*

**P**ost Iustitiam & Clementiam, Fidem commendamus: hanc quidem ex Iustitiâ natam. Quid enim magis ea dicat, quàm promissa præstanda? Et qui non facit, non solùm iniustum, sed ignauum meritò habeamus. Qui enim fallit & decipit, eò facit quia potentiae aut viribus minùs fidit: conatur igitur fidei specie circumuenire, & hanc vilitati suæ prætendit, ostentandam non seruandam. Turpe, & sublimi  
omni



omni animo indignum. Imò & naturâ abhorremus. pueros vide. Mendacium inter prima probra obijciunt; & quamquam leuitate quadam assumunt, tamen iudicij insitâ rectitudine damnant. Admiranda Dei prouidentia, virtutes animo inferentis, sine quibus vita & societas stare ægrè possit: quod in Iustitiâ, & Fide, palàm videmus. Tolle istam, aut minue: raptus, cædes, bella erunt: atque hæc, nullo fœdere aut pace terminanda. Quid enim adstringet? Cole igitur, ô Princeps, *nerabile hoc Fidei numen, quæ dexteram suam, certissimum* S A L V-  
TIS HVMANAE PIGNVS *ostentat.* Iunge tuam, si non dicam bonus, sed magnus & felix esse exoptas. Hoc enim quoque ab eâdem Prouidentiâ, quòd callidi isti & impostores, quantumuis subtilibus consilijs, rarò aut numquam ad potentiam perueniunt: aut si, in eâ non sunt firmi. At aliter in candidis ingenuisque mentibus, qui Deum, qui fidem reuerentur: hi crescunt, florent, & perseverant, cælesti fauore prosequente & attollente. Q. Marcius hoc benè, apud Liuium: F A V E R E  
PIETATI FIDEI QVE *deos, per quæ populus Romanus ad tantum fastigij venerit.* Benè, & opportunè ad Persen regem, qui spem in astu & fallacijs ponebat, fœderum parùm constans. Vtilitas igitur fidem approbat: & vel noxa à Perfidiâ possit detertere. Nam, vt sapientissimè Homerus:

Valer.  
Max. VI.  
cap. 6.

Lib. XI.  
IIII.

Iliad. 9.

Οὐ μὲν πως ἄλιον πέλει ὄρκιον, αἶμα τε ἀρνῶν,  
Σπονδαὶ δ' αἶ τ' ἀκριτοί, καὶ θεῶν ἥς ἐπέπιδ' ἔμεν.  
Εἴπερ γὰρ τε καὶ αὐτὴν Ὀλύμπῳ οὐκ ἐτέλεσσεν,  
Ἐκ τε καὶ ὅψα τέλει· σὺν τε μέγα λ' ἀπέτισαν  
Σὺν σφῆτι καφαλήσιν, γυναιξὶ τε, καὶ τέκνοιςιν:

*At non irritum erit iurandum, & fœdera pacta  
Sanguine, nec dextræ, quis credere suadebamur.*

*Nam quamquam Deus haud pœnas in tempore sumit,  
At post sumet: & hi magno, mihi crede, rependent*

*Ipsi, atque vxores, & dulcia pignora, nati.*

Audis verè vatem. Semper mala Fides pœnas statim aut postea, in violatoribus, aut sanguine eorum, luit. Et vis præsentis aliquâ commodi specie adherere? fuge: nam & Fama sic te fugiet, & quisquis vel hanc amat, Fidem amet. Cuius multa vel testimonia sunt, vel Exemplâ.



- I. **ÆGYPTIIS** quidem ( & apud priscos illos multa præclara inuenio ) lex fuit , recitante Diodoro : *Periuri capite puniuntor. quia duplici scelere obstricti , & Pietatem in Deos Violant , & Fidem inter homines tollunt* , MAXIMUM VINCULUM SOCIETATIS. Rectè de *Pietate*. quis enim perfidus , non & Dei numen , & aduocatum nomen , spernit?
  
- II. **AGESILAI** Spartani regis factum & dictum subiungam. qui cum exercitum in Asiam traiecisset contra regem Persarum ; *Tissaphernes* summus Satrapa , viribus imparem se videns , & celeritate præuentum , fallere per speciem fidei quaesivit. Itaque de inducijs cum Agesilao egit , ad simulans operam interea se daturum , ut Rex cum Spartanis componeret. Dedit *Agesilaus* trimestres. quas ipse quidem optimâ fide seruauit : at alter copias cogere , loca munire , & bellum summâ vi comparare. Quod ubi Laco sensit , & monitus est ; nihil moueri. imò multum in eo sibi profici dicebat , quòd *Tissaphernes* suo periurio & homines alienaret , & Deos redderet iratos. Vtrumque in se aliter esse. quòd & milites fidentiores redderentur , Deorum ope fisci ; & homines amiciores , qui ijs ferè studerent , quos conseruare fidem viderent. Et res atque exitus ita fuit.
  
- III. Ex eadem Græciâ fuit **ANDRONICVS** quidam à *Demetrio* rege præfectus Tyro. Cum autem *Demetrius* graui prælio victus à *Ptolomæo* esset ; isteloca & regiones passim inuadebat atque occupabat , destitutas scilicet omni spe auxiliij. In aliorum ignauia aut perfidia , constans mansit *Andronicus* , & aduentanti *Ptolomæo* , atque inuitanti , fortiter restitit : donec à militibus , seditione motâ , desertus & vrbe eiectus est. Venitque in *Ptolomæi* manus. qui nihil ut in hostem & pertinacem fecit , sed fidem illam ipsam admiratus , quam oderat , donis cumulauit , & in cohortem amicorum transscripsit.
  
- IIII. Apud Romanos plura & fortiora exempla. Primum communiter in ipso SENATU , aut POPULO. veluti , obsidione urbis à *Porcenâ* , cum iam pax coisset , & datis vtriusque sexus obfidibus



fidibus firmata esset: virgines, duce *Clælia*, transmissio Tiberi, hostibus se eripuerunt, & Romanis suis restituerunt. Poterat excusatio esse, & qui in custodiâ habentur, fallere posse custodes: sed noluit Senatus, & bonâ ac verè priscâ fide censuit obfides remittendos. Iterùm. *Faliscorum* ciuitas aliquoties rebellis, dedere se tandem *Q. Lutatius* Consuli coacta est. in quam cùm fœuire populus Romanus cuperet, & asperius consulere; doctus à *Papirio*, Faliscos non potestati, sed fidei se Romanæ commisisse; statim destitit, & verbuli religione motus, iram omnem impetumque deposuit. Quàm longè illi à cauillis, quos mala calliditas semper reperit? Romani etiam *CONSULES*, bello Punico primo, speciosè hac fide se ostentarunt. Victa erat circa Siciliam magna Punica classis, fractique duces consilia pacis agitabant. Sed ex ijs *Amilcar*, negabat ire se ad Romanos, ne eodem exemplo sibi catenæ iniicerentur, quo ab ipsis *Cornelio Asina* Consuli fuissent nuper iniectæ. Sed *Hanno* melior Romani ingenij morisque æstimator, dixit fidenter se iturum, & iuit. Verba fecit, & facienti Tribunus militum qui circa Tribunal adstabat dixit, *Nonne tibi meritò eueniat, quod Cornelio factum?* Consules statim Tribuno tacere iussu, *Isto te*, inquiunt, *metu Hanno fides ciuitatis nostræ liberat.* Verba grauiâ, verba veracia: & quanta gloria, nec speciem violandæ fidei dare voluisse?

Quod & *P. Scipio Africanus* fecit. qui captâ naue v. Carthaginensium, in quâ multi illustresque viri vehabantur; illi ad effugium commenti subito sunt, Legatos se ad eum venisse. Apparebat mendacium, & argui poterat: sed magno Romanoque animo maluit decipi fidem suam, quàm accusari. Idem. Carthagine iam obsessâ, cùm fessi malis legatos pro pace in urbem misissent, atque intereâ naues Romanas & commeatum diriperent, contra fœdus: *Scipio* nihil armis etiam tentans, suos Legatos in urbem misit conquestum, & ius petitem. At illi vix retenti sunt, quin manibus eos violarent: nisi quod ereptos tamen è turbâ, primores ad mare deduxerunt, & præsidium triremium dederunt, quæ prosequerentur redeunt. Sed id quoque parùm bonâ fide.



certè abeuntibus triremibus, *Asdrubal* statim eos aggressus est, & in conflictu duo Legatorum perierunt, reliqui inter tela volitantia ægrè se in castra & ad *Scipionem* receperunt. An non & hæc caussa soluendi iustè fœderis? non fecit: Legatos Româ exspectauit. Sed ij cùm re infectâ discedere à Senatu iussi essent, & ad suos statim se recipere, vt hostes: ecce tempestas detulit eos ad ipsa *Scipionis* castra. Et cùm Præfectus maris à *Scipione* petisset, *Quid ijs facere deberet? Nihil tale*, inquit, *quale nobis Carthaginienses*: dimisitque intactos. Hominem hunc fidum dicam, an ipsam in humano corpore Fidem?

VI. Dissimilis aliâ virtute, aut fortunâ: sed hac par fuit *SEX. POMPEIUS*, is qui Siciliâ & Sardiniâ occupatis, graue bellum fecit Triumuiris, & populo Romano. Et cùm inediâ atque inopiâ eos conficeret, coacti sunt ad pacem venire, etsi parum fidam aut diuturnam. Igitur *Octavianus Cæsar*, & *Antonius*, colloquium cum eo instituerunt, circa *Misenum*: quò ipse classe instructâ appulit, illi terrestribus copijs succincti. Conuenit tandem certis conditionibus de pace: atque vt, illi firmande, inter se beneuolè agerent ac cenarent. Prima cenæ fors *Sexto* euênit: qui rogante *Antonio*, *Vbinam cenaturi essent?* facetè respondit, *In meis carinis*: ad nauem suam respiciens, in quâ paratum epulum; tum & ad domum paternam, quam sitam Romæ in *Carinis* *Antonius* occupabat. Igitur in naui conuenerunt, & iam epulæ, & sermones, & cauilli in *Antonium* & *Cleopatram* eius erant: cùm sensim à tergo accedens *Menas* libertus, classis Præfectus, *Sextum* clam affatus est: *Visne tu vt funes incêdam, & nauim abducam, faciamque te non Sicilia modo & Sardinia, sed orbis terræ dominum?* Dixerat, & facere poterat. pons tantum nauim cum terrâ iungebat: qui eâ motâ ruebat: & quis hominum impedire, aut succurrere potuisset? In duobus autem illis capitibus vniuersa tunc res Romana nixa. Sed Deus & Fata noluerunt: nec ipsa Fides, quæ *Sexti* mentē mouit: *Et te quidem, Mena, facere fortasse oportebat*, inquit, *non prædicere. Nunc autem præsentibus acquiescamus*: NEC EST MEVM PEIERARE. Macte *Sexte*! quem vel ob  
hoc



hoc dictum factumque (nam cetera degenerant) nec Roma abdicet, nec pater.

Atqui & in singulos fidei etiam exempla sunt. ut hoc **L. V. CILLIUS**, qui vir & Senator illustris, in partibus *Bruti* atque acie Philippenfi fuit. Cum Brutus igitur altero praelio victus fugeret, & equitum manus infectaretur, & iam in eo esset ut apprehenderet: ille statuit vel morte suâ illum eripere, ac paulum velut fatigato equo subsistens, Brutum se simulat & praefert, ac capi ab illis est passus. Qui ingenti gaudio perfusi, ut tam vbere praedâ, adducebant eum reflexis habenis (nam id quoque petierat, quò magis falleret) ad *Antonium*, non ad *Cæsarem*: quasi de eius benignitate melius speraret. Interea *Antonius*, per praemissos quosdam iam certior de capto *Bruto*, probabat scilicet obuiam; sed & alij cum illo, partim miserantes, partim incusantes, quòd vitæ cupidine eò deductus esset. Iam propinquis, substitit *Antonius*, incertus quo vultu verbisque Brutum exciperet: cum statim *Lucilius. M. Brutum, Antoni*, inquit, *nemo cepit, aut capiet, spero, hostis: Dij meliora, quam ut in tantum Fortuna Virtutem calcet. Sed enim uerò ille aut alibi uiuus reperiatur liberque, aut certè, ut illo dignum est, abiuit. Ego uerò Lucilius sum, qui militibus tuis imposui, ut illi esset effugium: nec quidquam pœnæ hoc nomine recuso. Obstupuerant omnes, praefertim milites, qui sic sibi dolebant praedam ereptam: sed ad eos Antonius: Commilitones, inquit, bono animo estote, nec putate uobis fraude vel errore isto illusum. Imò ueriores, certè gratiorem mihi praedam, quam putabatis aut petebatis, scitote adductam. Nam Bruto ipso quid facturum fuerim uiuo, sum incertus: nunc dum hostem quaeritis, amicum repperistis, & adduxistis: qui, tu Lucilli, semper mihi eris. Abite, premium expectate.*

Laudabilis & ille *Cæsaris CENTURIUS*. qui captus in mari Africo, cum paucis veteranis, & ad *Scipionem* deductus, cum is vitam & pecuniam proposuisset omnibus, si militare secum vellent: ipse respondit, *Pro tuo summo beneficio, Scipio (nec enim Imperatorem appellabo, qui vnus mihi Cæsar est) gratias ago, qui vitam offers belli iure capto. Sed huic beneficio quia scelus con-*



inunctum est, non vtor. Egone contra *Cæsarem*, apud quem ordines duxi, vigintisex amplius annos militavi, aduersus armatusque consistam? Ne fides hoc sinat, aut virtus: & te magnopere hortor, vt de incepto desistas. Contra cuius enim copias contendas, si nosse vis; age, elige ex tuis cohortem vnam, quam voles: ego ex meis, quos nunc habes, non amplius decem sumam: tunc ex virtute & successu nostro intelleges, quid sperare de copijs tuis debeas. Ita militari-ter Centurio. quem statim ante pedes suos *Scipio* interfici iussit: quo crimine damnatum? fidei, quod inter desciscentes gra- uissimum est.

IX.

.. LXX.

Sed nec superior aut nostra ætas huius laudis ignara est. vt in Hispaniâ cum rex *Ferdinandus Primus* tres filios reliquisset, *Sanctium*, *Alphonsum*, *Garciam*, regna quoque inter eos diuisit, sed voluntate aut pace non firmâ. Nam statim ab eius morte *Sanctius*, ingenio violentior, fratrem *Alphonsum* bello aggressus vicit, cepit, & monachum profiteri coëgit. Non diu perseuerat coacta pietas, abdicat, & clam cum *Petro Ansurio Comite*, ad regem *Toleti*, *Almenonem* confugit. Maurus is erat, & religioni hostis, sed cum patre *Alphonso Ferdinando* amicitia ei & pax fuerat: eoque electus à profugo, cui se crederet: & iste cum fide recepit, habuitque. Dum illuc est, euēnit vt coram *Almenone* capilli eius subrigerentur, & manu aliquoties compressi non subsiderent: quod Mauri vates triste prodigium interpretati sunt, & hunc esse, qui ad vrbis *Toletanæ* imperium erigeretur. Itaque de nece suadebant. non fecit Rex, & potior ei metu fides fuit. Quod mirum in barbaro, satisque habuit, iuramento *Alphonsum* adstringere, ne se viuo regni sui terminos infestaret. Ecce autem paullò post interficitur ex insidijs, ad *Zamoram*, rex *Sanctius*: & soror *Vrraca* benignè in hunc fratrem affecta, nuncios litterasque statim mittit, quibus ad regnum euocat, & suadet astu aut celeritate euadere barbaros fines. Æstuabat *Alphonsum*. faceret? ingrati animi notam metuebat; tum etiam ne non celaret, & reduceretur meritò non demittendus. Non faceret, & rem aperiret? ne vinculis, aut conditionibus adstringeretur ab eo, qui à tam vicino & potenti rege haud frustrà timeret. Vicit tamen fides in honesto



nesto animo, & gratitudo: ad *Almenonem* venit. Quod tibi gloriosum, inquit, mihi felix sit, ad regnum à meis vocor, ereptum in parte à fratre nuper, nunc eius fato vniuersum relictum. Culpare illum mortuum, pietas me vetat: eadem, vt tuum beneficium prædicem, incitat. qui profugum, ab hominibus & fortunâ relictum recepisti, fouisti: quâ spe aut præmio, nisi quod ab ipsâ virtute est? Et tamen animus agnoscendi soluendique non deficit, fortasse nec occasio aut materies, si per te mihi datur eâ vti. Age Rex magnanime, imple tua beneficia, & pro cumulo, Regem me in regnum remitte. Hactenus vita tui muneris est, fac vt sit & sceptrum. Ita noster: quem Maurus amplexus, incolumem regemque gratatur, & promittit. Neutrum, inquit, futurum, si me inscio, non iter, sed fugam tentasses. Nec enim te celo, notam mihi mortem Sanctij fuisse, & tacitum expectasse tua consilia, vt aut laudarem ea, aut vindicarem. Istud facturum sanè eram, si fallaci & ingrato animo te subduxisses: & exploratores subsessoresque viarum dispositi à me erant, qui. sed taceo, & gaudeo opus non fuisse. Virum bonum fidumque te, erga me talem, ostendisti: fac & in regno, quod omnes dii tibi fortunent. Nihil stipulor, nisi illud vetus, Amicum te fore mihi & maiori filio Hissemo, quamdiu vita vtrique erit. Dixit, & pecuniam comitesque dedit, atque ipse, honoris causâ, aliquantum spatium deduxit. Clarissimum hercules exemplum Fidei in Afro, quod miremur, religionisque diuerso: sed & diuinæ Prouidentix, quæ id regnum & urbem ab eo voluit capi, qui perfugium ibi habuerat & tutelam. Quod nouem circiter annis post cœnit, sed mortuo *Almenone* & filio maiore.

Habet & iterum Hispania Fidei exemplum, in Lusitaniâ, sed in homine Christiano. Is fuit FLECTIVS vir nobilis, archi Conimbricæ atque vrbi à Sanctio rege præfectus. Sed enim uerò is Sanctius malè & improspere regnum administrabat, aulicis quibusdam nimis credulus, & in primis Mencix vxori suæ addictus mancipatusque. Igitur querelæ, & mox conspiratio procerum in illum fuit: denique eo ventum, vt Pontifice ipso, quem adierant, (is Innocentius fuit) auctore, curam tutelamque regni ad Alphonsum transferrent, Sanctij fratrem. Inde bellum, & plerique à Rege veteri alieni: sed constans pro eo Flectius iste fuit,

X.  
∞.cc.  
XLIII.

& op-



& oppugnationem & arma etiam *Alphonfi*, ac totius gentis, excepit. Nec flecti potuit, donec ei nunciatum, *Sanctium* in exilio *Toleti* mortem obiisse: pro quo pugnaret *ultrà*, aut *fidem* obtenderet? Daret se & verteret, quò *Fortuna* & omnes, nec *pulcherrimam* laudem, titulo *Peruicacis* aut *Insani* mutaret. Audit *Flectius*, nec satis credit. petit veniam ab *Alphonso*, vt ipse *Toletum* ire, & coràm arbitrari possit. Facile impetrat: & interea ab oppugnatione cessatur. Cùm veniit, Regem suum facto functum, sepultumque inuenit: atque vt in animo suo, non solum opinione hominum, liber esset, aperto sepulchro, cum suspirijs & lacrimis, ipsas clauēs vrbs *Conimbricensis* in manus dat, his verbis: *Quamdiu, ô Rex, viuere te iudicabam, extrema omnia sum perpeffus. corijs pellibusque famem toleraui, sitim lotio: ciuium animos ad deditiōem inclinantes, & conantes, erexi aut represfi: denique quidquid à fidei homine, & in tua verba iurato, exigi expectarique potuit, id præstiti, & perseueraui. Unum superest, vt clauibus tuæ Vrbs tibi traditis, solutum me iuramento omnibus, & ciuibus te vitâ cessisse, denunciem. Deus tibi benè faciat, in alio & meliore regno. Ita abiit, & legitimum iam alterum Regem agnouit, & adhæsit.*

XI.

*TRIMVMPARA* etiam in *Orientali Indiâ*, qui rex *Cochini* erat, cùm eò *Lusitani* venissent, fœdus pacemque panxit. Mox in nouam & suspectam gentem conspiratio omnium, & maximè *Calecutiensis* regis, qui opibus & milite inter vicinos pollebat. Ille igitur copias amicosque iungere, & hunc inprimis *Cochini* regem pertrahere, & suadere vt eiectis aut potius traditis pauculis *Lusitanis*, quos fidei suæ creditos acceperat, se culpâ, omnes metu exsolueret. Ille verò obniti, & apertè dicere, *Omnia se potius, quàm fidem amissurum. Siqui è subditis aut amicis id suaderent, eos verò magis hostes se ducere ipso Calecutiense: quoniam ille regnum modò aut vitam eripere, isti pulcherrimam virtutum conarentur. Et vitæ spatium breue ac definitum, perfidiæ maculam sempiternam esse.* Hæc & similia dicta factis affirmauit. oppugnat cum vndique *Calecutiensis*, tandem & sui deserunt: vincitur, pellitur regno, in vicinam quandam insulam se recipit, sed nullius rei maiore curâ, quàm vt secum paucos illos *Lusitanos* seruaret.



crusaret. quid? ignotos & exteros? cladem & pestem sui regni? Tanti fides fuit. quinetiam cum *Calecutij* rex iam victo pulso-  
que, offerret veterem fortunam & statum, eâ lege si illos trade-  
ret; abnuir, fortiter professus, *Sceptrum & vitam eripi posse, si-*  
*dem non posse*. Hunc hominem barbarum ego dicam? solo &  
gente fortasse, animo non possum.

Haud magis quam SOLEIMANVM Turcicum Principem, XII.  
cuius classis, ducibus *Lustibeio & Barbarossa*, in Salétinos exscen-  
derat. Ibi *Castrum* opidum arcemque, vicinum Hydrunti, subi-  
to terrore in deditionem acceperant, incolis & ipso Domino  
*Mercurino* salutem & libertatem pactis. Sed barbari, & præfer-  
tim nauales focij, nihil pensi habentes, omne maleficio infer-  
re; & idoneæ ætatis captiuos, cum ipso *Mercurino*, ad classem  
deduxere. *Lustibeius* tamen, non dubiâ perfidiæ infamiâ, ad mi-  
nuendam, *Mercurinum* liberauit: ceteros paullò post ipse *Solei-*  
*manus*. qui inter grauiores curas, *Corcyram* Venetorum obsidens,  
audito rem parum bonâ fide cum *Castrensibus* gestam; ingenuo  
pudore perusus, statim cõquiri captiuos omnes iussit, & in na-  
ues impositos, ad penates suos remitti. Ipsos quoque præcipuos  
auctores supplicio affecit, non hîc tantû Fidei amator & cultor.

Nam & in Pannoniâ, cum Budam cepisset, metu vacuam, XIII.  
eiusque arcem oppugnaret, in quâ Germanus miles, eique præ-  
fectus *Thomas Nadaustus*, curabant: ille quoque metu perusus,  
colloqui cum hostibus cœpit, & de arce dedendâ pacisci. Quod  
agrè *Nadaustus* ferens, ipse plenus animi & constantiæ, compe-  
scere conabatur, & diremptis colloquijs tormenta verti in ho-  
stem iubet. Enimuero hîc illi ignauæ ad scelus etiam versi, ip-  
sum in vincula conijciunt, & frustra reclamante & minante,  
rebus corporibusque suis saluis, arcem dedunt. Intran̄t barba-  
ri, isti exeunt, vt pacti erant: sed cum *Nadaustum* vinctum reppe-  
rissent, & rem, vti erat, ex ipso auditam, ad Imperatorem suum  
detulissent; ille perfidæ ignauæ obiratus, statim immissis in  
abeuntes Genitزارis, omnes interfici iubet: ipsum *Nadaustum*  
vinclis liberatum, & ad se adductum, laudat & liberali stipen-  
dio inuitat, ac renuentem dimittit.



XIII.

Claudamus inclito exemplo, quod magnus rex Galliarum FRANCISCUS nobis donet. Ille *Carolus Quintus* nostrum, solâ fide regis & suâ fortunâ nixum, in Belgas & turbidos tunc *Gandauenses* properantem, sine copijs, pænâ sine comitibus, comiter & regaliter excepit, apud se habuit, deduxit. Sermones inter eos varij, & de pace etiam fuerunt, donando ducatu Mediolanensi (vti iniectum erat) *Carolo* Regis filio. Sed cum Cæsar iam apud suos, pacatiq̃ue domestici motus essent; tardior in hanc rem videbatur, siue quia nec antè seriò cogitasset. Tum igitur vapulare multorum sermonibus regia comitas, aut credulitas. *cur non hominem, in quo rerum omne momentum, tenuisset? ecquando tam bella vnumquam occasio? & inuidia aliquid aut & infamia, pro tam spectabili vtilitate, subeundum fortiter fuisse. Saltem leges firmiores certioresq̃ue ei dixisset: nunc, quid nisi inanem gloriam apud vulgus, apud prudentiores risum quæsitum? Neque nescijt Franciscus: & in conuentu procerum celebri, cum alia in purgationem sui dixit, tum hæc ipsa in clausulâ: Etiam si Fides toto orbe exfularet, tamen Regibus tenendam esse, qui eâ solâ, & nullo metu, cogi adstringiq̃ue possent.* Notabile dictum, & res sic habet. nos alios Lex aut Pœna coërcet, Principes solus Pudor aut Fides.

XV.

Quid claudam? Gallus rex alium eius gentis, & vetustiorum subiicit, IOANNEM Primum, qui ingenti clade ab *Eduardo V Valliæ* Principe victus, captusq̃ue, in Angliam abductus fuit. Ibi quattuor annis in custodiâ liberiore habitus, ad suos redijt, certis conditionibus cum hoste depactus. quæ tamen cum grauioribus subditis viderentur, nec ciuitates Anglis dedendæ, facile nouum iugum præsidiumq̃ue admitterent; ipse placando hosti, & fidei testandæ, iterum in Angliam traiecit, ibiq̃ue ex morbo decessit. Clade acceptâ famosus, sed sic latâ clarus, & fide clarissimus.

XVI.

Sed heus vos, date veniam boni Reges & Principes, ac liceat illustri choro vestro seruale nomen inserere: non maculam, sed lucem & splendorem merum, quatenus hîc quidam spectabuntur. Nam & Fidei illorum in dominos aut patronos mirifica exempla sunt, nec nisi cum virtutis damno silenda.



Ienda. *Hasdrubal* in Hispaniâ res gerebat, & magnam eius partem vi aut astu subegerat: sed cum nobilem aliquem Hispanum interfecisset, *SERVVS* natione Gallus id non tulit, & mortem Domini certâ suâ morte vindicaturus, *Hasdrubalem* occidit. Rapitur, torquetur, cruci affigitur: inter omnia mala eo vultu, vt ridentis etiam speciem præberet, expletâ ultione, sui securus.

*M. Antonius* inter Romanos oratores, & in dignitate viros, XVII. nobilis fuit: atque is fœdo crimine (puto falsò) incesti publicè postulabatur. Accusator *SERVVM* maximè in quæstionem flagitabat, quem dicebat præluxisse hero suo ad flagitium eunti, & laternam prætulisse. Aderat ipse servus, cum hæc in iudicio dicerentur, & videbat rem ad suam pellem, quod dicitur, suosque cruciatus pertinere. Addo, quòd iuuenis erat, imberbis, & in ætate adhuc minùs aut patienti, aut constante. Tamen cum domum ventum esset, & herum suum animi anxium videret: *Quid diffidis here?* inquit. *In meo robore & constantiâ, si vis & expedit, spem audacter pone. nullus metus, cruciatus, mors me adiget, ut te & honorem tuum prodam. Minus arcto vinculo anima hæc corpori illigata est, quàm affectus tibi: nihil diuidet, nullus dolor aut carnifex Vocem ledendi tui ex ore isto extorquebit. Adeò non diffugio, depono hoc certamen, in quo tibi annis tiro, animi veteranum robur probem.* Erexit, & fiduciæ impleuit *Antonium*: qui iterùm poscentibus servum, præbuit. atque ille flagris virgisque laceratus, eculeo impositus, laminis adustus, mirâ patientiâ perstitit, & omnem vim accusatorum fregit atque elisit. Accessit facundia *M. Antonij*: sed heus, quæ tanta, vt hunc conditione servum, animo heroëm fatis celebret?

*Quid ille Urbini Panopionis SERVVS?* qui cum proscri- XVIII. ptus in villâ suâ Reatinâ latêret, nec fatis latêret (alii serui prodiderant: ) ecce aduenientibus militibus, ipse vestem heri subitò induit, suam illi dedit, anulo etiam in digitum inserto: atque ita, hero per posticum emissio, ipse in lectulum se reposuit, & pro illo occidi fortiter passus est. Citò id dictum: non tam citò suscipi, aut susceptum fieri, verus iudex dicet.



Magna fides, quæ vltima est, & postquam nec gratiæ, nec vi-  
tæ, vltra locus est.

XIX. *Antistij verò Restionis SERVVS* (qui & ipse miserabili illo  
Triumuiratus tempore, inter proscriptos erat) ad fidem inge-  
nium quoque adiunxit. Nam fugientē suum herum, & vt pu-  
tabat, ignotum assecutus est, & apprehendit: primò territum,  
quoniam hic erat stigmatum perpetuâ iniuriâ ab eo affectus,  
eoque in re trepidâ vindictam timebat. At ille primùm confi-  
dere eum iussit. & *Ego te ladam?* inquit. *qui tot annos aluisti, benignè*  
*fecisti? absit. nec ista stigmata plus apud me possint, meo merito imposita,*  
*quàm vetera tua beneficia in nec meritum collata. Quòd seruiui, & ser-*  
*uio, fortune iniuria est, tuum beneficium, pressum non oppressisse. Diui-*  
*nitas hunc ordinem rerum disponit, & pareo: tu confide, tibi quoque*  
*parco, & scis quomodo? vel vitæ huius periculo tuam seruabo.* Dixit  
breuiter fideliterque. & herum in speluncam abduxit, atque ibi  
ex operis & mercede diurnâ aliquamdiu aluit. Sed cùm milites,  
omnia ob præmium rimantes, ad spelūcam quoque, aliquid su-  
spicati, tenderent, ille subito senem viatorem abreptum occidit,  
& exstructo rogo superiecit. Superuenientibus in re militibus,  
& ferociter rogantibus *Quid ageret? Quin,* inquit, *scelestum meum*  
*herum interfeci, & crudelitatis huius ab eo (stigmata ostendebat)*  
*pœnas exegi.* Persuasit, & herum seruauit.

Singulorum hæc fides, plurium illa simul in eadem pro-  
scriptione. Nam *Pomponius*, audaci astu, arreptis insignibus  
Prætorijs, ipse in prætextâ, serui instar licitorum, & cum fa-  
scibus exculti, urbem mediam transiēre: arctiūs dominum sti-  
pantes, ne ab obuijs posset agnosci. Ad portam sumpsit con-  
scenditque vehiculum publicum, vt Prætor, & per totam Ita-  
liam sic incescit, quasi legatus à Triumuiris ad Sex. Pom-  
peium iret: itaque & triremi publicè præbitâ in Siciliam, cer-  
tissimum miseris tunc portum, transmisit. In tot hominibus,  
tot occasionibus & locis, admiranda plurium fides, & mente  
magis quàm stilo pensanda.

XX.  
ccccc.  
xxiii.

Addatur his non seruus, sed cliens *Roderici Danali*, Ma-  
gistri equitum in Hispaniâ. Is *Rodericus*, cum alijs aliquot,  
postulatus maiestatis fuit, & litterarum ad *Iosephum* regem  
Maurum



Maurum scriptarum, quasi patriæ prodendæ. Plura exemplaria prolata, & res in consilio Regis cognita, atque ipse alijque damnati. Hæsit in herili isto crimine ALVARVS NVNNIVS FERRERIVS, Cordubæ natus: qui Præfectus aulæ & domui *Dauali* erat. Sed is strenuè se herumque defendens, non priùs quieuit, quàm falsas litteras ostenderet, earumque auctorem *Joannem Garciam* conuinceret ac damnet. Et ipse quidem se expediuit, sed magni illi mansere exsules: cum ecce *Ferrerius*, ad heri egestatem subleuandam, omnia bona sua (quæ beneficio patroni acceperat) diuendidit, & octo aureorum millibus confectis, textrinæ lignis excuatis ea indidit; atque asino imposita, agente in viliori veste filio, clam ad *Daualum* misit. Dignus, quem illustrissima ea gens etiam nunc in memoriâ & laude habeat, & posteros, siqui exstant.

## CAP. XIII.

## DE MODESTIA IN SENSV.

*Hanc Principi decoram, & utilem esse.*

**D**Iximus tres virtutes & cominendauimus, planè Regias, & quæ in publicum spectant: sunt aliæ velut Priuatæ, quæ magis ipsum. Inter eas Modestia, quæ vario adspectu Principi adsumenda. Primùm, quia omnes homines decet submitti, & ab Arrogantiâ fugere, scopulo virtutum. Sed magis Principem, qui in alto est, & causas plures siue occasiones Superbiæ habet. Natura quidem hæc corrupta eò vocat, & vani aut tumidi per eam sumus: quid cum Fortunæ ille ventus obsecundat, & vela implet? auferimur. Adde Educationem, quæ in aulis. molliter, indulgenter, splendide habentur; obsequia & demissio omnium, etiam apud pueros: quî non infentur? Denique Adulatio accedit, ô Aulæ certa pestis! blandiuntur assidue, & laudant, honoribus ac titulis afficiunt, id est dementant. Non iure sic loquar? vide *Alexandrum* illum, à tali patre, tali præceptore: fastidit homo esse, nec iam *Philip-*



pi, sed Jovis filius audit. *Julius Caesar*, ille animi & ingenij magnus, impingit: & omnium victor, Adulationi succumbit. Voces emittit, *Debere iam homines consideratiùs secum loqui, ac pro legibus habere quæ dicat*. Itane pro legibus omnia dicta? difficile est credere, virum talem sic elatum & ablatum. *Caligulam, Domitianum, Cominodum* omitto, & hæc portenta: qui palàm saluari & haberi, *Dominus Deusque noster*, volebant. Vide an temerè ad Modestiam vocem: & quæ hodie peccentur, non dicam. Caue, caue Princeps: & cogita supra homines te, sed hominem esse. Quamdiu autem esse? mors imminet, & æquabit. Quamdiu etiam esse? tristis aliqua sors imminet, & demitteret. Regnas? potes subijci. Dominaris? potes servire. Quidquid altè se sustulit, opportunum est ad casum. Seneca noster: *Nulli Fortuna minùs benè, quàm optima creditur. alià felicitate, ad tuendam felicitatem, est opus*. Vidēsne histriones in scænâ, personam Agamemnonis aut Priami gerere: & mox, cùm fabula peracta est, ad habitum & sortem veterem redire? Date veniam Principes, tales estis. Deus personam in orbis theatro hanc imposuit: sustinete, agite, sed qui introrsum & apud vos sitis, cogitate. Chorus ille est qui dedit ornamenta: & nisi refertis ad eum, aufert. Huc vocant magnorum regum Dicta, vel Exempla: & vtraque ex magnâ copiâ, cum dilectu quodam, habe.

De Brevit.  
vit. cap.  
xvii.

\* Στοιχό-  
τημα.

I. SARDANAPALVS rex Assyriæ à delicijs, & purpuratâ, ut ita loquar, vitâ innotuit. tamen idem ab ebrietate longâ sobrius, sepulchro incîdi curavit symbolum, quod ad Modestiam altissimos vocet. Erant digiti duo, qui collisi inter se \* crepitum edebant: signantes, omnia regna, omnia votiua aut magna, NEC TANTI esse.

II. Sine alijs verbis ille hoc docuit: at ARCHIDAMVS Spartæ rex paucis, & pro Lacone. *Philippo* enim Macedoni, post victoriam ad Chæronéam, quâ libertas Græciæ concidit, insolentiùs se efferenti, scripsit: *Metire umbram tuam, nihilo reperies auctiorem*. O sapienter! Quid attollis te in hostibus victis, in finibus propagatis? tibi nil accessit. Numquid animo? curæ maiores, aut metus. Numquid corpori? *metire umbram*, videbis.

Sensit



Sensit ipse PHILIPPVS, cùm aliquando in palæstra, inter  
luctandum, prolapsus surrexisset, & corporis vestigium in are-  
nâ vidisset: *Papæ*, inquit, *quàm parvam terræ partem sortiti, or-  
bem appetimus!* III.

SEVERVS Imperator Romanorum, diu in ambitione, &  
ob eam bellis, senio confectus ac moriturus, urnam ad se de-  
ferri iussit, in quâ cineres (prisco illo more) erant recondendi. Et  
diu contrectans & contēplatus, vocem misit: *Tu virum capies,  
quem orbis terræ non capit. Ita, ita. — mors sola fatetur, Quantula  
sint hominum corpuscula.* Attollere in vitâ, manus & spes ab O-  
riente ad Occasum mitte: illa contrahet, & te intra te coget. IIIL.

*Seuerus* hoc sub mortem: diu ante eam MAXIMILIANVS  
*Primus* Imperator *Austriacus*. Nam ille memor fragilitatis huius,  
triennio (alij biennio) ante morbum, non solum mortem, capu-  
lum funebrem è querno ligno, arcæ viatorix inclusum, circum-  
ferri secum iussit: cavitque testamento, vt exanimum corpus  
suum, rudi linteo inuolutum, sine vllâ exenteratione, illi im-  
poneretur, naribus, ore, auribusq; viuâ calce oppleris. Quid si-  
bi voluit magnus vir? nisi monumentum illud assidue in ocu-  
lis habere, quod diceret, *Cogita mori.* quod amplius diceret, *Quid  
te dilatas & extendis? quid multa possides, plura appetis? Quem tot  
prouinciæ & regna non capiunt, loculus iste capiet.* Cur autem &  
calcem cauis illis partium inmisit? en aromata quibus condi-  
retur! Sed hoc spectauit, vt corpus putredini natum, eâ quoque  
exedente & consumente materie, citius consumeretur, & iret in  
suam terram. *Maximiliane*, magnus fuisti! & res tuæ dicunt,  
tum & hæc circa mortem. V.

Sed amplius, ille idem, pluribus diebus ante mortem nil  
nisi *Maximilianus* appellari voluit. quod imitatus nepos eius  
CAROLVS, cùm raro & miro exemplo, Imperio se vltro ab-  
dicasset, & in filium, iam validum æui & animi, curas contu-  
lisset. Secessit enim in Hispaniam, & in Diui *Iusti* monasterio,  
septem à *Placentiâ* milliaribus, se abdedit, cum duodecim  
dumtaxat familiaribus, Deo & quieti vacaturus. Interdixit  
autem, aliter se quàm *Carolus* appellari; *Cæsaris* atque *Augusti*  
illa VI.



III illa nomina, cum rebus animo exuens, & totum hoc honorari contemnens.

VII. Sed inter mundanos istos externosque Principes, fas sit locum dare & Ecclesiae Principi ac capiti, CLEMENTI Quarto natione Gallo: qui incredibile est, quam se in summo illo culmine modestè gesserit & temperanter. Ante Pontificatum Iurisconsultus fuerat, & filias ex vxore susceperat duas. Harum vni in monasterium collocatae, non nisi *triginta libras* Turo- nenses semel dedit: alteri quæ maritum habebat, *trecentas*, loco dotis; idque hac lege, nequid vnquam plus peteret. Nepoti quoque tria Beneficia, vt loquimur, habenti, optionem detulit vnum retinendi, cetera statim dimittendi. Mirantibusque & instantibus amicis, vt & illa permitteret, & alia daret; in claram hanc vocem erupit, *Non esse dignum Petri successorem, qui plus cognationi, quam pietati largiretur.* Exstat epistola viri sancti ad nepotem quemdam suum, ab Antonio Augustino prouulgata, in quâ & voces & sensus videre est, ab ipsâ modestiâ conceptos.

In Onu-  
frio.

VIII. Sed CANVTI etiam Anglorum regis insigne ad Modestiam documentum est. qui cum obsideretur ab Adulatoribus, id est coruis aulicis, & sortem eius attollerent, dicerentque omnia seruire, & ad nutum eius vultumque (verba Annalium) conuerti: ille foedam adulationem sic repressit. Spectantibus ijs, sedem regiam in litore maris posuit, in ipso accessu eius & fluxu. Tum dixit: *Tu mare ditionis meae es; & terra, in quâ sedeo, est mea. Impero tibi & denuncio, ne in terram meam ascendas, nec membra, nec vestem domini tui madore perfundas.* Ille dixerat, mare tene- rem suum tenebat, veniebat, alluebat. Tum resiliens: *En,* inquit, *quàm ego omnibus imperito! Quin sciant omnes, qui terram incolunt, vanam & falsam esse regum potentiam: atque vnum eo nomine dignum, qui verè imperium inhibet calo, terræ, mari.* Neque intra verba Modestia hæc stetit. in omni actione talem se præbuit, atque adeò coronam vltra in caput non admisit.

IX. Hæc inuitent & excitent, sed Mutationum exempla quæ addam,



addam, fortius etiam percellant. Quot enim ea sunt? & quàm paucis Fortuna currum à carceribus ad metam, sine offensâ aut euerfione, perduxit? In omni æuo, & in omni orbe occurrent. In Ægypto SESOSTRIS rex hoc didicit, & imbibit. Victor erat vicinorum, & imperium longè protendebat: sed & animum euexerat, & quattuor reges, equorum vice, currui suo subiungebat, quo vehabatur. In eo cùm sublimis federet, regum illorum vnus capite reflexo identidem rotam currus aspiciebat, & capi ac pasci videbatur. Quid rei sit, Sesostris rogat: ille liberè, *Intueor volumen hoc assiduum rotæ, in quâ vicissimima summa, & summa ima fiunt: quod exemplum capio, & applico nostræ fortune.* O benè! potuisset tamen addere, & *tuæ.* sed Sesostris ipse fecit, & statim illos à iugo, se à fastu liberauit.

SOLONIS etiam monitum tale, sed non apud talem: neque doceri, nisi malo suo, aptum. Apud CROESVM erat Lydiæ diuitem illum regem. qui Solonem comiter, vt peregrinum, excipiens, & gazam omnem atque opes ostentans, *Et quid videtur? habes dicere hominem me beatiorem?* Habeo, inquit Solon: & Tellum quendam, hominem inodiciæ sortis, sed in eâ quietum, nominauit: tum & duos alios, qui vitâ benè actâ essent defuncti. Risit Cræsus: & *nos quo loco sumus? Haud dixerim,* ait Solon. *nec fas beatum etiam censere, qui in his vitæ fluctibus iactatur, donec sit in portu. Nōne tempestas interuenire potest, & turbo qui euerfat?* Nec sic hominem docuit, sed fecit mox Cyrus. Nam ille acie victum, & vinctum, rogo imposuit exurendum. cùm Cræsus clamare inœcepit, *O Solon, Solon!* Miratus Cyrus, rogari iubet, *Quem in extremâ illâ sorte hominum deorumve inuocaret?* Dixit, *Solonem sibi in mente esse, qui sapienter monuisset, non fidere præsentī fortune, nec beatitudinem ante finem vindicare.* Risi, inquit, nunc probo & miror. Probauit & Cyrus. statimque ad modestiam etiam ipse flexus, liberari Cræsum iussit, & in amicos transcripsit.

Addamus quâquam æuo dissitum, sensibus exemplum ascriptum, GILIMERIS regis in Africâ Vandalorum. Diu felix fuerat, opes, terrasque victorijs quæsiuerat: vertit se Fortuna, &



*Belisarius* à *Iustiniano* Imperatore missus, cum exigua manu, hominem evertit. Acie igitur victus, fugit in Numidiæ excelsum montem *Pappum*, atque illuc obsidione aliquamdiu toleratâ, desperans ad *Pharam* misit, qui mandato *Belisarij* obsidebat, actum super deditioe, simulque petitem, *Panem sibi mitti, Spongiam, & citharam.* Panem, fami releuandæ; spongiam, siccandis oculis; citharam, leniendo animo. Dedit ea *Pharas*, & mox sese *Gilemer.* qui ad *Belisarium* deductus, nil nisi risit. Desipere eum è cladibus homines censebant: vera sapientia erat, quâ incerta hæc rerum, usu edoctus, ridebat. Idque apertius in ipso triumpho ostendit. cum per pompam Byzantij, ad *Iustinianum & Theodoram* coniugem in sublimi solio sedentes adductus, hoc tantum effatus est, *Vanitas vanitatum, & omnia vanitas.* O bone *Gilimer*, felix tua infelicitas, quæ mentem hanc dedit! nec vita deinceps infelix, quam in Galliæ angulo priuatus quietusque duxisti.

XII. In eadem Africâ, sed vetustiore æuo, non alium regem video vinci, capi, triumphari? *IUGURTHA* is fuit, *Masanisæ* nepos, opibus & ingenio validus, sed tamen à *Mario* deuictus. Romam ducitur, & post triumphalem illusionem in carcerem coniectus, veste spoliatur, inaures, quas more gentico ferebat, detrahuntur, sic ferociter, ut partem imam auris senserit auelli. Tum denique nudus in carcerem infimum abiectus, tætrum & horridum, *Papa*, inquit, *quàm frigidum est vestrum balneum!* atque inibi fame obiit.

XIII. Quid Rex è Macedoniâ *PERSES*? is quoque victus à Romanis, & animo fractus, ad religionem templi in Samothrace confugit: quasi sacra tueri possent, quem non arma. Intutum igitur asylum: fraude vel vi eductus est, & cum vxore & liberis ad *Emilium Paulum* Consulem perductus. Ibi solutus in lacrimas, & humiles preces, ad genua etiam se submisit: miserante Paullo, & simul indignante, quod homo sic vilis & degener victoriæ suæ decus delibaret. Triumphatus deinde est, cum duobus filiis, & filiâ: ipse in carcere, & duo mortui: tertius seruatus, quid nisi iterum ludibrium? Regia illa stirps primò fabrili arte vitam tolerauit; & usu iam Latini sermonis



nis aliquo, scriba & assicla magistratuum fuit. Vbi es Confidentia, aut Superbia?

Ante illum, & maior illo PHILIPPVS, eiusdem Macedo-  
niae rex, & Magni pater, quàm sensit infidam sortem? Græ-  
ciam ferro vel auro suam fecerat, spes in Asiam mittebat: &  
iam conuentus indictus erat, vbi caput & Præfectus eius belli  
legeretur. Quem vt celebriorem lætiorémque faceret, nuptias  
in eum contulit filiae suae *Cleopatrae*, cum *Alexandro* Epiri rege.  
Ludi & theatra parantur, etiam sacra & duodecim Deorum  
statuæ in pompâ ferendæ: quibus ipsius (ô cæca mortalitas!)  
decimatertia adderetur. Quid lætitiæ aut gloriæ abest? diu-  
turnitas. & dum securum se putat, & theatrum ingreditur,  
*Pausanias* ex amicis (& hoc inopinatum) à tergo consecutus  
interficit. Vis iterum inopinatum? conscendit ille celerem  
equum, & euaserat, nisi pes eius in vite adhæsisset: vbi à satel-  
lite Philippi confectus est.

Sed quid ego talia memorem? vna illa Græcia, præsertim  
à *Constantino Magno*, qui imperium in eam transtulit, tot exem-  
pla casuum istorum det, vt non sit opus alio theatro. Quid in  
Italiâ? ab *Augusto* ad eundem *Constantinum* numerantur IM-  
PERATORES *quadraginta tres*. Dispice. vix decem ex istis cer-  
tò dabis, qui suâ morte sint defuncti. Alios ferrum, venenum,  
laqueus abstulit: à filio, fratre, vxore, amico, inimico: quid  
nisi singulos iustæ tragœdiæ argumentum?

Iam & fati alia genera miseranda. POLYCRATEM in cruce  
mori video, BAIASITEM in caueâ, DIONYSIVM in scholâ,  
BOLES LAVM Poloniae in culinâ. Quid ANTIOCHVM Syriæ,  
nónne à latronibus occisum? PYRRHV M à fæmina? HEN-  
RICVM nuper Galliae à monacho?

In solâ Hispaniâ tria hæc demus: & quartum alij. HENRI-  
CVS *Primus* puer sceptrum ceperat, nec diu tenuit, post bien-  
nium miro casu, & verè casu, sublatu. Nam dum Palentiae,  
in arcâ domus, cum æqualibus ludit, tegulæ lapsæ ictu repen-  
tè caput comminutum: & ex vulnere vndecimo pòst die obiit.  
IOANNES itidem primus, in flore rerum & ætatis (annum tri-



∞.CCC.  
LXIX.

*gesimum tertium* agebat) dum equum iuueniliter calcaribus incitat, & ad cursum admittit, cum eo labente lapsus, inibi exstinctus est. Magis tragicum est de PETRO. qui cum aliquamdiu saeuiter, & multâ procerum cæde, regnasset, *Henricus* frater arma in eum cepit; & auxilia è Galliâ etiam conduxit. Pugnatum acriter, quàm odijs pertinacibus, exitus docuit. nam victus *Petrus*, cum in conspectum *Henrici* captus adductus esset, iste pugione faciem eius percutit: atque alter dum vindicare parat, fœdè colluctati, vterque ad terram prosternitur. Sed alijs quoque suppetiantibus *Henricus* superior, fratrem multis vulneribus conficit, & regnum capit. Nónne hoc Thebanum vetus illud par fuit? Quartum exemplum in mente habeo, nondum in stilo:

XVIII.

In isto, quintum. & est SEBASTIANI nuper Lusitaniæ & Indiarum regis, *Jndole, prob, quantâ iuuenis!* sed Fata eum euerterunt, & ipsum regnum verterunt. Iuuenis erat, animorum plenus: & accedebant, qui etiam Pietatis specie illos tollerent, & arma in Mauros, exquæ ijs victorias, suaderent aut sponderent. Acrior stimulus *Mahumetes Abdalæ* filius, profugus è Fessæ regno; qui ius suum & amicos ostendebat, & largiter promittebat, exsulum ingenio & more. Ergo excitatur, & omnia parat, naues, milites, comineatus; præter consilia, quorum inops tunc & postea fuit. Vetus regnum, & altâ pace, commouetur. insolens armorum nobilitas, & facta maiorum faciliùs, quàm sua ostentans. Additur & mercenarius miles: Dux nusquam, nisi in titulo & splendore regis. Mare transeunt, regna Fessæ & Marocci, vt destinant, occupaturi: sed rex illorum ex aduerso prodit, *Moleius Moluccus*, corporis æger, animo melior. Disponuntur acies, pugnatur, *Moleius* interest, etsi per ægritudinem vix in equo hærens. videt autem fluctuare suos aut fugere, & generosâ irâ in hostem ipse equum concitat, exemplo aut terrori futurus: sed proximi retinent, gnari virium. Quâ re ita excanduit, quasi in ordinem redactus, aut proditus, vt gladio eos petierit; & mox animo linquens, in lecticam repositus, illîc in ipsâ acie obiit. Sed mira fides aut prouisio amicorum fuit. silentium de morte, cursus



sus & recursus ad lecticam eius, quasi à viuo mandata peterentur: quæ res victoriam parti illi dedit. Nam Christiani pauci in plures paullatim fatigari aut cedere, multi cadere: postremum ipse rex, qui in medijs hostium pugnabat, cum videt omnia aduersa, cinctum se sine spe effugij, verba de pace aut deditioe facere: ah, quàm serò! Hostes inuadunt, & occidunt, siue inter plures ignotum (& quidam aiunt regia insignia sibi detraxisse: ) siue cognitum, sed rixâ inter ipsos ortâ, quorum præda esset, per iram interemptum. Addunt, equestri sellæ cadauer impositum, & in tentorium noui regis Afri (frater defuncti erat) delatum abiectumque ostentui fuisse, donec à captiuis bonâ fide agnosceretur. Ita ille obiit: & simul rex tertius *Mahumetes* exsul, qui fugere & fluuium vadare conatus, vorticibus siue voragine haustus merfusque est. O acerbi fati adolescens, quæ tulisti, & quæ dedisti! nam tecum regnum corruit, & quod seorsim diu luxit splenduitque, velut radius redijt ad suum Solem.

Assiduus hic ludus: & ideo non sit finis narrationum, nisi reprimam. quod facio: sed vnicum insigne exemplum Mutationis effatus, in quâ & manus carnificis interuenit. **C O N R A D I N V S** imperatoriâ & regiâ stirpe iuuenis, vltimus Ducum Sueuiæ fuit. Pater ei *Conradus*, rex Neapoleos & Siciliae; mater è Ducibus Bauariæ; auus, *Fridericus Secundus* Imperator; auia, *Constantia* filia *Ferdinandi* Hispaniæ regis fuit. Quàm amplum, & illustre hoc stemma! quos animos non faciat? quæ fata non promittat? Sed spes vndique destituit: & statim à puero aduersâ sorte, regna Neapolitana & Sicula, iure debita, *Manfredus* patruus fraude inuasit, vi tenuit. Cum ille abijisset aut pulsus esset, auctoritate Pontificis ( *Clemens quartus* tunc erat, Gallici sanguinis, & genti fautor ) *Carolus Andegauensis* aduocatur & inuadit. Quem *Conradinus* dum pellere conatur, copias contrahit, è Germaniâ in Italiam venit, multâ nobilium manu: inter eos, *Friderico* Duce Austriæ, cognato suo. Sed & Itali se iungunt, quidam ius eius, plures commoda vel affectus suos spectantes. Pugnâ cum *Carolo* commissâ, primò victor, denique vincitur: & fugit cum eodem *Friderico*

XIX.



*derico Austrio* per ignotam Italiam, trepidi & agasonum habitu se occultantes. Itā Asturam ventum. vbi consilium capiunt naus conscendendæ, & Pisas dirigendæ, sociam & fidam urbem. Conueniunt cum nauiculatore, & iam in nauierant, sed panis & commeatus deerat, quem mittunt eundem illum præstinatum. Pecunia etiam deerat: ergo annulum alter à digito detrahit, siue pignus nauiculario, siue pretio ab eo permutandum. Is annulus gemmam raram & æstimatam habebat: itaque aurifex miratus à sordido homine deferri, & suspectans, *unde habeat?* quærit. Ille candidè, *Aduobus iuuenibus, ingenui vultus & sanguinis, sed habitu & veste squallidis: neque ultra se scire.* Defertur res ad Dynastam urbis (qui tunc illi proprius erat) *Joannem*, è gente *Frangipantum*: atque is ex euentu prælij, & famâ, tale suspicatus, nauem instrui iubet, adolescentes retrahi, & ad se duci. Dictum, factum: sistuntur, agnoscuntur: & putabant extra periculum se, quia extra hostile solum erant, esse. Aliter accidit prauitate, siue avaritiâ Dynastæ. nam is *Carolo* indicat: qui statim cum copijs terrâ marique aduolat, & captiuos suos Neapolim abducit. Quid exspectas? aliquid regium? pudor est Andegauensis stirpis aut macula, quod dicam. Diu deliberato concluditur, tollendos adolescentes, & publicè capite minuendos. Quid? vt sicarios aut prædones? qui ius suum repetierant? qui bellum palàm intulerant, & iure ac more gentium administrarent? Omnia in hoc facto sæuitiam & barbariem habent: etsi Pontificem etiam obtendunt, atque illum consensisse, aut suassisse. Alterum potest, vix alterum: sed æstimatio aliorum etiam esto, in re autem istud. Producentur in scænam publicam, concursus ad tale spectaculum è totâ Italiâ, plerique omnes miserrantur & illacrimantur; sed nemo, nisi inani fauore, iuuat. *Conradinus* animosè loquitur, *Carolus* accusat, se excusat: Deum vindicem inuocat, & ius suum in hæc regna *Henrico Castellano*, amitæ suæ filio, donat. Huic rei tesseram, chirotecarn exuit, abijcitque. Tum *Fridericus* primus ingeniculare iubetur, & caput inciditur: quod sublatum è tabulato *Conradinus* (quis sine motu audiat?) pectori appressum, deinde ori applicuit: & sortem miseram eius defleuit, cui auctor ipse esset.



esset. Tum & ipse in genua prouoluens, fortiter carnificem exspectat: qui caput amputat. & cum fecisset, statim alius hunc interficit, ne exstaret qui iactaret generosum illum sanguinem à se sublatum. Hoc vnum *Carolus* magno in speciem animo: cetera feritatem habent. etiam illud, quod ipse spectator supplicij esse sustinuit, in altâ quâdam turri occultus. Illi obierunt: nec diu victoriâ aut regnis *Caroli* posterius gauisi sunt, & Hispani (an non morituri voce & voto?) eiecerunt.

## CAP. XV.

## DE MODESTIA IN CVLTV:

*Et hanc conuenire, elegantiam aut pompam  
non conuenire.*

**E**T præcipuum quidem est, animum sic affectum esse: sed vt corpore idem prodatur, quidni decorum sit? Aurum, gemmæ, serica, non digna sunt ornamenta magno Principe: & negotiator aliquis aut mango ea vsurpet. Quis etiam nescit, Principi in mundo hæc esse? habet gestatque, si velit; sed maioris animi est, seposuisse. Sanè egregios aliquot Principum sic factitasse video, & plebi virtute eminuisse, cultu consensisse.

AVGVSTVM apud Romanos: de quo Suetonius. *Instrumenti eius & supellestilis tenuitas apparet etiam nunc, residuis lectis atque mensis, quorum pleraque vix priuata elegantie sunt. Ne toro quidem cubuisse aiunt, nisi humili, & modicè instrato. Veste non temerè aliâ, quàm domesticâ vsus est, ab vxore, sorore, & filiâ neptibusque confectâ. Vt alia omittam, vide an vestis illi trans mare petenda, qui non nisi domo sumptam, & confectam, gestauit.*

I.

ALEXANDER *Seuerus*, planè inter bonos Imperator, gemmas lapillosque omnes, quos in Palatio repperit, vendidit: addens, *Gemmas viris vsui non esse.* Idem nec apparatu, nec pompâ mul-

II.



pâ multum utebatur, hoc usurpans: *Imperium in virtute esse, non in decore.*

III. Quod sensit sanè AGESILAVS, Spartâ dignus rex. qui iam senex in Ægyptum Tacho regi suppetias iuit. Nauibus vehabatur: & cum appropinquaret, ingens Ægyptiorum turba in portum se effudit, ad celebrem ducem spectandum. Præceperant animo magnificum virum, veste, comitatu, ipso corpore spectabilem: at ille prodijt cum vili palliolo, par gregalibus, & nec aspectu verendus, nisi siquis nosset. Itaque palam cœpit contemni, aut irrideri: *Hunc esse, qui res lapsas instauraret? anchoram suæ spei? Omnino iactatum illud in eo verum conspici, Montes parturire, murem nasci.* Hæc & talia plebecula: sed plebecula. virum & ducem se mox exhibuit, non parem famæ, sed maiorem.

IIII. Talis in eâdem Græciâ PHILOPOEMEN, quem scitè & verè dixit aliquis, *Ultimum Græcorum.* Post eum, vix sanè alius magnâ virtute, & laude fuit. At hic & corpore parum decens, & cultus omnis negligens fuit: ac dedit sanè modestiæ huius (sed apud fæminam) pœnas. *Megara* ibat, & præmiserat nuntiatum amico cuidam, affuturum se vespere, & hospitem conuiuiamque ei futurum. Gaudius ille, vt cocti aliquid esset, rectâ ad forum properat, vxori denunciâns, vt domi interea paret, verrat, sternat: & quæ tanto hospiti conueniant. Illa satagit, & *Philopæmen* opinione maturius adest, & comites post se reliquit. Salutat hospitam. illa resalutat: & de cultu eius & corpore suspicata antecursorem aliquem esse, & ex famulatio: *Heus tu,* inquit, *festinamus. adde manum & adiuta, atque hac ligna mihi scinde.* Vnâ porrigit securim: & facit opus sedulò *Philopæmen*, donec amicus de foro superuënît, & attonitus, *Quid hoc rei est Philopæmen? ita te & me dedecoras?* Ille subridens, *En pœnas,* inquit, *vultus & cultus mei luo.* Adeò non indignatus pro seruo se habitum, vt vltro iocatus in se sit: & credo materiam bellam sermonum eâ die, hoc factum fuisse.

V. RVDOLFO nostro Austriaco non aliter Moguntiâci euênit,  
& à



& à pari causâ. Nam vestitu, nihil à plebeio differebat. Mânè igitur egressus solus ( & aura frigidior erat ) videt in pistoriis domo carbones de fornace recentes , ignitosque. Intrat fidenter, adfistit, calefacit: cùm mulier eum adspicit, & ex vestitu æstimans, *Heus*, inquit, *mi homo*, parùm decet vos ad mulierculas, & in alienam domum sic venire. Rudolfus, *Mea mater*, miles sum, qui meas res in obsequio & comitatu Imperatoris contriui: at ille parùm benignè me nunc habet, nec pro spe aut meritis muneratur. Mulier ad illud Imperatoris nomen cœpit stomachari, & multa mala in Rudolfum dicere: *Quin iste vir est*, inquit, *qui nos & nostra perdit*, pauperum scopulus & exitium. Meritò hæc vobis eueniunt, qui adhaeretis & sequimini: atque ut plura eueniant, opto. Rudolfus delectatus procaciâ mulierculæ, *Sed mulier*, inquit, *de me missum face*: vos propriè quâ re lesit? Ibi mulier exclamare, *Jllène?* qui omnes pistores huius Urbis, lautos satis antea, fortunis euerit: nec facîle resurgemus. At tu bone vir fabulari desine, nec vltra molestiæ aut impedimento nobis esto. abi. Aliquid voluisset etiam Rudolfus, sed illa Amazon vas aquarium in prunas accensas iecit, & fumo, vapore, cinere perfusum eiecit.

Sed iste cultus eius priuatim, & non publicè fortasse fuit. Publicè? vide. Quis dies latior, & magis pompæ aptus, quàm cùm victum *Ottocarum*, Boëmiæ regem, ad se vocatum excepturus erat, & fidem ab eo ( Homagium dicimus ) accepturus? Ille venit cum magno & splendido comitatu: viri & equi auro, gemmis, serico nitebant. Dictum Rudolfo, aduentare: & sedulò à quibusdam additum, *Pararet se, veste & cultu ornatiore & Imperatorio, talem regem admissurus*. Rudolfus renidens: *Imò rex Boëmiæ*, inquit, \* *griseam meam vestem* ( verba fuerunt ) *sapè derisit: nunc ipsum vestis mea grisea deridebit*. At vos arma & equos expedite, & accincti instructique, ut ad pugnam, state. Decus Teutonicorum armorum, non vestium, aduenis istis ostendite: hoc me vobisque dignum est. Dixit Rudolfus, neque aliter fecit. *Ottocarus* illi vili culcui se & aurum suum submit, & ad genua accessit: non sine ludibrio etiam. cùm Imperator iussisset tentorium, in quo res gerebatur, subito pandi &

VI.

\* Leucophea Græcis: cineream, aut murinam Latinis



di & reuelari, vt ab omnibus geniculans *Ottocarus* conspici posset.

VII. CAROLVS *Quintus* Imperator, vt sanguinem ab eo, sic hanc virtutem traxit. In omni vitâ modicus, vel potius tenuis, in cultu fuit. quod notarunt Itali, & mirati aut calumniati sunt, in primo eius & sollenni ingressu Mediolanū, Insubrum vrbe. Ciues nouo domino omnia instruxerant, platéas auleis, tabulis, frondibus, sese quisque vestibusexornauerant: vimbella aurea parata, quæ ingredientem tegetet. cū ille & Imperator, & non semel Rex ac Princeps, in lancâ atrâ penulâ, & vili pilleolo, sub eam sededit. Videbant eum, & requirebant: matronæ præsertim, & virorum vaniores. qui trabeas, & illusas auro vestes, & fulgentes in capite & collo gemmas expectabant.

VIII. O quàm dispares isti à Græcanicis Imperatoribus, quos luxus & deliciae ad cultum vix virilem traduxerunt! In quâ re lepidum est, quod *Nicetas Choniates* denarrat de ALEXIO ANGELO, Principe Byzantino. Erat in Italiâ tunc *Henricus Quintus* Imperator, filius *Frederici Aenobarbi*, qui Siciliâ & Neapoli subiectâ spes suas longiùs porrigebat, & Græciæ imminabat. Misit igitur legatos, qui magnum auri pondus poscerent, velut tributum nomine: aut si negaretur, causam belli. *Alexius*, quem dixi, audito aduentu exterorum, vt opes suas & splendorem ijs ostenderet, & oculos veneratione aut metu præstringeret; iussit suis omnibus quàm ornatissimos adesse, auratos, gemmatosque: ipse autem à capite ad calcem nil nisi splendor, & nitor erat, rarum vel in exemplo aliquo spectaculum. Veniunt legati, sed Germani, id est viri. qui tantum abfuit (ait *Nicetas*) vt spectaculo eo ad metum moueretur, vt contrà ad cupidinē: & nihil magis vellent, quàm cum istis quamprimùm ad manus venire, effaminatis, nec nisi ad prædam natis. Cū interim Græculi etiam accedentes eos cubitis tangebant, & digitis præibant, vt Imperatoris vestem & gemmas aspicerent: quibus ille, vt floridum aliquod pratum, aut Alcinoi hortus, variè nitebat. En, aiebant, vel in mediâ hieme, Veris opes & gratias vsurpate, & oculos ijs pascite atque hilarate. O belli para-



parasiti ! & quid ad hæc Germani? Nihil capi aut affici se istis muliebribus spectaculis aut ornamentis . atque adeò iam tempus esse , ut his sepositis Græculi ferro aurum commutarent . Nam si irriti legationis suæ redirent ; pugnandum ijs cum viris esse , qui non ut prata lapillis niteant , neque vestibus variegatis , ut pavones , gloriantur : sed qui veri Martis alumni , flammæ nitoremque ex oculis in acie iaciant , & quorum sudor splendidis guttis defluens referat margaritas . Hæc nostri Germani ad Græcos , iam verbis terrefactos : quid si ad rem ventum fuisset? Et fuisset , nisi Henrici mors subsequuta consilia hæc & incepta turbasset.

## CAP. XVI.

## DE MAIESTATE:

*Et saluâ Modestiâ posse assumi.*

**N**Eque enim inter se hæc pugnant , & conuenientia est etiam inter specie dispares virtutes . Appello autem *Maiestatem* , venerationem aliorum animis insitam , cui à magnitudine est origo . Et ipsum etiam nomen Maiestatis est à Magno . Ouidius decenter aperit:

*Donec Honos placidoque decens Reuerentia vultu*

*Corpora legitimis imposuere toris.*

*Hinc sata Maiestas.*

Proles igitur est Honoris & Reuerentiæ , sed & matrem si quis horum dicat , non aberret . Origo ei præcipua ab internâ magnitudine , id est virtute : etsi externa etiam species , gestus , cultus , aliquid addunt . Orientales in his talibus magis curiosi aut affectati : minùs Europæi , & veteres Principes diademate & purpurâ ferè contenti fuere . Hodierno æuo , illis abolitis , sceptrum & corona successerunt . Parùm est . arbitraria sunt : leue adiumentum ad maiestatem , nisi aliunde ea adsit . Sunt & insignia quædam nouitiæ inuentionis , ut Aurei velleris , Conchæ S<sup>ti</sup> Iacobi , & talia : è quibus primum , omen habuisse videtur aut præfagium plusquàm Iasoniæ nauigationis , quâ



Ecclef.  
Hist. III.  
cap. I.

Lib. xxx.

Lib. xx-  
viii.

Apul. de  
Deo Socr.

Panegy.  
ad Theo-  
dof.

Tacit.  
xiii.  
Annal.

nouus orbis, & in eo aurum, sunt resecta. Aliquid & Aulæ pompa, & ministeriorum varietas aut copia, item satellitium huc faciunt: & *Iulianum* Imperatorem, vulgò *Apostatam*, culpatum in his memini, qui sustulit aut recidit: ὅτι (ait Socrates) παυομένη ἢ ἐν τῇ βασιλικῇ πλέτῃ τοῖς πολλοῖς ἐγγινομένη κατὰ πλῆξιν ἐν κατὰ φρόνησιν ἐποίησεν τὴν βασιλείαν: quoniam cessante admiratione opum & potentie, quæ plebeis animis hoc aspectu inseritur, vilem & contemni facilem reddidit Principatum. Plebeium iudicium est, nec magni hæc momenti: magis mores, si ij compositi & graues. Talem Periclem Plutarchus describit, vultu serio, nec ad risum facili, incessu moderato; voce & sermone sedato. Alacritas illa nimia vix conuenit, sed nec dicacitas, etsi ingenij notam dicas. Liuius in *Philippo* ultimo Macedone hoc notat: Et erat dicacior naturâ, quàm regem deceret, & ne inter seria quidem risu temperans. Iam corpus & species si adest, valdè iuuant. atque ita de *P. Scipione Africano* idem Liuius: Præterquàm quòd suapte naturâ multa maiestas inerat, adornabat promissa cesaries, habitusque corporis, NON CVLTVS MVNDITIIS, sed virilis ac verè militaris. Postremò, secessus & abductio iuuat. Vt enim ille ait, Parit conuersatio contemptum, raritas conciliat ipsa rebus admirationem. Sed nimia ne fit: aut tollit munus & officium regis. Neque enim Persæ laudandi, apud quos persona regis, sub specie Maiestatis, occultitur. Non item qui eos imitati, intra secretum Palatinæ domus inclusi, tamquam aliquod Vestale secretum consuluntur: tumida & odiosa sunt, nisi gentium aliquis receptus mos (nec is bonus) ita habet. Quid tamen de regibus dicam? ecce olim libertum, qui huc superbiæ & fastidij deuēnit. Is fuit *Pallas Claudij*, qui venerationi asserendæ, numquam domi aliquid, nisi nutu aut manu, significauit; vel si plura demonstranda essent, scripto vsus, ne vocem sociaret. Examina hoc, & ride seruilia illa portenta tam impotenter regnasse.

CAP.



## CAP. XVII.

## DE CASTITATE:

*Quam Princeps extra connubium, & in eo pro parte seruet.*

**A**ddidi denique alias virtutes, quæ ex decoro aut usu sunt: & quattuor præsertim, *Beneficentiam, Castitatem, Patientiam, Animi magnitudinem*. De primâ, alibi dicendum commodius: nunc de Castitate, dignissimâ Principe: cuius proprium est, alta & seria cogitare. Non facit libido, quæ in sordidis cogitationibus & cæno suo hæret. Benè ille veterum: *Nil est tam mortiferum ingeniis, quàm libido*. Nec animi solùm, sed corporis robur minuit: & perplacet illud Augustini, *Pudicitia est virtus, quæ comitem habet fortitudinem*. Omitto pericula ex eâ & contemptum, alibi dicenda. Habeas igitur ante matrimonium: neque enim ab eo te arceo. imò quod honestius (ait ille) *Imperatorie mentis leuamen, quàm assumere coniugem, prosperis dubijsque sociam? cui cogitationes intimas, cui paruos liberos tradas?* Cogitationes, nec tamen omnes. Illæ de republicâ, non benè semper infirmo, & interdum infido sexui, committuntur. Spernimus, qui referunt ad istas pleraque omnia, & qui audiunt: etsi Aristoteles notat, *feroces & militares sepe populos ita subijci, & nominatim Lacedæmonios*. Quod idem de istis Plutarchus, scribitque: *Lacedæmonios uxoribus suis semper addictos esse, plusque cum his, de negotijs politicis, quàm has cum illis, de priuatis communicare*. Turpe est, ne fiat. Quis Claudij imperium non nouit, hoc nomine famosum, quod semper aut Messalina aliqua, aut Agrippina regeret; aut vnâ cum his, quispiam è libertis? Quis & Alexandri Seweri, boni aliàs Principis, non misereatur: qui per pietatem nimis matri se addixit, & se sic euertit? Herodianus obseruat: *Quippe illi mater supra modum imperabat; atque is dicto audiens semper fuit. idque aliquis solum in Alexandro reprehenderit, quod mansuetudine nimia, & reuerentiâ maiore quàm oportuit, matri etiam in ijs quæ*

De Ciuit.  
Dei, lib. i.

Tacit. xii.  
Annal.

ii. Politic.  
cap. vii.

Lib. vii.



displcebant, obsequeretur. Atque idem scriptor proprium muliebre vitium tangit, quod instillant. *Alexander*, inquit, ipse ad praelium cum *Partho* non venit, incertum metune proprio, an quia mater retinuerit, famineo pauore. Omnes enim illius (hæc nota) GENEROSOS SPIRITVS retundebat, suadens alios potius periclitari pro se sineret, quàm vt ipse in acie consisteret. Talia fæminæ, & deteriora, solent: ac bonarum rara exempla, animosarum pauciora sunt. Mihi verò, si quæ Principis fæminæ partes in republicâ esse possunt, eæ sint quas *Homerus* in *Arete Alcinoi* describit: quam, inquit, maritus honorat & ciues: Quid ita?

Οὐ μὲν γὰρ τι νόος γὰρ καὶ αὐτὴ δ' ὅλῃ ἐοικε,

Ὅσῳ τ' ὅτ' φρονέῃσι, καὶ ἀνδράσι νεύει λυγρῇ,

Nam neque mente animoque ea deficitur sapienti,

Atque inter ciues & amicos iurgia soluit.

Hoc bonum germanumque fæminæ opus, pacare, mitigare: amplius, ex eodem *Homero*, afflictos iuuare. Ita enim *Minerva* *Ulyssi* suadet, adire in primis & blandiri *Arete*: quia per eam in patriam restituendus esset. Plura quæ facit, plurimum malè facit. & pulchrum elogium de *Mariâ Emanuelis* Lusitani vxore. quæ (ait scriptor eius gentis) erat moribus & vitâ grauis, humanitate comis; otij inimica, & ipsa manibus suis opera muliebria, è lino aut serico, faciebat; & virgines suas eodem ducebat. NEGOTIIS PVBLICIS numquam se admiscebat, summum mulieris decus in modestiâ ponens, & vitæ perturbationem censebat, munerum confusionem. Hæc magnanimæ illius *Isabellæ* filia fuit: sed non in virilibus curis ei par: & vt verum dicam, *Isabellæ*, vt *Phænices*, vix quingentesimo anno gignuntur. Siquis tamen talem nactus, vtiliter audiat: vel minorem eâ, sed audiat, non semper auscultet. Exempla porrò *Castitatis*, atque etiam deinde *Caritatis* inter coniuges, demus. ac primum illud, quod de

- I. CYRO Xenophon, siue verè siue decorè, scripsit. Cùm, inquit, *Panthea* formosissima fæminarum capta esset, atque ad eum adducenda, vetuit: ne vel oculis scilicet castitatem matronalem, & suam, violaret. Atque *Araſpo* ex amicis suadenti adire eam, & alloqui: esse enim mulierem insigni formâ, & Regis planè oculis dignam: Ob istuc ipsum, inquit, magis est vt



est vt abstineam . Etenim si nunc illam adiero , cùm vacat ; fortasse illa efficiet vt adeam , etiam cùm non vacat , ei que assideam neglectis rebus seriis . Bona oratio , & ratio . ac sanè si non alia noxia in vsu fæmineo ; ista certè est , auocari à melioribus curis.

Itaque iure PERICLES , cùm Atheniensibus Prætor , collegam Sophoclem poëtam haberet , atque is in communi officio fortè districtus , prætereuntem egregium puerum intentius intuitus esset , impensiùsque laudasset ; grauissimâ istâ voce corripuit , *Oportet , ô Sophocles , Prætozem non solùm manus à lucro , sed oculos à libidine habere puros .* II.

Quod fecit rex ANTIOCHVS tertius . qui Ephesi in suâ vrbe , conspectâ Dianæ sacerdote , supra alias formâ decorâ , continuo illinc soluit : veritus scilicet , ne amor aspectu paullatim auctior audaciorque , eò impelleret , vnde pius castusque non rediret . Laudari meritissimò posset , & contra impios quosdam Principes : quibus Deo dicatas virgines violare aut incestare , idque sub velo ( ô nefas ! ) sacrorum & religionis , ludus iocusque fuit. III.

At ALEXANDRI Magni in hac re continentia , cui non innotuit ? Is magno prælio Darij victor , eiusque gazam , coniugem , & filias etiam potitus : non solùm benignè & regiè habuit , sed sic castè & sanctè , quàm si eodem , quo ipse , parente genitæ forent . Darij quidem vxorem , exsuperanti formâ fæminam , nec oculis attingere vinqum voluit : quod ipse de se in epistolâ quadam ad Parmenionem sic scripsit : *Ego enim non solùm non vidi inueniar Darij vxorem , aut VIDERE COGITASSE , sed nec verba facientes de eius formâ audire sustinuisse .* O raram in eâ fortunâ , & ætate , laudem ! quam factum sequens cumulat. IV.

Cùm aliquando enim IDEM , naturâ incitante , vsum fæminæ voluisset , & ministri formosam noctu adduxissent : ille rogauit , *Ecquid tam serò venisset ?* Ibi mulier excusare mariti vigilias , & expectasse donec cubitum iuisset . Quod cùm audisset , quasi telo ictus , & calore omni remisso , mulierem omisit : V.



omiserit: vocatisque ministris, Reducite, inquit, istam. & quam pænè imprudentem me adulterio illigastis?

VI. Iam quæ verba Erivs & ira, aduersus *Philoxenum* quemdam, maritimæ rei Præfectum suum? qui ad eum scripserat, *Esse apud se Theodorum mangonem*, & venales habere duos pueros formâ eximiam, ecquid eos emeret? Quibus lectis valdè indignatus, & idemtidem exclamans amicos interrogabat, *Quid igitur in se Philoxenus tam fædum vidisset*, vt tantam maculam sibi inureret? Sed & in epistolâ ad ipsum, multis eum probris scidit, iussitq; *Theodorum* illum cum mercibus suis in malam rem ablegari. Quod si sic alij Reges & Principes; faxo, vt talium rerum conciliatores & interpretes pauciores in Aulis essent.

VII. Quid autem Romanus *Scipio*? nec robur eius in hostes magis, quàm in libidines suspexeris: quas an non supra *Alexandrum* domitas habuit & compressas? Nam ille oculis suis parùm credidit, & veritus est capi: iste cominus congressus, & vidit, & vicit. *Carthago Noua* ab eo capta erat, vbi præter aliam affluentiam rerum, pueri virginesque nobiles reperti: & inter eos vna, quæ ad *Scipionem* deducta, oculos, quaquà ibat, omnium in se splendore formæ vertebat. Donum dabatur iuueni Imperatori, vt putabant, gratissimum: sed ille oculis libatam modò, abnuuit: & *Acciperem*, inquit, *fruererque*, si priuatus, & non cum Imperio essem. Nunc respublica occupatum hunc animum tenet. *Accipio* tamen quasi depositum, reddendum cui ratio & humanitas suadebunt. Simulque virginem percontari de patriâ, parentibus, & sorte cœpit: agnouitque principe loco natam, & principi item suæ gentis adolescenti (cui *Luceio* nomen) desponsam esse. Igitur parentes, & hunc, aduocat: cumque venissent. statuta apud se virgine, sponsum ex ijs priorem alloquitur: *Ego*, vt hæc virgo ad me deducta à militibus nostris, ac donum data est; & formam eius libens vidi, & dotes animi corporisque laudavi. Nec enim cecos, aut ignaros talium, Natura genuit: hæc quoque pectora amor tangere potest, sed non nisi honestus, & quem temporaresque meæ permittunt. Hæc igitur etsi iure belli mea erat: tamen non lubet inter arma hos ludos ludere, nec deceat fortasse prari-



præripere, viro forti iam desponsam. Hoc enim ab eâ didici, & idè te euocaui: vt coràm viderem, coràm tibi hanc traderem (numina testor) castus castam. Sic pudicè cauteque meâ curâ habita est, ac si apud soceros tuos, parentesque suos fuisset. Non esset me teque dignum donum, si aliquid ex eâ vis aut occulta fraus libasset: intactam, inuiolatam accipe, & frui. nec aliam mercedem, quàm te volumus, id est animum tuum Scipioni & Romanis addictum. Attonito iuvene, & præ gaudio vix mentis aut linguæ compote; parentes interuenerunt, gratias agentes habentesque. & ad pedes Scipionis satis grande auri pondus deposuerunt, quod pro redimendâ attulerant: rogaruntque, quoniam gratis redderet, ipse hoc munus ab sese haberet. At ille beneficentiam aliâ cumulans, sponsum tollere hoc aurum totum iussit; & super dotem, quam parentes daturi essent, hanc quoque à se habere. Quid laudes potiùs? libidinem victam, auaritiâ victam? cum laude priuatâ, cum publico fructu? quia vno hoc facto magnam Hispaniæ partem ad Romanos & ad se traxit, certatim cupientes tali virtuti subesse.

Iam in IULIANO quoque Principe, etsi à pietate & religione nostrâ abiit, admiranda hæc continentia fuit. quem fides certa habet, mortuâ Helenâ coniuge, nihil vnquam venereum attigisse: celebrantem sæpe & recolentem Bacchylidis poëtæ illud dictum: *Vt egregius pictor vultum speciosum effingit, sic pudicitia celsius consurgens vitam exornat.* VIII.

Libentiùs & Christianos hîc infero, & laudo. primumque inter eos BALDVINVM, ex Flandriæ Comite Byzanti Imperatorem: qui annos XXXII. natus, in ipso illo ætatis æstu, sic continuit se & adstrinxit, vt toto illo tempore quo ab vxore abfuit, nec impudicis quidem oculis mulierem sit intuius. quod de illo totidem verbis, hostis eius alioqui, Nicetas in historiâ consignauit. additque, etiam in alijs hanc castimoniam exegisse, & bis quaquâ hebdomade, sub vesperam, proclamari iussisse, *Ne quis qui alienam mulierem attigisset, dormisse aut cubuisse in Palatio suo vellet.* IX.

MAXIMILIANVS Primus Austrius, quàm castus à libidine  
b fuisse x.



fuisse censebitur, qui sic verecundus à contactu aut aspectu fuit? Inter alias dotes, corpore & omnibus membris pulcherrimus describitur: sed eorum quæ natura occultari voluit, ita celans, ut nemo vir aut fœmina nudum eum viderit, aut retectum. Subducebat se furtim, cum naturæ purgationes vocaret: ad lectum iturus, nec cubicularium quidem ad exuendum, deponendum, collocandumque se admittebat. adeo ut nulla virgo magis teneri pudoris fuisse videatur. Quid, quod testamento cauit, caligas & feminalia mortuo sibi induci? ut & tunc cura pudoris esset, cum iam non esset.

XI. Sed & CONSALVVM *Magnum*, Hispanâ stirpe, merito celebrauerim. qui tot bellis, cum regnum Neapolitanum suo Regi vindicaret, consensu traditur, nullam matronarum aut virginum temerasse, unò & oblatas aut offerentes se (nec nouum in tali potentiâ) comiter reiecit. Atque adeo cum pater quidam, vir nobilis sed pauper, duas filias scitas & lepidas, ipse ad eum perduxisset, ratus hac se viâ ad opes posse venire: admisit quidem, sed causâ facti cognitâ, ut suas filias, dote datâ nobilibus viris elocauit, à se tam integras, quàm à parente.

XII. Addi fortasse meretur, etsi in vno facto, continentia, quam alij FRANCISCO *Sfortiæ*, alij CAROLO *Ostauo* regi Galliarum adscribunt. Sed huius nomen usurpemus, ut dignius: & potuit tamen hoc simile in utroque euenisse. Igitur *Carolus*, in reditu à regno Neapolitano (quod quæsiuit fortius, quàm tenuit) cum opidum aliquod Italiæ expugnasset; in militum direptione & discursu, virginem perhonestâ formâ ad pedes eius accidisse ferunt, tutelam à vi militum & custodiam pudicitiae suæ rogantem. Atque illum à militibus quidem seruasse; sed ut iuuenem & talium rerum satis liberum, statim oculos & cupidinem ad eam adiecisse, & seductam in lectum abiiecisse, iam imminuendam. Ibi ea toto animo anxia, videt tabulam in pariete suspensam, in quâ Diua virgo puerum, mundi feruatorem, sinu gestabat: & eâ ostensâ, *Per intactam hanc Virginem*, inquit, oro, adiuro, *virgini mihi parce*. Mouit ita regem (non sine Diuæ illius numine) ut libidinem iam exsurgentem coerceret: & lacrimis etiam profusis, solo amplexu prosecutus liberam dimiserit, cum dote quingen-



quingentorum aureorum. Sed & propinquos, aut affines captos, ei donauit.

Hæc exempla in regnis, aut imperijs: quis carpet vnum alterumq; prodi, in fortunâ priuatâ? SPVRINA adolescens in Erruriâ, excellenti pulchritudine, matronarum virginumq; in se oculos, sed & virorum trahebat. Illæ potiri auidè, & in occulto aut palàm, suspirabant: isti æmulatione tangebantur, & in suis quisque fæminis timentes, aut suspectantes. Optimus iuuenum vidit. & vt se aliosque metu vel molestiâ liberaret, faciem illam sic emendatam, plagis scissurisq; totam ipse deformauit. Quid addam? ludibrium postea, non irritamentum vixit. XIII.

Addatur, addatur ille DAMOCLES, adolescens Atticus, tam insigni facie & corpore, vt vulgò ei cognomen *Formosus* esset. Itaque eo ipso proditus *Demetrio* regi, qui tunc Athenis lasciuiebat, postulatur ad stuprum: impelliturque donis, promissis, minis. Nihil horum valuit, & vim aut insidias veritus, abstinere etiam cœpit gymnasijs publicis, & palæstrâ. Quod rex cùm aduertisset, positis obseruatoribus, euēnit vt in balneas priuatas lauandi gratiâ iuisse cognosceret; statimque eò properans nudum deprehendit, quid nisi certam, vt putabat, prædam? Et iam irâ quoque accensa libido irruebat: cùm ille non nisi in morte effugium videns, hanc elêgit, reseratoque aheni operculo, in aquam feruentem se demersit, & extinxit. Triste fatum, etsi forte factum! sed iustius vndique laudandum, quod adiungam. XIII.

PELAGIVS in Hispaniâ fuit. qui in clade à Mauris acceptâ ad *Juncariam*, sub *Ordonio* rege, cùm obses datus esset, siue pro auunculo *Hermogio* Episcopo Tudensi, vt plures certioresque volunt; siue pro patre *Galiciæ* Principe, qui captus *Cordubam* trahebatur: sed pro vtro, tamen obses *Abderamini* regi Mauro datus: ecce formâ eius captus *Barbarus*, florem hunc sibi destinat, & alludere cœpit, contrectare, & tentare. Ille reiicit, atque id sæpius: donec vim etiam parat amator. cui iste, ingenuâ irâ, pugnum impegit: & *Tolle canis*, inquit, XV.  
DCCC.  
XXI.  
vitam,



*vitam, non pudicitiam mihi extorquebis.* Hic quoque in iram seriò iam datus, iussit vt fundæ machinali impositus, trans Bætum fluuium vi emissus, rupibus illideretur. Quod factum: sed Pudicitia ipsa, opinor, alumnum suum tuita est, & cum miraculo viuus euasit. Non mutauit tamen Barbarus, nisi supplicium: & forcipibus membratim discerpi lancinariq̃ iussum, in flumen proiecit. Vnde Christiani nostri extraxerunt, coluerunt: nomenq̃ eius in Diuorum numerum ab Ecclesiâ meritò est relatum.

Satis sit iam talium: videamus & CARITATIS inter coniuges exempla. Nam ea castitati ferè semper comes.

XVI. *Vespasiani* æuo turbæ aut rebellio in Galliâ fuit, & dux partium *Iulius Sabinus*, cui vxor EPONINA. victis Gallis, dux ad supplicium quærebatur: sed is in speluncam auiam se abdidit, & famam mortis suæ sparsit, quasi veneno sponte eam sumpsisset: ac rei fidem, villam, tamquam super se, iussit incendi. Ipsa vxor hæc ignorabat, eratq̃ in multis & inæstis lacrimis: soli duo liberti sciebant. qui miserati mulierem, mori certam, & cibi iam triduum expertem, marito indicant, & suadent amanti subueniri. Factum, & illa resciscit *Sabinum* suum sic viuere: venitq̃ ad eum, fidem & silentium coluit per totos nouem annos, & liberos etiam in speluncâ concepit ac peperit, solâ Caritate obstetricante. Denique res euulgata est, capti sunt, Romam deducti: an non veniâ donati? laudem & præmium merebantur, certè ista. Sed *Vespasianus* (ah meo animo hîc sæuus) iussit interfici. quamquam illa prolatis ostensisq̃ liberis: *En Cæsar*, dixisset, *quos ego in monumento peperit atque alui, vt plures supplices haberes.* Indignor, non vel dicto huic indulgentiam donatam. sed nihil illa: & læta, opinor, cum marito periit, cum quo tot annos iamantè fuerat sepulta.

XVII. Fuit & CABADIS Persarum regis vxor, ignoto nomine, mirâ in eum fide. Is regno suo spoliatus à subditis, quibus duriùs imperasse visus, & in custodiam datus erat. *Blazes* frater in eius locum substitutus, consilium habuit, quid captiuo faciendum?



dum? atque ibi *Chanaranges* (magistratus & præfecturæ præcipuæ nomen) ostenso cultello, *Hic*, inquit, *tam exiguus statim peraget*, quod postea *viginti millia hominum non efficient*. Significans, tolli ex facili nunc posse; viuum, daturum molestias aut clades, vti euênit. Nam cum mitior sententia in virum sanguinis & loci regij obtinuisset, utque in carcere cui *Lethe* nomen, perpetuò adseruaretur: fuit ibi aliquamdiu, vxore idemtidem inuisente, & focillante. Sed fors ita tulit, ut Præfectus carceris conspectam iam sæpius mulierem adamaret: quod illa ad maritum retulit: atque hic eam iussit obsequi, vel salutis suæ causâ. Non volens paruit: sed volentior deinde Præfectus, & mulieri, cum vellet, ad maritum accessus fuit. Itaque operâ tandem *Seosis*, veteris & fidi amici, equi parati in propinquo ad effugium: atque ipsa carcerem, de more, ingressa, viro suam vestem induit, illius accepit: qui egressus sic fefellit. Iam plures dies abierant, & *Cabades* in tuto, & apud *Euthalitas Hunnos*: cum fraus deprehensa, & mulier iussu regio pœnas dedit. Infelix hac parte, nec *Cabadi* suo prosperorum futura socia. qui vxore aliâ ductâ, filiâ regis *Euthalitarum*, grandes à socero copias impetrauit, regnum recuperauit, & *Blazen* in custodiam dedit, oleo feruente super oculos infuso prius excæcatum.

Simile est SANCTIÆ Hispanæ facinus. quæ soror *Therasia* XVIII. reginæ Legionensis, aut eius ex fratre neptis (nam dissentiunt) fidem & affectum erga sponsum, & mox maritum, ostendit. Is erat *Ferdinandus* Castellæ Comes, cui infensa *Therasia* ob patris mortem, vlcisci eam famineâ fraude apparabat. Itaque DCCC. LVIII. nuptias *Sanctiæ* sororis offert, quæ apud *Garciam* fratrem, Vascorum regem, educabatur. Placuit Comiti conditio, it modico & in pacis speciem comitatu, ad sponsam capiendam, & fruendam & deducendam: cum *Garcias*, insidiarum gnarus & particeps, in vincla eum condit. *Sanctia*, audito suâ causâ & amore id euenisse, etsi amoris antea expers, honestè eum concipit: occultè in carcerem venit, nuptias paciscitur, & cum eo in Castellam, elusis custodibus, abit. *Therasia* nec sic mitior aut quiescens, aliam iterum fraudem struit: idque per filium



*Sanctium*, Legionis regem. Qui conuentus regni indicit, quasi de magnis publicis rebus, & eò Comitem, de more, vocat. Hæret nonnihil iste, & dubitat: sed vt solent generosi animi, in fidei partes inclinat. Tamen cùm venisset, immitiore statim vultu & sermone exceptus, in arctam custodiam datur. Quid facis *Sanctia*? in sororem, in nepotem, pro marito quid struis? fraudem iterùm, sed piam. Simulat voti se ream, velle ad Diui Iacobi proficisci: facit iter per Legionem, & satis benignè (quidni à nepote, matertera?) excipitur. Orat inprimis, visendi obiter mariti copiam sibi fieri: atque impetrat, sed in noctem vnam. Ibi complexus, ibi lacrimæ; & domo allatum consilium exsequitur, vt veste permutatâ, vicariam se daret pro marito. Ita ille luce dubiâ emittitur pro *Sanctiâ*, equos ex composito repperit, incendit, euasit. Ipsa *Sanctia*, cùm nepoti indicium fraudis factum, educitur: & quamquam stomacharetur primò, & delusum se doleret, tamen impetu ad rationem reuocato, pietatem & robur fæminæ veris laudibus tollit, & honesto comitatu ad maritum remittit.

XIX.  
M. CC.  
LIII.

Firmus etiam fundatusque ille amor, qui in BLANCA SCARDEONIA, Italicâ matronâ, ad stuporem apparuit. Captum *Bassianum* erat, in agro Patauino municipium, ab *Actiolino* immanis sæuitiæ tyranno: atque ibi dum fortiter repugnat maritus *Blancæ*, interficitur; ipsa etiam in armis virilibus marito iuncta, & simul pugnans, capitur. Adducta igitur ad tyrannum, & armis exuta, formosissima mulier apparuit; & accensus libidine potius, quàm amore, potiri statim voluit. Illa abnegat. precibus, minis, & terroribus immobilis: donec ad vim tyrannus se parat. quod intellegens, astu ad fenestram se subducit, & præcipitem ex eâ iecit. Non tamen vel sic obiit, ad aliud facinus superuixit, quod fuit tale. Cùm enim sanguine fœdata & semianimis, sublata *Actiolini* iussu esset, & in lecto reposita, curataque: post dies aliquot iterùm tentata recusauit, & eundem animum vitæ potius, quàm pudicitiaæ perdendæ, sibi esse testata est. Ab irato igitur constringi ligarique iussa, violata, non contaminata est (quæ enim posset illa castitas?) sed tamen dedecori huic superesse noluit, & fortius quàm



quàm aliqua *Lucretia*, cùm ad mariti sepulchrum isset, alleuato & suffulto lapide, super foetidum cadauer se proieciens, atque id amplexa, *Teneo te*, inquit, *mi anime*: quis tyrannus *Ultrà* auellet? *Maneo*, accipe fidam tuam *Blancam*, corpore & funere nunc iunctam. Dixitque, & fulcrum reuelens, caput sibi contriuit, & spiritum tenuem & exiturientem emisit.

At hæc in fæminis sunt, quarum ad honesta aut praua xx.  
maior sæpe impetus: sed nec viri destituimur huius Caritatis exemplis. Omitto vetera. sub rege *Emanuele* Lusitanix, in M. D. XVI.  
*Africa* bellum gerebatur: & *Ataidius* eius ibi Legatus, cum satis magnâ manu prædatum in agrum Marochiensem iuerat. Inopinantibus superuënit, atque ita *RAHV*M *BENXAMV*-*TIV*M repperit, claro nomine inter Arabum duces: qui castra illïc &, de more, familiam habebat. Igitur ingens à Lusitanis cædes edita, præda item hominum pecorumque parta. Ipse *Rahus* tamen euaserat: & cùm Christiani, onere graues, tardiùs iter facerent, collectis ad LXX. è suis equitibus, à tergo obequitabat minitabundus. Plures interea accedebant: & ipse tum suos cohortans, tum Arabas excitans (qui cum Lusitanis fœderati militabant) vt eos defererent proderentque: *En egregiam occasionem*, inquebat, *Deo, Mahumeti, gentilibus placendi, si istos canes & alienigenas, factò agmine ac nobiscum iuncti, inuaditis, & cinctos vndique trucidatis. Præda erit vestra, gloria æterna erit vestra, patria liberata muneris erit vestri. Agite fratres, agite commilitones, expiate fœderis dedecus honestissimâ transitione*. Claimabat, non mouebantur: imò contrà, quò fidem suam magis nostris approbarent, in primum agmen cum prædâ se conferebant. Iam parabat, vt impar, discedere *Rahus*: sed vxor illius *Hota* nomine, singulari specie mulier, amata vnicè & amans, ex agmine nominatim eum inclamauit. Substitit ille, & vocem agnouit, simulque fæminæ fatum: atque ipsa à ducibus petito breui colloquio & impetrato, *Rahe*, inquit, *Benxamutie*, vbi promissa & fides sunt? Quoties iurasti, captiuitatem meam & discrimen ipsâ morte tuâ depellere? *En trahor captiua, & pateris, perfide dicam an ignaue?* Nec vtrum probum viro indignius sit, scio. Vbi  
autem



autem de robore tuo vaniloqua verba? pudet & fama, quæ sic est mentita. His vocibus, & ipsis amoris furijs, incitatus *Rahus*: Dies, inquit, longa est, victoria in Dei manu, virtus in meo brachio, confide. At illa pulverem manu è terrâ tollens, & in altum proijciens, Sic, inquit, verborum tuorum fidem aura dispellit. Abi ingrate, aliâ frui, quam mihi, ut video, pretulisti. Sed *Rahus* statim, ut in more gentis est, calceum sibi detractum, in illam iecit: quod signum & pignus sanctum erat seruatae seruandæque fidei; & simul ad equites suos conuersus, Si unquam amor vos tetigit, inquit, mei atque huius miseremini, & adiuuate. Per sacra nostra, per gloriam gentis, per vitam hanc meam obsecro, quæ diuturna esse non potest, si hæc aufertur. Insilite, dii audentes & amantes iuuant. Fecitque ipse & alij impetum, quem egregiè sustinebant nostri, donec *Ataidius* in extremo agmine propugnans & sustinens, cum guttur eius casu arma nudassent, hastâ *Rahi* transfixus occubuit. Duce amisso, confusio; & ea maior, quod æmulatio etiam erat & certamen de loco. Alij hunc, alij istum sufficiebant, & id tanto certamine, ut pænè (ô fatalem insaniam!) ad manus inter se, relictis hostibus, venirent. Quod Arabes fœderati conspicati, & simul miseratione nobilis illius Ducis tacti, arma in nostros verterunt, & puncto temporis dissipatâ acie, cæsi plerique omnes aut capti sunt. Recepta ita *Hota*: quam secum ducens victor *Rahus*, omnium oculos, voces & laudes in se vertit, fidem & robur prædicantium, & vtriusque felicem affectum. Nec diu sanè post, mulier pro se fidem quoque testata est: cum marito in prælio quodam mortuo, illa funus eius cum multis lacrimis magnificè curauit: & inediâ deinde nouem dierum se vitâ exuit, & marito iunxit.

xxi. Hæc tragica: mitius exemplum est, quo claudam, nostri *PHILIPPI Boni* cognomento: qui præcipuus auctor fuit magnitudinis huius, quam domus Burgundicæ appellamus. Is igitur annos natus vigintitres, patrem *Joannem* Burgundiæ Ducem, scelere & perfidiâ (res dicenda est) *Caroli Delphini* interfectum amisit. Atque ut erat dolore & irâ recens, ad uxorem venit, quæ ipsa soror *Caroli* erat: & O mea *Michaela*, inquit  
(id



(id mulieri nomen) *frater tuus patrem meum occidit*. Mulier statim in lacrimas & clamores. (nam mirificè viri amans erat.) & discidium non frustrà verita, sine solatio lugebat: nisi quòd ipse eam erexit, multisque verbis affirmavit, *Nihilo sibi viliorē futuram, ob hanc propinquam quidem, sed alienam tamen culpam*. Reciperet animum, & metum poneret, viro eternū fido bonoque futuro. Et fecit. vixit triennium cum eā, omni amore & honore solito prosecutus: etsi ipse aspectus eius, scelus fraternum & triste parricidium sensibus ingerebat. Accedebat, quòd sterilis esset. quæ sola causa diuortij, quoties apud Principes valuit? Sed nihil apud istum: qui amorem & primam copulam, nisi morte, noluit solui.

Verè claudebam, sed SCYTHICA mulier interuenit, & XXII.  
ostendi postulat in hoc theatro. non illa magna, nec in re speciosā aut magnā, sed si ad calculos reuocetur, magni mirandique amoris. Sub *Andronico Palæologo Juniore*, Scythæ incursionem in Græciam Thraciamq; fecere, & latè populati magnam prædam auexere. In eā captiuus quidam Thrax fuit, qui cum alijs ante fores Scythicæ huius trahebatur: viditque & miserrata est, & emit eum, imò & mox nupsit. Sed iuramentum tamen prius exegit, non deferendam se ab eo in vllā fortunā, tempore, aut loco. Mulierem autem hanc iam antè acre desiderium habebat capiendæ nostræ religionis, & vt saluari aquā tingeretur: quod marito indicat, atque ille approbat, & vnā constituunt hoc fine in Christianos fines demigrare. Sed dum se apparant, & opportunitatem quærunt, annus elabitur, & binos intereā liberos marito suo, alterum peperit, alterum in vtero gestabat. Ex quo & creuit amor mutuus, & iam firma nexio videbatur. Ecce autem intereā euēnit, vt iterū Scythæ incursione factā, priorem vxorem huius mariti sui abducerent, & prætereuntem cum captiuis ille agnosceret & videret. Itaque, pro veteri affectu & consuetudine, illacrimauit, & causam vxori suæ Scythicæ dixit. Illa nec indignata marito est, nec odio aut æmulatione (pro muliebri ingenio) in alteram illam tacta: sed statim eam quoque emit, tum ad domestica ministeria, tum vt aspectu ipso dolorem marito leuaret. Et iam



tempus migrandi visum : migrant, Cōstantinopolim veniunt: mulier baptisinate tingitur: altera illa ( ausim ingratam, si non iniquam, dicere? ) statim ad Patriarcham accurrit, clamat per iniuriam maritum sibi ereptum, & à Scythicâ possideri. Illa quoque venit, & auditur, & rem totam exponit, nec quisquam damnare eam sustinuit, vt quæ amborum domina esset, eosque ex seruitute & immanibus illis belluis liberasset. Tamen hæsitantibus illis, ipsa sententiam hanc vltro tulit: *Marito meo, si prior vxor cordi est, habeat: cui etiam ob consuetudinem, & susceptos ex eo liberos, pretium redemptionis condono. In ipsam hanc autem feminam vti eadem liberalitate cupiam, sed cum in terrâ alienâ sim, & aliarum rerum inops, haud possum. Itaque illa, pretio reddito, cum marito abeat: ego cum duobus meis liberis benigni Dei manus expectabo.* Dixerat mulier, & mirati omnes equanimitatem sunt: cui Deus sanè mox adfuit. & cum altera illa in Thraciam iuisset, ad pecuniam corrogandam; ecce iterum à globo Scytharum abripitur, nec vltà visa est, & maritus iam tutò in Scythicæ illius coniugio acquieuit.

## CAP. XVII.

## DE PATIENTIA.

*Ab irâ & vindictâ alienum esse debere, praesertim in conuiciatores.*

**P**Oterat sub Clementiâ hæc virtus contineri; sed educere malui, & seorsim ostendere, quia valdè Principem decet, & sæpe in eâ fortunâ locum habet. Quis non alta illa fer-munculis aut iudicijs petit? Grauiamur imperari; & quamuis benè atque vtiliter aliquis faciat, tamen hoc, illud, carpinus: & semper aliquid est quod non omnibus placet. Inde voces. fed spernat Princeps, & sciat *Nullum esse argumentum magnitudinis certius, quàm nihil posse, quo instigeris, accidere.* Sicut suprema Mundi pars ventis, fulminibus, pluuijs non turbatur: non



non item debent apices isti rerum. Hic aut ille in te iocatus est? conuicio asperit? calumnias disperit? contemne. *Ille magnus* & 11 De Isa, cap. xxx. nobilis est, qui more magnæ feræ, latratus canum securus exaudit. Potentia tua supra læsionem est, gloria ( si benè agis ) supra infamiam. Sed Mecænatis verba & consilium, quod *Augusto* in hac re dedit, digna adscribi: *Siquis conuiciatus tibi fuerit, aut in occulto detraxerit, neque deferentem audire debes, neq; delatum punire.* Turpe enim sit, facile te id credere, cùm causam non præbeas, esse tamen qui conuicio petant. Atque id ferè non nisi mali Principes credunt, quos ad fidem inclinât conscientia. Deinde autem iniquum sit, hæc irasci aut punire. quæ si vera sunt, præstat non admittere, sin falsa, dissimulare. Nam ultione istâ, quid nisi plures sermones & plurimum prouocabis? Sunt saluberrima monita, siue rationes: & vltimam istam nota. Ne moue, quod motum magis exhalet: ne moue, quod mouendo non sedes. Quòd si omnes punitum ibis, quis finis erit? neque aliud agas, & assiduè in ijs occuperis. Contemne igitur, & Senecæ hoc imbebe: *Contumeliarum patientiam, ingens instrumentum esse, ad tutelam regni.* Et, vt ad Exempla veniam,

LACONES appositè in publicis sacris apprecari solent, 1. Vt possent iniuriam pati. Ne properè scilicet exsilirent ad vindicandum, & statum ita suum turbarent. Tum etiam, quia parùm idoneos iudicabant ad res gerendas, qui iniuriâ aut contumeliâ statim abriperentur. Sedatio animi & frigus decet imperantes.

In quâ parte DAVID, rex Hebræus, mirificus. qui pulsus 11. à filio *Absalomo*, & profugus, cum manu tamen fortium virorum, vt ad montem *Baburim* venit, ausus est *Semei* è *Saulis* cognatis, petere virum conuicijs: tantùm? imò & lapidibus, quos ex alto in eum iecit. Indignati comites, & ex ijs *Abisai*: *Itâne hic canis Domino meo & suo malè dicat? idque impunè?* Ibo, mi rex, & recidam ei caput, domicilium proteruæ huius linguae. At mitissimus virorum *Dauid*, *Mitte, vt malè dicat.* En filius, quem genui, sanguis meus, sanguinem istum quærit: & indignamur si conuiciatur alienus? Cælestis quædam hæc patientia: quid mirum in viro cælesti?



III. Magis in tyranno PISISTRATO. cuius vxore petulanter & iniuriè habitâ à quibusdam adolescentibus ebrijs, idque in publico : malum illi timentes, manè ad Pisistratum supplices veniunt deprecaturum. Ille autem : *Quid vos vultis ? mea vxor heri nusquam prodijt. At in posterum date operam, vt sobrij sitis.*

IIII. Quid in ARTAXERXE Persarum Rege, in quâ gente superbia domicilium habere visa ? Apud quem legatus Spartanus *Euclidas* liberè pro ingenio gentis, & pro suo ferociter locutus, hoc responsi rettulit : *Tibi licet, quæ libet, apud me dicere : mihi & dicere, & facere.* Saluâ maiestate modestia inserta fuit : & ad hanc iuit, ab illâ non abiuit.

V. Sed in hac virtute Macedonum aliquot reges eximij. Quid enim PHILIPPVS *Alexandri* pater ? qui plura eius dedit exempla. Vt in *Nicanore*. qui circumiens malè de *Philippo* opinabatur, & detractabat : nec defuit, vt solet, delator *Smicythas*. Amici igitur aduocandum, & plectendum censere : ille contrâ, *Et Nicanor*, inquit, *non est pessimus Macedonum. videndum igitur, numquid per nos admissum aut commissum, cur malè dicat.* Et serio quærens, repperit pauperem virum esse, benè meritum, nec adhuc habitam eius rationem. Itaque statim munere eum affecit : qui & ipse, mutatâ mente & linguâ, laudare vbique *Philippum* & attollere. Quod cum idem *Smicythas* rettulisset : *Videtisne ô amici*, inquit, *in nostrâ manu esse, benè vel secùs audire ?* Factum dictumque pensitandum Regibus, qui cupiunt famam.

VI. Iam iterùm IDEM, de petulanti quodam & procaci conuiatore, cum suaderent exilio plectendum : *Nequaquam*, inquit, *ne oberrans apud plures de nobis malè loquatur.*

VII. Nec verò in absentes solùm lingulacas talis, sed in præsentes, & qui in os insultabant. Vt ille *Demaratus Corinthius*, cum aduenisset ad eum, tunc fortè cum *Olympiade* coniuge & filio *Alexandro* dissidentem : rogareturque à *Philippo*, *Ecquid consentirent iam inter se Græci ?* ille ore libero, *Scilicet tibi conuenit de Græcorum concordia agere, qui dissides ipse à proximis tuis.*



*tuis.* Sensit eum vera dicere Philippus: ad se redijt, & cum suis in gratiam.

IDEM cùm pro tribunali sublimis, sub hastâ captiuos venderet, ac parùm decorè, veste reductiore, federet: quispiam è captiuis clamare cœpit, *Iniuriâ se affici, esse enim paternum se Philippi amicum.* Quod cùm miraretur Philippus, & dicere eum ac docere iuberet: *Apud te solum,* inquit. accedensq; ad tribunal, in aurem insufurrat, *Heus tu, vestem demitte. nam sic parùm honestè sedes.* Rex nihil offensus, gratiam imò rettulit: *Et verè,* inquit, *iste mihi amicus erat, mittite hominem.* simulq; aliter se composuit. En, fructum etiam suum alienam libertatem fecit. & solet ipse dicere: *Gratias se debere Atheniensium oratoribus, quòd conuicijs suis redderent se meliorem: dum illos factis conatur refellere.* VIII.

At inter successores eius ANTIGONVS, æmulus & pænè par fuit in hac laude. Qui in castris aliquândo, cùm duo è vigilibus, iuxta ipsum Prætorium, de rege malè dicerent, atque ipse omnia audiret, nihil vltrâ quàm tentorij velum concussit; & *Heus vos,* inquit, *paullo longiùs secedite, ne Rex vos audiat.* Quid istuc est? ne dissuadet quidem malè loqui, sed cautiùs loqui. IX.

IDEM cùm exercitum in tenebris aliquò duceret, & molestum ac salebris interruptum iter esset, milites ductorem passim execrabantur Antigonum. At ille ad singulos quosque accedens ignotus, & explicans: *Nunc,* inquit, *benè dicite ei, qui vos eripuit.* X.

Iam PYRRHVS qui Macedonia regnum aliquamdiu tenuit, idem hanc virtutem. Iuuenes aliqui Tarentini, cùm in Italiâ ipse esset, inter pocula malè de eo & minaciter locuti, deferuntur: adductique postridie, *An dixissent?* interrogantur. Vnus facetè & liberè: *Diximus, atque adeò te interfecissemus, nisi lagena defecisset.* Vini culpam, non animi ostendit: & Pyrrhus sic accepit, atque ipse arrisit. XI.

Inter germanos Græcos PERICLES, conuicijs petitus in XII.



foro, à proteruulo quodam, nihil reposuit, & placidè res suas egit. Actis, domum iuit, illo prosequente & linguæ tela idem-  
tidem eiaculante. Nihil sensit, nihil dixit *Pericles*: hoc tantum, cum ad ædes iam venisset, & nox esset, ministro suo, *Abi puer, & facem accende, & huic redituro prælucce*. Vah, non patientiam solum, sed benignitatem! qui adiutum iuit in ipso improbitatis freto æstuantem.

XIII. P T O L O M A E V S *Lagi* filius, Ægypti rex, in Grammaticum cauillans, & inscitiam arguens, *Quis esset Pelei pater?* rogauit. Cui ille, *Expeditam, si tu mihi prius dixeris, qui Lagi*. Genus obscurum aut sordidum regi palàm obiecitabat: & id indignati omnes qui aderant, præter regem. Qui ad incitantes: *Nisi ferre diæterium regium est, nec dicere*, inquit. Idem ius volebat ferulæ, quod sceptro, in istis esse.

XIIII. Sed Romani quoque Principes huc ducant, & primus eorum C A E S A R. Ille *C. Caluo* oratori, qui famosis epigrammatis prosciderat, cum de reconciliatione significasset, prior & vltro scripsit, tamquam ipse læsisset. Idem *Catullum* poetam, qui famæ eius perpetua stigmata (& nunc leguntur) versibus inusserat, satisfaciendam eandem die adhibuit canæ. Nihil stipulatus est, aut iniunxit, solâ pænitentia pro pœnâ contentus.

XV. At A V G V S T V S verè & hîc successor, cum in iudicio quodam inter alia crimina reo obijceretur, quod malè loqui de Cæsare soleret: interrupit, & ad accusatorem, *Velim hoc mihi probes, faxo sciat Ælianus* (id rei nomen) *& me linguam habere*. Benè, & benignè. quid aliud significabat, quàm dicta dictis vlturum? Etsi nec fecit, nec vltra quidquam inquisiuit.

XVI. I D E M in *Timagine*, historiarum nobili scriptore, plus semel patientiam ostendit. Multa in ipsum, etiam in uxorem, in filiam & familiam eius dixerat: atque ea vt arguta, & ab homi-



homine docto, excipiebantur vulgò & circumferebantur: Cæsar tamen nihil, nisi monuit eum vt modestiùs ingenio & linguâ vteretur: idque in domo suâ. Nam & (vide ingratitudinem) Cæsar eum alebat. Sed cùm nec sic desineret, tandem domo ei suâ interdixit: & quis accusasset, si vrbe, si toto imperio? At ecce, qui velut in inuidiam Cæsaris excipiat: & is fuit amicus eius *Asinius Pollio*, nec ideò desijt esse. Fouit hominem, & eius exemplo alij: visitur, colitur. & quis? priora omitto, sed qui tunc quoque, tamquam professas inimicitias cum Cæsare gereret, libros Historiarum de rebus eius scriptos combussit. Non hoc erat dicere, *Indignus es de quo scripserim? falsa censeo, quæ predicauerim?* Tulit & hæc Cæsar: tantum Pollioni semel dixit: *Onerosus es, id est, Serpentem nutris*. Et paranti excusationem obstitit, addiditque, *Fruere mi Pollio, fruiere*. Cùm hæc lego & examino, dicam Romam tunc seruisse? Aut si; addam quod publicè in theatro acclamatum, *O Dominum æquum & bonum!*

Nimirum confirmatus in hac patientiâ animus iam erat, & xvii. contra concussionem omnem stabilis. quod etiam Tiberio ostendit, conquerenti super eâ iuueniliter, & exstimulanti. Rescripsit enim in hæc verba: *Ætati tuæ, mi Tiberi, noli in hac re indulgere, & nimium indignari, quemquam esse, qui de me malè loquatur*. SATIS EST ENIM *si hoc habemus, nequis nobis malè facere possit.*

Et hausit ab eo xviii. *TIBERIUS*. qui aduersus talia firmus, subinde iactabat, *In ciuitate liberâ liberæ linguas esse debere*. Idem in Senatu, cognitionem super ijs flagitante: *Non tantum habemus otij P. C. vt implicare nos pluribus negotijs debeamus. Si hanc fenestram aperueritis, nihil aliud agi sinetis: omnium inimicitie, hoc prætextu, ad vos deferentur*. O pulchra, ô aduertenda! etsi ipse non tenuit, & postea se mutauit.

Vnum propioris aui exemplum etiam, & finio. xix. *FRI- DERICVS* Imp. conuicijs petitus, & ab amicis ad vindictam excitatus: *Minimè, inquit. an nescitis Principes, quasi scopum, expositos*



*expositos ad has sagittas? Ita est. alta liuor & calumnia petent: petent, sed non tangent, vbi animus quidem est altus.*

## CAP. XVIII.

## DE MAGNITVDINE ANIMI.

*Famam & immortalitatem Principi propo-  
sita, & expetenda esse.*

**H**Oc enim nunc appello Magnitudinem animi, alta & honesta proponere, & nunc, ac magis olim, in famâ bonâ ac gloriâ esse. Vt sol in aurorâ tenuior, assurgit & inclarescit; sic ex virtute & meritis fama cum æuo ipso augetur & crescit. Hoc velim equidem amare Principem, & vt trahat illum — *fax mentis honestæ Gloria*, vt poëta ait. Quid enim aliud in externis? Τὸ μὲν ἀργύριον, ait Polybius, ἐστὶ κοινόν τι πάντων ἀνθρώπων κτήμα· τὸ δὲ καλόν, καὶ θεὸς ἐπαινοῦ καὶ τιμῆς ἀνθρώπων, θεῶν καὶ τῶν ἔργων τοῦτοῖς πεφυκότων ἀνθρώπων ἐστὶ: *Argentum quidem & pecunia est communis omnium hominum possessio; at honestum, & ex eo laus & gloria, Deorum est, aut eorum qui à Dijs proximi censentur.* Dictum egregium. alia alijs communia, & adipiscenda: at bona & magna fama magnis conuenit, & quos Deus vicem suam fungi voluit in terris. Velleius de *Pompeio Magno*: *Quo viro nemo alia omnia minùs, aut gloriam magis concupiuit.* Egregiè, illuc eundum est, ad honestam ambitionem & nomen: quod non plebeïæ voces, sed seria Annalium testimonia celebrent & posteritati commendent. Ita ad Virtutem (etsi per se appetendam) ducitur: *nec potest quidquam abiectum & humile cogitare, qui scit de se semper loquendum.* Studia hoc donant, & rerum memoria: Princeps foueat, sed cum modo & iudicio, vt nec passim eò vocet, nec argumentum se cuicumque stilo velit. Augustum videat. qui *ingenia sæculi sui* (ait Tranquillus) *omnibus modis fouit: componi tamen aliquid de se, nisi & serio, & à præstantissimis, offendeatur.* Serio, non per ludos & mimos: à præstantissimis, non ab ingenijs passiuis aut plebeijs, sed quæ *Genium*

Mamertinus, Panegy. ad Iulianum.



Genium aliquem æternitatis à se haberent. Hanc laudis cupidinem summi viri prætulerunt: ut

I. **THEMISTOCLES.** qui in adolescentiâ solutus, & aliarum rerum, post *Miltiadæ* de Persis victoriam, honestâ æmulatione percussus, depositis nugis seria agitare cœpit, & totas noctes insomnis agitare. Rogatus causam, reddidit: *Miltiadæ se trophæis è somno excitari.*

II. **IDEM** in theatrum iturus, cum rogaretur, *Cuius vocem libentissimè audiret?* aliò rettulit, & *Eius*, inquit, à quo laudes meæ optimè celebrabuntur. Numquid dissimulavit? professus est gloriæ cupidinem, & eius aliquâ mercede inductum se res gessisse.

III. **IDEM** teriò, in conuentu celebri Græciæ, ludis Olympicis, cum pleriq; spectaculis omissis oculos in illum verterent, eumque mirabundi & fauentes exteris etiam ostenderent: dixit alacer animi & letus, *Illo die se laborū, quos pro Græciâ tulisset, fructum maximum cepisse.* Ad rigidam Sapientiam si examino, non sapientissimè. quid enim adiectum est? vox modò & laudatiuncula: sed virtuti aliqua oblectatio, cum & gratos istos vider, & posteros sperat.

IV. **At ALEXANDER** hîc vel nimius. qui patrem crescere & in-  
V. clarescere, interpretabatur se minui & obscurari. Cumque nunciij idemtidem venirent, huius illiusque victoriæ: inter æquales ingemiscens, *Hem!* inquit, *quid tandem pater nobis vincendum relicturus est?* Mirus vehemensque affectus, qui vel innatam pietatem vicit.

V. **Et quid quereris ô ALEXANDER?** ecce Asiam, & Africam, & reliqua Europæ, tibi palæstram. Sed nimiam ambitionem iure dixerim, cui & orbis fuit angustus. Nam differente *Anaxarcho*, plures esse mundos: suspirasti, & *Me miserum!* qui nec unum subieci, subiecisti.

VI. **An non simile alterius Alexandri,** imò maioris, id est **LI I CAESARIS?** qui in Hispaniæ *Gades* cum venisset, ibiq;  
d imagi-



imaginem *Alexandri* illius vidisset, diu intuitus in vocem & gemitum erupit: *Heu, nihil etiam memorabile à me gestum in atate, quâ iste orbem terræ vicit!* Non gestum, sed gerendum: acquiesce. affatim Deus & fata materiem gloriæ tuæ dabunt.

- VII. IDEM in Alpibus, cùm iter illac faceret, & comites rustica tuguria, & pauperes illos cœtus, riderent: *At qui malim hîc primus esse, inquit, quàm Romæ secundus.* Quid hæc vox, nisi tuba & clasticum belli ciuilis est? nolo secundus esse, vapula libertas.
- VIII. Sed magis honestiusque se affectus hic prodit, cùm posteros, & monumenta ijs futura, cogitat. vt in PERICLE: qui in concionem ab iratis Atheniensibus vocatus, quòd tantam vim pecuniæ in opera & ornatum vrbis contulisset: ille placidè, *An ergo, ô ciues, pœnitet? conditionem fero, meum nomen ijs inscribatur, & priuatim mihi feram expensa.* Reclamatum à totâ concione: hortatiq̃ue vltro sunt, *Cum bonis dijs pergeret, nec impendijs tali fine abstineret.* Ecce in toto populo honestum ambitum, & certamen à nullo, in gloriâ ad posteros, vinci.
- IX. TRAIANVS hoc quoque, *Optimus* suo iure Imperator, quaesivit: & passim noua ac vetera opera cùm faceret, aut reficeret, nomen suum etiam minimis inscripsit. adeò vt quidam subsannantes *Herbam parietariam* eum appellarent.
- X. Sed fidelior in libris scriptisq̃ue memoria: & ALEXANDER iam dictus sciuit. Is *Callisthenem* ab Aristotele acceptum, eloquentiâ & sapientiâ clarum, secum circumduxit, rerum scriptorem, & famæ propagatorem. Sed heu! præproperâ irâ vitam abstulit, à quo æternitatem sperabat.
- XI. IDEM Aristotelem quàm fouit hoc fine, & produxit? felicius. nam ille nomen eius secum perenne fecit, in operibus quæ exstant. Sed nō sine præmio. & in vnâ *Historiam Animalium* scribendam, certum est Alexandrum contulisse *octingentâ talenta*, nostræ pecuniæ *quadringenta & octoginta millia Philippicorum.* Quid dicitis hodierni Principes? corripello excitandos?

IDEM



**I D E M** eiusdem ardoris scintillas iudicio iecit, in vate *Homer*o. Et cum ad tumulum *Achillis* in *Sigæo* constitisset, è pectore vocem emisit: *O fortunate adolescens, qui præconem Homerum repperisti!* Certè, fatemur. tantum enim nescio an ipse se, sed tantus ille fecit. XII.

Ab eodem iudicio **I D E M**, in accursu tabellarij cuiuspiam res, ut videbatur, lætas ferentis: *Et quid, inquit, nuncias? an Homerum reuixisse?* Nec feriunt, aut capiunt, scio, hæc dicta vulgares animos: sed altos mirificè: & quid ille, nisi summum votorum, æstimauit, *Homerum* reuiuiscere, idque in suas (huc ibat) laudes? XIII.

Græciæ etiam colonus **H I E R O** rex *Syracusanus*, animum Græcanicum habuit, id est, ut cum *Venusino* dicam, *laudis auarum*. Nam cum poëta quidam *Archimelus*, epigrammate haud inscito, sed breui (octodecim modò versuum fuit) nauim, quam ingentem fabricarat, celebrasset: ille delectatus, & porro prouocans, in aliâ naui *mille modios tritici* *Athenas*, donum poëtæ misit; idque in ipsum *Pyræi* portum, omni suo sumptu. Si quis instructam nauim, & focios nauales euntes redeuntesque, cogitet: mirabitur regiam planè liberalitatem. XIII.

At nec Latini expertes huius ambitus, etiam sæculo adhuc rudi. En **P. S C I P I O** *Africanus* poëtam *Ennium*, à quo res suas celebratas videbat gaudebatque, & viuum beniuolentiâ omni complexus est, & mortuum stare in effigie iussit in suo & *Corneliorum* monumento. Quid aliud, quàm dictum voluit? Per me in imagine viuat, cuius scriptis ego mortuus etiam viuo? xv.

Nec degenerauit alter **S C I P I O** *Africanus*, qui (verba *Velleij Paterculi*) tam elegans liberalium studiorum, omnisque *Doctrinæ*, & admirator & fautor fuit, ut *Polybium* *Panætium*que, præcellentes ingenio viros, domi militiæque secum habuerit. Maeste Scipio! dignus tu comite *Polybio*, dignus ille te amico & patrono. xvi.

Iam **P O M P E I V S** *Magnus*, apud se habuit *Theophanem Mitylenæum*: xvii.



*lenæum*: quem Græcum & exterum, in concione militum, ciuitate donauit. Quâ causâ & titulo? scriptorem rerum suarum.

XVIII. Sed in vnum benignus *Pompeius*, in totum genus I V L I V S *Cæsar*. qui rerum iam potens, omnes liberalium artium doctores, qui Romæ essent, ciuitate donauit. Quæ hæc liberalitas? inquires, nihil à se dedit. Dedit à publico: nec maior aut optabilior tunc honos extero, quàm ciuem dici.

XIX. AVGVSTVS autem mirificè in hos propensus, quod tot scriptores aut vates dicent, ab eo producti & alleuati. Ambitio autem ab ijs vicissim attolli, vel ex epistolæ eius his verbis ad *Horatium* poetam (quem hodie legimus) satis elucet: *Irasci*, inquit, *tibi me scito, quod non in plerisq; eiusmodi scriptis mecum potissimum loquaris. An vereris, ne apud posteros infame tibi sit, quod videaris familiaris nobis esse?* Atque hoc velut conuicio expressit *Eclogam*, cuius initium:

*Cum tot sustineas, & tanta negotia, solus:*

Sed quod operæ talis pretium? serui, supellex, fundi toti.

XX. Sed & VESPASIANVS, etsi cetera parcus, ingenia artesque fouit vel maximè. & primus è fisco (ait *Suetonius*) *Latinis Græcisque Rhetoribus annua* \* *centena constituit*. Idem *Saleio Basso*, eximio poetæ, vnâ donatione \* *quingenta* donauit: id est, censum tunc equestrem.

\* Bis mille  
& quingē-  
tos Philip-  
picos.  
\* Duode-  
cim millia  
Philippico-  
rum &  
quingētos.

XXI.

ANTONINVS *Pius* diffudit etiam liberalitatem *Vespasiani*, nec Romæ tantum, sed per omnes prouincias, *Rhetoribus & Philosophis*, honores ac salaria detulit.

XXII. Quibus ALEXANDER *Seuerus* addidit, *Grammaticos, Medicos, Mathematicos*.

XXIII. Magna in omnes liberalitas, & sic perpetua: sed illa in vnum stupenda. ANTONINVS *Caracalla*, cetera haud laudabilis, delectatus elegantia carminum *Oppiani*, quæ illi inscripta legimus, in singulos versus singulos aureos iussit rependi: id est, *nostrates duos*. & versus numera, stupebis.

DIOCLE-



DIOCLETIANVM addam? is *Eumenio* Rhetori \* *sexcenta an-* XXIII.  
 nua assignauit, in scholâ Augustodunensi doctori. Credimuf- \* *quinde-*  
 ne? refragantur, & rescribunt: ignosco pro iudicijs & animis, *cim milia*  
 addam etiam, opibus hodiernis. *Philippic.*

Sed conuenio vos, PRINCIPES, voce *Anaxagoræ*, qui senex xxv.  
 & æger decumbebat; nunciatumque *Pericli*, ex eius disciplinâ.  
 Is accurrit, & solatus est, & precatus ne sic defereret: sed ibi op-  
 portunè *Anaxagoras*: *At enim, ô Pericle, quibus opus est lucernâ,*  
*oleum infundunt.*

Infundite bonis meritisque. & cum *LEONE* Græcanico xxvi.  
 Imperatore Eunuchum non audite dicentem, *Hæc in milites de-*  
*bere absumi.* Cui ille reposuit: *Vtinam meis temporibus eueniat,*  
*stipendia militum in doctores artium absumi!* *Vtinam, vtinam!*  
 sed meis non fiet: & inscitæ caligo aut tenebræ (falsus sim!) im-  
 minent Europæ.

F I N I S.



A P P R O B A T I O.

**H**As J. LipsI lucubrationes ut egregiè frugiferas fore confido, ita praelo dignissimas censeo, quòd ea quæ Principibus ac politicis Viris apprimè conveniant, non modò legenda, Verumetiam velut in tabula, non sine voluptate, spectanda, exhibeant.

Guilielmus Fabricius Nouiomagus, Apostolicus ac Archiducalis librorum censor.



# P R I V I L E G I V M C Æ S A R E V M.

**R**VDOLPHVS SECVNDVS diuina fauente clementia electus Romanorum Imperator semper Augustus, ac Germaniæ, Hungariæ, Bohemiæ, Dalmatiæ, Croatia, Sclauoniæ Rex, Archidux Austriæ, Dux Burgundiæ, Stiriæ, Carinthiæ, Carniolæ & Wirtembergæ, &c. Comes Tirolis, &c. Nostro & Sacri Imperij fideli dilecto IVSTO LIPSIO gratiam nostram Cæsaream. Postquam inter alia, quæ DEVS immortalis hominibus liberali manu dedit dona, illustria inprimis illa & quasi diuina sunt, quæ in litteris liberalibusque disciplinis consistunt, quibus scilicet homines non tantum ab animalibus ceteris rationis expertibus, sed à rudi etiam & imperito hominum vulgo ita distinguuntur, ut tanquam Dij quidam splendescere in terris videantur: rem sanè præclaram seque dignam illi præstant, qui diligentem iis ipsis in litteris ac disciplinis operam ponunt, præclarissimam verò & Reipub. vtilissimam, qui eas ita excolunt, ut aliorum menti docendo, scribendo lumina præferant, eosque ex ignorantie tenebris quasi manu educant. Quos excitare, quos amare atque animare ad dignitatis nostræ munus, ad quod Diuino vocati beneficio, concessumque sumus, inprimis pertinere existimamus. Cum itaque ab iis, quorum nobis spectata fides, qui que iudicare de Litteris possint, acceperimus, insignes te animi ingenii que tui dotes tibi à natura insitas à primis temporibus ætatis tuæ ita litterarum ac disciplinarum studiis excoluisse atque exornasse, ut olim iuuenilibus adhuc annis præclara florecentis minimeque vulgaris eruditionis specimina præbueris, dum obscura in antiquis scriptoribus loca, quæ quædam tanquam lustra erant, illustrasti, quæque in iis iniuria temporum deprauata & corrupta fuerunt, restituisisti, dum vetusta Latine antiquitatis rudera in nouam subinde structuram singulari artificio eleganter conuertisti: ad exquisitam adeò & raram doctrinam, quæ magnam de te apud doctos quosque viros opinionem excitavit, peruenisse, eamque variis abs te libris acri & graui cum iudicio scriptis atque in lucem editis ostendisse, ut in eo quod tam feliciter tractes scriptiōis genere paucos tibi pares hodie reperire sit: iam verò matura te ætate virum, viro magis magisque digna, & viris doctis grata ac Reipub. vtilia scribere, quæque à primis illis Romanis olim auctoribus scripta fuerunt, à mendis purgare, & lectissimos quosque ex Musarum hortis, in quibus assidue versaris, flores colligere, concinnare, quibus Lectores mirificè recrees, & eorum pectus ad prudentiam, probitatemque informes: haudquaquam prætermittere volumus, quin Reipub. ad quam hæc abs te ornamenta conferuntur, causa, Cæsareo te nostro elogio decorandum, & quamuis per te satis ipse animatus sis, animandum magis patrociniōque nostro defendendum pro benigna nostra in te suscipere voluntate. Quoniam verò lucubrationibus atque operibus tuis in lucem edendis, peculiarem te eligere velle Typographum, accepimus, Diplomate hoc nostro priuilegioque te & Typographum tuum aduersus quorumcumque fraudem, qui lucri causa, quod fieri solet, eadem excudere aut typis imitari fortè velint, munitos cupimus. Quamobrem pro auctoritate nostra Cæsarea decernimus, statuimus, vetamusque, ne quis Typographorum, Bibliopolarum



aut aliorum, qui librariam negotiationem exercent, eos libros, quos tu editurus es, quocunque modo, charactere, aut forma, siue integros, siue aliquam eorum partem typis imitari, edere, excudere, aut venundare intra sacri Romani Imperij, Regnorumq; ac Dominiorum nostrorum hæreditariorum finestriginta annis proximis à primo editionis die computandis, absque tuo tuorumve hæredum consensu audeat: Hac autem lege addita, vti tria vt minimum cuiusque libri exemplaria, quemadmodum moris est, ad Imperialem nostram Cancellariam mittantur. Si quis verò edictum hoc nostrum transgredi, violare, aut contemnere deprehensus fuerit, eum non solum eiusmodi libris, tibi, hæredibusve tuis, auxilio Magistratus, vbicunq; reperti fuerint, vendicandis, priuari, sed triginta etiam Marcharum auri puri mulcta, cuius semissis quidem Fisci nostri Procuratori, fraudis, vindici; alter verò semissis, tibi hæredibusve tuis pendatur, puniri volumus. Mandantes vniuersis & singulis nostris & sacri Romani Imperij subditis & fidelibus dilectis, tam Ecclesiasticis quàm Politicis, cuiuscunque status, gradus aut ordinis extiterint, præsertim verò iis, qui in Magistratu constituti, vel suo vel superiorum suorum loco aut nomine, ius dicunt, iustitiamve exercent, ne quemquam hoc Priuilegium nostrum impunè violare, spernere aut negligere patiantur: Sed, si quos contumaces compererint, constituta à nobis mulcta, eos puniri & quibuscunque modis coërceri curent, ni & ipsimet grauissimam nostram in se conuerture indignationem velint. Id quod hoc Diplomate, manu nostra subscripto, & Cæsarei nostri sigilli impressione munito, confirmamus. Datum in arce nostra Regia Pragæ, die prima mensis Augusti, Anno Domini Millesimo, Quingentesimo, Nonagesimo secundo: Regnorum nostrorum Romani decimo septimo, Hungarici vigesimo, & Bohemici itidem decimo septimo.

*Subsign.*

R. V. D. O L P H V S.

Iacobus Curtius à Senftenaw.

*Ad mandatum sacre Cæsareæ M<sup>ti</sup> proprium.*

Io. Baruitius.

*Additum sigillum Cæs. M<sup>ti</sup> in cerâ rubrâ.*

S V M-



SVMMA PRIVILEGII REGIS CATHOLICI.

**P**HILIPPVS Dei gratia Hispaniarum, &c. Rex Catholicus, diplomate suo sanxit, nequis, IUSTI LIPSI Historiarum in alma Vniuersitate Louaniensi Professoris, & item Historiographi sui libros quoscumque, à Censoribus legitimis approbatos, præter ipsius, heredumve eius, voluntatem, intra triginta annos à prima singulorum librorum editione computandos imprimat, aut alibi terrarum impressos, in has inferioris Germaniæ ditiones importet, venalesve habeat. Qui secus faxit, præter librorum confiscationem triginta marcharum auri puri illatione mulctabitur. Vti latius patet in litteris, datis Bruxella, XIV. Febr. M. D. XCVII.

Signat.

Verreycken.

SVMMA PRIVILEGII REGIS CHRISTIANISSIMI.

**H**ENRICVS Dei gratia Galliarum & Navarra Rex Christianissimus, singulari priuilegio sanxit, nequis per vniuersos Regnorum suorum fines, IUSTI LIPSI, quos vel hætenus edidit, vel in posterum editurus est libros, excudere intra decennium præter voluntatem ipsius possit. Qui secus faxit, præter librorum confiscationem, ter mille florenorum illatione mulctabitur, vti latius patet in litteris, datis Parisiis, XIII. Iulij, M. DC. V.

Signat.

Perrochel.

**T**ibi IOANNES MORETE, pro amicitia quæ mihi cum Plantino (heu, quondam meo) & Plantinianis est ac fuit, tibi, inquam, permitto, vti hæc MONITA ET EXEMPLA POLITICA typis tuis excudas ac diuulges. Nequis alibi alius præter te, cupio siue iubeo, ex lege quam magnus Cæsar & Reges dixerunt.

Iustus Lipsius.



ANTVERPIÆ,  
EX OFFICINA PLANTINIANA,  
APVD IOANNEM MORETVM.


M. D. C. V I.







+  
Cuiuslibet Anni trium Mensium dies suspecti, quare ab omni negotio  
et opere suspendendum, scilicet Prima Martij, Februarij  
Ultima Martij, et ultima Septembris.





Handwritten text, likely bleed-through from the reverse side of the page. The text is faint and mostly illegible due to fading and the age of the paper.





Hoc scio pro certo, quando cum stercore certo.  
Vineo, vel vinor semper ego maculor

Ridenti dno et calo se crede sereno

Maestas illi donat sed titulo tenus  
ne sacra dno virginitas libaretur.

Ex fauli causa Dni's mutatur et aura.

In ipso Palatio Venerabatur, tanti infus.

quo supparet. In nequitia comports, dicitur  
na deaphitang.

Fauskina, in balneis vulgo se outgabat, cum esset Romani Principis coniux, nec puduit  
ipsam, ubi homines melabantur, deo vasatos adnotare.



Quinta pp. de partman 2. gub 18. Jhd 3. 2.

do polski z wsi Kania p. 1. gub 18. Jhd 3. 2.









